

姚秦三藏法師竺佛念譯

菩
薩
瓔
珞
經

佛陀教育基金會

印贈

一切佛經，及闡揚佛法諸書，無不令人趨吉避凶，改過遷善。明三世之因果，識本具之佛性。出生死之苦海，生極樂之蓮邦。讀者必須生感恩心，作難遭想。淨手潔案，主敬存誠。如面佛天，如臨師保。則無邊利益，自可親得。若肆無忌憚，任意褻瀆。及固執管見，妄生毀謗，則罪過彌天，苦報無盡。奉勸世人，當遠罪求益，離苦得樂也。

菩薩瓔珞經卷第一

一名現
在報經

姚秦沙門竺佛念譯

普稱品第一

聞如是。一時佛在摩竭界普勝講堂。與大比丘眾俱。比丘十千。菩薩萬五千人。一切大聖。靡不雲集。諸德具足。不捨總持。其志宏普。無所不包。辯才通達。除去疑網。遊其神通。解說深義。以權方便。適化隨宜。慈及下劣。得至彼岸。宣暢如來三昧正受。諸佛嗟歎。天人所敬。所願自在。而無罣礙。普遊殊勝奇特之域。神足變化。眾相具足。降伏眾魔。曉了法慧。分別諸法。深知

本際。觀察眾生昔所根源。演暢道品。空無相願。於世
八事而無染著。加以大慈救濟眾生。護身口意。無有
邪見。志崇精進。心若金剛。雖執勤勞於無數劫。心恆
勇猛。無有厭倦。在諸大眾。現師子威。降伏異學。令不
有退。以聖前號而印可之。諸佛遊處。悉皆履行。皆是
正覺之所修行。嚴淨道場。巍巍無量。若行若坐。入無
底慧。心恆悅豫。亦無怯弱。所講演法。平等無二。以成
未成。視如同類。功稱名勳。常得自在。修深法要。訓以
道教。若在大眾。威相光輝。神智妙達。不可稱計。彈指
之頃。遊於無量諸佛國土。供養十方諸正覺等。其名

曰歡曜菩薩。山雷菩薩。慧密菩薩。普明菩薩。濟彼菩薩。總持菩薩。金剛菩薩。石磨王菩薩。雷震菩薩。雨滴菩薩。善算菩薩。智積菩薩。法上菩薩。息意菩薩。除幻菩薩。善稱菩薩。虛空藏菩薩。威力菩薩。燄光菩薩。識機菩薩。盡慧菩薩。無邊際菩薩。堅固志菩薩。月光菩薩。法熾菩薩。無見菩薩。無等菩薩。日盛明菩薩。如是十方諸佛世界眾菩薩等。普來雲集。詣忍世界。欲聽如來說法。瓔珞大智根門。趣菩薩藏。不可思議。權現無量。及賢劫中。彌勒。轉首。十六大聖。颺陀和等。八大神王。帝釋。四天王。與忉利天人。俱燄天。兜術天。不憍。

樂天。化自在天。魔子導師。梵天王。梵淨天王。善梵天王。梵具足天王。大神妙天。淨居天。離垢光天。上至一善住天。燕居天。善神。及諸樹神。山神。金翅鳥神。及餘一切諸天尊神。一一尊復尊。及諸天龍鬼神。阿須倫迦留羅。眞陀羅。摩休勒人。及非人等。各與眷屬來詣佛所。稽首畢而立侍焉。比丘比丘尼。清信士。清信女。各自修敬。前爲佛作禮。各坐一面。爾時世尊。與若干百千之眾。營從圍遶。佛昇嚴淨高廣師子之座。與諸大眾說法。瓔珞佛在眾中。如須彌山。晃若金積。威神光明。超世無雙。道德威儀。巍巍無量。放大光明。靡所

不照。復以神變感動十方。應時空中尋有百千寶瓔珞。蓋眾珍襍廁徧覆其上。無價寶珠照虛空珠。懸處空中。光從珠出。色像無比。於其空中。而興微雲雨。諸香華。時空中華積至於膝。復出大音徧滿世界。時有菩薩名曰普照。承佛聖旨。卽從座起。長跪叉手。前白佛言。今所神感。未曾見聞。此何瑞應。乃至於斯。唯願大聖。敷演其義。使諸會者。永無狐疑。佛告普照。還復汝座。吾當與汝一一分別法瓔珞義。修立根門。超越妄想。近一切智。諸通慧地。爾時世尊。復以神足。觀諸菩薩。所入定意。其法名曰道樹瓔珞。淨諸大士莊嚴。

道場覺道正法而無所畏。遊諸聖慧而得自在。所入道門不失辯才。復以神通瓔珞其座。演暢分別不退轉地。解一法界空無所有。觀察眾生利鈍之性堅固。其心決一切法。除去塵勞隨順法要。所言信用無所染著。應對無疑來往發遣。說無礙智永離縛著。積功累德不懷希望。所說諸法真如審諦。不計有爲當有成辦。想則無想爲興想爲。曉了深妙十二緣起。尋究根源而不可限。是時普照菩薩復從座起。前白佛言。願欲所問。惟敢聽者。乃自宣陳。佛言善哉。在所欲問。若有疑者。便自演暢。如來當爲具發遣之。是時普照

見聽喜踊。尋時問曰。何謂菩薩法瓔珞身。何謂菩薩除其妄見。何謂菩薩超出世法。何謂菩薩遊至世界。何謂菩薩親近如來。何謂菩薩不處母胎。何謂菩薩生輒神識不有錯亂。何謂菩薩而懷篤信。云何菩薩不自爲己。何謂菩薩救眾緣苦。何謂菩薩法施財施。何謂菩薩分別空義。何謂菩薩除其陰蓋。何謂菩薩廣熾法式。何謂菩薩聞法無厭。何謂菩薩遊戲止觀。何謂菩薩奉修禁戒。何謂菩薩誓離世法。何謂菩薩不處家業。何謂菩薩心無所著。何謂菩薩一坐一起。何謂菩薩口密心悲。其所問義旨要如是。佛言普照。

善哉善哉。乃問如來如此之義。汝今當聽善思念之。哉在心懷。無令捨之。在凡夫行。普照對曰。唯然世尊。願樂欲聞聖大之法。是時世尊告普照曰。行菩薩道。當念十德。瓔珞其體。身口意法。無說人短。於諸同學。不興輕慢。心平若空。亦無增減。棄諸惡趣。不加害人。視彼眾生。如己無異。志得由身。所知無盡。復以四諦。教授眾生。持心寂然。令悟使成。復以眾智。瓔珞妙門。訓化二乘。得至所趣。勤大乘學。觀達諸法。修如來行。功勳之德。教導以漸。不行暴逸。自省已過。不譏彼短。踰出眾難。常愛樂法。寂定無亂。蠲除諸疑。妄見之事。

有猶豫者。使得時悟。不捨道心。所造德本。又教他人。使不毀戒。常以大哀爲人說經。所遊世界。不離諸佛。宣示禁戒。逮一切智。復以照曜瓔珞。莊嚴諸佛寶淨道場。光明瓔珞。靡不周徧。悉照三千大千世界。蔽此日月。使無光明。正使神妙釋梵四王。所以威光。悉不復現。如來至真難測之光。獨明獨顯。無有及者。是謂普照修菩薩道。十德瓔珞。而自纏裹。常念諸佛供養如來。嗟歎聖教。勸化眾生。使入道門。復告眾生。發大宏誓。其所趣向。聞佛名號。將養萌類。願生彼國。志宏大。普不懷怯弱。深入聖慧。不恥下問。常樂微妙。所言

柔和而無自大。好喜隱居。除諸貪疾。見有行者。代其歡喜。以功德力。瓔珞道樹。報力心力。及乳哺力。諸聖所居。解脫之力。常以此法。育養眾生。慈悲喜護。不捨眾生。護諸緣者。拔去根本。觀了三世。無去來今。善惡報應。都無所生。法法自滅。法法自生。法不見滅。法不見生。心無想念。無我人壽命。亦無往來。無所歸趣。復以空法。瓔珞諸根。吾昔成佛。皆由清淨空無之想。自致正覺。修行善本。不造諸緣。興起善法。無放逸行。去離世事。不處俗法。所可演說。流布十方。親侍禮拜。諸佛世尊。所施清淨捨貪無欲。心意鮮潔。而無垢穢。慧

無邊際眼視通達。三礙六塵永已消盡。是謂菩薩法之瓔珞。菩薩復當發宏誓心。莊嚴瓔珞智度無極。隨其本器而與授法。如所聞慧便能建立。應如斯行則不退轉。執意堅牢。追從善友。所行言教終不虛妄。念常恭恪不違經業。心習深智受而不失。常專一心念不錯亂。了病深淺後乃投藥。意樂忍辱行步審諦。所施財物亦無適莫。其意清密而無煩憤。學習根本心不流馳。人欲聞法尋常指示令知要道。設見困厄不自濟者。便能惠施自致珍寶。加以善本眾妙之行。勸人持戒。所聞智慧成菩薩道。假使學人處在梵志。復

能建立。覺了所生。不離忍辱。棄捐家業。而修精進。觀
達無常。因緣之本。於諸憎愛。不興二相。所爲平等。令
眾生類。得無所從。生法忍。常能憑其無極大哀。漸訓
勸導宏誓之法。施於一切。使得聞知。志性寂然。知無
吾我。一心禪思。興其智慧。使不斷絕。其所施設。不離
四恩。救濟危厄。使至無爲。護身口過。不犯三事。建立
至真無著之法。意斷意止。真如法性。修而不失。是謂
普照。皆是菩薩瓔珞所建。復次普照。菩薩復當思惟
校計。料度無極。行施修戒。和顏忍辱。精進寂靜。不失
意止。復以聖明一心定意。深察四諦。甘露之道。直至

無爲無復虛僞。是謂智慧之所瓔珞。常當一意純淑。其心一切所有施而不恪。開化功勳解空脫門。若行行業訓導垂誠。廣接眾生隨順度之。而有殊勝仁和之德。曉了時宜若干品類。宣其慈心不著苦樂。悲哀一切不避劇難。悟彼眾生應正法教。施心滿世護使成就。瓔珞光明靡不照曜。普愍一切使濟彼岸。正使有人在隱蔽處。消除其暗。永使無餘。無畏之力愍育一切。除其老病無放逸行。導師所至靡不從教。所含如海聞施他人。開化塵勞令無妄想。所居之處如華無著。了一切法寂寞清淨。其所演教分別因緣。所造

德本習而致之。愍世哀苦。故訓生類。虛空非實。亦非
真有。解知世法如泡如幻。眾生不悟。習而不捨。雖處
居家。能離生難。道眼清淨。亦如蓮華。神德巍巍。不可
稱計。正使世界眾生之類。咸共嗟歎。莫知其源。是時
世尊重告普照。夫坐道行解。無去來。若見去來。則有
想著。分別罪福。亦無起滅。斯皆自然。空無所有。相住
無主。而無本末。亦無願求。而可獲者。能自校計。如此
之法。是謂菩薩趣於聖道。復當分別三世之法。解知
無二。無我。無人。及諸境界。空無所有。若見有來。則是
報應緣起之法。無起無滅。乃應道教。計聲有音。音無

形像。分別文字。斯皆無實。一切明達。靡不通暢。菩薩
瓔珞。真實無虛。亦無罣礙。除去陰蓋。悉無所有。若建
所施。在在所欲。設不有建。斯應施度。心懷謹慎。棄眾
不可。持此心者。乃應戒律。達了諸法。自然無住。亦無
本際。勤修思惟。建立處所。精進禪思。攝身口意。慧明
自曜。去眾穢行。乃應智慧。普照復知。神通所及。得其
報應。以其天眼。便得徹視。皆由修奉。施行禁戒。恆順
正見。無所毀犯。修法瓔珞。致天耳聽。念行勸助。因發
道意。或復成就。識念神通。憶過去世。皆悉自然。爲生
類。故積功累德。每自剋責。不及彼證。懷來神通變化。

無極。捨諸識著思惟禪定。平等無二。斯解因緣報應之果。以慧神通消滅眾垢。因其三昧究暢聖法。而不二人。盡諸有漏。不失道意。使人修德。加慕世俗。布施之德。雖有施恩。不望其報。令無數人喜樂務法。能知一切靡不通暢。能使奉行菩薩之法。皆由精進。不興懈怠。慈愍護彼一切成就。用眾生故。不惜身命。不貪己身珍寶之貨。所生之處。因奉道義。前人所求。亦無疑難。聞慧信施。不有猶豫。所行言教。悉共信用。如來至真。無所罣礙。所行寂靜。亦無放逸。堅固忍辱。而樂閑居。復化眾生。自責不及。禪思脫門。正受不亂。恆遊

神通以自娛樂。復以無極光明之照。適時隨宜。分別一切章句義理。消滅諸患。無所藏匿。恆常一心開導。聖慧示無數人報應之果。眾德具足。以勇猛力不爲所侵。解了三世都無所有。去來今事無有增損。然後乃應智度無極。以能布施自發道意。欲使眾生一切普安。自散諸結。不患己身。若人杖捶。悉以能忍。亦化他人。令行忍辱。具眾德本。加以專心。修諸佛教。勸諸生類。出家學道。自觀。僣露萬物不淨。輒厭惡趣。功勳究竟。所行善業。其心悅豫。智慧深遠。而不懷恨。篤信禁戒。自致善德。復以和心。慚愧不惑。常御神志。不執

麤獷。思惟地獄湯火之苦。歎天受福無極之樂。寂然無憂。無復貪欲。有所惠施。自去三想。心不倚內。不受外塵。修行道法。眾望休息。分別智慧。自悟其心。空無相願。建立脫門。除去顛倒。無所傷害。是謂普照菩薩。瓔珞心無所著。其意平等。空無不徧。不懷妄想。布施以備。調意安詳。爲人說法。不離空義。悲哀一切。行不漏失。觀其眾生所受法式。知其志性。而開化之。在所遊處。導爲一切。遵修聖明。而現道義。無極大哀。開度餘人。亦以善權方便之力。入諸外道異學之中。隨彼法則。順從祠祀。觀其志趣。使得度脫。令諸梵志興福。

無量。或在惡部盜賊之中。將導牽致而顯其行。緣此化度無數眾生。於往古世功德已備。見皆喜悅。莫不恭恪。爲雨甘露。道法之味。除去眾生瞋恨之結。若復前人。以若干惱而來犯之。不以厭患。而爲班示寂然之法。知其所興非真非實。如是普照。菩薩所修心意。瓔珞而遊其中。常樂於此。不見所樂。樂無所樂。以眞法性而娛樂之。明知眾生根本所趣。救濟使度無眾塵勞。危害之患。永使無餘。執御其心。平等如空。分別四大所興起滅。欲化眾生而訓誨之。所說眞正。無有憎愛。除棄一切邪見之心。堅心瓔珞。堅固之幢。若干

法品而與共戰。猶如勇猛大軍之將。降伏外敵。使入法律。若入習俗。施設法教。施便受報。持戒生天。所造之德。皆有報應。以此濟之。令至無爲。夫爲菩薩。自順瓔珞。心初未曾隨惡友語。然後乃全大士之行。意懷清白。終無吾我。持心如山。行無缺漏。智徧一切。猶月初照。若在大眾。無能及者。是謂普照。菩薩瓔珞。周滿一切。覺了虛寂。空無所有。所生之處。恆見光明。所聞輒解。至成佛道。常念願宣。根門之要。自建立業。無所侵害。覩見本性。自然起滅。過世八法。無所罣礙。身口心意。未曾有欺。復以權慧。救濟眾生。窮厄之士。令其

飽足。持心如地。不犯三過。日進其道。不行放逸。逮不退轉。牢固之心。不起法忍。而現在前。十力無畏。覺道正觀。捐棄吾我。及人壽命。分別思惟。有無之法。感動變化。無量佛國。斯由神通。而得自在。菩薩所宣言辭。瓔珞。超越諸見。無復希望。心向正道。亦無顛倒。辯才無礙。而無畱滯。周旋往反。不生想著。蠲除一切諸縛。結使。憍慢自大。永滅無餘。其聲音響。如師子吼。亦如雷震。無不聞聲。永立究竟。乃至滅度。發於無極。瓔珞之雲。演法雷吼。法鼓電光。雨解脫味。宣七覺意。念法清淨。不離三寶。心如明月。亦無點汙。通達往來。不除

正業具足眾相殊勝之法。是謂普照菩薩瓔珞而無窮盡。上中下善中間通利。懷來照曜不失禁戒。過去當來諸恆沙聖。靡不嗟歎斯菩薩德。如是普照賢聖道品妙法之藏。珍寶之門而不可盡。

識定品第二

爾時座上有寶王菩薩。卽從座起長跪叉手。前白佛言。唯然世尊。菩薩所習意識瓔珞。多所開悟。靡不蒙度。如今十方恆沙如來。及去來今諸滅度者。云何修學瓔珞戒品。使至彼岸。令眾生類普聞香熏。爾時世尊告寶王曰。諦聽諦聽。善思念之。吾今爲汝敷演其

義菩薩習行戒品瓔珞功德香熏自瓔珞身寶王對
曰願樂欲聞世尊告曰奉遵道法乃修戒定解脫之
慧勸眾生類篤信於戒願其志性各充所願曉了隨
宜不失本誓兼除一切愚惑之心嚴淨道場具眾品
宜不以麤獷使經其心志常慕及一生補處總持正
法深遠之藏意恆遊戲百千三昧感動變化無以爲
喻一切萬物悉皆無常難得之寶不可恃怙行權方
便而無所住眾生心惑不解正道心著吾我不明無
常菩薩誓心爲分別說了一切空虛而不真雖崇大
道不捨二乘所遊之刹莫不蒙慶轉加精進倍行道

業於諸經法去其妄想。菩薩法要不離十地。以次上位不越其敘。加以智慧消眾塵勞。不及道者自致道門。恆念剋責。意自念言。施爲是誰受者何人。如觀財寶皆無有主。設有毀辱當自制意。後自受報端正殊妙。所遊之處見莫不歡。若見貧匱裸形體者。躬自入海。致如意珠。誘以正法令知反覆。以甘露法消竭眾難。念不馳逸。是故寶王。菩薩道果之所瓔珞。意得自在。復以勇猛大力之教。建立訓導。莫不隨順。若行若坐。不離十念。心在三尊。未曾忽忘。了知地獄苦痛之惱。至心寂靜。去塵勞垢。眾惡不犯。無能迴轉。應於正

理奉修禁法。德光普照。皆蒙潤澤。自計所有無所貪
恪。施佛眾僧不興想著。或以權慧與國王交接。輒能
使王捐棄高位。若有人來求索頭目眼耳鼻口。卽能
惠施。不逆人意。爾時座上一切弟子諸菩薩等。聞此
功勳瓔珞之德。踊躍歡喜。不能自勝。思惟深遠善心
生焉。各自興敬。僉共供養。散眾名華若干珍寶。一時
同聲稱歎其德。我等宿福而遇善利。乃聞殊妙瓔珞
之訓。若當眾生聞斯法教。勸發菩薩識定之要。諸福
功勳不可稱量。安住所演諦而不虛。設有菩薩遭遇
此識定瓔珞者。觀了諸法解無處所。識定瓔珞者。神

心澹然。不復貪食。樂念爲食。所可勸助。興致福業。吾於昔佛。上五莖華。建志宏誓。自致成佛。道果不朽。興隆正法。復以禁戒。消除眾垢。救彼眾苦。如救頭然。令眾厄難。必得濟度。自念往昔。入海求寶。遭摩竭魚。及水形山。吾爲導主。入識定瓔珞。尋有善神。將示好道。快樂安隱。還至本邦。斯由願誓。精進不退。入禪正受。無若干想。諸佛世尊。之所遊堂。勸使眾生。生於梵天。及無想天。皆是識定瓔珞所致。若在人閒。十方國土。隨俗染化。講度世道。復以十善。諸道果證。利益眾生。令達空慧。宣示一切。不違聖教。解知本空。都無所造。

所植德本不自爲己。皆使獲於道法之果。設法傾沒。能爲重任。若遭苦惱。永無憂感。亦無妄想。識著心者。將養身口。使不漏失。以權方便。深入生死。爲說八解。正受之味。建立世俗。慕崇佛道。或演一教。或若干品。趣令引入。在聖賢律。漸漸牽示。而滅度之。能令正法。住若干劫。有餘眾生。令至無餘。寂然泥洹。無生老死。受形之患。不依四大。地水火風。諸在邪見。愚惑之部。示以正見。一道之法。若在閑處。修十二法。勤苦之行。宴坐樹下。而無所倚。思惟禪法。唯空爲務。一心靜定。而無謬錯。菩薩識定。瓔珞之寶。亦不念色。有相無相。

相自虛寂。種好亦爾。分別內外了之爲一。三世空寂。無去來今。以識定心。復觀五陰性諸衰持入。爲從何來。復從何滅。一一分別。知爲巧僞。非有生滅。不興希望。亦復不見。有是有非。不因心意。得發道教。識興則興。識滅則滅。不見想像。亦無我想。亦復不著住立處所。內外六塵。亦復如是。計校耳目。尙無所有。何況當有見聞之事。此則不然。寶王當知。菩薩瓔珞心。識定法。不起不滅。亦無終始。緣起則起。緣滅則滅。起不見起。滅不見滅。內自思惟。增減之意。無苦樂想。所以然者。離吾我念。雖復在欲眾惱之中。心無染著。以遠三

界欲色無色。意如金剛不可沮壞。知本宿命究竟根源。而斷諸結。不以爲難。不見有極。不見無極。是謂菩薩識瓔珞定。隨世訓誨。恭奉尊長。不望其報。於百千劫。勤修精進。具足成就道慧之法。宣諸菩薩平等持忍。諷誦通利。啓受不妄。如來法身五分之性。一一班暢言跡不飾。語常含笑。心無所著。不起斷滅二見之想。若在大眾。亦無適莫。於空無法。亦無想念。內實充滿。外現諮受。亦不生意。我行過量。彼有短乏。離諸利養。無所希望。常自思惟。知身無主。從頭至足。達了本無。修行六度。解無處所。校計諸法。悉是假號。知無形

質。一切諸法不可覩見。分別音響亦無所聞。如是寶王。菩薩大士。修法瓔珞識定法者。見善不喜。聞惡不感。然後乃應精進瓔珞。入百千定。恬然無想。天雷地震。龍電霹靂。山崩水漂。師子鳴吼。心意寂定。永無錯亂。或時菩薩入定正受。乃經一劫及百千劫。形體軟美。不復仰食。斯由定意。禪悅爲食。八解爲漿。或時菩薩復以神足而入三昧。其三昧名號曰普照。見於東方。江河沙刹諸佛國土。禮事供養。不失威儀。如是南方。西方。北方。各江河沙諸佛國土。悉能供養諸佛世尊。演暢思惟。識定瓔珞。如是寶王。菩薩入定所感如

是。且捨十方江河沙刹。一一諸刹滿其中塵。復舉一塵著諸佛刹。斯塵猶盡佛土難量。菩薩三昧皆悉覩見一切眾會。亦聞彼佛演說瓔珞神識定意。了諸法本虛寂無主。從初起學乃至道場。思惟發意瓔珞道樹。悉過諸縛。姪怒癡病。其心堅固不可移轉。正使天魔將眾億姪。欲來毀壞識定意者。終不爲彼之所屈還。不爲邪部而見錯誤。意宏如海。靡不容受。眾德瓔珞悉爲成辦。恆講無常苦空非身。常非有常。豈有身耶。諸計常者則離定遠。墮於生死。不能自濟。菩薩所修唯務於道。其心恬然。永無眾想。不離諸佛所造德。

業意如太山不可移轉。獨步世界而無所畏。以四智
辯苞內諸法。指示眾生知道慧要。內實質直而無諛
諂。所以然者。用本淨故。既無眾垢。諸冥消索。慧光普
照。莫不蒙澤。心大宏廣而無邊涯。沐浴意穢。令使鮮
明。隨世所好。悉能成辦。詣佛樹下。自修法義。於一切
法。不有狐疑。於諸愍智。具足成就。順諸所聞。救濟甚
知。瓔珞定意。拔濟亂者。及諸所習。常得寂定。修行賢
聖。八道之品。立一切人。使見正諦。是謂寶王菩薩識
定。瓔珞之要。若有聞持。在於懷者。未曾遠離諸佛世
尊。得不退轉於無上正真之道。佛說是識定瓔珞時。

於座上有無量億百千天龍鬼神人與非人皆發無上正真道意。復有異方菩薩六十二千人。得不起法忍。復有八千清信士女。遠塵離垢。得法眼淨。五千比丘。漏盡意解。九萬天子離諸貪欲。

莊嚴道樹品第三

爾時世尊告諸賢者。吾昔無數阿僧祇劫。積功累行。修清淨法。坐臥經行。不捨四等。一時一行一念之頃。修乎十法。云何爲十。一者從兜術天降神下生。盡見十方無數佛刹。見諸菩薩。一生補處。皆詣道樹。修淨瓔珞。當舉右足。欲詣道場。慈愍眾生。三千大千刹土。

皆悉震動。菩薩自念。吾昔誓願今日已辦。當壞魔界莊嚴佛土。是謂菩薩摩訶薩大慈瓔珞進趣道場心不退轉。二者盡見三千大千世界菩薩大士心識所念。又入定意三昧不亂。或見菩薩於空成道。或見閑靜樹下之處。或入水火空界三昧。莊嚴道樹不離大悲。是謂菩薩摩訶薩大悲瓔珞進趣道場心不退轉。三者菩薩摩訶薩。普見三千大千世界。進趣道場不捨喜心。吾今成佛必然不疑。以我法本普潤一切。悉與眾生同黃金色。三十二相八十種好。無央數眾前後圍遶。壞魔羅網成己國土。是謂菩薩摩訶薩修喜

瓔珞心不退轉。四者菩薩摩訶薩。欲趣道場詣佛樹下。盡見十方阿僧祇刹土。一生補處菩薩大士。盡修護心莊嚴道樹。令無數眾生同己護心。不捨一切瓔珞定意。是謂菩薩摩訶薩進趣道場護心正受心不退轉。五者菩薩摩訶薩。復見十方無數刹土。一生補處菩薩大士。皆轉法輪不退轉行。法無言說亦無形貌。一相無相空界無形。空猶無空。況有法界。是謂菩薩摩訶薩瓔珞空無無形之法。六者菩薩摩訶薩。普觀十方恆沙刹土。通慧眾生諸根淳淑。意向三乘不捨法忍。慈悲喜護行六重法。四無礙慧一向道忍。自

知受決。亦復見他授其決者。或授羅漢辟支佛決。菩薩自念。吾從無數阿僧祇劫。捨身受身。皆是幻化。非眞實法。今得受決。進趣無上正眞之道。成最正覺。遊空往來。無所罣礙。一時一處。得總持定。諸佛所嗟。苦集盡道。此苦非苦苦。由何生。解苦無苦。乃應明慧。集由愛興。愛本無形。亦不可見。生本無生。況復有滅。眾生愚惑。從起更樂。集是得是。解集無集。乃應明慧。諸法無生。爲磨滅法。盡者無生。亦不有盡。諸法無盡。眾生愚惑。謂盡非盡。於中興想。橫貿諸法。盡者實盡。是謂明慧。道無相貌。非眼境界之所能見。八直平正。坦

然無礙。是謂明慧。是謂菩薩摩訶薩。進趣道樹心不退轉。七者菩薩摩訶薩。盡觀三千大千刹土。眾生根源高下大小。或與如來心識同趣。本行共合。智無增減。大慈大悲。瓔珞其身。布施持戒。忍辱精進。禪定智慧。善權方便。十六妙行。百千總持。其心曠大。不爲褊狹。雖見羅漢辟支佛行。心無染著。不從彼受。是謂菩薩摩訶薩。莊嚴道樹心不退轉。八者菩薩摩訶薩。修行八百總持法門。德行法門。菩薩得此法門者。眾行具滿。莊嚴道樹。復有普忍法門。菩薩得此法門者。普潤一切。雨甘露法。復有無相法門。菩薩得此法門者。

盡入空行不退轉地。復有音響法門。菩薩得此法門者。八等行具不聞異音。復有身行法門。菩薩得此法門者。身行清淨不造眾惡。復有口行法門。菩薩得此法門者。不作四過無他惡行。復有意行法門。菩薩得此法門者。意不馳想寂然滅盡。復有無念法門。菩薩得此法門者。入滅盡定觀了無形。復有究竟法門。菩薩得此法門者。從此岸得至彼岸。復有無著法門。菩薩得此法門者。於生死法不起染著。復有無礙法門。菩薩得此法門者。通達往來不滯生死。復有應聲法門。菩薩得此法門者。隨行進趣不譏彼受。復有神足

法門。菩薩得此法門者。變化自由。禮事諸佛。復有清淨法門。菩薩得此法門者。淨於智慧。無國土想。復有空行法門。菩薩得此法門者。解知諸法。虛偽不真。復有幻化法門。菩薩得此法門者。觀了眾生。權詐合數。不可模像。復有無形法門。菩薩得此法門者。眾生根源不可究盡。復有道種法門。菩薩得此法門者。修三十七道品。不斷復有意止法門。菩薩得此法門者。觀內外身。念念不斷。復有意斷法門。菩薩得此法門者。觀察諸法。無若干想。復有神足法門。菩薩得此法門者。住壽無數。阿僧祇劫。復有諸根法門。菩薩得此法

門者。道慧甚深牢固無礙。復有神力法門。菩薩得此法門者。安處諸法不可沮壞。復有覺意法門。菩薩得此法門者。以覺意華不爲塵垢之所汙染。復有道品法門。菩薩得此法門者。入定無礙。心不錯亂。復有空慧法門。菩薩得此法門者。安處眾生永離欲怒。復有無相法門。菩薩得此法門者。使眾生類懷來道故。復有無願法門。菩薩得此法門者。教化眾生除去願求。是謂菩薩摩訶薩八百總持。略說其要。進趣道場莊嚴佛樹。心如金剛不可沮壞。九者菩薩摩訶薩觀此三千大千世界。一足二足三足四足至無數足。有愛

欲心無愛欲心。有瞋恚心無瞋恚心。有愚癡心無愚癡心。有苦樂心無苦樂心。一時一起一念之頃皆能分別。爲說苦空無我人想。是謂菩薩摩訶薩行無想定。進趣道場莊嚴佛樹。十者菩薩摩訶薩。復觀三千大千世界。當來過去現在之心。諸根寂靜。行應無上正真之道。是謂菩薩摩訶薩進趣道場莊嚴佛樹。佛復告族姓子。菩薩摩訶薩。初舉右足行第一步。於其中間修行十法。進趣道場莊嚴佛樹。云何爲十。一者菩薩摩訶薩。當舉右足踏地之時。自稱名號。三界至尊。過佛恆沙。皆行七步。當來諸佛亦皆當然。吾今現

在出現於世。三界獨尊亦無等侶。諸佛標式不可漏脫。是謂菩薩摩訶薩進趣道場莊嚴佛樹。復次菩薩當舉右足蹈地之時。便作是念。吾今已逮不退轉地。亦使眾生同我所趣。不捨宏誓曠大之心。是謂菩薩摩訶薩莊嚴佛樹進至道場。復次菩薩初舉右足蹈地之時。復作是念。過去諸佛。先行是法。當觀一生補處菩薩。紹吾處者名號是誰。卽自右旋。顧謂彌勒。卿後如我成佛不久。百千天人聞皆欣然。異響同音。稱善無量。快哉世雄。佛種不斷。當於爾時。十一那術諸天人民。見授彌勒印封。皆發無上正真之道。是謂菩

薩摩訶薩莊嚴佛樹進至道場。復次菩薩。初舉右足。蹈地之時。便作自念。吾今已逮眾智自在。神慧無礙。辯才通達。斯等眾生久抱狐疑。沒溺塵垢。不求度脫。吾今當以智慧之火。焚燒心中狐疑之叢。是謂菩薩摩訶薩莊嚴佛樹進趣道場。復次菩薩。初舉右足。蹈地之時。便復念言。吾今已得無爲解脫。當復接度。有爲解脫。過去恆沙諸佛世尊。皆悉同我無爲解脫。當來諸佛亦獲此法。快哉福報。不有斷滅。妄想已盡。無所貪求。是謂菩薩摩訶薩進趣道場莊嚴佛樹。復次菩薩摩訶薩。初舉右足。蹈地之時。復生此心。眾生永

處邪見顛倒。不覩三向空無之慧。我今當演護心清淨。無覺無觀。法性虛寂。知慚知愧。眾行之本。苦空非身無人無壽。當以此心普覆一切。是謂菩薩摩訶薩。進趣道場。莊嚴佛樹。復次菩薩。初舉右足。欲趣浴池。瑠璃水精七寶園觀。鳧鴈鴛鴦異類奇鳥。諸天尊從。不可稱量。我今露形。乃非其宜。設當入城村落人眾。謂爲裸形。不知慚恥。宜求袈裟以障於體。時有天子。名曰福蓋。卽知菩薩心中所念。尋奉八萬四千金縷。織成袈裟。菩薩自念。過去諸佛法服云何。進趣行來。斯用何法。虛空神天叉手白言。過去諸佛皆著織成。

金縷袈裟。亦如今日諸天所獻。菩薩卽受八萬四千
織成金縷袈裟。以道神力。而合爲一袈裟著體。三十
二相八十種好。盡皆外現。斯由曩昔施無想報行度
無極。是謂菩薩摩訶薩進趣道場莊嚴佛樹。復次菩
薩舉右足時。便生此心。眾生若干性行不同。吾今當
以智慧光明。普照三千大千世界。卽放頂相光明。普
照十方諸佛刹土。眾生之類見光明者。悉來雲集。詣
忍世界。奉事如來香華供養。威神所感。使令天地六
反震動。是謂菩薩摩訶薩進趣道場莊嚴佛樹。復次
菩薩當舉足時。心自生念。生分已盡。更不受胎。三界

獨尊無有儔匹。當號爲佛如來至真等正覺。十號具足。十方刹土諸佛世尊。各各於其國土。告四部眾天龍鬼神乾沓和。阿須倫迦。留羅緊陀羅摩休勒人。與非人。今日忍界釋迦文佛。出現於世。眾相具足如星中月。福度眾生。天人蒙祐。有欲興敬供養彼佛。宜知是時。爾時十方諸佛世界神通菩薩。辯才具足得總持門。千七百七十七億那術眾。皆來雲集詣此忍界。興致供養華至於膝。復有八十萬婬天魔波旬。皆詣忍界。興致供養給事菩薩。復有百千億婬神王。各各七首。獻奉香湯浴洗菩薩。斯由曩昔口演甘露。

無厭足法。是謂菩薩摩訶薩進趣道場莊嚴佛樹。復次菩薩內自生念。眾生著有迷惑來久。設聞空無虛寂之法。意懷恐懼。衣毛爲豎。佛法深奧不可思議。漸當以次說道根源。分別眾生根源所由。玄鑒三世生法滅法。除去想著無貪悋心。從無數劫積行以來。所以不得道者。皆由恩愛。吾今當除恩愛刺本。拔濟眾生安處無爲。是謂菩薩摩訶薩進趣道場莊嚴佛樹。如是族姓子。菩薩大士降神出生。墮地舉右足。於其中間思惟十法。莊嚴道樹亦不退轉。復次族姓子。菩薩初生時。墮地行七步。欲趣金机。次舉左足內自思。

惟諸佛世尊。句義無量。道法涓粹。應度無極。無起滅法。行無生滅。不可思議。非是羅漢辟支所及。道當一意。多念非道。道當少欲。多欲非道。道當知足。多求非道。道當正見。邪見非道。是時菩薩復作此念。過去諸佛所行正法。爲何謂耶。復作是念。過去恆沙諸佛世尊。出現於世。以神足力。現身威德。十根本義。不可思議。云何爲十。於是族姓子。菩薩達士。先舉左足。徧滿三千虛空境界。不憍眾生。無覺知者。其有眾生覩足相輪。皆發無上正真道意。斯由曩昔禮敬之報。是謂菩薩摩訶薩。進趣道場。莊嚴佛樹。復次族姓子。爾時

菩薩左足蹈地。心自生念。古昔諸佛說法。云何分別。句身義味。云何過去諸佛世尊。進止行來威儀法則。以一句義演出無量諸佛法藏。從劫至劫。乃至百劫。不能究盡。一句之義。如來祕要不可思議。非是小節所能測度。是謂菩薩摩訶薩進趣道場莊嚴佛樹。佛復告族姓子。菩薩爾時放一毛孔光明。徧照無量諸佛刹土。於光明中。演說六度平等大法。空無相願不起法忍。亦使眾生畢志堅固。皆發無上正真道意。是謂菩薩進趣道場莊嚴佛樹。復次族姓子。菩薩爾時內自思惟。吾今當以三昧正受。普遊虛空諸佛法界。

爾時菩薩卽入無形想定意。徧遊虛空諸佛法界。左右翼從。天世人民莫覺知者。謂爲菩薩進趣金机。是謂菩薩摩訶薩進趣道場莊嚴佛樹。復次族姓子。卽化一形。徧滿三千大千世界。復還如故。眾生之類無覺知者。是謂菩薩進趣道場莊嚴佛樹。復次族姓子。菩薩爾時慧明之光。徧照三千大千刹土。一一光中皆出音聲。今日釋迦文佛如來至眞等正覺。於閻浮利地。當轉法輪度未度者。福利眾生名稱遠布。是謂菩薩進趣道場莊嚴佛樹。復次族姓子。菩薩爾時一念之頃。令十方界諸佛世尊各各舒手扶接菩薩。一

切眾會皆悉見之。是謂菩薩進趣道場莊嚴佛樹。復次族姓子。諸佛法藏深奧難測。吾當以次布現三乘緣覺聲聞菩薩之道。聞法覺悟終不中滯。是謂菩薩摩訶薩進趣道場莊嚴佛樹。復次族姓子。過去三世諸佛世尊。吾今欲成無爲大道。皆當證明令我成道。諸佛稱善皆在前立。汝從阿僧祇劫。苦行無數。布施持戒六度具足。國財妻子無所吝惜。今當成佛廣度眾生。我等扶接上至成佛。不使中住。是謂菩薩摩訶薩進趣道場莊嚴佛樹。復次族姓子。菩薩分別過去現在未來。空無相願。亦是諸佛所應行法。從初發意

乃至成佛。要當修習三向諸道。四等大慈。八無礙道。瓔珞其身。是謂菩薩摩訶薩。進趣道場。莊嚴佛樹。佛復告族姓子。菩薩次舉右足當蹈地時。當具足此神足。十慧不可思議。云何爲十。有神足慧名曰無著。菩薩得此慧者。盡遊諸佛深要法藏。是謂菩薩摩訶薩。進趣道場。莊嚴佛樹。復有神慧名曰無形。菩薩得此神慧者。入無厭足定意。諮受十方諸佛言教。復有無二神慧。菩薩得此神慧者。勸進眾生成無上等正覺。不取聲聞辟支佛道。復有虛空神慧。菩薩得此神慧者。盡觀世界空無我人。復有無相神慧。菩薩得此神

慧者。演暢諸法解。一相無相。亦無生滅著斷之法。復有。空觀神慧。菩薩得此神慧者。見諸佛土成者敗者。如掌觀珠。復有棄壽神慧。菩薩得此神慧者。觀壽緣報捨形受形。復有無言說神慧。菩薩得此神慧者。說法無法想。亦無若干念。復有無近遠神慧。菩薩得此神慧者。不見諸法窠窟遠近。復有無生滅神慧。菩薩得此神慧者。分別十二因緣根本。生者滅者悉無所有。是謂菩薩摩訶薩十神足。慧進趣道場莊嚴佛樹。佛復告族姓子。菩薩初生舉右足時。復當具足十業。無量究竟。云何爲十。於是族姓子。諸佛如來之所修。

行。如來降形出世教化。分別三世十二牽連。三界五道塵垢縛著。沐浴諸結。永無塵暄。是謂菩薩修第一業。進趣道場莊嚴佛樹。復次族姓子。如來出世化諸眾生。安處三乘。隨其所願。或有眾生意趣羅漢。不向佛門。或有眾生習緣覺行。不趣佛道。或有眾生修無上道。不向聲聞緣覺辟支。或有眾生退於佛道。志慕小乘。爾時菩薩誘進前人。逮成無上正真之道。或有眾生在凡夫地。不求方便。上及三乘。菩薩勸進成三乘道。是謂菩薩第二之業。進趣道場莊嚴佛樹。如來出世布現言教。以權方便。適化眾生。荷負重擔。爲人

重任。或與眾生現作父母兄弟朋友。或現國師尊長。道士。或現大富長者。神力鬼王。周給貧困。惠施七寶。聞說道教。成三乘果。是謂菩薩修習三業。進趣道場。莊嚴佛樹。如來出世。轉無上法輪。不失四辯。觀察人心。授十善行。分別演暢。苦集盡道。或生迷惑。沒溺三界。行權拔濟。永離生死。是謂菩薩修第四業。進趣道場。莊嚴佛樹。如來世尊。出現於世。恆以大悲。加被眾生。如母愛子。心不捨離。譬如龍王。伊羅鉢多羅。住於須彌金福山邊。七寶宮殿。與諸龍女。共相娛樂。若欲往至。忉利天宮。興致供養。化身七萬。由延三十二頭。

一一頭者邊有七牙。一一牙上有寶浴池。一一池中
生七百蓮華。一一蓮華七百玉女。共相娛樂作倡妓
樂。彈琴鼓瑟音聲不絕。復雨七寶。乃至於膝。菩薩大
士亦復如是。以四等心加被眾生。雨七覺意無窮法
財。隨其志趣皆成道果。是謂菩薩修第五業。進趣道
場。莊嚴佛樹。如來世尊以權方便。隨時適化。可行知
行。可坐知坐。可言知言。可默知默。徧入眾生心識所
念。隨病療救。不使增減。普令永處無爲之岸。是謂菩
薩修第六業。進趣道場。莊嚴佛樹。復次族姓子。如來
出世。化導眾生。不自爲身。爲一切人。故經百千劫。代

彼受苦不懷厭倦。安處佛慧成無上道。是謂菩薩修第七業進趣道場莊嚴佛樹。諸佛興出不壞法界。法性自爾亦非自爾。如爾真際亦不有壞非不有壞。修而不懼亦不恐懼。是謂菩薩修習八業進趣道場莊嚴佛樹如來出世。當復具足一相無相。彈指之頃於過去未來現在法中。出生三世諸佛世尊實而不異亦不變易。是謂菩薩修第九業進趣道場莊嚴佛樹。如來出世慈愍眾生。以一日之數令三世爲一劫。其中眾生無覺知者。是謂菩薩初生墮地初舉右足修行十業進趣道場莊嚴佛樹。佛復告族姓子。菩薩初

生墮地行七步。於其中間復當思惟十法。降伏外道。壞魔羅網。諸天侍衛。進趣道場。莊嚴佛樹。乃至滅度。終不捨離。云何爲十。於是族姓子。先當降魔。身被慈仁之鎧。手執慧劍。善權前導。頭戴無畏華鬘。摧卻憍慢之眾。永除貢高。是謂族姓子。先當修此第一難得之法。復次族姓子。復當思惟玄妙廣義。斷漏取證。攝彼外道而爲上首。加以神足神力無量。設彼現一我當現二。趣使邪部安處正見。是謂族姓子。菩薩當念修此第二難得之法。復次族姓子。菩薩大士化度眾生。受法歡喜。必至堅固不趣餘道。是謂菩薩修行第

三難得之法。復次族姓子。諸佛世尊恆所行法。日夜四時觀察眾生。彈指之頃。周徧十方恆沙刹土。周而復始。不著三界。是謂菩薩修行第四難得之法。復次族姓子。行無礙智。徧滿三千大千世界。雖度眾生不見有度。是謂菩薩修習第五難得之法。復次族姓子。菩薩大士以神足力。徧遊十方恆沙刹土。徧觀眾生心識所念。或以一身化百千身。還合爲一無覺知者。是謂菩薩修行第六難得之法。復次族姓子。菩薩思惟四無礙慧。亦非羅漢辟支所修。亦非天龍鬼神八部之眾所能及逮。是謂菩薩修行第七難得之法。復

次族姓子。如來神力不可思議。十方無量諸佛刹土。入一塵孔。周旋往來。無有罣礙。還復如故。無覺知者。是謂菩薩修行第八難得之法。復次族姓子。如來至真等正覺。得四辯才。無生滅智。徧滿三千大千世界。是謂菩薩修行第九難得之法。復次族姓子。諸佛世尊。行無盡法門。覆蓋眾生。十力無畏。十八不共。諸佛之法。是謂菩薩修行第十難得之法。進趣道場莊嚴佛樹。

菩薩瓔珞經卷第一

菩薩瓔珞經卷第二

姚秦沙門竺佛念譯

龍王浴太子品第四

佛復告族姓子。菩薩於時前昇金机。顏色安庠。顏貌容豫。諸天在上散華燒香。作天妓樂。娛樂菩薩。世人在下。左右侍衛。異口同音。聲震天地。八十億姪。乾沓和子。椎鍾磬歌。娛樂菩薩。時有龍王名摩那斯。龍王。文麟龍王。伊羅鉢龍王。阿耨達龍王等。八十四億。皆來雲集。時諸龍王。便以此偈而讚頌曰。

今日離世垢 降生閻浮利 隨俗處母胎

願浴除世塵 昔於無數劫 積功造眾業

誓願今已果 願聽沐聖體 八十四萬姪

龍從十方來 各欲供養尊 奉執貢香湯

尊本無數劫 苦行爲眾生 巍巍德無邊

垂愍願聽之 渴仰世雄久 疲厭生死苦

今得覩賢明 如日照虛空 尊本發宏誓

欲度未度者 最勝已解脫 當復脫未解

過去恆沙佛 及當來現在 功勳不可量

尊今已具足 設從劫至劫 宣暢人中尊

豈以螢火光 敢與佛日競 虛空可究竟

須彌可稱量 海水可竭盡 尊德無邊涯
北方日月光 摩尼明月珠 雖照外暗冥
未能除無明 今日無等倫 一毛之光明
普照天世間 除垢姪怒癡 過去六如來
盡生閻浮提 盡受我等供 香湯浴尊形
今復遭天師 億劫乃出現 今各項禮足
惟願時沐浴 諸天世人民 咸欲聽正法
敷演深法本 當禮三界尊
爾時世尊直視東方顏色和悅與諸龍王而說斯偈
吾今已降形 踔步閻浮利 拔濟苦惱類

四等無邊涯	金體有明證	眾相如日光
當覺未覺者	今成佛不久	觀生無數世
受形非一類	雖有上中下	未有如是像
快哉牢固誓	執意不虧損	所現應果報
本淨如虛空	世有三堅法	身命財寶貨
此猶非究竟	終始可恃怙	吾今捨此三
如虛空無形	無盡無生命	自然成道根
世寶多險危	如幻不久停	今獲七寶財
無盡不可窮	眾生心意識	三垢所覆蓋
今已獲三明	初中竟通達	普爲世人

當轉不死法 法輪震大千 仁慈心普潤
受生有四縛 不離三世患 今得四誠諦
無縛不復染 慧觀苦聖諦 無智悟其智
淨性如無垢 受證永擔怕 本習興更樂
染著愛無盡 彼塵我心受 纏結遂滋甚
吾今觀本淨 樂想苦想滅 愴然無憂喜
永與生死別 過去有三行 生癡愛本源
已盡亦不處 無有塵垢心 現在六十四
牽致冥室叢 永捨不與俱 獲六十四明
未來無數塵 覆蔽於人心 法雲布三界

潤澤諸不及	淨教口柔輒	言聲如哀鸞
斯由行無欺	說法無缺漏	眾生懷陰蓋
調戲無慚愧	今始得慚愧	壞滅貢高心
佛所出現世	降伏諸邪眾	昇座師子吼
演說本行緣	過去諸佛記	及未來現在
五濁衰微世	有佛名能仁	今我自觀察
志性殊於常	名號既不虛	父稱爲悉達
故在於眾中	平視無所畏	得淨總持慧
爲度不肖人	不見諸法本	起滅無處所
亦復無成敗	寂然應慧觀	普分別諸法

悉無窠窟處 憺然無歸跡 斯乃應律行
不以見無見 無求無所守 我人寂寔空
無相願亦然 夫欲飲無厭 甘露微妙味
亡相除諸著 斯應菩薩慧 無人無壽命
成就諸佛藏 摧碎貢高心 不興自大意
上智不著數 不計有常想 眾生興染汙
照令知淨慧 賢聖若干品 眾生根不同
以慧觀未來 盡無若干道 佛法有深要
其慧無邊涯 唯空無所著 是謂法界淨
一生經百生 乃至無數劫 我今永已捨

首而前取證	設我於中間	計壽著法性
恆沙諸佛過	不履空無慧	恆自降伏心
分別文字法	是故自覺悟	建立大宏誓
昔吾初發意	志求緣覺乘	閑靜無人處
四十四億劫	無佛法聖眾	其間七十劫
後遇大通慧	演暢大乘跡	初聞未曾有
聖慧無量覺	慈悲護四等	爾乃微信解
自從是已來	興建功德業	供養無數佛
復經十九劫	後爲大國王	飛輪皇帝王
七寶前導從	千子才藝具	供養清淨人

勤修梵行者 九十七億姪 無著解脫心
及施國貧窮 孤遺無所歸 庫藏出珍寶
周濟令無乏 復於無數世 躬自修淨行
捨位授太子 出家衣法服 忍辱性仁和
燕居寂無念 漸漸心疲倦 猶人溺於淵
善根漸漸微 如果熟自落 往來生死苦
受報無數變 意局無大誓 趣欲免身患
意業被想風 猶豫不究竟 如是在生死
輪轉不能出 復經六十劫 值遇寶瓔佛
權心濟度人 一乘無二道 不聞小節名

空慧盡漏人 敷演道一相 甚深純淑行

始從彼發意 宏誓心難沮 從彼至今日

七億阿僧祇 將護順正法 今乃自覺悟

佛復告族姓子。爾時菩薩與諸眾生。天龍鬼神八部之眾。及諸十方神通菩薩。歎說此偈。受深妙義。卽於座上。八十四婢人。皆發無上正真道意。復有無數眾生。逮得法忍。佛復告族姓子。若有眾生。聞此一偈。諷誦讀說。爲人解說。分別其義。不爲眾魔邪部之所得。便。何以故。斯等眾生。皆由過去。眾行具足。曾更供養無央數佛。誓願純淑。各各發願。若我後生。要從一生。

補處菩薩聞說正法。卽於彼佛亘然大悟。逮得無生無起滅法。云何族姓子。若有一人便說斯言。吾乃以無形之法。以形教授。虛空之相。以實教授。此人興建斯意。寧能不乎。時有無畏大護菩薩。過此三千大千世界。有佛土名曰賢豪。佛名普賢。無畏大護菩薩。從彼刹來。逮得總持。立不退轉。卽從座起。偏露右肩。長跪叉手。前白佛言。世尊。無形之法。以形教授。虛空無相。以相教授。甚難甚難。終不可逮。所以者何。虛空無形。無能染汙。況當欲使有形質乎。此事不然。佛告無畏大護菩薩。族姓子。斯猶可獲。欲從一生補處菩薩。

聞此偈者終不可得。何以故。諸法無數。豈當以無數
中行有數法乎。無緣對法有緣對乎。虛空之法有形
質乎。此事不然。但爲如來世尊大慈廣普。開化眾生
令立牢固。敷演道教。分別諸法。無言無說。世多愚惑。
興是非心。斯是漏法。是非漏法。是緣對法。非緣對法。
是可護持。是非護持。是法有我。是法無我。是世俗法。
是泥洹法。是法染著。是非染著。是法有數。是法無數。
是法斷滅。是非斷滅。是法滓濁。是非滓濁。復自相戒。
各說是言。習是捨是。學是置是。學法非學法。此聲聞
辟支佛法。非聲聞辟支佛法。是菩薩法。非菩薩法。不

以此觀成最正覺。何以故。有想著觀非第一空觀。無求無想亦無知見。乃成空觀。夫觀諸法無我無壽。不見刹土。分別境界無依無所依。是爲法觀。空無所有。如是觀者。諸法亦寂。道果亦寂。受證亦寂。假使菩薩空觀如是。於諸希望便無顛倒。祐利眾生而發大哀。興其佛法。雖度眾生無眾生想。空觀菩薩豈見度者。此事不然。若有菩薩摩訶薩。得此空觀者。便獲具足十無我法。云何爲十。於是無畏。菩薩摩訶薩。若族姓子。族姓女。於佛法眾不見淨穢。亦復不起彼此之念。此是法身。此思欲身。前知過去。後察未來。斯皆清淨。

而無我想。是謂菩薩空觀無我。復次無畏。菩薩摩訶
薩。法服齊整。執持應器。觀見當來過去現在。諸佛世
尊。入城教化。不見豪貴及下劣者。於中不起吾我二
見。是謂菩薩空觀無我。復次無畏。菩薩摩訶薩。立見
無數佛刹。嚴淨國土。坦然平正。不說今日佛土穢惡。
執意清淨。無若干想。念念一定。識不流馳。是謂菩薩
空觀無我。復次無畏。菩薩摩訶薩。眾生染著。倚身解
空。菩薩空慧。三世無倚。是謂菩薩空觀無我。復次無
畏。菩薩摩訶薩。諸佛世尊。教化若干。本無清淨。亦不
有異。是謂菩薩空觀無我。佛告無畏。菩薩摩訶薩。若

族姓子女行度無極無盡法藏。眾寶華鬘以自嚴飾。如是無盡亦不見盡。於中成就盡不盡者。是謂菩薩空觀無我。復次無畏菩薩摩訶薩。當觀諸佛色像無量。入於本際寂然之法。分別義趣解色本無。普入法界化導眾生。不見色像化眾生者。是謂菩薩空觀無我。復次無畏菩薩摩訶薩。得佛聖慧深奧之藏。四事無畏。離八縛著得八解脫。雨法潤澤亦無老死。爲師子吼志如金剛。離彼此中亦無染著。是謂菩薩空觀無我。復次無畏菩薩摩訶薩。漸當親近習宿命通。觀察無數阿僧祇劫。某國某佛諸佛世尊。雖現泥洹不

取滅度。淨眾生跡。不壞懈怠。不以劫數厭患眾生。亦復不以泥洹快樂。欲取滅度。心如虛空。不可點汙。是謂菩薩空觀無我。復次無畏菩薩摩訶薩。以無邊涯智拔濟眾生。正使極遠在恆沙表。一一沙者。盡爲恆沙。如是計算。周而復始。如是徧滿八方上下。亦遊虛空。無量境界。要濟眾生。不令墮落。不自稱歎通慧果報。是謂菩薩摩訶薩。十無我法。一生補處。胎分盡者。乃應是行。爾時座上。色欲天子。十九婬眾。卽得頂忍。復有無數諸天世人。逮得空觀盡信之行。諸閱叉龍鬼。信向三尊。受三自歸。佛復告族姓子。爾時菩薩在

金杙上。國王居士天龍鬼神十方菩薩。各各興敬欲浴菩薩。時有菩薩名曰月精。於眾菩薩最爲上首。攝持威儀法服安詳。卽從座起長跪叉手。以偈讚曰。

尊今無礙形 不染三界塵 洗以八解湯

世水安可堪 心垢盡清淨 內外無障礙

江海河泉源 斯浴非久淨 昔在瑠璃池

禪頭龍宮時 專意發大乘 要滅愛欲魔

今已果本願 三界無等倫 願昇無畏座

何爲現洗浴 生天六十二 那術劫數中

天妓五樂至 福響自然報 法身智具足

演說無礙道 周訖託生此 迦維羅衛城

現世有三災 滅以三明報 三慧通三達

三要今具足 三等觀三世 不染三界有

三分法身具 當禮三界尊 諸來會眾生

諸天須倫鬼 咸各懷踊躍 敬承興供養

前後衛清妙 行至瑠璃園 右攀蓮華枝

降神生閻浮 當生墮地時 淨如紫磨金

天地六反動 神感諸天至 地獄諸拷掠

一時皆休息 清淨無瑕穢 如華不著水

十方諸佛刹 如來等正覺 各各於其國

宣告四部眾 今日忍世界 世雄降出現
垂愍諸眾生 永在三塗者 當轉正法輪
鹿野清淨園 爲久饑虛者 潤以甘露法
入道尊獨悟 究盡十二緣 無盡江海寶
充飽一切人 設從劫至劫 佛佛歎其德
猶尙不能宣 況我螢火光 昔在無畏刹
不眴佛土中 初觀無言法 未得無生慧
誓生言教中 敷演無窮法 今日期已至
願轉尊法輪

是時菩薩心意憺然默然熟視亦無言說內自思惟

如我今日爲人說法。講論清淨不退轉地。不懷吾我之性。諸法自然。生者亦爾。隨人根源而爲說法。法性自爾。無有變易。何況眾生有受法者。眾生本淨。不見染汙。建立智慧。發宏誓心。尋究眾生皆悉清淨。本淨自然。無我自然。無形自然。人物自然。云何本淨自然。從久遠已來。流轉生死。發意求道。乃至泥洹。本自清淨。斯乃名曰本淨自然。云何無我自然。本有今無。今有本無。亦不言我。我本生有。亦復不言有。從我生。我不自知。無我有。不自知無有。斯乃名曰無我自然。云何無形自然。無形者。識也。神也。壽也。此三句義常存。

不變。在空爲空。在形爲形。在有爲有。在想爲想。在無想爲無想。無形之識空性自然。斯乃名曰無形自然。云何人物自然。尋究人物不見窠窟。意識幻化不達本源。愚惑相承言父言母。國財妻子漸生眾想。染著三有。我今已捨永不與處。以此自然明達空慧。空慧自然。諸法亦爾。諸法自然。逮正覺者亦復自然。一切諸法但假名號。因號有名亦復自然。論說自然便爲論說。無起滅法。斯則名曰人物自然。吾今若說空寂之法。眾生不信。倍生疑網。設我復說形質之法。不盡根源。況當滅度。宜且寂靜。聖賢默然。是時有天子名

寶瓔。通達聖心。同佛性行。六通清徹。曉了一相。永離
八法。不處塵勞。堪轉法輪。頒宣佛教。四諦聖慧。霍然
除垢。具足五分。如來法身。逮六無礙。神通道果。形神
俱遊。無所觸礙。得七覺意。而自瓔珞。八道具足。諸法
不共。得四無畏。力如金剛。不可沮壞。以知菩薩賢聖
默然。不與眾生敷演法教。時天子寶瓔。卽從座起。偏
露右肩。叉手前白佛言。世尊。我今不以佛眼法眼慧
眼天眼觀眾生類。應賢聖法律。我今乃以肉眼。觀見
十方恆沙刹土。應受證者。修禪定者。或在一住。至十
住者。復見善男子。臨欲成佛。得不退轉。一生補處。往

詣道場莊嚴佛樹者。此等之類。應從一生補處菩薩
聞平等法。諸法無二。志願於道。皆悉成就。是時寶瓔
天子。慇懃勸請。乃至三四。復以此偈。而讚頌曰。

金顏尊無比 面像百葉華 墮地自稱號

聲踰梵天音 建立智慧淵 說法不有無

眾生有常想 寂然不起二 光曜照十方

暗冥悉見明 人中尊難有 今故重自歸

苦行無數世 慈悲難有雙 功勳已具足

今我重自歸 正使歎尊足 躡跟膝胫腰

皮毛七處平 平立左右停 手臂指纖細

掌文合縵理 無畏廣長舌 千葉蓮華文

含齒方四十 色如白雪珂 當其說法時

脣像珠火明 八聲非男女 亦非雌雄音

感動十方界 聽聞無厭足 耳方雙部瑠

如空明月珠 眼視白黑分 上下而俱眴

頭髮色紺青 肉髻毛右旋 相好無邊涯

熟視如金山 眾德瓔珞身 亦如眾華敷

消滅眾塵埃 獨步三界尊 斯等眾生類

普從十方集 欲聽尊正法 無上至道要

天人龍鬼神 渴仰思聞法 願愍一切故

速爲轉法輪

爾時十方世界大梵天王。八十四億識乾天王最爲第一。卽從座起偏露右臂。長跪叉手在於佛前。以此偈歎佛而作頌曰。

無著捨眾穢

漏盡無欲汗

行一應尊教

遊意空無慧

本在兜術天

說法如駛流

云何今寂然

不開慧明華

尊光照幽冥

蠲除三世暗

十力無點汗

唯願時演法

今日十方界

諸尊菩薩集

咸欲悉聽聞

未曾所轉法

意淨行無漏

亦如星中月

已過無相願 唯願時說法 眾生今沒溺

流轉生死海 願以平等船 救彼沒溺者

奇光甚巍巍 覆蔽日月精 抑遏熱惱患

清淨無眾瑕 尊本造誓願 勇猛無虧損

慈悲平等意 說法無增減 戒具以禪寂

神足力無畏 空想無畏法 正受遊疆界

本行六度法 不懷憂感心 卑意禮恭敬

供養師尊長 故使尊肉髻 無敢熟視者

何況欲施心 觀覩如來頂 十方哀出世

降步度羣萌 眾人咸渴仰 唯垂轉法輪

爾時識乾梵天王。以此偈讚已。起遶三帟。還復本座。是時釋提桓因。卽從座起。偏露右臂。整衣服。長跪叉手。三自稱號。我是天帝釋。名曰拘翼。在菩薩前而歎頌曰。

不語應寂然 不教行自具 不習應無際

自然應無爲 本行無相施 今獲空無果

當禮虛空神 寂然無言跡 在世先覺悟

安隱危厄人 導示正見路 盲冥受正行

眾生迷惑久 欲聞甘露法 願開無盡藏

潤及天世人 行慈修德本 善權無增減

演布無爲教	充足一切人	生世尊難遇
正法亦難值	欲遭賢聖會	亦復不可得
過去諸如來	於此成正覺	願尊時屈神
貪此世榮爲	尊本樂閑靜	思惟無爲道
已果本誓願	何爲處憤鬧	閻浮五鼎沸
劇於湯火熾	唯願速出家	離世貪欲縛
念我過去世	諸佛成等覺	卽詣樹王下
朝坐暮成道	尊今如有疑	方欲樂生死
恩愛如朽城	此樂何可貪	世有生死患
唯道永寂然	恩愛如過電	幻化不真正

世間盡暗冥，五蔽使覆蓋。唯願開慧明，
普照今得眼。變化形無數，應適前眾生。
隨其本行願，各充禪力行。如今何爲靜，
不轉上法輪。唯願時敷演，使饑渴飽滿。
憶本所造福，蓋亦微少耳。由致天王位，
所領無疆畔。供奉諸過去，如來等正覺。
四佛一補處，是尊悲將來。無數億那術，
沈翳生死久。願執宏誓興，運濟至彼岸。
今唯勸請說，甘露無厭法。八解無所著，
無汗無染塵。尊本或入定，不度應度國。

願先化此類。執心不動者。虛空性無染。

平等亘然壹。無趣不見得。唯願無有疑。

深妙無極藏。非劣所守掌。今遇天世師。

願開使布現。尊本發願度。同日不易時。

如今何爲默。自濟不度餘。

是時釋提桓因說此偈讚佛已。遶佛三匝還復本座。爾時魔王名曰怒害。將諸魔眾卽從座起。頭面禮足。前白佛言。世尊。久抱狐疑。不獲眞道。今欲聞說無比法輪。唯見垂愍。演暢正教。我等久處不入法律。雖各有心慕及空慧。猶未遭遇大化訓典。爾時魔王卽於

佛前。以偈頌曰。

於億百千劫	無著時乃出	如華離塵水
心淨超於彼	劫數無有窮	經歷積苦行
不捨四宏誓	金剛不可沮	口演八無礙
充滿天世閒	受者永充足	無復老死患
一生至百生	名號諸種姓	悉知諸根源
化以無比慧	十住逮本際	退成猶復進
最勝度此難	時演勿有疑	去佛恆沙數
盡由此苑園	轉無上法輪	度人無有量
正使當來世	諸佛成道果	皆當於此處

當轉尊法輪 曾聞如來藏 如來祕要慧

名曰普嚴土 菩薩瓔珞經 今日正是時

難遇不可值 拔濟諸苦厄 從是布道慧

或有眾生類 厭患處身苦 欲聞微妙法

蠲除四大法 復有入道檢 知生滅無常

欲聞空無道 悉知無所有 復有處巖穴

自守無他想 計身非久器 不興想著念

雖復念道根 未聞不得悟 唯願尊降神

念彼無疑滯 眼如青蓮華 徹覩無有礙

觀察三世苦 塵瞋染汙者 尊本所經歷

供奉諸世尊 謙卑下下人 今獲無形髻
於相不著相 不假眾好色 是故眾賢聖
無能見其頂 眉閒清淨光 普照無數土
見光除熱惱 如夏遇重蔭 尊一師子吼
降伏諸異道 摧碎邪見林 如明永除暗
說言言不妄 志趣必成辦 說法法真諦
至道道根源 憶尊昔在此 十二小中劫
展轉共相繼 不斷轉輪種 追師求高明
採取若干慧 莊嚴體無極 無形不可名
無信立以信 根力不虧損 無畏離彼此

唯願時演說	三界尊無極	正法御一切
非法壞成道	永除吾我想	諸人貪著身
翫習不能離	世苦所纏絡	何由有出期
慧明照世閒	拔斷貪愛心	自度復濟彼
人中甚難有	惠施無吾我	已超三界表
一時一意念	平等無男女	眾生懷倒見
不達空無慧	發意著五欲	計有身實用
以是墮五趣	不覩非常證	佛現出世閒
滅彼有無想	入禪不著貪	永除世榮飾
觀此無常形	非有非無者	大慈濟眾生

曠大無邊涯 宿願今已果 速起復坐爲
觀此熾然人 流轉不自覺 如何尊靜然
無言無所說 世垢有五難 不覩佛法眾
體信中國生 父母爲五事 光相色無色
不見形質像 將入滅盡定 乃寂無音響
大眾遠方集 迦畱乾沓和 聽尊演無厭
廣長舌無爲 有法不思議 化不自覺化
欲令知本末 此亦未曾有 菩薩不退轉
且未獲其法 況復向道門 而欲知本要
尊今觀四輩 志趣若干種 幸爲敷演法

各令蒙得度	眾生染三有	欲求去離縛
常想非常想	悉照向滅盡	魔眾有億千
皆從十方來	得信不起忍	行地不退轉
復有億千眾	意趣隨我等	斯等族姓子
必至堅固地	復有無數人	行地不著有
悉求空無相	進趣向道場	羅漢意自鄙
隨類入其俗	所說苦不淺	終無一切智
亦是菩薩印	印彼成道果	稟受大乘行
本無無若干	尊本初發心	修習四意止
行地無高下	唯道從慧通	正使無央數

恆沙諸劫數 苦行不邪念 如今悉果願
將來諸恆沙 方欲成佛者 不捨彼此願
必至如今覺 如來大慈愍 捨命不爲己
施等無高下 故成六度慧 去來今現在
生滅本無窮 生者生自生 莫知本根源
十行離人身 五行爲法主 思惟滅本源
慈愍演大法 或復於異時 經行坐臥念
斯由得總持 四辯無疆界 菩薩愍一切
不計有常想 念世處非常 安隱永至安
神力四無畏 覺道八等行 如來十八法

尊今已具足 眾生自生念 無獲不可獲
遂自墮深淵 不向解脫門

是時怒害魔王。說此偈已。遶佛三匝。還復本位。爾時
忉利諸天。將諸天眾。往至佛所。頭面禮足。在一面立。
斯須之頃。前白佛言。我等於世尊。宿有福業。遭值聖
顏。降神閻浮剎內。敷演法輪。王三千世界。復以華香
拘物頭芬陀利華。須乾提華。散如來上。爾時諸天。復
以此偈。而讚頌曰。

世雄今降步 王此閻浮庭 既生八不閑
眾生所居處 求離不染著 內不生思想

無息寂然滅 願具演說法 尊德不思議
功勳不可記 眾相瓔珞身 如月在星明
行盡不造本 端坐於道場 亦自無心識
豈當染世著 已過眾行本 德充滅諸情
音響過於梵 自歸天中天 本造由四魔
魔欲離生死 八等不染汙 自歸無等倫
尊今趣一法 泥洹不起滅 滅意意不生
不見果報證 尊本修二行 止滅不起觀
行盡不見盡 世雄最第一 如來三法本
空無相無願 進趣泥洹道 無利無所染

立願甚堅固 行積無所違 不念無著行

亦不處三有 神足有四業 隨緣住其壽

行過無邊涯 慈仁最第一 既生處五濁

合會無是非 真人無染汗 行權入眾生

平等行五根 信慧精進力 不染去倒見

清淨爲第一 尊德過天世 永不著八法

定意不錯亂 是故禮最勝 當尊下降神

震動三千世 覺久寐眾生 離此三世患

爾時忉利諸天說此偈讚佛已。遶佛三匝還復本座。

爾時菩薩內自思惟。今此眾會皆悉普集十方世界。

六通聖智。一生補處。四等具足。皆悉雲集。欲得聞法。不退轉地。今我寧可執無畏法。眾行德本。瓔珞其身。如諸過佛所行法則。卽於座上。入自然無性三昧。分別定意。觀佛所行。菩薩瓔珞有八萬品。其德殊特。無以爲喻。菩薩摩訶薩得此瓔珞法門者。便能一意進趣道場。未入道跡。眾生成令得至彼岸。爾時世尊出廣長舌相。光明普照三千大千世界。告四部眾。比丘比丘尼。優婆塞。優婆夷。天龍鬼神。諦聽諦聽。善思念之。吾當與汝演說菩薩無相瓔珞。若善男子善女人。得此瓔珞莊嚴身者。便能進趣無所罣礙。

菩薩瓔珞經卷第二

音釋

踔敕教切 憺憺徒覽切 怕怕恬靜切 白白各切 滓壯士切 洵

音音 躄躄時亮切 跟跟音根 足足 縵謨官切 璫都郎切 克克 駛駛音

疾疾 憤憤古對切 鬧鬧女教切 喧喧亂也

菩薩瓔珞經卷第三

姚秦沙門竺佛念譯

法門品第五

爾時世尊。告族姓子。族姓女。吾今當說菩薩瓔珞八萬法門。云何八萬。於是族姓子。或有瓔珞名曰盡信。如來得此法門者。令地獄眾生受苦惱者。使無眾患。復有等慈瓔珞。菩薩得此瓔珞者。令彼受畜生形者。永無傷害。復有無妄瓔珞。菩薩得此瓔珞者。使餓鬼之類。永無饑渴之想。復有清淨瓔珞。菩薩得此瓔珞者。令迷惑眾生。知其道徑。復有徹聽瓔珞。菩薩得此

瓔珞者。使無聞眾生悉聞正教。復有自悟瓔珞。菩薩
得此瓔珞者。使愚癡眾生心不邪亂。復有檢意瓔珞。
菩薩得此瓔珞者。教誨眾生行十善行。復有直信瓔
珞。菩薩得此瓔珞者。使邪見眾生安處正見。復有宏
誓瓔珞。菩薩得此瓔珞者。不以劫數爲遠。復有超越
瓔珞。菩薩得此瓔珞者。使懈怠眾生奉持正律。復有
無恚瓔珞。菩薩得此瓔珞者。令恚害眾生修行忍辱。
復有勇猛瓔珞。菩薩得此瓔珞者。使慢惰眾生精進
不廢。復有一意瓔珞。菩薩得此瓔珞者。使亂意眾生
禪定不虧。復有熾然瓔珞。菩薩得此瓔珞者。使愚癡

眾生成就智慧。復有牢固瓔珞。菩薩得此瓔珞者。未履道跡者。令立道跡。復有多聞瓔珞。菩薩得此瓔珞者。使少智眾生。彊記不忘。復有威儀瓔珞。菩薩得此瓔珞者。使無慚愧眾生。令知慚愧。復有惡露瓔珞。菩薩得此瓔珞者。使著欲眾生。令知不淨。復有快樂瓔珞。菩薩得此瓔珞者。使瞋恚眾生。永斷無餘。復有普曜瓔珞。菩薩得此瓔珞者。悉逮慧明。永除暗冥。復有徧普瓔珞。菩薩得此瓔珞者。使等分眾生。不起狐疑。復有形色變化瓔珞。菩薩得此瓔珞者。覩見無量形色之變。皆發無上正真道意。是謂族姓子。斯等瓔珞。

至八萬法門。菩薩不可窮盡。吾今畧說不悉其事。若有眾生從劫至劫。至百千劫。欲盡菩薩瓔珞行者。此則不然。時有菩薩名曰無形。立不退轉。卽從座起。偏露右肩。長跪叉手。前白佛言。甚奇甚特。未曾所聞。如來變化不可窮盡。乃能演說瓔珞妙法。諸有菩薩摩訶薩。執持諷誦瓔珞名者。皆是諸佛之所擁護。若有善男子善女人。遭遇如來說法。瓔珞便爲值遇。如來法藏。爾時世尊重告四部之眾。若有善男子善女人。一心一意受持諷誦。便得十無礙功德。云何爲十。得虛空藏威儀深入。所聞強記不失辯才。觀了諸念如

幻如化。遊心解脫。亦不計常。恆離八法。不處憤鬧。聞
輒歡悅。心無二見。解空無相。亦不著相。復能深入寂
滅定意。神足無礙。得捷疾智。知法自生。不見起滅。是
謂善男子善女人。便能具足十無礙功德。爾時舍利
弗。卽從座起。偏露右臂。叉手前白佛言。唯然世尊。諸
法無形。不可覩見。無形之法。非是羅漢辟支所及。云
何世尊。言善男子善女人。執持諷誦十無礙功德。便
成道果。入泥洹門。無礙泥洹。豈異法乎。泥洹無爲。無
礙無著。如來現在逮等正覺。云何以無礙功德。而說
泥洹。若使眾生得十無礙功德。便爲已得泥洹。若使

眾生已得泥洹者。則爲泥洹。非泥洹也。云何世尊。言得十無礙功德。便是泥洹。佛告舍利弗。如汝所問。皆佛威神。非汝境界。云何舍利弗。泥洹色耶。對曰非耶。云何舍利弗。泥洹無色耶。對曰非耶。云何舍利弗。泥洹非色。非非色耶。對曰非也。云何舍利弗。無礙諸法。是常非常。有起有滅耶。對曰非也。世尊。佛告舍利弗。若使無礙諸法。乃至泥洹。非色非無色。亦非色亦非無色。亦無生滅著斷。無形不可見。云何復言泥洹名乎。舍利弗。白佛言。世尊。泥洹無名。非眼識境界所能見也。佛言。如

是如是。舍利弗。如汝所言。非眼識境界所能見也。云何舍利弗。識有形乎。對曰。隨其形相。佛告舍利弗。如汝所言。隨其形相。則有識。云何復言非眼識境界耶。舍利弗。白佛言。隨有形相。是有爲識。隨無形相。是無爲識。無礙泥洹。非有爲相。非有爲識。非無爲相。非無爲識。云何舍利弗。無礙泥洹。非有爲相。非有爲識。非無爲相。非無爲識。有爲有識。無爲無識。泥洹非此。非彼。更異識乎。舍利弗。白佛言。非也。世尊。佛告舍利弗。泥洹非此。非彼。亦非異識。相則非相。云何泥洹。別立名耶。假使泥洹。別立名號。隨其形相。則有識生。若使

泥洹不別立名號。隨無爲相便有無爲識。云何說言泥洹不有爲相不有爲識。不無爲相不無爲識。亦不異識。復非別立名號。如今云何稱泥洹乎。舍利弗白。佛言。世尊。泥洹泥洹。佛言。云何泥洹泥洹。舍利弗言。如泥洹盡。佛言。云何如泥洹盡。舍利弗言。如盡無盡。佛言。善哉善哉。舍利弗。如汝所言。本說無礙泥洹。非有爲相非有爲識。非無爲相非無爲識。亦非異識。相則無相不別立名。云何復言無礙泥洹如盡無盡。時舍利弗白。佛言。世尊。非我境界說無礙泥洹。但無礙泥洹。非盡非無盡。佛告舍利弗。吾今與汝引喻。智者

以譬喻自解。猶如士夫仰射虛空。於空求空。復向人說。吾昔遊空。自陷乎淵。今得空。便射而報讎。何其快哉。果我所願。云何舍利弗。斯人志趣爲審然不乎。舍利弗白佛言。世尊。彼射虛空。欲報其怨。審然不虛。云何舍利弗。於空射空。箭著空耶。對曰。不著。佛言。云何於空報怨。舍利弗言。虛空無相。不見有報。無報。佛言。如是如是。如汝所言。虛空無報。佛告舍利弗。無礙泥洹亦復如是。在有爲相。隨有爲識。在無爲相。隨無爲識。不在此相。不在彼相。亦非有識。亦非非識。是謂無礙泥洹。非有識。非無識也。時有五百比丘。聞此虛空。

無盡之法。卽從座起。收攝衣鉢。涉道而去。何以故。斯等比丘。於空求空。欲報空怨。計心染著。謂空有空。正使將來。恆沙諸佛。立前說法。斯等比丘。於空染空。終不解脫。爾時座上。凡夫立信。學無學人。未能盡苦。至無爲界。時舍利弗承佛威神。告四部眾。云何諸賢。汝等審解此染法乎。對曰。唯然。賢者。舍利弗。永斷塵勞。所作已辦。舍利弗言。云何盡塵勞耶。對曰。眾智不襍。非造非不造。故盡塵勞。舍利弗言。善哉善哉。族姓子。塵勞之儔。是眾生本。於眾生中。成無上道。於如來福田。淨一切智。舍利弗言。淨亦無淨。云何於福田淨一。

切智對曰。未得道果。於一切智未淨其跡。又問舍利弗。菩薩淨一切智。凡有幾品。舍利弗言。菩薩淨一切智。不爲世法所拘。又問。云何不爲世法所拘。舍利弗言。諸法無著。不懷倒見。又問。菩薩瓔珞云何成就。荅曰。不失佛道。至竟成就。不失菩薩瓔珞。是謂族姓子。斯由本行不失善願。又問。云何舍利弗。菩薩摩訶薩云何憑善知識。成就菩薩眾行瓔珞。荅曰。於一切眾生。不惜身命。是謂菩薩摩訶薩善知識。又問。用何等智。成就眾行瓔珞。荅曰。不斷佛種。更不造新。又問。云何於諸如來。承事供養莊嚴佛土。荅曰。不以劫數爲

期。是謂莊嚴佛土。又問。云何於如來所。賢聖默然不起眾想。荅曰。寧失身命。不缺於戒。又問。云何分別八百根門。荅曰。持心連續。不失守意。出入息念。又問。云何具足六堅之法。荅曰。不實之身。不實之命。易實身命。又問。云何具足無盡藏。荅曰。已得菩薩無礙瓔珞。便能具足七財無盡。又問。云何於世少欲知足。荅曰。於諸眾智。不相違背。是謂少欲。又問。云何遊心閑居不染三有。荅曰。不願求於三界。又問。云何用智覺三世患。荅曰。盡苦無本。不生塵勞。又問。云何於三痛法無有想念。荅曰。不見苦樂無苦無樂。又問。云何菩薩

受無所受。荅曰。分別五陰色痛想行識。又問。云何菩薩深入法本。荅曰。捨外六入內不造六塵。又問。云何以度度也。荅曰。分別諸道不染道果。云何菩薩捨慳惠施不起想著。荅曰。於一切眾生心無三礙。又問。云何菩薩守戒不缺。荅曰。從初發意乃至成佛。不捨道心柔順法忍。又問。云何修忍不起恚怒。荅曰。伏心攝意計空無形。又問。云何菩薩用心精進不起懈怠。荅曰。分別思惟如救火然。又問。云何菩薩禪意不虧。遊至十方心意不錯。荅曰。慈等無二不失智慧。又問。云何慧眼普照無礙。荅曰。一切諸法不見形相。又問。云

何菩薩入慈等定。攝取眾生不見有度。荅曰。觀了眾生心意識本。云何菩薩愍念悲泣。諸不度者。荅曰。不起法想。見有高下。又問。云何菩薩喜心不絕。入無量定。荅曰。行本自然。不見生滅。又問。云何菩薩行三三昧。至泥洹門。荅曰。不捨如來八道徑路。爾時舍利弗以無數方便。與諸會者。說微妙法。無礙瓔珞。時一千二百比丘。信心堅固。立不退轉。復有無數天人。皆發無上正真道意。時有菩薩名無頂相。卽從座起。前白佛言。甚奇甚特。未曾所聞。如賢者舍利弗。說智慧界。非有非無。不見愛憎喜怒諸法之相。如我觀見十方。

世界諸佛世尊。敷演道教。或說有教。漸至無爲。或說無教。亦至無爲。或說身苦。令知厭患。或除識相。知離本際。云何菩薩。普入諸法。一一分別。不起增減。今聞如來身相之法。有爲自爾。行不改易。無爲無形。不可測度。今欲聞如來瓔珞之本。唯願解說。有爲色身。有幾瓔珞。而自嚴飾。無爲色身。有幾瓔珞。而自嚴飾。有爲無色身。有幾瓔珞。而自嚴飾。無爲無色身。有幾瓔珞。而自嚴飾。爾時世尊。告無頂相菩薩曰。善哉善哉。族姓子。乃能於如來前。爲師子吼。今當爲汝。一一分別。諦聽諦聽。善思念之。菩薩摩訶薩。從初發意。乃至

成佛恆當具足檢身口意莊嚴六度了色本無不見色本於色莊嚴六瓔珞法逮得如來深藏瓔珞云何爲六於是善男子善女人若眼見色知彼起色眾生有姪怒癡應進便進應退便退眼非彼色色非卽眼念除彼色不起眼想是謂一法清淨瓔珞復次族姓子色性自然識亦自然彼色我識不興塵勞速解彼縛不染我有是謂二法清淨瓔珞復次族姓子諸善根本於色無形分別思惟根本清淨色亦清淨是謂三法清淨瓔珞復次族姓子著色染欲非色有欲色性本無況復姪欲是謂四法清淨瓔珞復次族姓子

計色有常非眼境界。意識分別便起猶豫。計常無常。乃至無我。色性虛寂。永無起滅。是謂五法清淨瓔珞。復次族姓子。色是外人。眼識生受。有色有爲。有色無爲。有爲色識。便敗道根。無爲色識。果報成就。思惟分別。有無相者。是謂六法清淨瓔珞。復次族姓子。自攝色識。復有六事。云何爲六。於是族姓子。識想無形。流馳萬端。前有外塵。便生塵勞。善則善識。惡則惡識。惡識無善。善識無惡。菩薩攝意不起。善惡識者。是謂一法清淨瓔珞。復次族姓子。眼識觀空。悉無所有。便生色想。無善惡報。不見今生。後復受報。於中攝意不起。

顛倒想者。是謂二法清淨瓔珞。復次族姓子。識別無我。或時有見根門不淨。而計有淨。或復有念根門有淨。而計不淨。於中攝意不起二想者。是謂三法清淨瓔珞。復次族姓子。識見彼恚有善不善。善謂常善。不善亦爾。於中攝意具足忍辱者。是謂四法清淨瓔珞。復次族姓子。識知眾生有趣善者不趣善者。有堅住行地不堅住行地。於中攝意心不退轉者。是謂五法清淨瓔珞。復次族姓子。識觀前色有道有俗。見道不知是道。見俗不知是俗。於中攝意善分別道俗者。是謂六法清淨瓔珞。耳識起想。復有六事。云何爲六。於

是族姓子。若耳聞聲十八變動。或聞風聲樹木山崩。或時鳥獸音樂之聲。聲有善惡可記不可記。於中攝意耳識不錯者。是謂一法清淨瓔珞。復次族姓子。有時眾生。便得世俗通徹之聽。或百由旬二百由旬。復至無數諸佛國土。猶如雄猛世尊。進趣道場。欲成等正覺。爾時天地六反震動。分別音響。悉歸虛空。於中攝意不起想著者。是謂二法清淨瓔珞。復次族姓子。耳識聞聲本無所有。便生眾想起若干念。於中攝意無邪念者。是謂三法清淨瓔珞。復次族姓子。耳通清淨。知彼受形有清有濁。見濁不起塵勞。見清不生道。

心於中攝意不起彼我者。是謂四法清淨瓔珞。復次族姓子。或時耳識聞他方異刹演說。五分法身現處母胎。不染塵欲。復現出家心。不改變。在樹王下成等正覺。於中攝意分別道俗者。是謂五法清淨瓔珞。復次族姓子。耳識聽察十方國土諸佛世尊轉虛空法輪。彈指之頃。拔濟無量眾生之類。不自稱說吾有所度。於中攝意不計化眾生者。是謂六法清淨瓔珞。佛復告無頂相菩薩曰。依彼耳識。當修行六法。云何爲六。於是族姓子。行權方便。記本所造。修習瓔珞。不越次敘。是謂一法清淨瓔珞。復次族姓子。倚行無我不

計身本。是謂二法清淨瓔珞。復次族姓子。具足六法不毀戒性。是謂三法清淨瓔珞。復次族姓子。耳識玄鑒通達無礙。不捨宏誓大慈之心。是謂四法清淨瓔珞。復次族姓子。耳識了知進趣行步。斯法善道。斯法惡道。斯法有爲。斯法無爲。於中分別耳識不錯者。是謂五法清淨瓔珞。復次族姓子。耳識分別諸佛世界。聽聞殊特深妙之法。一一承事諸佛世尊。是謂六法清淨瓔珞。復有六法當念修行。云何爲六。如來世尊。色身清淨。非愛欲身。身放眾香。普徧十方無量世界。一一香氣。皆演無量瓔珞法門。不倚眾生有眾生想。

於中成就具足鼻識。是謂一法清淨瓔珞。復次族姓子。如來世尊無量香界。以戒德香。普周十方恆沙刹土。於中攝取無量眾生。是謂二法清淨瓔珞。復次族姓子。復以鼻識察彼香界。應從三道斷諸縛著。不失鼻識應行之本。是謂三法清淨瓔珞。復次族姓子。因彼鼻通演出無量審諦之教。鼻識清淨眾行具足。是謂四法清淨瓔珞。復次族姓子。鼻識有三。外入內識。鼻善惡香。分別八道十六聖跡。是謂五法清淨瓔珞。復次族姓子。鼻識鼻香一念一意。知彼眾生心。所念法。一一演暢無量法門。是謂六法清淨瓔珞。佛復告

無頂相菩薩曰。復當具足六法。佛相無相不可護持。莊嚴成道。以自莊飾。云何爲六。於是族姓子。坐佛樹下。修習一相。觀見眾生所行不差。從兜術天降神母胎。雖現俗變。不失賢聖。如來禁戒德香。普徧無量世界。是謂一法清淨瓔珞。復次族姓子。修鼻識相。普知十方諸佛世界。知所趣生受形不同。復以神足而教化之。是謂二法清淨瓔珞。復次族姓子。鼻識分別相。相無厭。復觀十方無量世界。悉見一生補處菩薩。香氣徧滿十方世界。於中攝意而不分散。是謂三法清淨瓔珞。復次族姓子。初坐佛樹內。自思惟。今吾成佛。

必然不疑。以何證驗。令天龍鬼神乃至十方諸佛世尊。知我今者坐佛樹下。卽放諸毛孔一一眾香。令十方界悉來宿衛擁護菩薩。至成作佛。是謂四法清淨。瓔珞。復次族姓子。於樹王下已成等覺。眾相具足。一夜之中成三明慧。初夜自念過去恆沙諸佛世尊在此成道。先布何法。云何教化。如是思惟。復至中夜。古昔諸佛在此成道。皆說無量諸度無極。我今亦應如諸佛法。便入眾香無形定意。復從定起。復更思惟。古昔諸佛雖於此處成佛。先度何人。云何說法。爾時便聞十方世界一切眾香。各有斯音。度應度者。復於彼

處一一思惟。乃至後夜時。如是不退不闕香界。是謂五法清淨瓔珞。復次族姓子。已獲鼻相內自思惟。世香無常種生死法。以何方便求道德之香。便自入定。分別慧定五分法身。以識往別。戒香攝身。定香攝意。慧香攝亂。解慧攝倒見。度知攝無明。是謂如來五分法香瓔珞其身。是謂六法清淨瓔珞。佛復告無頂相菩薩曰。如來舌相眾相中妙。演布言教不漏四過。本所造願說法教化。口教清淨不失舌識。是謂一法清淨瓔珞。復次族姓子。本修清淨守護三行。知彼眾生神識所趣。輒便說法不失次緒。舌識清淨。是謂二法

清淨瓔珞。復次族姓子。雖口說法有教有響。言從識發。外輒受化。復採彼語而爲說法。於中自攝舌識清淨。是謂三法清淨瓔珞。復次族姓子。舌有眾相。相不同。一一化識說法無窮。不失四辯。舌識清淨。乃至無量恆沙刹土。言從語用無不受信。是謂四法清淨瓔珞。復次族姓子。或時有人聞彼說法。或善或不善。或說邪見。或說正見。復能反詰尋究義趣。於中具足不失舌識。是謂五法清淨瓔珞。復次族姓子。過去諸佛所說言教。有行有智有趣。當來諸佛。有行有智有趣。現在諸佛。有行有智有趣。云何過去諸佛。有行有

智有趣。於是族姓子。過去如來無所著等正覺。身滅相滅。色滅。云何身滅。過去如來身不常住。色身變易。非一非二。生生自滅。雖後久久滅盡。猶有身名不滅。此有爲身不入無爲境。如來身者。五分法性常定不變。有佛無佛。是謂身滅。非五分身滅。所謂相滅者。有相有色。有相無色。云何有相有色。有相無色。眼識境界外六入本。是謂有相有色也。有相無色者。諸有爲法。無爲法。定法。無定法。非眼識境界也。是謂有相無色也。所謂色滅者。色有三品。有形色。無形色。增大色。云何有形色。口所吐教。心識造行。隨前染著。是謂有

形色也。云何無形色。如今說言。有善有惡。知後有報。必然不疑。今處現在。造過去未來行。非今眼識所見。是謂無形色。云何增大色。色有不盡。非色有盡。有色亦盡。無色亦盡。是謂增大色。如是族姓子。復具六法。清淨瓔珞。爾時無頂相菩薩。前白佛言。云何舌識言教。演出無量本。慧定意。舌識非識。亦非平等。一切音響。耳識境界。外諸色像。眼識境界。眾香好醜。鼻識境界。口所言說。有聲而無形。主知外法。而不自知。云何舌識受耳識相。佛告無頂相菩薩曰。云何族姓子。聲從耳出。爲從外來。荅曰。外識不從內識。又問。口出言

教或大或小。由口耳識聞。不由口耳識聞。荅曰。或由口聞。或不由口聞。又問。云何由口聞。不由口聞。荅曰。口出音響。此則由口聞。地水火風山河石壁。此不由口聞。又問。口出音響。得稱爲識。地水火風何無識乎。荅曰。地水火風非口識也。又問。云何成就口識。荅曰。四大也。又問。口非四大。今言四大耶。荅曰。有識四大。不言無識四大。又問。云何言有識四大。不言無識四大。荅曰。有識四大。口識是也。無識四大。地水火風也。又問。有識四大。豈非地水火風乎。對曰。然。又問。無識四大。何者是耶。荅曰。地離水則無識。水離火則無識。

火離風則無識。風離空則無識。空離識則無識。是謂四大無識。又問。有識四大所出音響。地耶。水耶。火耶。風耶。空耶。識耶。荅曰。普聚。又問。除四大識爲所在。荅曰。識無所倚。又問。地水火風同聲同響。不說識乎。荅曰。識獨無侶。故無識也。又問。識獨得稱識耶。荅曰。識獨非識。又問。識獨非識。云何依地水火風耶。有爲耶。無爲耶。荅曰。如是。又問。識離死胎。復有處耶。荅曰。有。又問。何者盡苦本。荅曰。無盡識是也。時無頂相菩薩。復問。大成就識。識成就大。荅曰。大成就識。又問。識所倚耶。荅曰。識大。又問。地水火風空。離地水火風空。識

爲所在。荅曰。識無所在。又問。滅盡耶。荅曰。非耶。又問。非滅耶。荅曰。非也。又問。識非趣非不趣。此法非泥洹乎。荅曰。非也。又問。識泥洹有異乎。荅曰。不異。又問。泥洹復有泥洹四大耶。荅曰。無泥洹四大也。又問。有泥洹識耶。荅曰。有泥洹識。又問。地水火風識。及泥洹識。有何差別。荅曰。地水火風識轉。泥洹識不轉。是謂差別。又問。地水火風離識。泥洹離識。有何差別。荅曰。四大離識。不離過去當來現在。泥洹離識。永離過去當來現在。又問。離四大識。離泥洹識。此識未四大。未泥洹。復有異乎。荅曰。非也。又問。四大離識。泥洹離

識不異乎。荅曰：不異。又問：識處泥洹成無爲法。識處四大成有爲法。不別耶。荅曰：不別。又問：若使不別。云何此有爲識。此無爲識。有何異。荅曰：有爲識成就四大。無爲識不成就四大。是故有異。爾時無頂相菩薩前白佛言：世尊。離四大識。離泥洹識。亦不一亦不二。何以故。識在四大。便有過去當來現在。識在泥洹。便無過去當來現在也。此識彼識。復有異耶。荅曰：不異。又問：何以故。說此四大識。此泥洹識。荅曰：假號。非成諦教。時無頂相菩薩。內自思惟。我今所問四大離識。有果報行。今以無果報行報我。將無我問非耶。報我

非乎。爾時世尊知彼無頂相菩薩心中所念。便告無頂相菩薩曰。有爲四大識。非無爲四大識。無爲四大識。非有爲四大識。云何四大識非此非彼乎。荅曰非耶。又問。非四大識非此非彼乎。荅曰非也。又問。非四大識非泥洹識耶。非無識耶。荅曰識滅識不滅。云何識滅。荅曰非現在。云何識不滅。荅曰現在。又問。識有滅耶。荅曰現在。又問。無爲法復現在耶。荅曰不也。又問。有爲法復現在耶。荅曰不也。又問。有爲法復現在耶。荅曰不也。又問。有爲無爲相非現非無現。爲何所依。荅曰依無所依。又問。善哉。識有依耶。荅曰識無有無依。又問。云何識有依有界耶。荅

曰。有三界。身界。法界。空界。是謂三界。時無頂相菩薩前白佛言。有染汙識。無染汙識。云何無染汙識。而成染汙識。佛告無頂相菩薩曰。染汙識動。爲無染汙識。無染汙識不爲染汙識。何以故。識性常住。亦不變易。無生滅著斷。以是故。動識爲住識。住識不爲動識。爾時世尊復告無頂相菩薩。吾今成佛。三界特尊。眾相具足。四無所畏。十八不共法。眾德普備。今得住識。未得動識。時無頂相菩薩前白佛言。世尊。云何住識。不得動識。佛言。所謂動識。有爲法界。所謂住識。無爲法界。非無爲識。成有爲識。以是故。動識成住識。非住識。

成動識。是時世尊說此語時。無頂相菩薩及百千人。皆發無上立住識行。無數眾生皆發無上正真道意時。無頂相菩薩卽於佛前。而作頌曰。

眾相具足	成如來身	不著三界	如空無我
已除心垢	神通自在	由逮動識	不逮住識
法界虛空	亦不變易	如來久如	當逮住識
過去如來	數如恆沙	爲得住識	悉動識乎
我今有疑	不達法界	唯願垂愍	令無妄想
眾生志趣	性行不同	聞說妙空	不究根源
虛空無相	行一平等	云何住識	乃謂清淨

如今時至 宜爲演暢 本際通慧 甚奇難有

四輩無畏 咸欲聞知 住識動識 分別其性

過佛常爾 法界平等 當來諸聖 法性亦然

如今眾生 入寂不亂 復從何識 而獲定意

今此定意 永寂無響 爲是住識 爲是動識

願一一說 法界根本 永除疑結 不懷猶豫

爾時世尊復以此偈報無頂相菩薩曰。

過去諸如來 神智無有窮 雖身取滅度

住識不變易 動識有二品 有住不住識

設入無爲境 不見二名號 如來無所著

安明山不動 行過無與等 愍度下劣者
國界諸村落 眾祐所經過 非識不由此
爲疑動住識 設從無數劫 難計諸如來
欲算如來識 動住不轉住 佛慧無邊涯
識周無量法 身相宏誓備 無相不可見
當我初生時 天地霍然明 執心宏誓牢
無形無爲識 二足人中尊 如象離鉤鎖
自然音樂妓 充滿虛空中 無數諸天人
各自修禮敬 各以若干頌 歌歎如來德
以逮等正覺 目視無厭足 轉無上法輪

演說無比法	一切眾生類	宗奉尊聖教
不計去來今	世雄如師子	積功無數劫
不失總持行	四等無所畏	潤益一切人
道果自莊嚴	不計壽吾我	無想應正覺
如虛空無礙	今日得五眼	未住不處住
懷來無顛倒	無住不見識	如來奇特慧
印以無相法	行盡無所缺	無財非世榮
一行意一念	菩薩觀無亂	動識眾識妙
住識非第一	思惟過去佛	及以方當來
如我今現在	不由住識成	如來三達智

無偶亦無伴 行過不可滅 不見識所在

爾時世尊復重告菩薩曰。無身身識。身無身識。此法有六。云何爲六。若有善男子善女人。身入十六受外塵垢。身識一一分別。乃至淨地。是謂一法清淨瓔珞。以無身之識。以起身識。於中分別。悉由更樂。是謂二法清淨瓔珞。吾昔有願。修其身相。有行百五。乃謂身相。復有百五。乃成身相。是謂三法清淨瓔珞。過去久遠。眾生已滅。於彼受身。有爲無爲。有行無行。若好若醜。有苦有樂。一一識別。法界非法界。此法界身識。此非法界身識。是謂四法清淨瓔珞。身識造色。復有十

事。真身化體亦無端緒。知彼身識趣無所趣。是謂五法清淨瓔珞。了身識本歲日不同。本身今身變易不住。知本受形今亦變易。便能於中不失身識。是謂六法清淨瓔珞。復次族姓子。復有六事。云何爲六。身行清淨不爲眾惡。口亦清淨不說邪業。意修清淨不造眾塵。是謂一法清淨瓔珞。過身已滅。有善有惡。善身善福。分別善識。惡身惡業。分別惡識。一一思惟善惡身識。是謂二法清淨瓔珞。六身相法離善離惡。復能起念不捨身識。又時眾生計身清淨有清淨識。計身不清淨有不清淨識。於中分別清淨身識。不淨身識。

是謂三法清淨瓔珞。憶本所造有爲身無爲身。過去
未來現在身。悉能分別不失身識。是謂四法清淨瓔
珞。心所念法非一非二。彊記不忘知識所起。是謂五
法清淨瓔珞。無形識身。復有五事。云何爲五。有染著
身無染著身。有形身無形身。有識身無識身。有俗身
有道身。有一身有非一身。於中悉皆分別。是謂六法
清淨瓔珞。佛告無頂相菩薩。復有六事。云何爲六。無
盡法身有盡法身。分別有無法識清淨。是謂一法清
淨瓔珞。無爲法性行無增減。知法有善知法無善。知
有生法知有滅法。曉了法識不失法性。是謂二法清

淨瓔珞諸本皆少三法有常住身無常住身。法不常住知不
 常住。諸法常住亦知常住。思惟諸法住識無住識。是
 謂四法清淨瓔珞。諸法寂然諸法色亦復寂然。有為
 非識知有為識。無為非識知無為識。思惟不失法界。
 是謂五法清淨瓔珞。法身無數無形不可見。非眼界
 所攝。從初發意不起二想。分別諸法不失法身。是謂
 六法清淨瓔珞。

菩薩瓔珞經卷第三

音釋

捷疾葉切儔除雷切鼻許救切詰契吉切
敏疾也 儔侶也 鼻攬氣也 詰問也

菩薩瓔珞經卷第四

姚秦沙門竺佛念譯

識界品第六

爾時座上有菩薩名曰豪賢。乃從東方十六恆沙刹土。來詣此界。聽受瓔珞妙法。卽從座起。偏露右臂。長跪叉手。白佛言。唯然世尊。若見聽者。乃敢陳啓。世尊告曰。善哉善哉。族姓子。吾當與汝一一分別。爾時豪賢菩薩白佛言。世尊。云何諸持諸識境界。如世尊言。識從有爲不從無爲。又復說言。識從無爲不從有爲。云何此識彼識。名曰識界乎。佛告豪賢菩薩曰。識非

有識從法生識。豪賢白佛言。云何識非有識從法生
識。荅曰。識非常識。隨法有識。又問。云何爲識。徧一切
識。知一切法。是謂識非常識。又問。識有智耶。爲無智
耶。荅曰。識有智如如。識無智如如。一切眾生識有智
如如。無學賢聖識無智如如。是謂族姓子。有識如如。
無識如如。又問。云何有識。云何無識。云何有識如如。
云何無識如如。荅曰。悉能分別有識智無識智如如。
是謂分別識界。豪賢菩薩白佛言。如來今說定義識
義。倍生狐疑。佛告豪賢。諦聽諦聽。善思念之。或有智
識非智識。或有法識非法識。云何法識非法識。從最

第一義至辟支佛。是謂法識。從見地薄地。性地無礙地。至一生補處。是謂法識。法識復有五事。云何爲五。一趣道慧。二識宿命。三趣分別慧。四入空門。五觀心本。是謂法識成就五事。復有五事成就法識。云何爲五。一修梵行不倚三毒。二處胞胎不染生死。三行無相空無願法。四修神通神足無礙。五立覺意一相無相。是謂成就法識清淨。佛復告豪賢菩薩。法識清淨復有五事。云何爲五。學識不變。思惟學跡。無學無跡。不見法趣。不見有教。亦不見無教。亦復不見道性。非道性。有生道意。不生道意。是謂法識成就五事。觀法

識定。復有五事。云何爲五。一定滅本垢不見處所。二念無量空寂定意。三建道本不與道會。四心斷念求坐道場。五修福田。蠲除妄想。是謂五事。法識清淨。無生法識。復有五事。云何爲五。識觀過去不起生滅。識觀現在不見生滅。識觀未來不見生滅。識觀本末不見生滅。識觀如性不見生滅。識是謂五事。法界清淨。佛復告豪賢菩薩。如來等正覺。復當修習法識。音響通有十一行。云何爲十一。法界無著不見識本。於中具足神足道行。欲得淨修法界識者。初意如山如牆壁。漸漸乃至思惟身本知身離身。復捨身已知心離

心復離心。已知空離空。復捨空已。還從一意。至百千
意。未化之意。盡能修之。復知化法。而無所有。是謂法
識起。神足行。以無身識。修身識行。或以身識。造無身
識行。識別身識。非身識。是謂法識。修神足行。有無二
法。分別一切諸法。於中成等正覺。不見生識。成等正
覺。過去億百千數。悉能分別。諸陰入持。不失眾生本
行所趣。是謂法識。修神足行。無化之法。不見變易。於
中造識。不可窮盡。是謂法識。修神足行。於是入定。分
別空界。復自計身。如彼無異。是謂法識。修神足行。觀
諸世界。亦不見盡。一切世界。成界不成界。悉能了知。

是謂法識修神足行。夫法界識成五陰形。有生有滅。不見五陰有生滅者。是謂法識修神足行。法界無著。不見形相。過識非今。今識非過。不見現在因緣本末。是謂法識修神足行。一一分別法性所起一切諸法。不見窠窟。攝意滅想。亦不生智。是謂法識修神足行。諸法不生不見起滅。復能思惟生滅之法。本性自然。一相無相。是謂族姓子。菩薩所修神足之行。佛復告族姓子。無著法界。復有十事。云何爲十。如來至眞等正覺出現於世。便能具足三世身識想。是謂法識修無我行。漸化眾生以三滅法。亦不見滅。亦不見不滅。

是謂法識修無我行。分別句義一一了知。復以權慧示現本業。是謂法識修無我行。如來至真等正覺。分別思惟四無量慧。不見斷滅有常之想。是謂法識修無我行。復以妙慧悉化眾生。不捨大慈。是謂法識修無我行。盡觀眾生有涓淑。有不涓淑。隨類而化。不捨其性。是謂法識修無我行。如來世尊行權方便。盡化眾生。不見化者。是謂法識修無我行。佛慧無量。不見成敗。有生有滅。非如來本誓。是謂法識修無我行。如來一相。不染過去。當來現在。修無倚行。乃逮至真等正覺。是謂法識修無我行。如來至真等正覺。以無數

億千萬劫。以爲一日。於一日中化度眾生不可稱極。是謂法識修無我行。佛復告豪賢菩薩曰。過去無數阿僧祇劫。自念修行無形法識。有佛名曰宏誓無願如來至真等正覺。明行成爲善逝世閒解無上士道法。御天人師號佛世尊。爲說法界無著之行。夫法界者一百七事。云何爲一百七事。不求空行。不念有常。觀世如夢。自滅吾我。生識不起。分別界相。永斷妄見。施心不闕。心常一定。在眾不亂。身識空識。無若干想。菩薩有數不著名號。觀了諸法。非一非二。眾生起恚。便爲方便。說除九本身識之行。十二因緣。四諦聖慧。

思惟苦本有苦識耶。無苦識耶。或時有識。在眼耳鼻
舌身意。或時有識。離眼耳鼻舌身意。或時有識。著色
不染色。或時有識。不著色。不染識。此識微妙。非退轉
菩薩所能了知。或時有識。著聲。不染識。或時有識。不
著聲。不染識。亦無音響。故名清淨識。或時有識。著香
不染識。或時有識。不著香。不染識。一一分別。不失法
識。或時有識。著味。不染識。或時有識。不著味。不染識。
亦復分別。不失次緒。或時有識。著身。更樂。不染識。或
時有識。不著身。更樂。不染識。一一分別。不起想著。或
時有識。了知諸法起者滅者。有爲法無爲法。有定有

亂。是謂菩薩摩訶薩分別識性亦無所染。復次族姓子。分別四無量慧。慈悲喜護。徧滿一切救攝眾生。亦無所著。或時有族姓子。入定三昧。修行一法。已行一法。便獲百千總持法門。如響如幻。漸漸乃至滅盡定。意。身行清淨。不造惡本。心念慈心。不施眾惡。解知三世。除去縛著。是謂族姓子。菩薩正行。有起不起。復次有定意法門。一切諸法皆來入中。有身無身。想有念無念。意無一無二。亦復無識。吾昔無數阿僧祇劫。初入法律。乃應斯行。識法有十二造。因緣本。無明緣行。乃至老死不見起滅。是謂定意。名曰無盡。已得定意。

悉知一切三界所趣。或有眾生有常想無常想。有苦想無苦想。有定想無定想。一一分別不起染著。佛復告族姓子。菩薩摩訶薩。當念修行三十七品道法之要。何謂三十七。所謂四意止。除婬怒癡。永滅三毒。復當思惟四意斷法。斷去念求不生果報。乃獲四神足行。已得神足。往至十方諸佛世界。不自稱說神足。如來五根成就法身。戒身定身慧身。解脫身解脫知見身。是謂如來五分法身。如來神智不毀法身。云何爲五力。信力精進力念力定力慧力。所謂信力者。一向無爲不染三界。正使恆沙諸魔變形作佛。不能變動。

此意。是謂信力。云何精進力。所謂精進力。曾聞有法
法界識者。或在一由延。至百千由延。或在一佛境界。
或百千佛境界。守信立戒。不捨宏誓。是謂精進力。云
何爲念力。所謂念力者。繼念在前。無他餘想。正使恆
沙諸魔官屬。欲來毀此念力者。徒自勞苦。不獲本願。
是謂成就念力。云何定力。所謂定力者。立根上位。菩
薩摩訶薩。攝意去想。不懷狐疑。是謂定力。亦不可壞。
云何慧力。所謂慧力者。無量法界。不可思議。悉攝諸
慧善權法本。不毀法界慧性之行。是謂慧力。眾德具
足。復當分別七覺意法。覺了一切有形無形心識所

念從欲界至色界無色界。斯可分別。是不可分別。攝
意不亂。是謂定意。慧性八道平等。亦無恐懼。入空三
昧。一行無二。不可本末。有限無限。已離生死。不生餘
智。知起滅法。淨不生眾想。是謂八道清淨無二。復當
思念六十二見。有常想無常想。有道想無道想。有今
世想無今世想。有父母想無父母想。有著身想無著
身想。或時有識。分別諸道。清淨無瑕。一一分別三處
愛本。五處欲本。七處婬行。有時有行。在閒靜處。若在
樹下。露地塚間。觀出入息。有時有長。有時有短。有時
有寒。有時有暖。諸法生生。因緣共會。思惟分別。意不

錯亂。所以行者知出入息。息長亦知。息短亦知。亦知前息。亦知後息。漸漸乃成一禪之行。如來聖達禪意不同。修行四禪。入想知滅。如此定意。三乘共有。又復如來無上定意。云何名曰無上定意。所謂無上定者。心有上中下。行人入定。無復出入。長短息。唯分別刹土。專心一意。觀過去未來現在。何者。是我所化。非我所化。復自思惟。設我在閒靜處。不分別眾生者。是非我宜。今當往。至無數刹土。自化化彼。乃成我願。是謂初定。亦不可毀。復次行人初入定意。內自思惟。有苦有樂。皆由身本。已過此行。復當宣傳。使彼眾生而悉。

知之。是謂入定成就二行。復次心法非有非無。無身有身想。不得神通遊化十方。攝意自檢淨其種姓。是謂定意不毀法識。有心意識。思惟止觀。我自無我。況有眾生。先自知空。卻觀眾生。以神足道。心神往化身。不往彼。復於十方諸佛刹土。以此定意濟度無數百千眾生。於彼復修十虛空慧。云何爲十。所說法教摧卻魔官。進趣道場。成無量覺。心若虛空。無有增減。是謂族姓子修虛空慧。復次族姓子。初化外道異學之類。去其邪業。使立正見。皆使歸趣。無復慳嫉。是謂修虛空慧。又復世尊化眾生類。隨其所願。皆令具足。雖

說此法心無所著。是謂修虛空慧。復以無礙智神通道遊至無量世界。布現諸法而化眾生。不見眾生亦不見化。是謂修虛空慧。復有如來智。名曰壞空。成就法界不毀本性。持心如空。不生染汙。是謂修虛空慧。如來等正覺。或以一身遊虛空界。或無數身。或復示現滅盡泥洹。不著一身。不起若干想。亦復不著滅盡泥洹。是謂修虛空慧。諸佛世尊有七十二無礙辯才。十四舌相報。教化眾生。智不停滯。使眾生類皆成慧明。云何七十二無礙辯才。於是族姓子。如來初修功德。相本自發宏誓。若我後成無量等正覺。所生國土。

眾生之類。不聞無明。姪怒癡名。令我國土淨如虛空。如淨居天。少欲知足。意趣於道。中間無滯。亦復不生。八無閒處。在於豪貴中。不自貢高。不鄙卑賤。於中攝意。行布施福。求漿與漿。求食與食。國財妻子。盡施與之。心施無礙。不生亂想。復教眾生持戒。完具精進。一心修六重法。若有眾生。遭百千苦。輒能往度。不令墜落。失賢聖類。是謂八法。修虛空慧。如如來等。正覺欲轉法輪。先入等定。自攝身意。自知時至。吾今宜可與眾生類。轉無上法輪。遊心六通。一一毛孔。放諸光明。然後乃轉無上法輪。不起不滅。無所著法。一相無相。

無染汙法。所說如空言跡不現不見。眾生有增有減。是謂九法。修虛空慧。復次如來從無生法界成等正覺。悉觀諸法如幻如化。不見成就道果者。不失神通慧分別。如來十力亦不染著。是謂十法。修虛空慧。爾時世尊告四部眾。汝等各各於如來前。自說空慧無所著法。時有菩薩名曰空行。去此東南五十六江河沙諸佛刹土。從彼國來。來至此土。叉手白佛言。國土清淨。無有法說義說。知淨不淨。悉如虛空。是謂空慧。無著之法。無我菩薩曰。無見非空。見亦非空。不見見亦不見。無見。是謂空慧。無著之法。法住菩薩曰。未立

行跡生染汙識。不可計劫本無識性。是謂虛空無著之法。過行菩薩曰。於身口意不造眾惡。定不起想。是謂空行無著之法。無行菩薩曰。法身無盡。不見倚著。定心一意。是謂空慧無著行也。寶藏菩薩曰。不見前後法界處所。亦復不見罪福惡報。是謂空慧無著行也。習苦菩薩曰。諸佛世尊。悉知過去當來現在。入自在。慧不起妄見。是謂空慧無著行也。慈意菩薩曰。吾我無形。專心行道。無他異想。無倚無著法。自然起滅。是謂空慧無著行也。寶髻菩薩曰。四無我行。無著無染。有身有苦。識想亦苦。解不起滅。是謂空慧無著行。

也。善算菩薩曰。不見諸法有數無數。云何諸法有數無數。俗是有數。道是無數。有爲有數。無爲無數。不見數。無數者。是謂空慧無著行也。盡生菩薩曰。諸法無生。亦不見生。淨無淨想。生死已盡。永滅不起。是謂空慧無著行也。梵行菩薩曰。習三三昧。不念受身。念空不離空。念無相。不離無相。念無願。不離無願。亦復不念受清淨福。是謂空慧無著行也。光相菩薩曰。分別三毒爲暗冥法。不見三達爲清淨法。是謂空慧無著行也。所作菩薩曰。不見一相。分別無相。不見苦。不見離苦。無苦不苦。亦無所作。是謂空慧無著行也。不受

形菩薩曰。無四大本。亦不見境界所在。一向無爲不生三意。是謂空慧無著行也。無等菩薩曰。離世苦樂不著八法。見有稱譽。不以爲歡。設見毀謗。不懷憂戚。忍心如地。是謂空慧無著行也。無垢菩薩曰。不見內六情。造外六塵。不見六塵與六情爲對。是謂空慧無著行也。重觀菩薩曰。外色不起內識。識亦不著外色。識不知我爲色。色不知我爲識。聲香味細滑法。亦復如是。法不知我爲識。識不知我爲法。一切諸法。各不相知。是謂空慧無著行也。遠離菩薩曰。不見五陰有染有著。何以故。五陰性諸法性。常住不變易。是謂空

慧無著行也。賢護菩薩曰。諸法總持不見有望無望。不見有法可說不可說。將護眾生立不退轉。是謂空慧無著行也。寶來菩薩曰。諸法常定無有若干。亦不分別佛法菩薩法。俗法道法。有形法無形法。可護持法。不可護持法。亦無分別。是謂空慧無著行也。爾時座上無數四部眾。聞說此法空慧清淨無著之法。倍生狐疑不達究竟。世尊卽知心中所念。應從空慧解緣會未至。卽自化身高四百由延。出大音聲告十方世界諸如來至真等正覺。現在說法。欲聞聽受菩薩瓔珞。悉皆雲集。欲詣忍世界。遣化菩薩無央數眾。盡

禮十方諸如來至真等正覺。今能仁如來於沙訶剎土演說菩薩瓔珞。我等宜可普集彼土。如是十方諸如來無所著。尋如其像攝持威儀。詣沙訶剎土。立信菩薩得十住者。盡見如來禮拜供養。各各以次坐無畏座。未立信人在凡夫地。未得天眼。諸通未具。亦不見十方如來。何以故。凡夫意小恐失梵行。或有如來定坐於此。身至梵天。或有如來變身徧滿一千剎土。二千剎土。乃至三千大千剎土。何以故。眾生受化應見形。受法應聽聞受法。爾時東方過二江河沙剎土。有如來號曰本淨。卽與大眾。因偈說此法言。

虛空無邊涯 想著生狐疑 本際行已盡

無二無等侶 欲說虛空相 本質無生兆

何得疑空慧 欲於中求無 吾今雖成佛

懷有無所染 垢盡自致尊 不復有起滅

已入平正路 不從陘小意 計我無生心

得道從是滅 吾壽有劫數 所度不可量

斷意永滅寂 豈有度人識 七觀瓔珞身

道華色不變 無形入諸趣 斯謂菩薩行

如來有二業 道本眾德具 權現幻化法

乃應無起滅 天世眾生類 無形無有數

何得有形人 善知無色法 世雄無盡藏
非色欲能盡 況復未得道 欲究平等慧
雖經百千劫 未曾自息意 眾生有懈怠
中住不建意 大乘平等法 聽受何可盡
今粗說空慧 何復疑於空
爾時如來說此偈已。忽然不現。南方去此十八億江
河沙數。彼有佛刹名曰嚴淨。佛名離垢如來。至真等
正覺。十號具足。現身色相無極巍巍。在大眾中復說
頌曰。

吾本從覺道 聞空平等慧 經於十二劫

故應寂然定	清淨無爲行	復過嚴淨刹	法界亦清淨	我旣無心行	國無三惡道	如我所遊國	宏誓不有異	皆由空慧業	乃得此定意
行盡無名號	說言不有言	十億諸刹土	解了已盡滅	云何當說有	唯演空慧行	嚴淨妙瓔珞	無著慧觀念	熾然諸法本	思惟前後來
眾生心所趣	不著有想本	彼乃有此法	是故無起滅	如性無形相	不著有無處	願宣殊特慧	化人無若干	發意有階差	六度四等行

隨類起本識 如我永憺怕 不見有無行
所以無數劫 斷求不著有 欲求不起滅
逮得始成就 今已空無身 現形如所趣
佛慧無邊涯 終不爲所染 自然性清淨
不見有常想 道慧眾德具 故號名離垢
自從成道果 徧遊虛空界 或作天帝釋
大尊梵天王 所以變化形 化彼著有者
盡趣無生慧 清淨至究竟 復作轉輪王
統領無數域 捨而行學道 知之非久長
復入聲聞中 現如不及道 輒便從師受

斷諸想著結 復到淨居天 說行清淨本

使離彼天福 此等不盡苦 無色色眾生

計常不去想 憍慢自放恣 盡令人道門

本無等正覺 所化無有形 要盡死生本

終不捨入寂 況汝今四部 初聞便懈怠

此類自有期 非速能使成

爾時如來說此偈已。忽然不現。西方去此百億恆沙諸佛刹土。刹名水精。佛名淨尊。如來至真等正覺。十號具足。彼土眾生奉持一法。亦無六度眾行業本。復在大眾而說斯頌。

八行無高下 亘然歸滅盡 捨身復受身
但益塵勞垢 虛空無二法 無住亦無著
八道平等慧 諸佛所遊處 吾昔自建行
宏誓轉於法 體信歸於無 今得人中尊
諸佛所居刹 善權法各異 在在處處現
現欲化羣有 更樂所縛著 永處於冥室
道從本無誓 然後乃得離 如我國土人
攝心不造惡 至終崇無爲 如是自近道
姪怒癡垢薄 亦不大慙懃 自然入律行
如華隨時敷 道意不移動 苦樂心永斷

往來諸刹土 盡修於空慧 我今旣一行
彼眾亦不異 今聞能仁尊 故現修等慧
大聖皆雲集 豪尊無高下 雖現國土異
所修同一法 今觀五趣人 無明行所蔽
沒溺於生死 轉增勤勞苦 何不自建意
體信空慧道 速可得解脫 如外刹眾生
如來說此偈已。忽然不現。北方去此三恆沙佛土。刹
名普照。佛名勇辯。如來至真等正覺。十號具足。復於
大眾而作頌曰。

如來道一相 本從名色生 勤苦經無數

乃盡塵勞患 如人欲度空 不求巧方便
但憶望空法 無由而果獲 意想之所縛
不計物非常 欲求不死地 此亦未曾得
安住所以離 不住有無境 已得履空慧
自然無染著 道從身本生 然後成正覺
迷惑心意錯 離心外求空 外苦雖有號
不離其識想 法界清淨道 乃應清淨慧
如來所顯現 暢演無比法 一相無染汗
何由復染空 眾生處生死 沒溺不自拔
欲得離眾惱 先當去意識 最勝三達智

已過有礙形 今念非本念 緣眾生有念

諸法不思議 非有亦不無 因聲乃有響

眾生乃有佛 受化眾生等 常自厭患身

道能滅非道 無有非眞法

爾時如來說此偈已忽然不現。東北去此九十二億
恆沙刹土。刹名淨觀。佛名法觀。如來至眞等正覺。十
號具足。於此大眾而說頌曰。

色本無有色 亦非有色想 痛法無起滅

亦非生更樂 意識如野馬 水泡不久停

無身慧自淨 是謂平等空 一觀一意止

清淨尊梵行 吾我著有想 不至有無境
自覺復覺彼 令達虛空慧 眾生不自覺
是以懷猶豫 性有上中下 善惡常有對
捨惡而行善 不得空無慧 能不見善惡
心正無顛倒 爾乃信解空 逮得清淨慧
本從平等意 不見羣萌類 久久乃自達
應於無上道 慧觀除貪著 洗心淨無垢
仁智如空慧 故謂真人法 慈愍世閒類
故演虛無道 不念善惡對 無形無情想
我本從等意 如來受斯法 聞輒達空慧

今化淨觀刹 受命阿僧祇 說法終教化
導引無數人 入此法界本

爾時世尊說此頌已。忽然不現。東南去此一億佛土。
刹名極妙。佛名微妙。如來至真等正覺。十號具足。復
說頌曰。

識本因五陰 因緣共合會 流轉無數劫
自起自然滅 愚惑眾生等 不達生死本
終竟處胞胎 不求離災患 如人一念頃
純生顛倒見 縛著遂滋甚 況復生道根
計念眾生類 愛樂三毒本 五蓋翳心神

無眼何有觀 如來執大炬 消滅塵欲本
雖復見慧明 猶生不篤信 我觀十方世
發意欲求道 行盡復受生 當更三塗惱
四處非本願 自投於四淵 不離四生門
不成四道果 有時離四法 便生五盛陰
無著增上慢 不盡放逸行 漸至無數法
不覩聖行源 猶人意遊蕩 心不自防慮
如來六通行 非空不果空 永去生死本
乃應平等慧 本自無生死 流轉染著色
遂成法界色 滅有不著有 有道則有識

此識非本無 能不見道識 乃應慧定法
道從識更樂 現身無數變 自知成定慧
乃應眾相變 無住不變易 無疑猶豫想
降伏諸塵勞 乃應平等慧 人行有三礙
由想不捨空 未興眾行本 此業無有成
爾時如來說此偈已忽然不現西南去此十三億佛
土刹名廣勝佛名妙跡如來至真等正覺十號具足
在於大眾而說頌曰。

覺生是幻法 不在深法要 道尙無名號
況空見言跡 諸外入內入 分別悉無有

無形不可見 乃應清淨慧 計欲不從心
亦復不著空 彼此無染著 逮成最正覺
愚惑未覩明 計從心識起 六法生六塵
由是起疑想 因識受此身 自然成四大
輪轉向五趣 不解空性法 如有一人念
自說染本無 身心俱生礙 豈達有無想
妙觀照三世 示現說諸法 諸佛體妙教
不有亦不無 世苦由無明 平等空無倚
觀了等有無 故謂平等慧 有時識有無
此非如來慧 不染彼此者 心平如響應

八道盡苦源 八解洗心塵 八響悉歸虛

八慧不起生 自離復離彼 中閒無有礙

隨識所染著 是謂平等慧 人本在虛空

染識三有道 唐自著塵勞 不入本無際

本從初發意 不滅空性慧 由復經無量

後乃獲此定 吾解眾會心 離識欲求空

何不自念識 內空外亦然 如法法無相

慧見亦復然 念定除去亂 是謂平等慧

此身悉歸空 永寂無起滅 如來普宏誓

濟此羣萌類

爾時世尊說此偈已忽然不現。西北去此五十四億
江河沙數諸佛國土。刹名柔順。佛名眾相。如來至真
等正覺。十號具足。在於眾會而作頌曰。

如我觀空行 一意無高下 有無是非心
皆由生死起 欲求佛深藏 究盡諸行本
未曾能究暢 如來神慧通 如有一士夫
從劫復至劫 如是億百千 其數不增減
彼人諸根具 六情不缺減 欲聞如來慧
未便卒果獲 況復初發意 欲至平等慧
但自轉有損 無益於道法 要修大慈悲

權慧自防衛 堅固無畏誓 然後乃降心

設復遊世界 欲供養諸佛 不起所造功

自然應聖行 如來十力聖 降伏諸邪見

忍智無我想 故得人中尊 了法住不住

不見功德行 盡生更不受 是世雄境界

欲成眾相好 不斷諸善本 滅意不起想

是謂平等慧 我觀眾生類 曉空不自知

是故數疲勞 不入永寂處 欲速行道果

眾德莊嚴身 但念斷心本 云何起狐疑

爾時世尊說此偈已。忽然不現。上方去此無數佛土

盡眾生界。刹名迴轉。佛名音響。如來至真等正覺。十號具足。在彼大眾而說頌曰。

虛空無形識	不有彼此岸	不見有眾生
況有遊法界	現在求道者	遊空求於空
不淨已識者	復求外空爲	愍念此等人
意不解聖慧	思惟此慧觀	亦獲無常道
今受三界身	通慧自分別	定識無形想
種斷爲道意	人自思惟識	四大爲窠窟
正使在外空	不異於四大	但今未得慧
未了內外情	此等可慈愍	眾祐不尤責

丈夫無等倫	行過無想定	是謂諸佛法
迷惑自計我	本無起盡法	究竟悉清淨
梵行終竟淨	不生三世念	前說非今說
念念自變易	以此可爲證	何故生狐疑
我旣不自稱	權假爲凡夫	思惟此四大
識法爲何從	宣說過去法	無形不可見
雖有未來識	亦未受四大	現在爲二品
今爲一一說	各各莫懷疑	於此平等慧
分別過去識	死者非今形	此識不腐敗
爲稱過去識	設識今現在	四大因緣合

此識恆不變 復稱識現在 且復捨現在
未來未有生 彼識亦非今 何由稱三世
識性恆自住 無去來現在 欲求識根本
窠窟何所在 如來無等智 乃達識本無
空性恬然一 忽復有疑想 欲成等正覺
不染想著行 悉知無識性 故號平等慧
爾時如來說此偈已忽然不現下方去此十一恆沙
土刹名無滅佛名普願如來至真等正覺明行成爲
善逝世閒解無上士道法御天人師號佛世尊在於
彼會而說偈曰。

十方諸佛集	平等無有二	盡說於空定
寂然無有行	眾生有常想	謂爲空有限
達本無染汙	是謂悉歸空	不於心縛著
以失本願行	遂生誹謗業	無佛法聖眾
如來戒德身	清淨無瑕疵	已度未度者
三世無觀想	空識自有名	自生自然滅
此生非空生	識滅亦復然	由彼不達本
流馳求識相	假空名爲識	空識豈有異
身相猶無形	生一復一生	但爲愚惑人
起識有若干	眾智成法體	相好自嚴身

身滅智歸空 復可言有識 推尋無三世

無識無四大 乃得遊法界 知有亦不有

諸佛無量智 權現無增減 以此無識形

徧遊諸佛刹 此疑久已有 非汝我亦爾

通慧普悉照 爾乃應佛識

爾時如來說此偈已。忽然不現。卽時在會十一那術諸眾生。悉得平等空慧之觀。復有無量眾生。天龍鬼神。聞說此法。皆發無上正真道意。

菩薩瓔珞經卷第四

音釋

譽

羊茹切

稱美也

粗

坐五切

頒

與班同

翳

壹計切

腐

奉甫切

也

菩薩瓔珞經卷第五

姚秦沙門竺佛念譯

諸佛勸助品第七

爾時世尊自昇無畏座。放舌相光明。普照三千大千世界。及照十方無央數恆沙諸佛國土。及十方恆沙地獄畜生餓鬼。乃至十方虛空眾生。悉見光明。爾時世尊。放無央數億百千光明。彼彼眾生。自相謂言。從久遠已來。未曾見此微妙光明。亦非星辰日月天子。有此光明。甚奇甚特。未曾所聞。未曾所見。爾時十方諸國眾生。各生此念。將不有佛出現乎世。爾時世尊。

卽知十方眾生心中所念。現諸光明皆有化佛。一一化佛皆有無央數眾。前後圍繞而爲說法。所謂說法者。無形相法。無言教法。無生無老無病死法。有復聞此音。諸不覩光見形色者。皆聞如來說法音響。空慧法慧說無礙著心。爾時世尊告諸來會四部眾曰。汝等頗見此舌相光明不思議法。普至十方無央數恆沙刹土。悉照無量眾生之類。及諸化佛而說法言。汝等眾生爲見不乎。時諸神通菩薩大士皆白佛言。唯然世尊。我等悉見。諸在凡夫著欲眾生。復自陳說前白佛言。世尊。我等雖見光明。不知此光是何瑞應。爾

時世尊。知彼眾生心中所念。欲去狐疑。不著妄想。便告輒首菩薩摩訶薩曰。如來至真成無上等正覺。身黃金色。圓光七尺。聲如羯毗鳥。柔輒無瑕。眾相嚴身。皆由過去無央數劫。積福行善。眾德具足。不犯口過。所說言教。無有增減。故使如來至真等正覺。今得十四舌相報法。一者言聲至誠無欺。二者所說聞輒信解。三者口行不失根門。四者知時說法無闕。五者自樂演布禁戒。六者名句次第相應。七者大慈加被。不捨施心。八者覩佛形像。不懷疑滯。九者得佛神通。而自遊戲。十者已入法界。不捨佛慧。十一者獲無量慧。

無盡之藏。十二者佛意無形。皆悉得入。十三者權慧無礙。不見有度。十四者住誠諦慧。人皆篤信。是謂十四舌相之報。若有善男子善女人。得此十四舌相報者。便能放此無量光明。照諸十方諸佛刹土。皆由曩昔言無欺詐。佛復告。轉首。若有善男子善女人。執持諷誦此深法者。便獲身相十無厭報。云何爲十。如來至真等正覺。昇於無畏座。先以平等觀。攝意寂默。內自思惟。吾今在眾爲人中雄。今坐此座。必有所濟。復自思惟。眾生之類。不可思議。或在信地。欲退轉者。或在初地。乃至六地。欲退轉者。宜且別置。不在聖例。或

復眾生姪怒癡心。縛著偏多。此亦別之不在聖例。或有眾生。意崇豪貴。不造德本。此亦捨置不在聖例。或有眾生。無明心盛。起憍慢行。此亦捨置不在聖例。或有眾生。心解幻法。覩見如來。此幻非佛。此亦捨置不在聖例。或有眾生。得世俗通。覩佛神德。與已無異。此亦捨置不在聖例。或有眾生。體性彊記。不信如來。總持之行。此亦捨置不在聖例。或有眾生。施心偏多。聞如來施。與我何異。此亦捨置不在聖例。或有眾生。純有戒心。聞如來戒。與我何異。此亦捨置不在聖例。或有眾生。心恆慈忍。今世尊忍。與我何異。此亦捨置不

在聖例。或有眾生所爲精進。世尊精進與我何異。此亦捨置不在聖例。或有眾生心樂禪行。世尊行禪與我何異。此亦捨置不在聖例。或有眾生得世辯才。世尊說慧與我何異。此亦捨置不在聖例。或有眾生偏有慈心。如來說慈與我何異。此亦捨置不在聖例。或有眾生悲意不斷。如來行悲與我何異。此亦捨置不在聖例。或有眾生恆懷歡喜。如來歡喜與我何異。此亦捨置不在聖例。或有眾生心恆放捨。如來放捨與我何異。此亦捨置不在聖例。或有眾生心恆念空。如來行空與我何異。此亦捨置不在聖例。或有眾生心

不橫貿。如來無願與我何異。此亦捨置不在聖例。或有眾生不生想著。如來無想與我何異。此亦捨置不在聖例。爾時世尊告輒首菩薩。眾生所處志趣不同。一切十方諸佛世界。欲界色界無色界。眾生心念各異不同。或有欲界眾生。娛樂五欲不捨五陰。此亦捨置不在聖例。或有眾生。計色存懷內不著欲。此亦捨置不在聖例。或有眾生。願樂無色。此亦捨置不在聖例。佛告輒首菩薩曰。眾生之類。心識不同。所行各異。所以然者。皆由顛倒。卒不可悟。如我今日觀眾生類。知心所趣。願求何道。至十方界無數刹土。一一了知。

而不錯謬。猶如士夫有目之者。躬自手執明月神珠。審然不惑。無他餘想。我今亦爾。分別眾生神識本行之所趣也。或有眾生意。一念頃一行二行。此亦捨置不在聖例。或有眾生一念之中具足眾行。行亦無記。此亦捨置不在聖例。或有眾生有戒無施。有施無戒。此亦捨置不在聖例。或有眾生具足六行不具足六行。此亦捨置不在聖例。過去恆沙無數如來至真等正覺。先具三品後乃說法。正使將來恆沙諸佛如來欲說法者。亦當具此三品妙行。云何爲三品妙行。一者觀眾生念念不同。二者諸佛莊嚴無畏道場。非聲

聞緣覺能建此場。三者本未聞法。如來與說。悉歸空慧。是謂如來三品妙行。當說法時。悉無缺減。爾時。轉首菩薩白佛言。世尊。云何如來三品妙行所建不同。爾時。世尊報曰。如是如是。如汝所言。今當爲汝一一演說。何謂菩薩三品妙行。如來至真初入定。意眾相三昧。普爲眾生一會說法。如此等無央數眾。心同一識。所念亦同。聞說苦義。非餘法典。此則得入在如來例。又復族姓子。過去當來。今現在佛。知彼眾生心中所念。先從等覺。乃成無上正法。然說有法。不離想著。此亦不應在聖賢例。又復如來至真等正覺。先攝十

意無亂想行。然後乃演深妙法藏。使眾生類所聞言
教。尋得解了。云何爲十。如來演說法時。一向無礙。悉
觀眾生。爲應何法而得度脫。復有眾生意有深淺。以
何方便而得拔濟。或復說法一行無二。今此眾生爲
應此法不耶。觀無量空識心所念爲從何法。然後得
解。奮迅三昧。行無玷汙。一念之頃。諸法悉具。悉觀法
界。無始無終。行諸佛事。亦無罣礙。以無量慧。普潤一
切。眾會已定。以神足力。照彼心意。皆識本緣。而爲說
法。乃在聖例。復次。輒首。如來至真等正覺。昇無畏座。
復當具足十無盡法。云何爲十。諸佛法藏不可思議。

佛身無量法亦無量。如來至真等正覺。復有無量無
形法海。施爲佛事。復有無盡非眼識所攝。普觀十方
有形無形識。如來至真等正覺。善權方便拯濟眾生
不捨本願。普立一切修十善行。復次如來至真等正
覺。內常一意外現說法。不以一定應寂然法。不以說
法外現有亂。復次如來至真等正覺。當說法時降甘
露法雨。有情無情有識無識。普使周徧皆蒙潤澤。復
次如來至真等正覺。居家成就色相殊特。正使大眾
處在高者伏心自卑。不自稱說我姓豪貴。卑者不說
如來本從出我族姓子。復次如來至真等正覺。以宿

命智識前生。無極不可計量。難度眾生生在五趣。本造此緣。今復報緣。因緣得悟。復次如來至真等正覺。發大宏誓。四等之心。能使十方有形眾生。一日成佛。眾相具足。如實如願。皆成佛道。復次如來至真等正覺。建意牢固。不捨本心。復使無量諸佛世界。普共一日。盡取滅度。如其所念。亦不違錯。是謂十無盡如來法要。昇無畏座。具此法要。宣暢如來無窮盡法。亦非羅漢辟支佛所能宣傳。爾時世尊告轉首菩薩曰。云何族姓子。若有善男子善女人。習行空無相願。皆立信地。修菩薩行。其福寧爲多不。轉首菩薩白佛言。甚

多甚多。世尊不可稱量。無以爲喻。世尊佛告。輒首。不如善男子善女人。執持諷誦十無盡藏。其福勝彼。善男子善女人者。上佛復告。輒首菩薩云。何族姓子。若有善男子善女人。已在二地。具足眾行。不懷懈怠。有下劣心。并復供養如前立信。十方恆沙諸佛國土。皆如此類。其福寧多不乎。輒首白佛言。甚多甚多。不可稱計。何以故。若有善男子善女人。修行諸法。從信地至二地。如此等類。徧滿十方。無量世界。甚奇甚特。不可爲喻。佛復告族姓子。故不如此善男子善女人。奉持修行十無盡法。其福甚多甚多。不可爲喻。佛復告。

輒首菩薩曰。若有善男子善女人。修行諸法成就三地。皆使具足成諸法本。并前信地二地。十方恆沙諸佛國土。皆如此類。其福寧多不乎。輒首白佛言。甚多。甚多。不可稱計。何以故。若有善男子善女人。奉修諸法。從信地至二地三地。如此等類。徧滿十方無量世界。不可以喻。佛復告族姓子。故不如是善男子善女人。奉持修行十無盡法。其福甚多。甚多。不可以喻。佛復告輒首菩薩。若有善男子善女人。修行諸法成就四地。皆使具足如上信地二地三地。其福寧爲多不。輒首白佛言。甚多。甚多。世尊。佛言。故不如此善男子。

善女人。執持諷誦十無盡藏。其福勝彼善男子善女人。上。佛復告輓首菩薩。云何族姓子。若善男子善女人。具足誠諦不狐疑法。不捨五地如來法印及行信地。乃至四地。徧滿十方無量世界。其福寧多不乎。輓首白佛言。世尊。甚多甚多。佛言。故不如此善男子善女人奉持修行十無盡法。其福甚多。不可以喻。佛復告輓首菩薩。復捨此已。若有善男子善女人。已在六地。具足眾行。已得越彼空無相願。必然不疑。并行信地。乃至五地。徧滿十方無量世界。云何族姓子。其福寧爲多不。輓首白佛言。甚多甚多。佛言。故不如此善

男子善女人。執持諷誦十無盡藏。其福出彼上。佛復告輒首。云何族姓子。若有善男子善女人。宏誓堅固。在於七地住不退轉。具足諸法而無彼我。從信地乃至六地。眾德具足。諸行皆備。云何族姓子。其福寧多不乎。輒首白佛言。甚多甚多。世尊。佛言。故不如是善男子善女人。執持諷誦十無盡藏。其福出彼上。佛復告輒首菩薩。若有善男子善女人。已過七地進前成佛。吾今已住無彼此想。如我自覺必然不疑。如此等類。徧滿十方。供養如前。從信地乃至七地。其福寧爲多不。輒首白佛言。甚多甚多。世尊。佛言。故不如是善

男子善女人執持諷誦十無盡藏。其福出彼上。佛復告。輒首菩薩。若有菩薩摩訶薩。已得無生無起無滅法。心如虛空不可玷汙。唯須權慧詣樹王下。如此等類。始從信地乃至八地。具足眾行成佛不久。徧滿三千無量世界。云何族姓子。其福寧爲多不。輒首白佛言。甚多甚多。世尊。何以故。是善男子善女人。已住佛畔。便名爲佛。況復十方無量世界。從信地乃至八地。故不如九地菩薩摩訶薩一念之德。佛言。若有善男子善女人。執持諷誦十無盡藏。如我今日成如來至真等正覺。明行成爲善逝世閒解。無上士道法。御天

人師猶上不得十無盡藏。若有善男子善女人欲得修習十無盡藏者。盡知十方如來同時得道者。同時般泥洹者。盡滅眾生心識想著者。欲在前成佛者。欲攝眾生同如佛心者。當修習是十無盡藏。爾時釋迦文佛在於大眾而說斯頌。

吾今雖成佛 由昔勸助報 正法不可移

大道無若干 自念過去世 承事供諸佛

勸助以道法 捨形至無形 復於無數劫

不獲無盡藏 建意無有想 漸至無爲岸

如來等正覺 三達六通慧 勸助眾行具

乃獲無盡藏 本願今得報 故號天中天
斯由勸助福 自致無極尊 江海可竭盡
山谷可崩落 日月有虧盈 法藏不可盡
諸佛權慧道 其力不可思 育養諸眾生
慈愍轉於法 或現在母胎 欲化於父母
復作轉輪王 統領無數土 快哉斯果報
獲此無盡藏 修行得成佛 變化無有窮
昔在無數世 作福建功德 勸助爲第一
無有出是上 金銀七寶具 色相無有比
皆由勸助報 無盡諸法藏 虛空無所有

由造形色相 此法甚深妙 眞諦不可毀

爾時釋迦文如來說此偈已。復告善男子善女人。若有菩薩摩訶薩。從初發意乃至成佛。令一切眾生如已不異者。當習是十無盡藏。爾時如來至眞等正覺。將欲說法轉於法輪。便入無盡定意。感動十方恆沙諸佛。應時面見。同時一響各說頌曰。

現法離四義 如來無著行 修一得佛道

念進無有怠 三向平等空 號曰無盡藏

不捨十行本 是謂如來藏 佛法不思議

如空無所受 我識不見我 是應無盡藏

佛行非有盡 所演不可量 慈愍一切故
示現無所有 如來諸佛相 成道無差特
隨彼眾生意 知相有高下 我今無有等
厭患眾生苦 以道自攝意 降伏諸外道
一切諸法本 無緣亦不合 道從平等覺
乃逮如來慧 諸佛不思議 法本不思議
緣報不思議 分別不思議 我住經千劫
佛佛自稱歎 未能盡法藏 毫釐有損減
我等已成佛 具足空法身 昔修無盡藏
自致人中尊 欲界多塵勞 斷欲非餘處

於欲能離欲 皆由無盡藏 雖住不處住

亦無形色相 分別諸識著 佛識無形相

如來無色相 爲眾生現相 無著無染汙

如來身亦空 徧滿十方界 如今等正覺

本識不可思 演說無盡義

是時十方諸佛說此偈已。八方上下六反震動。座上有六百比丘。本趣羅漢。尋時迴意。便逮無盡藏。有三億眾生。亦得無盡法藏。

如來品第八

爾時輒首菩薩白佛言。世尊。諸族姓子。云何修習無

盡法藏。佛言。若有善男子善女人。欲得修無盡法者。當修五苦法門。云何五苦法門。若有眾生見十方界。當聞苦慧若識。便能隨形而往接度。是謂一法。復次族姓子。若有善男子善女人。欲觀無量世界眾生所念。空無所有。欲得空苦慧者。當建此意。亦不退轉。是謂二法。復次族姓子。諸比丘比丘尼優婆塞優婆夷。皆得平等意。行無盡慈。未獲者獲。未得者得。未度者度。是謂三法。復次族姓子。若有善男子善女人。居家成就種姓。亦爾。皆知苦慧心不在樂。是謂四法。復次族姓子。若有善男子善女人。如來無量法門。無盡法

藏眾智自在。是謂五法無盡法藏。復次族姓子。若有善男子善女人。欲得具足無盡法藏者。復有五事。云何爲五。諸佛世尊常在等定。有時入虛空觀。分別眾生。有在賢聖法律不在賢聖法律。悉能安處。各充其願。是謂一法。復次族姓子。若欲生天。便當修行諸天戒法。有愛欲天無愛欲天。或時有天著於更樂。不著更樂。能具足二事。悉無染著。乃應無盡法。復次族姓子。復當具足四果報行。便乘神通遊無量世界。云何四果報行。諸佛如來恆處寂寞。若有諸天龍神乾沓和。阿須倫。欲從如來聞真實者。未發問頃。如來已知。

此族姓子當問是義。是謂一法四果報行。佛復告族
姓子。若善男子善女人。心意寂然不欲聞法。如來悉
知是可從是不可從。斯欲聞法不欲聞法。是謂族姓
子第二果報。復次族姓子。若善男子善女人。已得如
來印。便能印可眾生心意。是謂第三果報。復次族姓
子。若善男子善女人。已聞正法。非心所度。非念所測。
皆使平等。無有二想。是謂第四果報。復次族姓子。欲
得具足四神足行。亦當念此四事果報。云何四神足。
於是菩薩摩訶薩。從初發意一地二地。乃至十地。各
有神足行行不同。或有菩薩。已在一地。便得身識。遊

行十方無量世界。未得定意。知眾生心。復有菩薩。既在一地。得佛色相。眾好具足。亦復遊觀十方世界。禮事供養諸佛。世尊雖得身通。未能堪任教化眾生。淨佛國土。復有菩薩摩訶薩。已得神通。禮事供養諸佛。世尊便能說法教化眾生。復有菩薩摩訶薩。已在初地。淨修佛國。未能自知第一地事。復有菩薩摩訶薩。未具宏誓大乘之心。於中便生猶豫想著。如此等。比必墮聲聞緣覺道中。復有菩薩摩訶薩。修治一地。清淨之行。復以神通廣遊十方無量世界。徧知眾生心中所念。然未能度彼眾生安處道檢。復有菩薩摩訶

薩。已在初地得四神足。第一神足名曰苦觀。菩薩得此神足者。恆遊諸佛世界。諸苦眾生得處無爲。第二神足名曰音響。菩薩得此法者。徧遊十方無量世界。諸有眾生應從音響而得度者。聞菩薩所說無不信解。復有神足名曰發意。菩薩得此神足者。徧遊十方無量世界。諸有眾生發意趣道。輒能擁護。令得成就。復有神足名曰感動。菩薩得此神足者。徧遊十方觀眾生心。應從空觀而得度者。是謂初地菩薩摩訶薩。具足是四神足行。二地菩薩復有四事。云何爲四。有菩薩神足名曰滅種。得是神足者。徧遊十方無量世

界。盡知眾生意識所念。滅凡夫種入聖諦境。復有滅神足。得此神足者。徧遊十方無量世界。盡觀知眾生心中所念。有善惡想。能滅惡想入於聖諦。復有神足名曰除垢。得此神足者。徧遊十方無量世界。觀知眾生心中所念。垢欲纏心。便能蠲除。凡夫識念。入於聖諦。復有三巧便神足。菩薩得此神足者。徧遊十方無量世界。觀知眾生心識所念。能建彼意。立三等法。是謂菩薩摩訶薩。得是四神足法。能遊十方無量世界。則能具足二地行法。佛復告族姓子。菩薩摩訶薩在三地中。復有四瓔珞神足。能變此身成無量形。還合

爲一。云何爲四。有本要神足。得此神足者。徧遊十方無量世界。普觀眾生心中所念。如我所念而度脫之。復有法行。然熾神足。菩薩得此神足者。徧遊十方無量世界。盡觀眾生心中所念。見有喜怒無喜怒者。以然熾法本而教化之。復有無形神足。得此神足者。徧遊十方無量世界。觀眾生心中所念。以無心識而教化之。復有三清淨神足。得此神足者。徧遊十方無量世界。觀知眾生心中所念。說三法行使滅三想。云何爲三法行。一者空。二者識。三者我。是謂菩薩摩訶薩。在三地中。具是四神足行。佛復告族姓子。菩薩摩訶

薩住四地中。復當具足此四神足。云何爲四。復有神足名曰無相。菩薩得此神足者。徧遊十方無量世界。從三色天至虛空際。普令眾生得無相法。復有除貪神足。得此神足者。徧遊十方無量世界。盡觀眾生心中所念。以定意法而教化之。復有轉法輪神足。得此神足者。徧遊十方無量世界。轉四無畏不死甘露法。久飢渴者令得充足。復有等慧神足。得此神足者。徧遊十方無量世界。盡觀眾生所念。以平等慧而度脫之。是謂菩薩摩訶薩住於四地。具足四神足行。佛復告族姓子。菩薩摩訶薩。在五地中。復有四神足。云何

爲四。有神足名曰無量門。菩薩得是無量門者。盡觀
眾生心中所念。以解脫慧而度脫之。復有行神足得
此神足者。徧遊十方無量世界。悉了眾生所念。卽說
法本通達法門。復有受報神足門。得是神足者。以現
行法報而度脫之。是謂菩薩在五住地具足。是四神
足行。佛復告族姓子。菩薩在六地中。復當具足四神
足行。云何爲四。有神足名曰墮落。菩薩得此神足者。
徧遊十方無量世界。盡觀眾生心中所念。諸惡果報
應洎淑者。漸與說法。令不墮落。復有無根神足。得是
神足者。徧遊十方無量世界。盡觀眾生心中所念。掘

其根本永斷不生。復有神足名離垢出要。得此神足者。徧遊十方無量世界。盡觀眾生心中所念。令彼眾生得出道要。梵本闕一事佛復告族姓子。菩薩摩訶薩。以在七地名曰不退轉法。便當具足四神足法。云何爲四。有神足名曰眾生身不淨。菩薩得此神足者。能示現惡露不淨。因此教化無數眾生。復有神足名曰道德。菩薩得此神足者。能以正道捨於三道。得阿羅漢。復有神足名曰覺正。菩薩得此神足者。能令眾生皆立信地。令不退轉。是謂菩薩摩訶薩。在七地中具神足法。佛復告族姓子。菩薩摩訶薩。復有菩薩在八地。

中具足四神足。廣大無邊。非聲聞辟支佛所能及。知云何爲四。或有神足本未發道心。菩薩得此神足者。令彼眾生始立信地。餘行未就。復有神足名曰無生。菩薩得此神足者。一一觀察諸行無我。復有神足名曰貪著。菩薩得此神足者。貪樂諸佛相好。復有盡漏神足。菩薩得此神足者。能破一意斷諸漏法。是謂菩薩摩訶薩。在八地中具四神足。佛復告族姓子。菩薩在九地中便當具足四神足法。云何爲四。有神足名曰眾海。菩薩得此神足者。諸有四使趣來向門穢垢已盡。便得入門。心垢未盡不得入門。是謂菩薩在九

地中具四神足。佛告族姓子。菩薩在十地中具四神足。云何爲四。有神足名曰光明。菩薩得是神足者。遊騰十方無數佛土。盡觀眾生心中所念。坐樹王下結跏趺坐。爾乃具足宏誓之心。復有神足名曰無量門。菩薩得此神足者。分別所趣。盡趣一乘。復有神足名曰一念。盡令十方無量眾生一念成道。復有神足名曰莊嚴。菩薩得此神足者。一日之中。盡共莊嚴諸佛刹土。同字同時一時成道。是謂十地菩薩摩訶薩具四神足法。

菩薩瓔珞經卷第五

音釋

輒乳充切

羯居竭切

瑕何加切

謬靡幼切

玷都念切

掘

渠勿切
穿也

菩薩瓔珞經卷第六

姚秦沙門竺佛念譯

音響品第九

爾時世尊復欲重宣如來神足無量法義。便以一偈徧滿十方無量世界。爾時如來卽說頌曰。

有無從空生 彼聲非我有 聲聲各各異

故說尊法教 佛行不可量 非有亦不無

一音演諸法 由此得成佛

爾時世尊說此偈已。便見十方諸佛世尊。各稱歎說善哉善哉。諸佛清淨眾行齊同。十方無央數世雄最。

勝。同一音響。演說諸法。六度無極。一一度中。皆有無量諸佛種性。無盡之法。不可思議。云何種姓不可思議。如十方佛。盡同一響。以一偈義。普使十方無量眾生。盡入無盡法門。皆同志趣。一日一時。悉皆成道。復以一音徧滿無量恆沙刹土。使彼眾生聞此音聲。自然識縛。永得解脫。時有菩薩名曰解釋。卽從座起。執持威儀。已捨眾妄。曉了諸法。眾智自在。逮不起法忍。偏露右臂。長跪叉手。前白佛言。甚奇甚特。今聞如來一音一響。一度之中。盡說法典。具足眾行。亦非羅漢辟支佛所能逮及。今欲所問。云何以音響之中。具足

如來眾行之法。爲彼眾生先得諸法。後聞此音。乃得覺悟乎。爲音聲中出諸法名耶。爾時世尊聞解釋菩薩所問。卽報曰。善哉善哉。族姓子。汝今乃問空無形法。非是羅漢辟支所及。今當與汝一一分別。諦聽諦聽。善思念之。如來音響如空無形故。出生諸法不可思議。解釋菩薩白佛言。云何世尊。如來音響如空無形。云何復言出生諸法。佛告解釋菩薩曰。如來音響爲有形耶。荅曰無形。又問音響無形響從何出。荅曰。四大因緣有識分別。佛復告族姓子。如汝所問。如來音響如空無形。云何以無形法出生諸法。響從四大

非空法界乎。荅曰不然。佛復告解釋菩薩云何族姓子。如來音響本出四大音響滅者復歸何處。荅曰響無所歸。佛復問曰。若有異空出響乎。荅曰非然。不從異空而出音響。佛言亦非異空亦非此空。將非如來於汝有咎。解釋菩薩白佛言。世尊。自稱如來音響如空無形便能出生諸法。審知此法由如來響乃出生諸法。云何復言於虛空界復出生諸法。如人於冥求明甚爲難得。今我懷疑甚倍於彼。佛復告解釋菩薩曰。云何族姓子。今此諸法名生。云何而有爲從空耶。不從空耶。荅曰。今諸法之法性自本空。空性亦空。空

空自空豈有諸法乎。佛言。如是如是。如汝所言。如來諸法如空無形。四大音響出於四大。如來音響及虛空界豈不異乎。荅曰不然。如我所問。如來音響出本四大。便出生一切諸法。此則不疑。云何虛空復言出生諸法乎。佛言止止。族姓子。今發汝問者皆是如來威神。云何族姓子。如來音響有耶。荅曰無也。云何族姓子。如來音響無耶。荅曰如如。佛復問。如來音響非有非無。當何名此法乎。荅曰此法當稱曰空。佛言空自無形。亦非此亦非彼。亦無中間。云何得稱爲空。解釋菩薩白佛言。如來廣長舌自說空性。非有非無亦

無若干。如我所觀本無此空。況我當復立空名號乎。佛言。族姓子。空非有非無亦無中間。如我今日如來至眞等正覺十號具足。亦非有非無亦無中間。所說諸法亦復如是。何以謗如來言稱空名號出於如來。爾時世尊欲解諸會心中所疑。便告四部眾。如來一音便能出生一切諸法。說此非虛非不有是。但爲眾生計著想故。處迷惑永在四流。如來神智不可思議。如佛識所念以無量行本。悉能識知一切眾生所應果報。亦非羅漢辟支佛境界。是故如來一音盡能出生一切諸法。爾時解釋菩薩。復白佛言。世尊甚奇。

甚特眾生境界不可思議。或有弘誓趣於大乘。或發
羅漢辟支佛心。或樂空定無相無願。復有樂在天人
受福。如此等類。不可思議。彼彼眾生。彼彼心識。所念
不同行。亦非一。云何以一音出生諸法。盡能周徧一
切眾生。爾時世尊告解釋菩薩曰。如來神智無形不
可覩見。有智名曰速疾自在。盡能徧知眾生心識。有
深有淺。皆能分別。時解釋菩薩復白佛言。眾生神識
非有非無。或計有常。或計無常。云何以捷疾自在智。
盡能出生一切智乎。佛告解釋菩薩。今當與汝引喻。
智者以喻自解。云何族姓子。如日天子受四大身十

二由延。內宮牆壁去外牆壁七由延。其閃光照倍明無量。第二宮牆去第三宮牆。復去七由延。光明轉減。乃至第七各相去七由延。光明所照各各不如。最第七牆外復有衛護牆。相去二由延。光明轉復不如。在內第一宮牆名曰如意。隨珠所作。其閃熱如無根本火也。第二牆名曰隨燄珠。所造。其熱如黑繩火也。第三牆名曰燄光影。其熱如燄火也。第四牆名曰勇燄珠。其熱如灰沸火也。第五牆名曰極燄陰。其熱如銅葉火也。第六牆名曰璫璃。其熱如紅蓮華火也。第七牆名曰水精。其熱如青蓮華火也。云何族姓子。此日

天子一日一夜周徧四域行極速疾其光明照四天下。青黃赤白若高若下。城郭丘聚姓字名號悉能目見。一一分別。云何族姓子。眾生無量形品不同。云何日天子光明。悉能照彼盡同一色。爲從日光中出無量光照無量形。爲從一光照無量形。爾時解釋菩薩前白佛言。如我所問。如來一音出生無量諸法。此之音聲出於四大。當來過去今現在。所出言教我則不疑。今日光明性分自爾。云何以言教同耶。佛告族姓子。如來四大所出音響悉各有教。盡能出生一切諸法。諸佛世尊當說法時。亦不念言說是置是。心寂然。

滅不念若干。猶日天子一光所照。普徧諸域。亦不有念。我有所照。其蒙光者。各知所趣。是謂解釋菩薩。如來捷疾自在之智。多有所益。徧知十方有形之識。化而度之。爾時解釋菩薩。復白佛言。如來所出音響。有明無明。有暗無暗。皆能進趣。成於道教。日光所照。多有所傷。樂暗者多。何得以此爲喻耶。佛告族姓子。如人遊空。意迷難悟。汝今如是。未解吾譬。吾今所說。如來音響。出於四大。盡能出生一切諸法。日光天子光。悉能徧照一切有形。一者能出生諸法。二者能徧照有形。有何差別。而懷狐疑。爾時解釋菩薩。深自思惟。

豁然大悟。復重白佛言。善哉世尊。如來至眞等正覺。以無形法以形教授。以無言教法以言教授。令重所啟。唯願如來。以時發遣。使無狐疑。佛言。善哉善哉。族姓子。如來當以權便而發遣之。云何世尊。有常神通。無常神通。自識宿命神通。識他宿命神通。眼識神通。耳識神通。此六法義有何差別。爾時世尊告解釋菩薩。如是如是。如汝所問。此六神通各各不異。今當與汝說。菩薩摩訶薩得有常通。盡觀萬物生生不絕。前生是前生。後生是後生。若經一劫。至百千劫。劫起則起。劫滅則滅。觀見此識亦不腐敗。何以故。無明根深。

不可得敗。復次無常通者。亦復觀見一切眾生有形之類。有生者滅者。從一劫乃至百千劫。劫起則起。劫滅則滅。知彼受形悉歸磨滅而不常存。是謂菩薩摩訶薩有常通無常通各各差別。佛復告解釋菩薩曰。於是族姓子。若菩薩摩訶薩若獲自識通者。便能自見一身二身至百千身。從劫至劫其中經歷盡能自識。我生某國某縣。姓字如是種姓如是。復自識知初受四大受形若干。悉能分別善惡之行。是謂自識通也。佛復告族姓子。菩薩摩訶薩得他人神通智者。從此欲色界乃至有想無想天。盡能分別一一所趣。從

一歲至百千萬歲。從一劫至百千萬劫。其中成敗所
經歷處。盡能分別悉皆識知。是謂菩薩摩訶薩。知他
人神通。佛復告族姓子。菩薩摩訶薩得眼識通。觀三
千大千世界。知受形者不受形者。悉能見有形。從一
歲至百千萬歲。從一劫至百千萬劫。皆悉觀見而不
錯亂。是謂菩薩摩訶薩具眼神通而無所著。佛復告
族姓子。菩薩摩訶薩得耳識通。悉聞十方眾生有苦
樂聲者。無苦樂聲者。聞受善惡報聲者。不受善惡報
聲者。皆悉聞知而不錯亂。是謂菩薩摩訶薩具耳識
神通而無所著。諸本闕是謂六法各各差別。爾時解

四法

釋菩薩白佛言。世尊。有常通菩薩得此通者。盡知有
形質者。生生不絕。無常通者。菩薩得此通者。盡知有
形質者。生生而滅。如今觀見前生。非後生。云何稱言
生生不絕。復次。如來以得自識通。盡識宿命。一身二
身。至百千身。一劫二劫。至百千萬劫。今身非後身。此
身異前身。今識非後識。此識異後識。識離此識。則同
眾生。云何世尊言。稱自識宿命通。又世尊言。菩薩摩
訶薩。得知他人。心通者。盡知一切眾生。心識所。知自
識。心通亦知。己心他心。知他人。心通亦知。己心他心。
此二神通。有何差別。如世尊言。菩薩摩訶薩。得眼通。

者觀見十方從欲界上至有想無想天皆悉觀見有受形不受形者。有受善惡報不受善惡報者。復言得耳通菩薩悉聞十方有苦樂聲無苦樂聲者。聞受善惡報不受善惡報者。眼通亦見耳識亦聞。此二有何差別。唯願世尊重演分別使我等永無狐疑。佛告解釋菩薩曰。菩薩摩訶薩得有常通。覺了諸法。知住法性不變。菩薩摩訶薩得無常通。覺了諸法。皆有變易。是謂無常通。復次。諸法體性自爾。有佛無佛亦無生滅。是謂有常通。復次。諸法無常通者。悉歸磨滅。亦不久存。生生不住。是謂無常通。復次。菩薩摩訶薩得有

常通。便爲具足如來諸法。四意止。四意斷。四神足。五根。五力。七覺意。八賢聖道。是謂有常通。復次。諸法當來過去。現在善法惡法。悉無所有。是謂無常通。復次。菩薩摩訶薩。復觀眾生發三乘道。應得羅漢。求師覺悟。果如所願。必然不疑。復見眾生發緣覺心。獨處曠野。如其所果。必然不疑。復見眾生發菩薩心。如其所願。必然不疑。是謂菩薩摩訶薩有常神通。若有善男子善女人。初求羅漢辟支佛道。及行菩薩道。於中退轉。在凡夫地。不成就者。是謂無常神通。復次。若有菩薩摩訶薩。已得自識宿命通。自知無數宿命。初發道。

意建立功德。承事供養諸佛。世尊定獲道果。復自憶
識。未受四大倚空不著色。是乃名曰自識宿命。或有
菩薩得知他人。心通。彼彼受身。彼彼受形。然不能知
本所從來。是謂世俗他心智。復有善男子善女人。既
得神通。知他人。心智。盡能具足。內外神通。是謂自識
神通知他人。心智。各各有別。若有善男子善女人。已
獲眼通。內外清淨。盡見三世眾生根源。或有菩薩以
天眼見一千刹土。或有菩薩見二千刹土。或有菩薩
見三千大千刹土。或有菩薩以天眼見一佛國。見二
國土。見三國土。於中悉知有退轉者。不退轉者。是謂

菩薩摩訶薩得天眼通。悉知諸界而無所有。佛復告族姓子。若有菩薩摩訶薩。已得耳通。盡聞十方諸刹音響。有善音無善音。有好音無好音。復有善男子善女人。聞一千二千三千刹土。或有菩薩聞一佛國土。二佛國土。三佛國土。乃至無數佛國音響。爾時佛告解釋菩薩曰。於六事法。便得具足。各有差別。爾時解釋菩薩白佛言。世尊。如來大慈說無量辯。一一分別。眾生牢固。說六神通不可思議。非是羅漢辟支佛所能及知。如世尊言。演說六通無著法。行猶懷狐疑。如世尊言。有常神通說泥洹法。無常神通說有爲法。若

使善男子善女人得有爲神通。便爲身意卽滅度乎。佛言不然。解釋菩薩言。一切諸法無生無滅。今日如來身識卽滅度乎。何以復有言教耶。世尊告曰。非不說有常泥洹。亦不說無常神通。但我神通知有知無。故說之耳。爾時世尊復告族姓子。若有善男子女人得有常神通者。便名爲如來至眞等正覺。得無常神通者。此人或在聖地。或在凡夫地。是謂二事各有差別。爾時解釋菩薩白佛言。世尊。如來至眞等正覺。已得眼識神通。盡能了見過去當來。現在三世眾生。乃名曰神通。復言。耳聽過去當來。現在無數世聲。若言

眼見過去色耶。過去已滅。未來色耶。未有形兆。眼識現在法界。則我不疑。唯願世尊。使無聞眾生。永得開悟。爾時世尊。告解釋菩薩曰。諦聽。諦聽。善思念之。吾當與汝分別其義。云何族姓子。如有眾生。已得天眼。徧觀一切有形色相。盡能分別。亦無疑惑。憶過去色。忽然在前。盡皆了之。無有障礙。耳識神通。亦復如是。念亦在前。耳無所障。悉皆了之。解釋菩薩復白佛言。如今所聞。倍生狐疑。云何眼通耳通。見過去事。聞過去聲。如我現在。自識宿命。便能自知宿命事。如我耳識現在。知現在事。云何得知過去未來。佛告解釋菩薩。

薩曰。或有眼通眼定識。或有眼通非眼定識。或有耳通耳定識。或有耳通非耳定識。若菩薩摩訶薩得眼識定通耳識定通。便能見此從初受形至今後身。若大若小其間分別。不失定意通。菩薩摩訶薩亦復如是。入此定意者。觀一佛境界。復壞此界觀無數刹土。於中變現成就五陰。不成就五陰。或現火五陰。或現地五陰。或現水五陰。或現四天下五陰。或現寶山五陰。或現須彌山五陰。或現鐵圍山五陰。或現大鐵圍山五陰。或現人世城郭村聚五陰。遊戲浴池所居處五陰。或現諸天所居宮殿五陰。或現龍宮五陰。或現

八部鬼神五陰。或現欲界眾生形。或現色界作色界
眾生形。或現無色界作無色形。或現小世界作小世
界形。或現千世界二千世界。乃至三千大千世界。或
見眾生受果報不受果報。一時一日一月一歲。成劫
敗劫。清濁好醜善趣惡趣。諸佛出世菩薩翼從。盡能
分別。是謂定眼識通定耳識通。得諸如來神識感動
到十方佛國。承事供養諸佛世尊。復見諸菩薩興致
供養衣被飯食牀褥臥具病瘦醫藥。復見佛國清淨
者不清淨者。復見眾生修梵行者。不修梵行者。見五
趣眾生受行不同所修各異。是謂菩薩摩訶薩得定

眼識通得定耳識通。盡觀過去當來今現在事而無所失。復次菩薩摩訶薩得眼識通。權現無數眾生境界不可思議。便能變化種種珍寶。諸有眾生往取珍寶者。悉施與之。皆令充足。或復示現諸佛國土爲行清淨。皆已畢故。更不造新。是謂菩薩摩訶薩得定識眼通得定識耳通。盡能具足一切眾行。爾時解釋菩薩白佛言。世尊得定眼識通得定耳識通。是等善男子善女人。爲在何地爲供養諸佛幾時。佛言。是善男子善女人。奉持修習定眼識通定耳識通。已供養過去恆沙諸佛。已得總持不退轉行。諸根已具相好成。

就父母端正種姓成就。復有菩薩雖得供養諸佛世尊。從一佛國至一佛國。承事禮敬諸佛世尊。然未得眼識通耳識通。或有菩薩摩訶薩。雖得眼通。未能具足眾行之本。以神足力遊至十方無量世界。承事供養諸佛世尊。或有菩薩摩訶薩。雖得眼通耳通。未得定識者。不能悉知眾生所念。不能淨佛國土教化眾生。或有菩薩摩訶薩。六通清徹。內外無礙。不能具足四法門行。或有菩薩在一佛刹。周旋教化。無所染著。未能備悉眾生根源。或有菩薩。自淨其刹。無姪怒癡。眾生其國土。雖生其國土。不盡苦本。或有菩薩發

弘誓心。若我滅後在已刹土生者。使我國人無三乘之名。此菩薩等不得定眼識通定耳識通。復有菩薩發弘誓心。我本誓願求無上正真道。使我國人盡同一行。國土清淨同一形像。如彼所願已得不疑。如此等菩薩猶未得定眼識通定耳識通。復有菩薩發大弘誓心。如我後成佛時。諸有眾生在我國者。一日成道。盡取滅度。如此等菩薩摩訶薩。猶未得定眼識通定耳識通。復有菩薩發弘誓心。若我後作佛時。使我國土一切眾生同日成佛。如此等菩薩便得定眼識通定耳識通。爾時解釋菩薩白佛言。世尊。頗有菩薩

摩訶薩發弘誓心。若我成佛時。一切眾生皆得一時成佛。不乎。佛言有。過去無數阿僧祇劫。有佛名號住無住如來。至真等正覺。明行成爲善逝世間。解無上士道法。御天人師。號佛世尊。國土名法妙。人壽三萬歲。爾時住無住如來。壽十萬歲。發弘誓心。使已國眾生。同日同時盡成佛道。卽於彼日。盡取滅度。爾時解釋菩薩。復白佛言。頗有如來至真等正覺。發弘誓心。若我後作佛時。使我十方世界。虛空神識。盡得佛道。不耶。佛言不也。何以故。眾生境界。不可思議。虛空邊際。無有涯底。過去滅盡。不可稱量。將來生者。亦無有

限。佛復告族姓子。此賢劫前過去無數阿僧祇劫。過此數已。復過無數阿僧祇劫。有佛名平等如來至眞等正覺。明行成爲善逝世間。解無上士道法。御天人師。號佛世尊。出現於世人壽千歲國土清淨。一日之中。現十方無數盡虛空界有形之類。盡同一日皆成無上正眞之道。卽於一日盡取般泥洹。爾時解釋菩薩。復白佛言。平等如來至眞等正覺。旣成佛已。復使一切眾生十方無量世界虛空無邊際眾生。盡同一日皆成佛道。云何今日復有如來及我等耶。一切眾生乎。云何復有天道。畜生餓鬼地獄道乎。佛告

解釋菩薩曰。止止族姓子。吾先已說得人身者。不說餘道也。爾時解釋菩薩復白佛言。世尊。頗有菩薩摩訶薩發弘誓心。一日之中使五趣眾生同已同日成佛不乎。荅曰。無也。何以故。眾生性行志趣不同。豈當以餓鬼畜生地獄成佛耶。此事不然。何以故。終不以非身得成人中尊。權化示現。可假適濟。佛復告解釋菩薩曰。過去無數諸佛過去本發弘誓心。令一切眾生有形之類。及虛空界。悉令成佛。盡般泥洹。然彼如來至真等正覺。卽於其日。先化三趣眾生。拔其苦本。盡復人身。得人道已。諸根具足。六情完具。然後一

日之中同成佛道。眾相具足。如我今日如來至真等正覺神智自在辯才無礙。悉取滅度。爾時解釋菩薩白佛言。弘誓菩薩教化眾生。其中苦行經無量劫。何以故。不卽於三趣眾生。悉令得佛道乎。佛言。不可得。成道云何。族姓子。此三趣道非三善道。云何欲於中得成佛道乎。此事不然。猶如有人欲求七寶。捨七寶。積反從空求。此人能獲不乎。荅曰。不也。世尊。佛言。如是如是。族姓子。欲使三趣眾生成佛道者。此事不然。因緣品第十

佛告族姓子。若有善男子善女人。受持諷誦定眼識

定耳識者。便獲十功德。云何爲十。於是菩薩摩訶薩。以無等心。獲虛空像。不以言教。教化眾生。淨佛國土。善男子。善女人。自知無數形識本末。知其虛寂。悉無所有。起無生法忍。復次族姓子。若有菩薩摩訶薩。當坐道場。便能具足法界清淨。但爲如來一相無形。或有菩薩得一法印。演說無量如來法教。非從師受。自然而覺。復次族姓子。行一法本。廣大無底。以無相法。生諸法本。云何無相生有相。佛言。如外有色。有青。有白。有赤。有黑。有黃。解釋菩薩言。如來所說神在虛空。非過去當來現在。亦無有五陰名。云何言青。黃。赤。白。

黑。此因緣法不可思議。由眾生自起緣想。有行則有識。由識生癡。則成人身。解釋菩薩白佛言。如世尊言。虛空無形。由四大色地水火風而有色。今問如來云。何名曰地水火風青黃白黑。如世尊言。如青黃白黑空識在空中。何以不說青黃赤白。中青黃赤白盡非空耶。荅曰不然。何以故。各各自空。空性不知有性。有性不知無性。猶如菩薩摩訶薩一念之頃。知無量恆沙刹土諸佛世界。成劫敗劫。一一知之。了知其中而無他想。諸法因緣自生自滅。本我因空生生不滅。復觀無量阿僧祇刹土。觀見諸菩薩受慧莊嚴刹土淨。

眾生種。因彼佛國演布道教。阿僧祇諸佛如來。盡知所出之處。一一分別亦無我想。復於諸佛如來至眞等正覺。聞深法要。奉持承受。不捨諸法之本。爾時菩薩亦不自見有我無我。行菩薩行不見有行。是謂因有起於無想。於中不自滅想。身雖生觀亦不自見無所覺知。已無所覺亦無此念起。吾我想。自效計已便能分別一切諸法。無明緣行。行緣識。識緣名色。名色緣更樂。乃至生老死亦復如是。爾時具行菩薩復作是念。一切諸法因緣相生。因緣相滅。從初發意乃至成佛。一一觀了諸法之相。緣生則生。緣滅則滅。無明

滅則行滅。行滅則識滅。識滅則名色滅。名色滅則六入滅。六入滅則更樂滅。更樂滅則愛滅。愛滅則受滅。受滅則有滅。有滅則生滅。生滅則老病死憂悲苦惱滅。取要言之。五盛陰眾行之本。無倚不可倚。然知起所從來處。於彼自省觀諸法界。法慧清淨不捨辯才。菩薩摩訶薩。思惟分別十二因緣。云何無明緣行。於是善男子。善女人。由無明本造善惡行。盡生十二諸不善本。漸漸成五盛形。是謂無明緣行。爾時過行。比正卽從座起。偏露右臂。右膝著地。叉手白佛言。如我所學十二因緣甚深之法。我今當說。無明緣行便生。

十二。行緣識便生十二。識緣名色便生十二。名色緣更樂便生十二。更樂緣六入便生十二。六入緣愛便生十二。愛緣受便生十二。受緣有便生十二。有緣生老病死憂悲苦惱復生十二。如我所解十二因緣。癡滅則行滅。行滅則識滅。識滅則名色滅。名色滅則更樂滅。更樂滅則六入滅。六入滅則愛滅。愛滅則受滅。受滅則有滅。有滅則生老病死憂悲苦惱滅。佛言。比正不壞法相。猶如幻師住於此地。現其幻法。然彼幻法不損此地。地亦不損幻法。然此幻師造作此化。無有晝夜。其有見此幻者。悉皆信解。菩薩摩訶薩亦復

如是以神足力分別十二因緣。無佛境界見其刹土。本無有世。今現有世。復以有佛刹土能現無佛刹土。以無色刹土現有形色。不以一壞二。不以二壞一。何以故。如彼幻法能使一切世界盡如幻術。猶如一切世界隨人所喜盡爲幻法。幻有若干。非有一法。或有幻法名曰無量諸法門。菩薩得此幻法者。便能現一切諸法。皆如幻法。已得幻法。便得幻智。而不忘失。已得幻智。便得幻行。能盡眾苦。菩薩摩訶薩已獲幻智。幻行。便能於中以幻智盡能分別眾行。一一思惟不失本際。如彼幻法不依內地。現於外法。亦不依外。使

諸眾生現有內法。菩薩摩訶薩亦復如是。不以空性內外分別。言我當越一切世界。亦不以世界在內外空法。何以故。虛空性爾不壞法界。法界不壞空性。菩薩摩訶薩於中得虛空性。種種觀一切法界。亦不觀法界。亦不壞法界。不但不見此世界。有若干形。亦不見眾生善行惡行之報。一一分別究尋其事。性空自爾無能使爾觀。已復觀分別三有。於中計校十二因緣。由癡起眼識。有三行事。云何爲三。猶如族姓子眼見外色。若善不善。盡不分別。斯由本識無明行染。或復善男子善女人。起身口意行三不善法。意漸自悟。

咄我本所造。由無明本。今乃致十二因緣。知從無明不能自改。復次善男子。善女人。由癡致行眾罪根源。由罪而生。我今當念寂靜定意。觀此十二因緣爲由癡耶。爲從行乎。復自思惟無明。憺靜隱匿之法。何由能出諸緣著乎。非我身口行造。無由得生。是謂菩薩摩訶薩分別三行而無所有。菩薩摩訶薩得空觀定意。分別十二因緣。緣癡有行。便有緣報。癡非本源。何由而有行乎。身口意法三事相因。乃生諸法。所以如來於無數劫。分別思惟十二因緣。今得成佛。始得信解。吾初發意求菩薩道。捨身受身分別十二因緣。思

惟苦本未盡其源。今我成如來至真等正覺。乃得暢
達十二因緣。佛復告過行比丘。汝今雖在如來前說
十二因緣。未能具其源本。何以故。本無如來至真等
正覺。住壽經恆沙劫。宣說十二因緣。猶不能盡。何況
汝今欲得盡乎。爾時彼此比丘。在如來前極懷慚愧。將
我得無失神足乎。卽從座起。頭面禮世尊足。便退而
去。

心品第十一

爾時座上諸欲天人。諸色天人。龍鬼神乾沓耆阿須
倫迦留羅眞陀羅摩休勒。聞如來至真等正覺說此

甚深之法。皆有渴仰欲得見如來正心定意。爾時世尊。知眾生心中所念。欲令眾會心定三昧。爾時世尊。卽於座上入面現定意。令諸菩薩摩訶薩皆悉見之。去此十五江河沙數。有佛土名曰如幻。佛名等心如來。至眞等正覺。明行成爲善逝世間。解無上士道法。御天人師號佛世尊。彼國清淨不倚想著。無有餓鬼畜生地獄道。所行純厚不自計我。心不趣小亦無聲聞辟支佛音。令一切會皆悉見之。爾時世尊從彼定起。復入月盛定意。令一切眾生盡見金色。悉聞十方諸佛說無想行。云何爲無想。諸法寂然。澹怕無形。諸

法不起忍。諸恚怒。諸法攝心不起外想。諸法定意現已國淨。諸法善觀。不以劫數爲限。諸法樂行。永離恩愛。諸法現明。不生癡想。諸法去貪。具足施度。無極。諸法無所犯。具足戒度。無極。諸法不起恚想。具足忍度。無極。諸法精進。無有懈怠。具足進度。無極。諸法不與亂意。攝心不起常樂於禪。具足禪度。無極。諸法盡除愚惑。無他異念。具足智度。無極。復有名四意止。菩薩摩訶薩所修行法。云何爲四意止。若有善男子。善女人。分別內身意止。從頭至足。一一分別。生不淨觀。自觀己身。觀他人身。自觀己心。觀他人心。內外諸法悉

皆如是。菩薩摩訶薩復自觀諸法四意斷四神足五
根五力七覺意八賢聖道。是謂菩薩摩訶薩無想行。
佛復告族姓子。菩薩摩訶薩自觀身已觀他人身。一
一分別從頭至足起不淨想。是謂菩薩摩訶薩觀內
外身悉無所有。爾時世尊卽說此偈。而歎頌曰。

不倚心意識 分別諸行本 道存無想念

乃應賢聖諦 佛慧無邊涯 不見有合離

成佛由無想 乃應果實行 佛道本無二

亦復無一想 真人慈盡普 示現若干法

本我不造我 染有成五陰 聖諦慧無量

進趣自滅意 不有亦不無 生死起染著

滅想自成佛 故號天中天 生值人道難

六根完具難 滅十二緣難 生天受福難

遭遇賢聖難 入定除想難 觀內外身難

面受聖教難

爾時世尊說此偈已。座上諸天人。民天龍鬼神八部
之眾。皆發無上正真道意。復有無數眾生。得不起法
忍。

菩薩瓔珞經卷第六

菩薩瓔珞經卷第七

姚秦沙門竺佛念譯

四聖諦品第十二

爾時佛告文殊師利。過去無數阿僧祇劫。有佛名大
身如來。至真等正覺。明行成爲善逝。世閒解無上士
道法。御天人師。號佛世尊。刹名空寂。正於此處。成無
上等正覺。與四部眾說微妙法。四賢聖諦。廣化眾生
皆令至無餘泥洹界。而取滅度。云何四聖諦。一爲無
量聖諦。菩薩得此聖諦者。一念之中。自滅心垢。亦能
滅他心垢。不見塵垢。有盡無盡。二名行盡聖諦。菩薩

得此聖諦者。一念之中。盡令眾生覺了身口意行。若善若惡。盡趣道門。悉令眾生至無餘泥洹界。三名速疾聖諦。菩薩得此聖諦者。能使一切眾生彈指之頃。盡成佛道。無限無量。不可稱數。一日成道。復令無數阿僧祇刹土眾生之類。各生善心。興敬供養諸佛世尊。香華繒綵。作倡妓樂。阿僧祇諸佛刹土。化作一寶蓋。而用供養。出過諸天世人上。盡持天上自然飲食。衣被床臥具。病瘦醫藥。一念之頃。悉能成辦。四名曰等聖諦。菩薩得此聖諦者。能使一切眾生盡同一趣。無若干相。於無餘泥洹界。而般泥洹。猶如燄幻野馬。

世界空寂無形不可護持。菩薩摩訶薩亦復如是。教化眾生淨佛國土。亦不見眾生有得度者。亦復不見受化者。非不有眾生。非不無眾生。非不有淨眾生。非不無淨眾生。非不有濁。非不無濁。非不有受胎。非不無受胎。非不有非。非不無有。非不有生。非不無生。非不有死。非不無死。一一分別悉無所有。知十二因緣亦復如是。從癡至十二因緣。非有非無。猶如野馬。世界不可護持。無近無遠。雖化眾生不見有化。菩薩摩訶薩亦復如是。觀諸如來至真等正覺。不見有起。不見有滅。亦不有想。亦不無想。如來至真等正覺以無相之法教化眾生。

淨佛國土。雖有佛無有佛想。雖有法無有法想。雖有
比丘僧無有比丘僧想。是謂文殊師利菩薩摩訶薩
已得無想法者。住不退轉而無有礙。譬如有人於夢
中或爲國王。或爲轉輪聖王。覺已便憶夢中所作。亦
不忘失。菩薩摩訶薩亦復如是。觀諸衆生成如來。至
眞等正覺。亦不見有成相。亦不見無成相。爾時佛告
諸會大眾。爾時大身如來。說法清淨無形不可見。豈
異人乎。莫造斯觀。何以故。爾時大身如來。今文殊師
利是。爾時世尊便說此偈。

過去無數世 佛號大身尊 於此成正覺

無有邪部行 恆以無相法 分別四聖諦
權現遊世界 現有所諮受 佛道不思議
神力不可極 教化眾生類 盡同爲一相
吾今自成佛 三界第一尊 不爲彼所染
不更生老死

爾時世尊說此偈已。有無量眾生皆發無上正眞道
意。

成道品第十三

爾時有菩薩名無畏。曾供養過去無數諸佛。已得總
持分別三世成敗所趣。卽從座起。偏露右臂。叉手長

跪白佛言。唯然世尊。今聞如來至真等正覺說四賢聖難有之法。未曾所聞未曾所見。若有善男子善女人。受持諷誦四聖諦名者。便能與人作良祐福田。何以故。世尊。此善男子善女人。興建弘誓不自爲身。欲於空際濟度眾生。皆得至無餘泥洹界。而般泥洹。菩薩摩訶薩得此四聖諦者。觀了眾生悉無所有。空觀菩薩不自有身。亦無眾生執弘誓之心。以空舉空於無數劫積功累德。觀見諸佛出現於世。分別諸法無有形貌。不著世利衰毀譽稱譏苦樂。亦知眾生我人壽命當來過去現在心識。一一分別能使成就。爾

時無畏菩薩復白佛言。云何世尊。眾生之類不可稱記。非是羅漢辟支所及。過去恆沙無央數佛。頗有發意求菩薩道。言我久久當成無上正真之道。我能盡虛空際。知虛空際。眾生根本。已能分別虛空眾生。復能分別識有趣無趣。如是等眾生。盡令一日之中。能使成道。有此不乎。爾時世尊告無畏菩薩曰。當來過去。今現在。識非汝境界所能分別。今發汝問者。皆佛威神。何以故。如來至真等正覺。乃能一一宣暢深法。佛言。族姓子。過去識如汝所問。盡知識流轉天上人中。四道。乃至八部。識所經歷。所趣盡能分別。無畏菩

薩白佛言。如來至真等正覺。發弘誓心。盡能拔濟。過去當來。今現在。云何一日之中。盡得成佛耶。佛言。無畏菩薩所問甚大。今當爲汝一一分別。知其所趣。所問。過去識不於過去中。使過去識令得成佛。不於現在中。使現在識令得成佛。不於未來中。使未來識得至成佛。何以故。過去識非過去識。未來識非未來識。現在識非現在識。無畏菩薩當知。過去成佛有三事。行云何爲三。有初心。有生心。有眾生心。云何爲初心。無畏菩薩當知。本無如來至真等正覺。卽於彼而教化之。同日同時。盡成佛道。是謂初心。云何生心。所謂

生心者。已受塵垢。方當滅心除垢。云何爲眾生心。如有眾生從劫至劫。乃至百千劫。復盡無數生死塵勞。然此菩薩摩訶薩。要當滅彼無數塵勞。及濟無數眾生。是謂無畏菩薩。於過去中成就三事。無畏當知。如來至真等正覺。於當來世亦當具三法。云何爲三。如當來心未受現在。是亦可進。復次無畏。未來心已經一日。便有塵垢。菩薩摩訶薩。當滅一日塵垢。族姓子。當知。未來移轉。從一劫至百劫。乃至無數阿僧祇劫。如來至真等正覺。如此身識。及與塵勞。是謂於未來中。當具此三法。佛復告族姓子。如來至真等正覺。於

現在中復當具是三法。云何爲三。初識現在未染塵勞。卽令彼識一日滅度。若一若二便生塵勞。能滅一二及與塵勞。然彼乃得成佛。佛復告族姓子。若於現在從一身至百千身生諸塵勞。是謂菩薩摩訶薩。於現在中具足三法。佛復告無畏菩薩。過去初心一度者。卽是過去普施如來至真等正覺。過去生心蒙得度者。卽是無等如來至真等正覺。過去眾生心蒙得濟者。卽是源本如來至真等正覺。未來初心蒙得度者。卽是空色如來至真等正覺。未來一二蒙得度者。卽是空門如來至真等正覺。未來無數身蒙得度

者。卽是定意。如來至真等正覺。現在初心得度者。卽是無身。如來至真等正覺。現在一二身得度者。卽是善星宿。如來至真等正覺。現在無數身得度者。卽是月光。如來至真等正覺。云何族姓子。汝於九品中。何所志趣。爲欲從過去初心耶。過去生心耶。過去眾生心耶。爲欲從未來初心耶。未來一二心耶。未來無數劫心耶。爲欲從現在初心耶。現在一二心耶。現在無數心耶。爾時無畏菩薩。前白佛言。如我初發心。求無上正真道。未能自知。爲求何道。今聞如來說九品行。今始欲發弘誓大心。欲度過去初心。未受塵垢者。佛

言止止。族姓子。汝今已墜墮初心。云何欲得於初心成無上等正覺乎。此則不然。無畏菩薩白佛言。世尊。今於過去初心已墜落。願欲求過去度生心。眾生普同等慧成無上等正覺。佛言。汝今已越此境。墜墮下地。未能成辦。拔濟眾生。成無上等正覺。爾時無畏菩薩復白佛言。云何世尊。於過去塵勞眾生。發弘誓心。得成無上等正覺不乎。佛言。無也。何以故。過去無數已滅已盡。非今見身盡。彼塵勞。以是故。不得成無上等正覺。爾時無畏菩薩白佛言。我今欲過去三分永無所得。在上亦不在下。故不得無上至真等正覺。何

以故。汝本發弘誓心。非彼非此。故不得成。無畏菩薩
白佛言。云何世尊。我今欲捨未來一二捨未來塵勞
復可從現在初心得成無上等正覺不乎。佛言不也。
汝本發意心係有在。非汝本願。無畏菩薩白佛言。世
尊。於未來中捨一心二心。復於未來中捨塵勞眾生。
復於現在捨現在眾生。頗於現在一心二心眾生。使
成無上等正覺不乎。佛言無也。何以故。汝本發意心
係有在。非汝本願。無畏菩薩白佛言。世尊。且捨一心
二心。復捨未來眾生塵勞。復捨現在初心。復捨現在
一心二心。今欲發願於現在塵勞眾生爲可得不乎。

佛言不也。何以故。已過此境。時無畏菩薩白佛言。世尊。今日如來於九品中爲在何地。佛言。吾捨過去三未來三現在三。復可於未來初心成等正覺。使未來初心眾生。成等正覺不乎。佛言無也。何以故。汝身非未來。云何欲得成等正覺。度未來眾生。此事不然。無畏菩薩白佛言。世尊。我今墜落未來初心。復欲發弘誓願於未來一二心成等正覺不乎。佛言然。果汝所願也。何以故。汝本無數阿僧祇劫。恆發弘誓曠大之心。卽於此身當昇上方清淨世界於中成佛。如今汝號無畏如來。至眞等正覺。無畏菩薩得受前已歡喜。

踊躍卽自面見清淨世界。所化眾生如己無異。何以故。皆佛威神令彼悉見。爾時無畏菩薩白佛言。世尊。我令復發弘誓心。供養無數恆沙諸佛。願欲度未來塵勞眾生於中。成等正覺。可獲不乎。佛言不也。汝求道已來。心不中際。除二在塵勞眾生中。成如來至真等正覺。明行成爲善逝世間。解無上士道法。御天人師。號佛世尊。

生佛品第十四

爾時座上有菩薩摩訶薩。名分別說施。昔於無量諸佛世尊造眾德本。卽從座起前白佛言。善哉善哉。世

尊。頗有如來至真等正覺於過去世未來現在一時
一日中知過去三事未來現在三事得成佛不乎。答
曰無也。何以故。如來至真等正覺隨其變化觀見國
土。應適眾生乃有所成耳。猶如菩薩摩訶薩不以國
土爲國土。不以眾生爲眾生。分別法界法智所生。如
來神智非世俗智。世俗智者從欲色界。至有想無想
天。乃謂世俗智。今日如來至真等正覺已過此智。云
何出生諸法。成如來至真等正覺乎。此事不然。何以
故。如如來如。世界如。諸法性如。不思議如。未來如。於
彼世界劫數如。如來劫數如。一如不二如。諸有如。諸

法性空如。亦不生亦不滅。亦無著斷。諸佛世尊所出名號。於彼劫數無限無量。不可稱記。不見有長亦不見短。亦不見生亦不見滅。云何出生諸法。無形不可見。未來未起。無記不見有記。如無形法種種異。名句身亦爾。味身亦爾。無各各名身。無各各句身。無各各味身。何以故。一切諸法各各虛空。亦不有善亦不有惡。亦不有福非不有福。或有行或無行。爾時有菩薩名無盡慧。得此性空如如無法。卽從座起白佛言。我今堪任於如來前說有行無行如空性如如法。佛言。善哉善哉。族姓子。恣汝所說。無盡慧菩薩白佛言。若

有善男子善女人。修習有行無行。便能具足一切諸法。成等正覺。云何有行無行。諸法不生不滅。無過去當來。今現在。是謂無行。必終諸法。分別過去當來。今現在。是謂菩薩有行。無量有名。身不見本末。無量有句。身不見有本末。無量有味。身不見本末。是謂菩薩無行。若善男子善女人。知三世法有生有滅。於中分別悉無所有。是謂菩薩有行。爾時無盡慧。復白佛言。未究竟法。使令究竟。未滅盡法。使令滅盡。是謂菩薩無行。若有菩薩摩訶薩。於過去當來。今現在。不見有量。不見無量。是謂菩薩有行。復次善男子善女人。初

生道心行無上正眞道。不以稱譏苦樂利衰毀譽甘樂其中。是謂菩薩無行。如三千大千世界其中眾生一意一心。分別三世斷滅之法。是謂菩薩有行。復次善男子善女人。於無量劫中行勤苦行。欲得聞受如來言教。是謂菩薩無行。復次善男子善女人。行四等心。不以四等以自稱歎。是謂菩薩有行。不染不汙無過去當來今現在。是謂菩薩無行。若善男子善女人。非義非無義。非有成非無成。亦不有對亦不無對。是謂菩薩有行。或以國土清淨無所染。自不見國土有所成就。是謂菩薩無行。若復於諸法不生妄見而無

所起。以無盡法能自瓔珞。是謂菩薩有行。亦不有亦
不無。是謂菩薩無行。復次善男子善女人。觀一刹土
如空無異。不以異刹係在一國。是謂菩薩有行。復自
觀見本有三世諸佛菩薩摩訶薩。有過去當來今現
在。是謂菩薩無行。復次族姓子若善男子善女人。一
一分別界非我界。世非我世。有非我有。是謂菩薩有
行。復次族姓子。分別三界行無所行。不見作亦不見
不作。是謂菩薩無行。爾時如來問無盡慧菩薩曰。汝
住何等法而說此乎。無行起於有行。有行起於無行。
何由而行從如來。而自說有行無行耶。無盡慧菩薩

復白佛言。本從自覺。如今始果。唯願世尊敷演宣暢。佛言。善哉善哉。善男子。如汝所言。善思念之。今日如來當爲汝敷演其教。云何族姓子。汝本發意成無上等正覺。爲從有行爲從無行。荅曰。不從有行。不從無行。佛言。云何族姓子。若不從有行。不從無行。云何得成等正覺乎。荅曰。有如如無。亦如如是。故不從有行。不從無行。佛言。汝本何以不發此問。吾先已說有行無行。

本末品第十五

爾時世尊將欲示現菩薩之行。卽入本淨三昧。令一

切眾生悉見過去未來現在諸法本末。復令眾生見諸佛無量世界諸佛世尊。有成就者。不成就者。或從一地乃至十地。有現在身行。不現在身行。令一切眾生一一分別。爾時如來無所著等正覺。將欲度眾生。便笑從面門出大光明。乃照無量恆沙刹土。從欲界上至有想無想天。悉見光明。於彼光明演出無量眾生根本。云何爲眾生本末。於是善男子善女人。修行一法無量智慧。便能具足。淨佛國土教化眾生。爾時世尊告諸會等諸無著行。云何無著行。從初發意乃至成佛。五十四法不著空行。於是善男子善女人。常

當思惟不離須臾。云何爲五十四。一者分別五陰起。亦知起滅亦知滅。然彼五陰有生無生。有聖行無聖行。有空觀無空觀。若善男子善女人。分別五陰何由而生。何由而滅。色本無生。如今有生。解色非有非無。或有色有。或有色無。過去當來。今現在色亦復如是。本無有色。不見本色。於過去中不見過去色。於未來中不見未來色。於現在中不見現在色。過去色非現在色。非未來色。未來色非過去色。非現在色。現在色非過去色。非未來色。菩薩摩訶薩。盡能分別一一悉知。復次善男子善女人。分別痛法解知痛無所起。觀

過去痛本無此痛。亦知此痛非有過去。過去痛非未來現在。未來痛非過去現在。現在痛非過去未來。何以故。未來痛本無此痛。若善男子善女人。觀現在痛亦非前痛。亦非後痛。非過去痛。非未來痛。痛亦不自知痛。然後乃知本淨末淨。若善男子善女人。復當思惟過去五陰想。法本無此想。過去五陰想不知未來現在想。未來想不知過去現在想。現在想不知過去未來想。想無有想。若善男子善女人。於未來中分別未來想。未來想不自知未來想。未來想不知過去現在想。未來過去想不知未來。過去想過去想不知未來。

來現在想。若善男子善女人。於現在中分別過去想。亦無有過去想。分別未來想。亦無有未來想。分別現在想。亦無有現在想。於現在過去亦無過去想。於現在未來亦無現在想。於現在想亦無有想。若善男子善女人。復當於過去分別五陰行。何由生復何由滅。過去行亦不有行。分別過去行非過去行。過去行非未來行。非現在行。未來行非過去行。非現在行。現在行非過去行。非未來行。過去未來行非過去未來行。過去現在行非過去現在行。何以故。行本無所有。亦不有行。若善男子善女人。於未來中便當具足。

於未來行。於未來行中不見過去行。不見現在行。於未來中不見未來。過去行不見未來。現在行亦不見未來。現在行。何以故。本無有此行。若善男子善女人。於現在中復當分別。過去行亦無過去行。亦無未來行。亦無現在行。於現在行觀現在過去行。亦不見現在過去行。於現在觀現在未來行。亦不見現在未來行。觀了諸行悉無所有。若善男子善女人。於過去中觀過去識。亦不見過去識。於未來識亦不見未來識。於現在識亦不見現在識。於過去識亦不見過去未來識。於過去中亦不見過去現在識。亦不見識。若善

男子善女人。於未來中不見過去識。未來識。於未來中不見未來過去識。不見未來現在識。若善男子善女人。於現在識。不見過去識。不見未來識。於現在中不見現在過去識。不見現在中未來識。是謂善男子善女人。分別五陰本末空也。

菩薩瓔珞經卷第七

菩薩瓔珞經卷第八

姚秦沙門竺佛念譯

非有識非無識品第十六

爾時形響菩薩白佛言。世尊。向聞如來至眞等正覺。已說眾生根本。如我今日欲承如來威神說有識無識。唯願世尊聽者。果敢當說。佛言。族姓子。樂說便說。形響菩薩卽於佛前以偈讚佛。

世尊大弘誓 知眾生根源 今曰已得聽

神尊口言教 本從無數佛 恆求聞此要

今蒙聖尊教 聽說有無教 昔我無數劫

承事諸聖尊 如我今已獲 音響辯第一
相亦不有相 亦不見有無 無塵無諸垢
今號人中尊 人生本無生 況我復有生
以我無生意 欲說小慧本 不敢以愚情
宣暢如來教 自憶昔行本 唯聽不敢疑
生死無有量 受身復受身 至竟懷狐疑
唯聽敷演之

爾時形響菩薩說此偈已。前白佛言世尊。解第一義
不別彼識此識者。是謂有識無識。不見有行執不見
無行執。諸法一相。悉無悉有。是謂菩薩摩訶薩。有識

無識分別種姓。此清淨識。此非清淨識。我相好成就。彼相好不成就。悉能觀了。而無所有。是謂菩薩摩訶薩。有識無識分別時節。觀見諸佛。此劫有佛。彼劫無佛。不以有佛而懷喜悅。正使無佛亦復不感。是謂菩薩。有識無識。我復觀見眾生之類。有權方便者。無權方便者。於中不起想行。是謂菩薩。有識無識。復觀眾生。知其年歲限數。或有眾生應從前劫而得度者。復有眾生應從後劫而得度者。或有眾生應從現在劫而得度者。亦不見此劫有度無度。是謂菩薩。有識無識。爾時有菩薩名眾相具足。卽從座起。前白佛言。世

尊。我亦堪任於如來前說有識無識。復以此偈而說
頌曰。

於恆沙諸佛	造此眾德業	心念等正覺
積行識宿命	不著我人壽	生死無根本
道相無形兆	今遭人中尊	三世平等慧
非識非無識	行盡不造行	乃授弟子決
一識亦無一	覺悟深法要	超越諸佛刹
無量諸佛刹	本從無數世	聞說乃得悟
願於如來前	聽說識無識	分別深妙法
今遭人中尊	盡達泥洹境	唯願聽說之

爾時眾相具足菩薩白佛言。世尊。如我今日號曰眾相具足。相起不知相起。相滅不知相滅。是謂菩薩摩訶薩有識無識。眾相具足菩薩白佛言。世尊。如我自念。昔從識慧如來至真等正覺。聞說此要。諸有眾生從初發意。乃至成佛。不見識想。是謂菩薩有識無識。若善男子。善女人。一一分別六衰六入。知過去衰非過去衰。知未來衰非未來衰。知現在衰非現在衰。於中不起想著者。是謂有識無識。種姓生菩薩白佛言。世尊。今日於如來前。聞音響菩薩說有識無識。復聞眾相菩薩說有識無識。云何世尊。所言識云何爲識。

佛言。如空等耶。種姓生菩薩。復白佛言。世尊。云何如空等也。佛言。不生不滅不著斷也。種姓生菩薩。白佛。今問如來識所起。乃以空報我耶。佛言。不然。我今說識非有非無。故號有識無識。種姓生菩薩言。識爲有相爲無相乎。佛言。識亦非有相非無相也。種姓生菩薩。白佛言。云何識非有相非無相乎。佛言。本不有相亦非今相。故曰本識非今識。今識非本識。故曰識非有相非無相也。爾時種姓生菩薩。白佛言。若使有相非識無相非識。何以故。說識識。佛言。隨識所起。識起則起。識滅則滅。是故非有相非無相也。佛復告族姓。

子云何種姓生菩薩。汝今識有乎。荅曰無也。何以故。無形無像。非今有非過去有非未來有。佛言。汝已自說識無有識。非今非未來非過去。汝今言是誰乎。荅言。欲言識耶。種姓生耶。佛言。我不問此識菩薩生。但問識爲有爲無。荅曰。識非有非無。佛言。如是如是。族姓子。爾時種姓生菩薩白佛言。云何世尊。如今日如來至真等正覺。爲從識說有說無。爲不從識說有說無。佛言。汝以何等義而問如來。種姓生菩薩白佛言。向如來問。汝今說有識無識乎。有當來今現在過去乎。無當來今現在過去乎。我報曰無也。世尊。如今世

尊言亦無今當來過去識。我與如來識何所在。佛言
我已先說非有識非無識。但爲如來至眞等正覺。以
若干法覺悟眾生。云何族姓子。若善男子善女人體
知此法者。便能具足一切諸法。爾時有菩薩名曰力
盛。卽從座起復白佛言。我亦堪任說有識無識。力盛
菩薩卽於佛前而說頌曰。

本從十力尊	聞此有無識	賢聖八等道
演暢無礙慧	音聲各各異	眾生界不同
施慧無等想	稱號爲十力	若我後成佛
分別諸法界	從一行無二	唯願聽說識

道本從我生 由我不生識 計了無思想

非有識無識 積小至大行 乃自致覺悟

生死非可量 神識豈可盡 我今承尊神

少欲自演說 唯願在聖顏 得近諸佛藏

爾時力盛菩薩說此偈已。便白佛言。云何世尊。若有分別如來十力不可沮壞。云何如來十力不可沮壞。一者如來發意求無上等正覺不可沮壞。是謂菩薩有識無識。復知和合彼此不見本末。是謂菩薩有識無識。觀眾生行本了自然。乃知無量本所從來。是謂菩薩有識無識。一切諸法本無有形。積由癡故便生。

此識分別此癡不知所從起滅。是謂菩薩有識無識。分別眾智有三事行本。從有明還墮四顛倒。於四顛倒了爲幻化。亦不見倒亦不見非倒。是謂菩薩有識無識。復於四事觀眾生本末具足五行者尋能思惟。卽成五事。若善男子善女人。於本無行行無行跡。何謂爲五。一者念。二者轉念。三者本。四者癡。五者無盡。是謂菩薩摩訶薩有識無識。復有識法不可思議。無惑善權非人所測。有四事行。覩見諸佛刹土有生起滅。便能成就不見起滅。是謂菩薩有識無識。如來至眞等正覺觀過去當來現在。亦不見過去當來現在。

根本。若生五趣。受五趣眾生形已。得分別五趣。隨彼所入。復能分別受有形根無形根。若菩薩摩訶薩已受天根。不受龍根。雖然欲受龍根。便能降諸法雨。若善男子善女人。得閱叉根離彼閱叉根。受阿須倫根。復能具足有識無識。捨彼阿須倫根。受彼乾沓耆根。捨彼根已。便能具足有識無識。眞陀羅摩休勒人。與非人亦復如是。是謂菩薩摩訶薩通盡法藏不可思議。

無量品第十七

復次善男子善女人。菩薩摩訶薩復能盡知諸佛設

教有定有量無量。云何族姓子。菩薩摩訶薩諸佛世
尊入此三昧。盡知諸佛所設言教。有量無量。盡能知
一切諸佛說口行說身行說意行。或復示現遊十方
世界。度東方無量世界。度所度界。不失東方諸佛設
教。度南方無量世界。度所度界。不失南方諸佛設教。
度西方無量世界。度所度界。不失西方諸佛設教。度
北方無量世界。度所度界。不失北方諸佛設教。東北
方無量世界。度所度界。不失東北諸佛設教。東南
方無量世界。度所度界。不失東南諸佛設教。西南
方無量世界。度所度界。不失西南諸佛設教。西北

方無量世界度所度界。不失西北方諸佛設教。復遊上方無量世界度所度界。不失上方諸佛設教。復至下方無量世界度所度界。不失下方諸佛設教。爾時世尊出廣長舌放大光明。普照無數十方世界。盡令眾會聞如來至真等正覺。說甚深設教度所度界。此有十八慧明。於是族姓子族姓女。便能具足如來設教。能使界有非界想。能使非界有界想。於彼世界說一觀法。是謂善男子善女人於十八慧明成就一法。復次善男子善女人。豫察未來無數世事。及知過去現在佛非佛菩薩非菩薩。是謂菩薩於十八慧明成

就二法。復次善男子善女人。過去無量無邊無數盡
不見盡起不見起。是謂菩薩於十八慧明成就三法。
復次善男子善女人。內外分別四非常行。於中自觀
身行具足者。是謂菩薩於十八慧明成就四法。復次
善男子善女人。佛界無量不可思議。便能分別諸佛
二事癡愛。悉知性空。是謂善男子善女人於十八明
慧成就五法。復次善男子善女人。若能一一觀內外
空。我非彼有。彼非我有。一一知空寂而無所有。是謂
善男子善女人於十八明慧成就六法。復次族姓子。
虛空無相。不可以與虛空作相。於中自分別身如彼。

空等者。是謂善男子善女人於十八明慧成就七法。復次善男子善女人若有形無形若有聲無聲於中分別悉無所有。是謂善男子善女人於十八明慧成就八法。復次善男子善女人知七觀所生四諦聖法總持十八空行。是謂善男子善女人於十八明慧成就九法。若善男子善女人知無形法性亦在有生亦在無生於中分別悉無所有。是謂菩薩於十八明慧成就十法。復次善男子善女人觀無量世界知有起有滅猶如幻師觀鏡中像。是謂菩薩於十八明慧成就十一法。復次善男子善女人復當知七苦根本云

何爲七。一者知此心不從彼出。彼心亦不在此。二者
彼苦心無我無人。此苦心無我無人。三者諸佛世界
不可思議。如來至真等正覺。盡能度彼量。四者若善
男子善女人。內自思惟。苦空非我。不見有身。如鏡照
像。五者若我受形。斷十身法。亦不見十身。本從我有。
六者以無畏法。不燒彼受。諸有受教者。意不移易。七
者觀行無行。本行我行。未來行非有非不有。非無非
不無。此號七苦行。是謂菩薩於十八明慧成就十二
法。若有善男子善女人。觀無量空於無量空。想不自
生念。亦不見彼念。何以故。以無量世界空無相故。是

謂菩薩於十八明慧成就十三法。復次善男子善女人。復當觀無量四苦。云何爲四苦。於閻浮利內觀無量眾生諸苦源本。一者生苦。知生本末恆念胎厄。二者老苦。形異色變壯意不存。三者病苦。一大增則一病增。四大增則四病增。一大減則一病滅。四大減則四病滅。云何族姓子。則病爲起滅。爲不起滅。爾時菩薩名本滅。前白佛言。世尊。四大本滅非起滅也。佛言。族姓子。云何四大本滅非起滅。答曰。本無四大。今生非本有。是故本滅非起滅。佛言。族姓子。云何爲本滅。云何爲起滅。答曰。本無有形本無有生。不見苦不見

非苦。是謂本滅。所言起滅者。我心現在。能令此心潛伏不起。是謂起滅。佛言云。何族姓子。過去心現在心。過去心非現在心。現在心非過去心。云何本滅起滅。答曰。本者無滅。起者無滅。佛言族姓子。本滅起滅。何由而生。答曰。無生。故生。爾時世尊歎本滅菩薩曰。善哉善哉。族姓子。乃能於如來前快作是言。所謂死苦。臨欲死時。捨身受身中。闕停住。未知所趣。當來過去。現在。當於爾時。神便恐怖。是謂死苦。是謂菩薩於十八明慧成就十四法。復次族姓子。若男子女人。分別無我。苦空非身。具此四行。便能受如來前。云何爲四。

於是族姓子。若善男子善女人。計我無我非有色非無色。解了無所有者。是謂無我。若復善男子善女人。思惟法界苦無根本。說苦非有苦。亦不有生滅。是謂分別苦無苦。如眾生無量想徧滿虛空界。徧知此想本識所生皆盡於空。是謂乃名爲空。云何爲非身。所謂非身。我得我分別。我無我見無見聞無聞。非有見非有聞。是謂非身。是謂菩薩於十八明慧成就十五法。復次族姓子。如我如諸佛如與諸佛法如不異。不有佛法不有如亦復不異。是謂菩薩於十八慧明成就十六法。復次族姓子。若善男子善女人。如來至真

等正覺。於本行願知等分眾生三毒多少。不見三毒
三清淨法。是謂菩薩於十八慧明成就十七法。復次
族姓子。若善男子善女人。自念過去無數恆沙劫。復
知現在無數恆沙劫。復知當來無數恆沙劫。於中一
一分別而無所有。是謂菩薩於十八慧明成就十八
法。若善男子善女人。分別十八慧明在大眾中無所
畏懼。猶勇健國王有所典領。有親附者皆承王教。無
有闕失。菩薩摩訶薩亦復如是。得聖慧法教。以法印
所封。則能備悉無量慧門。云何爲無量慧門。諸佛不
可思議。諸佛刹土不可思議。諸法不可思議。諸法刹

不可思議。比丘僧不可思議。僧法不可思議。僧刹不可思議。如此法行復有四事。云何爲四。一者本從無數經歷劫限。恆爲一意而不錯謬。若善男子善女人守一行本。知有盡無盡。知諸佛有盡無盡。乃能具足平等道行。爾時有菩薩名月光照。卽從座起白佛言。世尊。我今堪任說有盡無盡諸法門行。云何菩薩摩訶薩於四法本具足五行。便能盡知如來根本。云何爲四。一者在世盡知去就。分別道法世法。是謂成就一法。復以無形色相。定意感諸國土。於彼國土教化眾生。示現無爲之教。是謂善男子善女人成就二法。

復次善男子善女人。於己身法不自見身。能度於無量眾生。終不捨眾生法界。是謂成就三法。復次善男子善女人。分別如來三法行本。云何爲三法行本。一者經行。可去知去。可來知來。可坐知坐。繫意明想。心不憤亂。二者坐禪。若欲詣座。結跏趺坐。便去眾想。一意一心。不轉其身。終竟禪定。初不錯亂。若復興作施諸善事。所造必成。無他餘想。是謂於三法中成就四法。復次善男子善女人。於過去當來現在。盡知當生未生已生。便能於中作師子吼。不失本行之法。是謂成就五法。復次善男子善女人。菩薩摩訶薩當復覺

知如來三行。如來禪定非世俗禪。亦非羅漢辟支佛禪。亦非一地二地乃至十地禪。何以故。餘禪有限。如來禪者亦無有限。爾時世尊告月光照菩薩曰。云何族姓子。爲世俗禪爲學禪爲無學禪。從一地乃至十地禪。月光照菩薩白佛言。世尊。如我從如來所聞。其中諸事。諸有欲界眾生。若男子女人。從初發意乃至成佛。初在道地。未處菩薩位中。便得三禪。有過去禪。有未來禪。有現在禪。是善男子善女人。雖得此三禪。正可自知身中過去身。身中未來身。身中現在身。未能知他身中過去身。未能知他身中未來身。未能知

他身中現在身。如此善男子善女人。云何知身中過
去身。於是世尊。若坐禪時。便自觀身起不淨想。便自
思惟。咄我此身。爲磨滅法。一意一念。唯知不淨。未能
知其所趣。爾時善男子善女人。復自思惟。我今捨此
身。已當更求觀。如我今身解知無我。然知外物亦復
如是。一一分別。悉無所有。是謂於現在身。便能思惟
過去未來。復次善男子善女人。自觀已身外物。已捨
此心。當更求觀。我今此身。悉皆分別。非有非無。彼眾
生者。如我身不。便分別外人內。過去身。咄嗟此身。磨
滅不久。便起不淨想。以生不淨想。知外人內。過去身。

如已無異。若善男子善女人。捨此外人內過去身。已復當生觀。云何此人內過去心爲從何生爲從何滅。復自思惟。且捨外人內過去心。便復思惟外人內未來心。咄我此身爲從何來爲從何滅。是謂善男子善女人在菩薩位者。便能具足三禪之行。佛復問月光照菩薩曰。云何學地修三禪法。月光照白佛言。若善男子善女人。已在信地名曰學人。便欲前進向所趣道。卽詣六靜處。若樹下塚閒無事。及虛空露地。便能結跏趺坐。端心思惟。自欲具足三禪行法。是謂善男子善女人。內自思惟。自觀內過去身。本從何生復從

何滅。復自思惟。咄嗟此身本無所生。本無所滅。善男子。善女人。卽捨此身已。復更求觀。我今此身爲從何生。爲從何滅。未來身者。亦復然耶。便自思惟。內未來身。爲從何生。爲從何滅。便自生念。此內未來身。亦不有生。亦不有滅。是謂善男子。善女人。於學地內。身具足三禪。云何學地。觀內身於他身。具足三禪。是時善男子。善女人。捨此身已。自觀外身。內過去身。本從何生。本從何滅。便自思惟。咄他內過去身。爲從何生。爲從何滅。復自思惟。此內過去身。亦不生。亦不滅。復捨此已。復更求觀。此內過去身。已不復生。已不復滅。此

內未來身爲從何生爲從何滅。便自生念。此內未來身亦不生亦不滅。是謂善男子善女人於他身內過去未來身具足三禪。佛告月光照菩薩曰。云何無學地善男子善女人具足三禪。月光照白佛言。若善男子善女人。欲趣漏地斷無漏法。便自思惟。結跏趺坐。內自思惟。此內過去身爲從何生爲從何滅。復自思惟。此內過去身亦不生亦不滅。爾時無學善男子善女人。捨此觀已復更思惟。我今已觀內過去身。當復觀我我過去身。亦不見滅亦不見生。無劫無有亦無生死亦無刹土。是謂善男子善女人於無學地具足

三禪。世尊復問。月光照曰。云何一地菩薩不盡諸行。具足三禪。荅曰。以無身觀。不觀身念。以無念本。不失念行。不以聲受音響。過初菩薩地。三過信地。三越一切諸法。是謂善男子。善女人。具足三禪。世尊問。月光照菩薩曰。云何族姓子。不見汝一地三禪乎。荅曰。不見有界。是故不說。佛言。無身耶。有身耶。何以故不說。荅曰。有身。佛復問曰。身為法身。為大四身。荅曰。是父母身。佛言。汝今以父母身。云何成就三禪。月光照菩薩白佛言。如我初求如來。至真等正覺。坐樹王下。無畏亦無恐懼心。便念三界然熾法。卽自思惟。過去諸

佛悉般泥洹。爲能度幾所眾生。過去須陀洹。過去斯陀含。過去阿那含。過去阿羅漢。過去辟支佛。復自思惟。於未來亦復如是。是謂一地菩薩具足一禪行。如我一地菩薩觀見三界。一地行本。越次羅漢辟支佛上。是謂一地菩薩成就二禪。若一地善男子善女人。分別內外守身三空。演說法教。無有差錯。是謂一地中成就三禪。佛復問月光照曰。汝何不說斯陀含阿那含三禪耶。荅曰。若善男子善女人。已在見地。便自思惟。己身內過去身內未來身亦不有此身。亦無佛想。亦無法想。亦不見身想。是謂內過去身具足三禪。

云何內未來身具足三禪。爾時斯陀含復自觀內外捨諸塵勞。於三禪地繫念不忘。雖自獲證不壞自相。猶如法法自相。自分別名身句身味身。復觀外無量眾生不興佛想。成就佛想平等無二。悉令清淨不見往來無有近遠。是謂斯陀含於內未來身具足三禪。復次善男子善女人。端坐思惟。以得不還道。便自分別。吾今定在受證之地。不壞諸法自然之相。審自證明。吾已過一已過二已過三不復往來。處在生死心意憺然不可移轉。是謂善男子善女人於己身觀過去。未來亦復如是。爾時世尊問月光照菩薩曰。阿那

含獲過去法耶。未獲過去耶。答曰。阿那含獲過去法未盡過去法。何謂獲過去法未盡過去法。然阿那含身在過去現在未來。是謂獲過去法未盡過去法。又復阿那含身在未來法已過去。此亦獲過去法未盡過去法。復次善男子善女人。若阿那含身未過去身未現在法已過去法已現在前。是謂阿那含獲過去法未盡過去法。世尊復問。月光照菩薩曰。斯陀含獲過去法盡過去法乎。答曰。斯陀含雖有過去身。不獲過去法。不盡過去法。云何。斯陀含有過去身。不獲過去法。不盡過去法。答曰。斯陀含過去身已滅。過去法

未盡。未來法自觀已過去法亦無所有。如阿那含無過去身有過去法。是故斯陀含不爾。猶如明鏡觀其面像不如面面相見。是故斯陀含不如阿那含識如純鍊金。斯陀含識如未鍊金。故有差別。佛復問云何族姓子。如汝所言阿那含獲過去法盡過去法。獲未來法盡未來法。已成就所未成就法耶。荅曰不然。雖爲鍊金猶未成器。可有金名未有形像名。佛言善哉善哉。族姓子。善說此義。如阿那含無過去法盡過去法。無未來法盡未來法。如今阿羅漢獲過去法盡過去法耶。獲未來法盡未來法耶。荅曰獲過去法未盡

過去法。獲未來法。未盡未來法。是故有差別。爾時世尊問月光照菩薩曰。云何二地菩薩具足三禪行。荅曰。猶如二地菩薩發無上至真等正覺。不見內身不見外身。繫念在前。便自思惟。我今內身有內過去身耶。無內過去身耶。有內未來身耶。無內未來身耶。捨此觀已。復更思惟。我今已無內身。已無外身。云何於內身求內過去身。求內未來身。是謂二地菩薩於已內外身具足三禪。爾時二地菩薩復作是念。我今於內外身悉皆分別。當復次觀他內外身法。與我有異不平。轉自前進觀他內外身有過去身耶。無過去身

耶。有未來身耶。無未來身耶。是善男子善女人在二地者。於他觀過去身無過去身。於他觀未來身有未來身。是謂二地善男子善女人於他過去身成就三禪。世尊復問月光照菩薩曰。云何三地善男子善女人於三地中成就三禪。荅曰。若三地善男子善女人端坐思惟。於內觀過去身。有過去身耶。無過去身耶。於內觀未來身。有未來身耶。無未來身耶。復自思惟。我無初地內過去身。不過去身。亦復無初地內未來身。不未來身。亦復無初地他內過去身。不過去身。亦復無初地他內未來身。不未來身。復觀二地內觀過

去身。有過去身耶。無過去身耶。內觀未來身。有未來身耶。無未來身耶。復自思惟。我無二地內過去身不。過去身亦復無二地內未來身不。未來身亦復無二地。他內過去身不。過去身亦復無二地。他內未來身不。未來身如我今觀我三地中內過去身無內過去身。復自觀內未來身無內未來身。自於地中觀他內過去身無他內過去身。觀他內未來身無他內未來身。況當我有身無身乎。是謂善男子善女人於三地中具足三禪。爾時世尊復問月光照菩薩曰。云何善男子善女人於四地中具足三禪。荅曰。若四地善男

子善女人端坐思惟。於內觀過去身。有過去身耶。無過去身耶。於內觀未來身。有未來身耶。無未來身耶。復自思惟。我無初地。二地。三地。過去身。亦無未來身。何況當有四地。內過去身。四地內無過去身。四地內有未來身。四地內無未來身。是謂善男子善女人。於四地中成就三禪。爾時世尊復問。月光照菩薩曰。云何五地善男子善女人。於五地中具足三禪。荅曰。若五地善男子善女人。端坐思惟。內觀過去身。有過去身耶。無過去身耶。內觀未來身。有未來身耶。無未來身耶。復自思惟。我今已捨一地。二地。乃至四地。於四

地中於內觀過去身無過去身。於內觀未來身無未來身。復捨此已觀他內過去身無過去身。觀他內未來身無未來身。況我於五地於內有過去身無過去身。於他觀未來身無未來身。是謂善男子善女人於五地中具足三禪。世尊復問月光照菩薩曰。云何六地善男子善女人於六地中具足三禪。答曰。若六地善男子善女人端坐思惟。觀我無身於無我身中觀內。有過去身耶。無過去身耶。於內觀有未來身耶。無未來身耶。是謂六地善男子善女人於六地中成就三禪。六地善男子善女人捨無我身已。於他觀內。有

過去身耶。無過去身耶。於他觀內。有未來身耶。無未來身耶。復自思惟。於他內觀過去身。無過去身。於他內觀未來身。無未來身。是謂善男子。善女人。於六地中。成就三禪。佛復問。月光照菩薩曰。七地善男子。善女人。云何於七地中。成就三禪。答曰。若善男子。善女人。在閑靜處。端坐思惟。觀內過去身。有過去身耶。無過去身耶。復觀內未來身。有未來身耶。無未來身耶。善男子。善女人。復作是念。我今已捨一地。內過去身。無過去身。內未來身。無未來身。乃至六地。內過去身。無過去身。內未來身。無未來身。云何當於七地中。

有內過去身無內過去身。有內未來身無內未來身。是謂善男子善女人於七地中成就三禪。復問月光照曰。云何善男子善女人不於七地中觀他內過去身不過去身。他內未來身不未來身乎。荅曰。善男子善女人觀他內過去身非有他內過去身。觀他內未來身非有他內未來身。佛言。止。止。族姓子。非汝境界。何以故。七地菩薩善男子善女人觀他內過去身亦不有他內過去身。唯無有他內未來身。汝何以故說。善男子善女人於七地中成就他內未來身。月光照菩薩復白佛言。如我觀他內未來身非有非無。是故

說成就。佛復問月光照菩薩曰。云何八地善男子善女人於八地中成就三禪。答曰。若善男子善女人端坐思惟。觀內過去身無內過去身。觀內未來身無內未來身。觀他內過去身無內過去身。觀他內未來身無內未來身。或時善男子善女人。自觀內過去身時。非有非無。猶如虛空。未能滅內未來身。或時觀內未來身時。未能滅內過去身。或時觀他內過去身時。未能滅他內未來身。觀他內未來身時。未能滅他內過去身。是謂善男子善女人於八地中成就三禪。佛復問月光照菩薩曰。云何九地善男子善女人於九地

中成就三禪。答曰。若善男子善女人端坐思惟。觀內有過去身耶。無過去身耶。自觀內未來身。有未來身耶。無未來身耶。善男子善女人捨此觀已。復觀他內過去身。有過去身耶。無過去身耶。觀他內未來身。有內未來身耶。無內未來身耶。捨此觀已。復作是思惟。我本無內過去身。無過去身。本無內未來身。無未來身。何況當有他外過去身。無過去身。他外未來身。無未來身。執心牢固。不捨本誓。是謂善男子善女人於九地中成就三禪。復次九地善男子善女人。當復修三禪行至坐道場而不違失。云何爲三。一者觀。二者

行三者本。若成就三禪者。便能具足得至道場。云何爲觀。分別法界知眾根本莊嚴眾相。是謂爲觀。云何爲行。往詣佛樹現身色相諸漏已盡。不爲塵垢之所染汙。諸佛如來之所常行。四非常法。是謂爲行。云何爲本。菩薩摩訶薩自念。我今弘誓已備。當使眾生備此弘誓。是謂爲本。善男子善女人。具此三行者。便能具足得至道場。復次善男子善女人。復當具三禪得至道場。云何爲三。一者空空。二者空想。三者空識。若具此三空者。便能具足得至道場。云何爲空空。所謂空者。觀內法空。外法空。觀一世界二世界乃至無數。

阿僧祇世界。是謂爲空空。云何爲空想。便入定意。盡觀世界。亦不生念。有空無空。有我無我。是謂爲空想。何謂空識。入定意時。復作是觀。吾今以眾念。更無他。想。念當淨。眾生如我無異。然此眾生有無量識。吾今當以何識。化彼眾識。吾今當以空識。令此世界皆悉如空。令彼眾生分別識著。是謂善男子。善女人。於九地中。具此三禪。復有三法。所可修行。云何爲三。一者分別世界。二者分別眾生界。三者分別第一義。若修此三法者。便能進趣道場。而無所畏。云何分別世界。盡能徧觀一切諸界。有清淨者。不清淨者。皆悉了知。

亦無錯謬。隨意選擇修治佛土。是謂世界。云何眾生界。復當徧觀一切眾生。常以權便而教化之。不捨弘誓曠大之心。經歷劫數不以爲難。是謂善男子善女人成就眾生界。云何成就第一義。一一分別眾生義趣。悉歸於空。無我人壽命亦無一二。至一切法亦復如是。是謂分別第一義也。若善男子善女人成就三法者。便能具足進趣道場。復有三神足法。云何爲三。一者神足知過去法。二者神足知未來法。三者神足知現在法。若善男子善女人具此三法者。便能具足得至道場。云何神足知過去法。於是九地善男子善

女人知過去法如虛空想。分別過去眾生有欲怒癡染汙心者。無欲怒癡不染汙心者。一一分別而無所著。是謂神足知過去法。云何神足知未來法。於是九地善男子善女人知未來受形眾生。有欲怒癡染汙心者。無欲怒癡不染汙心者。一一分別而無所著。是謂神足知未來法。復次九地善男子善女人知現在一切眾生。有欲怒癡染汙心者。無欲怒癡不染汙心者。一一分別而無所著。是謂神足知現在法。是謂九地成就三法進趣道場。復次九地善男子善女人復有三法得至道場。云何爲三。一者身淨。二者口淨。三

者意淨。具此三法得至道場。云何身淨。身已越過無量德行。本行已滅。更不造身行。身通達無所罣礙。是謂九地菩薩身淨。云何爲口淨。出無量教。未曾虧損甚深妙藏。是謂口淨。云何爲意淨。除去染著。不受塵垢。是謂意淨。爾時月光照菩薩。便說斯偈。

身淨無瑕穢 內外無所染 德高無等侶

永滅欲怒名 口淨演諸教 不漏諸過失

乃至取滅度 口教無有窮 意淨除貪著

慈愍無增減 受生無量中 覺悟不悟者

九地過法界 非有亦不無 此等善男子

已入如來境 我本無量世 勤學追師侶
 由未履此行 況餘墜落者 守行無所著
 積一得作佛 行過出三界 人中師子吼
 是謂九地善男子善女人成就三法
 菩薩瓔珞經卷第八

音釋

沮壞

沮在呂切止也 壞古曠切毀也

閱

欲雪切

擾

爾沼切與擾同亂也

潛

昨廉切藏

也健

渠建切

繫

胡計切 有力也 繼也

菩薩瓔珞經卷第九

姚秦沙門三佛念譯

無量品第十七之餘

佛言。善男子。善女人。奉持修習三禪行者。便獲具足諸善功德。遊諸佛國。供養承事諸佛世尊。爾時世尊在大眾中。便說斯偈。

過去恆沙佛 皆由三禪法 無相不願法
乃應聖律行 三禪根本法 自致得泥洹
正使無量頌 未能盡其法 若使一士夫
住壽無量劫 於中欲宣說 不盡三禪本

自觀過去識 非意所能宣 未來識亦然

非有非無識 無形不可見 然種生死病

思惟九地法 後乃得覺悟 梵行清淨法

擁護如來教 欲一一分別 未暢如來身

三世無等尊 破有諸欲網 牽連諸縛著

永盡而無餘 觀世諸有變 生生不常停

況欲知識本 現身六巢窟 本我不造有

染有乃生垢 皆由三禪法 乃坐道樹下

若有族姓子 施心欲量計 分別如來身

未必知毫毛 過去諸法界 一一不思議

斯由此三禪 乃得稱名號 若欲計識本
分別非有法 所趣無數變 乃應三禪行
我生既自安 亦能安眾人 然人思想多
我導引使知 我從本等定 行觀覺三禪
非有地識想 超越過去行 生本從我人
流轉趣五道 能盡一生垢 乃謂應三禪
究竟有三法 審鑒本深要 二爲現在慧
道觀是謂三 能盡此議趣 三禪無量行
此亦不可思 究盡三法行 又知恩愛本
漸漸轉入空 既自從師受 後乃成道覺

或現三千世	如人掌觀珠	一一入淨觀
洗浴諸塵勞	若人圖度空	欲以斗斛量
雖可建此心	豈當有此理	心念無邊涯
生生無有息	如水趣于海	不見有增減
況人欲得量	心之本根源	欲尋心所念
豈當有此理	聖人所以降	示現出於世
故欲量度空	令知斛斗量	分別念生生
前後及中閒	一一悉能知	斷種生死本
人心非一類	造行若干種	自墜墮本際
遂自陷於淵	過去諸恆沙	諸法悉同等

皆由三禪行 得成無上道 將來諸如來
亦當執此行 安處諸眾生 俱同成道覺
如我今成佛 王此諸世界 亦由三世慧
得成無上道

爾時世尊說此偈已。便告善男子善女人。過去無數
恆沙劫中有佛出現。名曰見無如來。至真等正覺明
行成爲善逝世閒解。無上士道法。御天人師。號佛世
尊。亦於此處成佛。時有國王。名曰吉滿。於此治化人
民熾盛。五穀豐熟。七寶成就。所謂七寶者。珠寶輪寶
玉女寶馬寶象寶典藏寶典兵寶。復有千子多技勇

悍六藝備具。爾時吉滿大王。年既衰末。欲捨王位。從彼如來。至眞等正覺。淨修梵行。卽授王位。與第一太子。便詣見無佛所。求修梵行。追尋彼佛。十二年中。修此三禪。時猶未解一句之義。復從彼佛去世已來。中間二十大劫。無佛。後有佛出。復詣彼佛。修於梵行。如是經歷十二億那由諸佛。一一諸佛所淨修梵行。復從彼來。供養無數諸佛。久後乃遇光明如來。至眞等正覺。從彼受三禪慧。至今方乃得之。佛告諸來會者。爾時吉滿國王。者豈異人乎。莫造斯觀。何以故。爾時吉滿國王。今我釋迦文佛。如來至眞等正覺。是從彼

已來今乃獲此三禪。本行自致成佛坐于道場。爾時
世尊復說頌曰。

念我積本德	經歷無數佛	遭遇諸塵勞
未能自拔濟	其閒復供養	恆沙無數佛
妻子國財施	未獲此三法	後遇光明尊
始得此尊慧	其閒修淨行	始悟三禪法
憺然無憂畏	無生無染汙	眾相自嚴飾
故號人中尊	由我平等慧	不起眾想著
化此天世人	典領三界尊	

爾時世尊說此偈已。時座上百千億眾生皆發無上

正眞道意。復有諸天世人隨所念道各自成就。爾時有菩薩名曰淨白。佛言。夫轉輪聖王典四天下。便能具足七寶。然後乃名爲轉輪聖王。如來至眞等正覺。有七法度無極。然後乃名爲至眞等正覺。今問如來七法爲有形爲無形。佛言。止。止。族姓子。吾今解汝機辯。如族姓子所問。如來七法則無有形。何以故。此法甚深不可窮盡。但爲眾生故。現有窮盡。然此七法無有窮盡。爾時淨菩薩白佛言。轉輪七寶復有形耶。無有形耶。佛言。亦有形。有情。亦有形。亦無情。云何有形。有情。玉女寶。象寶。馬寶。典藏寶。典兵寶。是謂有形。有

情。云何有形無情。輪寶珠寶。是謂有形無情。爾時淨菩薩白佛言。世尊。如轉輪聖王在天之坐。意有所念。尋念卽至。爾時有形有情王念便至。爲有情而至。無情而至。佛言。此雖有情王念便至。非彼知王意至。淨菩薩白佛言。彼雖有情。何異輪寶珠寶乎。佛言。云何族姓子。輪寶珠寶亦由念至。然此二者。有音響言教。不乎。淨菩薩言。無有言教。佛言。如是族姓子。雖有情以念故則至。不取言教。淨菩薩復白佛言。云何世尊。若轉輪聖王心念便至。欲使輪寶珠寶有言教者。得不乎。佛言得。何以故。轉輪王威力使然。便有言教。淨

菩薩言。轉輪聖王非通非感。云何使無情而有言教。佛言。轉輪聖王得世俗通。能使世物如念所應。但未能使有情之物令至無情。淨菩薩復言。云何使有情之物令至無情。佛言。族姓子。今當爲汝一一分別。有情之物令至無情。無情之物令至有情。善思念之。今當爲汝說。如轉輪聖王觀彼有形有情眾生。愛而樂者。未能捨離。欲使永存終無變易。自念己身受王聖位。但覩其福不覩磨滅。是謂無形之物欲使有情。如善男子。善女人。已成道已。恆自思惟。我今捨欲不復愛樂。欲滅此形無染於識。是謂有形而滅於情。佛言。

族姓子。如四法界。一法界增諸界有損。諸界悉增一界有損。此由有情而增。不由無情而增。淨菩薩復白。佛言。如世尊言。我今當說有情至無情。無情至有情。今如來但說有情至無情。不聞如來說無情至有情。佛言。善哉善哉。族姓子。今發汝問者皆佛威神。我今反問汝。汝當一一報我。云何族姓子。若有善男子善女人。初在學地。成就學法。七無漏觀。是時復有凡夫過去當來現在心不平。荅曰。無也。世尊。佛言。如是如是。族姓子。是謂無情於有情。佛復問淨菩薩。云何族姓子。如今無學修九清淨道。爾時復有七無漏觀不

乎。荅曰無也。世尊。佛復言。族姓子。不退轉菩薩得虛空觀。修十六聖行。爾時無學。修九清淨道。不乎。荅曰。不也。世尊。佛言。如是如是。族姓子。是謂無情於有情。佛復問。云何族姓子。如今八住菩薩得佛形相。獲三十二聖諦。爾時復有九清淨道。不乎。荅曰。無也。世尊。佛言。如是如是。族姓子。是謂無情於有情。佛復問。淨菩薩曰。云何族姓子。九地菩薩。爾時復有三十二聖諦。不乎。荅曰。無也。世尊。佛言。如是如是。族姓子。是謂無情於有情。佛復問。淨菩薩曰。云何族姓子。如今如來至真等正覺。最後降伏十四諸塵垢。爾時復有三

禪行不乎。荅曰。無也。世尊。佛言。如是如是。族姓子。是謂無情於有情。佛復告淨菩薩。今已爲汝說有情於無情。無情於有情。便能具足。如來道教。上菩薩位。進趣道場。猶如月光。眾星中明。普曜一切。莫不蒙照。菩薩摩訶薩。具此有情於無情。無情於有情者。便能具足。如來聖行。身黃金色。眾德巍巍。猶紫磨金山。眾智自在。爾時淨菩薩白佛言。世尊。今日如來至真等正覺。有情於無情耶。無情於有情耶。爾時世尊。聞淨菩薩問此義已。便放身支節光明。普照無量諸佛刹土。盡令金色。還攝光明。便告淨菩薩曰。善哉善哉。族姓

子。今以無相之法而問如來此義。如來至真等正覺。已過九地故。有情於無情。至成得佛。乃至道場。是謂無情於有情。何以故。皆由眾生有想著故。爾時淨菩薩白佛言。如世尊所說。以眾生故無情於有情。如來今日未離耶。佛言。已離。雖處亦不染。又問云何世尊。如來別情。乃使無情於有情。唯有無情於有情耶。佛言。族姓子。如來無復別情。更有無情於有情。但以第一義故。無情於有情。淨菩薩復問。云何於無情。云何於有情。佛言。族姓子。我無辟支佛阿羅漢心。然有慈悲喜護。是謂無情於有情。淨菩薩言。如來今日無情

於有情。頗有無情於無情乎。佛言有。淨菩薩問曰。何者是。佛言。我今心滅。託在無爲。是謂無情於無情。淨菩薩問曰。無爲亦有情無情。亦有情名假號耶。云何世尊言。我今心滅。託在無爲。佛言。族姓子。如是如是。如汝所言。一切諸法皆悉假號。是亦有情於無情。無情於有情。淨菩薩復白佛言。如世尊所說。諸法亂諸法。不定諸法無常。云何於假號法中。復說無情於有情。有情於無情。佛言。云何族姓子。我今當以第一義問汝。汝當以一一報我。汝今有情耶。無情耶。答曰。有情。佛言。汝情何所立。答曰。立於無情。佛言。汝今有情。

云何立於無情。荅曰。捨有趣無故立於無情。佛言。無情既無爲何所立。荅曰。立無所立。佛言。汝今用何等法立無所立。荅曰。我今不見有情不見無情。故立無所立。佛告族姓子。汝言一切諸法假號。云何於假號法中。說有情於無情。說無情於有情。若當爾者。諸法亂諸法不定。諸法無常。汝今復說。亦不有情亦不無情。故立無所立。爾時淨菩薩默然不報。佛言。族姓子。汝觀何等義。默然不報。淨菩薩言。我觀第一義中無言無說。故默然耳。佛言。如是如是。族姓子。一切諸法皆悉假號。假號法中非真非有。以染汙心。故眾生不

達各自稱說此是泥洹此是生死以第一義清淨觀者亦無泥洹亦無生死爾時世尊便說斯偈。

一切諸法界 本無無所有 生死不達觀

謂爲法自爾 經歷三世苦 進求菩薩道

退轉如恆沙 豈有達本無 十力哀現世

愍念羣品等 爲演假號法 令知至道明

解脫無等侶 速疾演法音 無量眾生類

充以法甘露 大道無形像 非有情無情

但生染汙心 不獲三禪本 若欲修習本

清淨七無漏 宣暢九淨地 是應趣道門

初欲趣道場	繫著十四心	得佛乃當滅
然後成道果	十六諸聖諦	菩薩諸法印
授前甘露慧	因號爲如來	三十二法本
菩薩神通慧	消滅三世患	漸至於泥洹
夫欲求佛道	莊嚴諸刹土	聲徧十方世
修禪乃得獲	無漏三禪行	諸佛深奧藏
爲眾生立誓	爲說無死法	行盡不造行
果亦無果報	道從平等慧	心一無邪念
四信如來寶	六種爲世塵	七覺清淨鬘
八道具乃成	世俗五通道	如鳥遊虛空

繫念在地大 不免生死難 六通大乘道
遊戲虛空閒 至竟不退轉 斯安非有餘
慧觀達清淨 悉照暗冥中 無著亦不染
故號爲天尊 道生不自生 因緣乃有道
法法不自知 虛寂何有道 人本處生死
流浪不自覺 精進不懈怠 漸漸應聖諦
心珠素自明 不假外光明 日月有五翳
何能有所照 佛本行清淨 心慧無瑕塵
自濟復濟彼 所至無罣礙 能斷諸希望
蠲除諸縛著 照以諸法光 莫知愚冥暗

泥洹性清淨	不見有往還	深微不可覩
愴然不變易	入禪一定意	感動諸十方
神足道力彊	八等不虧損	所以發弘誓
雨淚愍眾生	咸念代受苦	此爲實奇特
人不計無常	貪著三界榮	如風吹落葉
流轉隨所趣	虛空無邊際	道行亦無邊
空報以音響	虛寂無根本	人本出母胎
隨行染五趣	善惡追人形	如影隨其身
若能滅五陰	神識還歸空	不復生老死
是處實快樂	欲知諸佛藏	深奧不可覩

越界超三世 顧眄生死岸 本我爲愚惑
入此然熾鑊 今得離此灾 遊戲清淨淵
我今雖免苦 自離彼不離 獨善非弘誓
何必取滅度 復來還現生 權化處塵勞
曠濟無有涯 不厭劫數期 日度如恆沙
如已無等侶 不計如毫釐 宣暢自功德
不念度者近 未度者爲遠 心識愴然一
至竟無罣礙 色相是身具 容好無雙比
諸根遂純淑 乃知爲大患 利根具足行
覺悟猶復漸 會值癡愚者 此乃甚爲難

菩薩入定意 不念有無想 獨步無所畏

德過諸山嶽 行者有五品 進退中閒法

立志如安明 心堅不可動 六度本神慧

神足通往來 法界無三念 故能轉法輪

本積無量善 自致人中聖 道等無三本

心計內外淨 性行有若干 行法無有異

但爲世辯者 分別有差品 過行有累劫

未曾起想念 故遊心無量 虛空無有滯

地爲至誠本 能忍穢不穢 慧心所含容

不見度不度 聖人行甚奇 能忍此眾苦

億劫行功德	乃成一法本	三定空無相
無願行諸法	眾智十力慧	超越無生處
本修音響慧	八聲甚淨妙	分別五陰行
蠲除思想貪	沈湮生死本	不求出要路
三本不捨本	乃出於道要	自識宿命通
法身不思議	壞有成無等	是力不可沮
虛空無量界	非一非二三	隨行本誓願
淨修眾妙道	生死滓濁法	愚士所貪樂
慧觀無染著	永除愚惑法	菩薩樂寂靜
思惟無量法	現在不生滅	非有非不有

自識宿命智 觀本生死根 如人臨江海

爾乃顛慄懼 弘誓度無極 平正道地行

坐臥入深藏 常離穢汙行 地水火風空

神識倚著住 欲求禪窟處 不知神識趣

人亦信復然 因緣共合會 識離四大空

不知各所趣 法海無有涯 受入內外塵

本性自清淨 不譏別汙染 大道本無法

觀法內外淨 不念去來今 世智無等雙

曉眾一切音 有量無量法 劫數磨滅法

豈有常存者 能斷眾生厄 永離四魔地

貪嫉本無性 爾乃應淨觀 本坐樹王下
初夜中亦然 一心一意止 定意無有亂
七日體不傾 咸察三世法 滅一無復一
從是乃覺悟 今既得成佛 愍念未度者
與轉無上法 在於鹿野苑 先說四明慧
苦集盡道慧 爲未覺悟者 三說乃成就
一切無量眾 初聞甘露法 皆得無生心
無復有生滅 雖現於此生 神遊無量界
在在轉法輪 處處現變化 於此現作佛
十月處母胎 聖人無塵垢 不恥在五欲

是故精進學 念離有無識 體性行自然

不毀於法界 過者不可量 來者亦無盡

現在復變易 神識爲所在 識爲生死本

流浪無窮已 欲至無爲岸 三禪爲第一

願得無色法 染以無形服 於無自娛樂

不願處三有 念我本牢誓 爲本際眾生

故復隨俗入 不闕弘誓心 菩薩行三本

叵有勝負心 我今乃自達 爲精進中最

如來所現變 無有能思量 或處巖石閒

寂默無言說 分別內六根 無我無人想

外法亦當爾 常想非常想 吾從初發意
立行不爲己 今雖得先悟 豈不爲餘者
所以力勤學 恐負本所願 故度未度者
是謂如來誓 佛本初發願 不念劫數難
雖處於塵欲 此苦亦不久 正法本無二
差品有三號 道如日月照 無有高下心
一智及一慧 本從一願成 我今不捨一
故號第一尊 二觀從一法 行念過三苦
本無苦境界 法身自分別 菩薩執權慧
教人無法想 真人意常淨 不念起無起

恆以大慈心	不念眾生闕	由是自瓔珞
法義具足慧	道本自無我	此出眾生日
不可爲眾生	說本自無我	今當說有行
漸令見道跡	令知無常想	久當自覺悟
在世修聖行	終不失義本	不以文字故
顯現於世人	從諸佛受教	遊戲諸定意
人中神龍步	獲四無所畏	如來別有諦
一一不思議	無倚無所染	故號人中尊
凡人學世典	齊可至無想	不如一句義
不與生死處		

爾時世尊說此偈已。云何族姓子。審解此義有情無情不平。荅曰如是。世尊。實無等倫。若有善男子善女人。諷誦受持有情於無情無情於有情義者。便能具足一切諸法。何以故。諸佛世尊一切賢聖皆由此義而得成佛。自今已後我等善男子善女人。皆當擁護是善男子善女人。受持諷誦有情於無情無情於有情者。何以故。如我所觀如來所說。過去當來今現在佛。皆由此義而得成就。我等亦當逮此法義。爾時有菩薩名曰無觀。卽從座起。偏露右臂。叉手長跪。白佛言。世尊。我等八人於此賢劫中。當擁護是善男子善

女人受持諷誦是句義者。便當獲十功德福。云何爲十。一者得無形相法。二者深入法藏。三者辯才第一。四者得無量法。五者獲捷疾智。六者不捨弘誓心。七者定意自在。八者逆知眾生念。九者立無生心。十者行本自然。若善男子善女人受持諷誦此句義者。便當獲十功德。若使三千大千刹土滿中善男子善女人。皆令成就得菩薩道故。不如是善男子善女人受持諷誦此一句義。何以故。諸善功德皆由是生。爾時世尊告淨菩薩。云何族姓子。令三千大千刹土眾生盡爲釋提桓因。其功德福甯爲多不。淨菩薩白佛言。

甚多甚多。世尊。佛言。故不如立信善男子善女人修三禪本。其功德福甚多甚多。佛言。云何族姓子。若三千大千刹土眾生盡爲梵天。一一梵天神德無量。其功德福甯爲多不。淨菩薩白佛言。甚多甚多世尊。佛言。故不如一地菩薩摩訶薩修三禪行。其功德福不可稱量。不可以譬喻爲比。佛復告淨菩薩曰。云何族姓子。若善男子善女人已在一地得菩薩號。徧滿三千大千世界。其功德福甯爲多不。淨菩薩白佛言。甚多甚多世尊。佛言。故不如二地菩薩摩訶薩修三禪行。其功德福不可稱量。何以故。二地三禪行非一地

所能及。佛復告淨菩薩曰。云何族姓子。若二地菩薩皆令成就。徧滿三千大千世界。其功德福甯爲多不。淨菩薩白佛言。甚多甚多。世尊。佛言。故不如三地菩薩摩訶薩修三禪行。其功德福不可稱量。何以故。三地菩薩非二地所及。佛復告淨菩薩曰。云何族姓子。若三地菩薩摩訶薩具足三禪。徧滿三千大千世界。其功德福甯爲多不。淨菩薩白佛言。甚多甚多。世尊。佛言。故不如四地菩薩摩訶薩修三禪行。其功德福不可稱量。何以故。四地三禪非三地三禪所及。佛復告淨菩薩曰。云何族姓子。四地菩薩摩訶薩具足三

禪徧滿三千大千世界。其功德福甯爲多不。淨菩薩白佛言。甚多甚多世尊。佛言。故不如五地菩薩修三禪行。其功德福不可稱量。何以故。五地三禪非四地三禪所及。佛復告淨菩薩曰。云何族姓子。若五地菩薩摩訶薩。具足三禪。徧滿三千大千世界。其功德福甯爲多不。淨菩薩白佛言。甚多甚多世尊。佛言。故不如六地菩薩修三禪行。其功德福不可稱量。何以故。六地三禪非五地三禪所及。佛復告淨菩薩曰。云何族姓子。六地菩薩具足三禪。徧滿三千大千世界。其功德福甯爲多不。淨菩薩白佛言。甚多甚多世尊。佛

言。故不如七地菩薩修三禪行。其功德福不可稱量。何以故。七地三禪非六地三禪所及。佛復告淨菩薩曰。云何族姓子。若七地菩薩具足三禪。徧滿三千大千世界。其功德福甯爲多不。淨菩薩白佛言。甚多甚多。世尊。佛言。故不如八地菩薩修三禪行。其功德福不可稱量。何以故。八地三禪非七地三禪所及。佛復告淨菩薩曰。云何族姓子。九地菩薩具足三禪徧滿三千大千世界。其功德福甯爲多不。淨菩薩白佛言。甚多甚多。世尊。佛言。故不如十地菩薩摩訶薩修三禪行。其功德福不可稱量。何以故。十地三禪非九地

三禪所及。佛復告淨菩薩曰。云何族姓子。十地菩薩具足三禪。徧滿三千大千世界。其功德福甯爲多不。淨菩薩白佛言。甚多甚多。世尊。佛言。故不如一生補處菩薩摩訶薩。何以故。一生補處三禪非十地三禪所及。佛復告淨菩薩曰。云何族姓子。一生補處菩薩修三禪行。徧滿三千大千世界。云何族姓子。其功德福甯爲多不。淨菩薩白佛言。甚多甚多。世尊。佛言。故不如如來至真等正覺。須臾之間。念三禪得其功德。福不可稱量。一切諸佛世尊。由是三禪而得具足一切諸法。爾時世尊便說斯偈。

三禪諸佛母 出生一切法 拔濟眾生苦

得為人中尊 十地菩薩種 所獲禪不同

本慧無若干 息心為第一 現在十六法

於中自娛樂 不倚三毒本 乃應十句義

超越無量界 不失本觀行 度脫諸眾生

是謂三禪行 諸法如夢幻 非有非不有

盡化一切類 是謂三禪行 雖未在十地

能施作佛事 能現種種變 是謂三禪行

無等十二輪 暢演本無行 受入諸根本

是謂三禪行 生死無有量 不滯三有道

識神自然轉 是謂三禪行 人既知非常
不著世榮寵 真人斷彼此 是謂三禪行
有情非有情 無情亦復然 道行過三界
是謂三禪行 生死本無兆 因緣有諸法
彼彼不相知 是謂三禪行 慈愍普育養
不著身想本 法性無高下 是謂三禪行
菩薩根本行 唯空無相願 得趣泥洹門
是謂三禪行 道從四等心 弘誓不可動
十慧超眾道 是謂三禪行 具檀度無極
拯濟下劣人 隨所充其念 是謂三禪行

守戒無所犯 如護吉祥瓶 念念不禱想

是謂三禪行 忍辱行之本 受對心不變

無想如虛空 是謂三禪行 無數劫精進

終不懷懈怠 教訓眾生類 是謂三禪行

正受三禪行 一意念不變 感動十方界

是謂三禪行 智慧大海淵 平等無有二

蠲除諸妄想 是謂三禪行 善權無方法

變現無有量 不計有貴賤 是謂三禪行

爾時世尊說此偈已。百千億眾生皆發無上心得三

禪行。

菩薩瓔珞經卷第九

音釋

巢窟

巢鋤交切窟苦骨切

悍

侯肝切有力也

釐

陵之切十日釐

湮

伊真切沒也

顛慄

顛之膳切慄力質切顛慄恐懼也

菩薩瓔珞經卷第十

姚秦沙門竺佛念譯

隨行品第十八

爾時天龍鬼神阿須倫迦留羅眞陀羅摩休勒人及
非人。及諸菩薩摩訶薩。比丘比丘尼優婆塞優婆夷。
各自生念我等欲觀如來神智變化無量。遊諸世界
還復故處無覺知者。時有梵天名曰尊復尊。從他方
佛刹來。行過三禪無所復畏。卽從座起偏露右臂。叉
手長跪而作頌曰。

天尊三達智 悉觀三世本
斷惑去狐疑

爲現神智道	如爾性自然	行過超三有
菩薩瓔珞慧	爲總何等行	道樹諸法本
無生心第一	自悟無師授	爲隨何行得
超越下劣地	上慕菩薩道	宣暢四要法
梵行清淨本	天世眾生類	念念各不同
滅想令不起	何由而得成	法界本自空
受決有若干	一行得作佛	復由何等辦
生死十二海	流轉常不停	佛慧無邊際
尋究而度之	道本從一相	斷滅無所生
觀外身塵勞	內法亦復然	來處去此遠

願樂欲聞法 惟尊一一演 永令無塵翳
爾時世尊告尊復尊曰。善哉善哉。族姓子。能於如來
前而問斯義。今當以偈一一分別。

本從無數世 親近善知識 不見本末空

是謂隨行得 思惟無量法 分別本末空

道果不染汙 是謂隨行得 所念不處邪

不離正法本 一相本自寂 是謂隨行得

十力王三千 永度彼此岸 修行本無法

消滅五陰苦 慧明所照處 上徹空無際

善化隨本教 是謂隨行得 空性憺然安

無願相亦然 三定等有伴 是謂隨行得

當其入定時 諸法無所有 捨身染一身

是謂隨行得 諸佛法不異 分別隨其人

過去以滅行 豈復有根兆 人知所修習

守信爲權法 自滅吾我想 是謂隨行得

從久遠以來 眾生染著有 有竟不自知

豈識無想法 但爲大聖人 分別隨其類

導引以正要 是謂隨行得 劫數亦不難

令可如彈指 難悟癡惑人 就善乃爲難

一身復一身 經歷億萬劫 愍以無念想

不度終不捨 行本由自然 利鈍各有品
今蒙大光明 是謂隨行得 我本自造行
今復受其報 行盡無三果 獨立無所倚
人想眾常想 非是聖律教 能捨彼此想
是謂隨行得 計身本自無 況有識神念
愚惑眾生類 初不能捨離 道忍有五行
初念中亦然 思惟不淨觀 是謂隨行得
身淨無瑕垢 終不造邪業 所以口真誠
由本無欺故 道潤所及處 轉得有所濟
由前有麤澀 豈怨潤不及 弘誓恆平等

不念麤以細	行等無彼此	是謂隨行得
人知超其難	自守無他念	自濟復濟彼
是謂隨行得	如人視五色	自起其識想
痛陰由是茲	不離大災患	識法不可見
緣生若干念	一生復一滅	欲免甚爲難
道慧有五相	分別成敗法	行盡無窠窟
時識竟所在	一形受一形	身身不磨滅
夫欲伐其樹	欲盡勿捨根	識根爲蔓莖
所至無有礙	力士諸仙道	誰能尋其本
唯有三界尊	能攝使不逸	燒以智慧火

莫知暗冥處 無明眾行灾 抑遏善根本
洗以八解水 除垢無塵翳 生死往來苦
今世就後世 咄嗟此苦惱 非聖孰能濟
諸天受福堂 四梵亦復然 行由清淨果
德爲人中上 思惟古昔來 本無三惡趣
本造今自受 何爲復有疑 若使諸世尊
不顯曜道教 便於如來所 可譏說其過
吾亦愍念汝 受生不達本 如此眾生類
不受聖訓教 過佛無有量 汝由不覩聞
將來恆沙佛 豈從得蒙濟 人心霍然悟

不待劫數期	一聞便成佛	不歷諸法界
但念羣品黨	不慙懃於道	所以自墜落
永處五道淵	如鳥飛虛空	憑翅乃得逝
人無止觀定	何由獲空慧	生死無限齊
道力過百行	染以無形服	自致道果成
五陰本無形	爲作形色相	德過諸釋梵
爲說無相法	行人觀外色	內識往分別
彼色非我造	我心自往染	色本非我本
色性竟有無	計我識亦爾	本從何所生
爾乃自覺悟	外色自空寂	內識亦復爾

愴然本無生 人念非常空 自觀身本法
爾乃得至彼 永處無爲岸 本受五陰身
欲脫未能離 受胎是大患 未離有何益
五分法身具 戒定慧解成 熏以道德香
蠲除世臭穢 人能修明慧 億劫不懈怠
眾德自然具 故號無等倫 戾意隨習俗
處尊不爲憍 隨行從高下 令立永處安
或入三塗苦 爲現權慧智 外如代受苦
內心無所染 吾昔無數世 修行菩薩道
以獲盡信忍 行過二住地 爾時諸佛集

普從十方來	爲一下劣人	欲令免無救
諸佛各伸手	障令不至罪	罪力難可蔽
攘手牽入獄	諸佛尋其後	復到地獄中
欲救彼罪人	令離眾苦惱	如來神智力
身放大光明	普曜地獄中	晃若同一色
罪人見光明	無復身痛想	皆悉蒙光明
得離地獄難	唯彼一眾生	諸佛不能救
五逆不順行	乃致是苦惱	吾從是已來
進行不懈怠	不以生死苦	中有變悔心
今旣得成佛	號字釋迦文	壞敗五陰身

眾德普備具 受罪無終竟 不識善根源
行盡超眾德 乃應虛空性 恐今亦當有
受罪無救者 非神力所能 制住令不往
空性雖清淨 行滿乃得具 神足五通法
未能離此惱 五陰各有性 所造非一品
忍智度無極 行具乃得成 道生諸法本
滋長無有法 立志如安明 終不可沮壞
譬如有士夫 爲空施畔齊 此由冀可得
欲免罪甚難 七寶諸宮室 象馬國財寶
斯盡如幻化 暫有不常停 轉輪聖王位

統領四天下 是亦磨滅法 無常不久存

如彼修行人 分別色根源 解知本自爾

是謂成色陰 身痛有百八 內外中閻法

知痛所出生 是應痛陰法 想如野馬遊

壞有無所有 抑制想不生 是謂應想陰

三行成三法 滅三乃應三 拔斷三毒根

不染三世有 五法已成具 不受識無識

無內外六塵 是謂爲識陰 執四方便道

乘四無礙慧 超四道果證 故應四聚要

生死海無疆 曠大無邊涯 乘六神足道

乃得遊其淵 愍念愚惑種 翫習不捨離
形如芭蕉樹 有皮裹無實 今我樹王下
瓔珞諸道品 功勳超百億 世雄尊第一
今日無等倫 現生於五濁 不爲塵垢染
如蓮華無著 當守護其心 不爲塵勞惑
內以八正覺 瓔珞身心法 外以諸相好
莊嚴諸國土 明慧修二觀 相好自嚴飾
本從四大成 成敗無所有 前念非後念
新新成塵勞 施心於一切 高下無所逆
內具度無極 無倚無所處 守戒常一心

勸彼無所犯	擁護眾道德	不闕戒性行
三地有十法	無形不可見	權詐入生死
示現世徑路	生世眾苦患	憂畏無數變
聖人能往來	不以此爲危	大道本無形
非有無生慧	相相度無極	而自瓔珞身
眼視上下眴	遠觀無有疆	修淨度無極
獲此無礙報	腳跟細平正	修治大聖座
今獲無垢報	具道度無極	踣如布重金
亦不受塵水	舉足如旋風	機關無觸礙
心華不著塵	內悅色外發	皆由忍辱報

故號度無極	執心如金剛	演布道地法
知過無量世	具足無礙度	口演八種音
悉布諸言教	至誠不染有	是謂不欺度
道由三觀想	能逮平等慧	心不著是非
應於無生度	初發弘誓心	不爲少許人
自然成道覺	是名具空度	神足遊佛土
身心無限礙	一意無移易	神足度無極
本由色墮有	知色非有常	今受此色身
眾好度無極	痛法有內外	非苦非有樂
繩除內外法	無行度無極	五根有五法

要由十八持	分別除去五	無報度無極
守護身口意	攝令無放逸	淨響普照曜
八道度無極	不倚三覺觀	亦無生起滅
自意不復生	無言度無極	清淨如蓮華
博聞無所染	常訓化眾生	淨教度無極
平等無二想	不懷偏局心	如日照虛空
慧觀度無極	仁智不可量	無生不可見
施心無量慧	道智度無極	觀三千世界
起滅無所有	善覺悟一切	無想度無極
知生本無生	因緣生諸法	成就有無道

平等度無極	總持無礙道	解脫成就慧
分別無我想	空淨度無極	生死有五難
染著世俗塵	遊空無量境	權智度無極
已脫生死縛	遊戲解脫中	清淨無亂想
果報度無極	在世現苦行	執心如金剛
已超三有道	自然度無極	或在虛空界
念法無亂想	如空有所容	無形度無極
快哉無生道	永斷諸塵勞	不見有往來
無行度無極	神足有四事	恆遊十方刹
身心俱虛寂	明慧度無極	本從平等心

一意無所染 心超無量界 微妙度無極

觀了生世苦 一相無所起 道心不可轉

金剛度無極 無學修梵行 超越九次第

行盡不熾然 瓔珞度無極 道從三慧觀

分別定意行 自息心不起 無量度無極

濟拔四要道 越次不受證 自然滅無明

等分度無極 道教實微妙 精進不可踰

平等無二法 眾行度無極 生世眾苦難

常習無上道 不見有無跡 眾想度無極

生死多限礙 不覩智慧光 道力以宣暢

積行度無極 成就九禪法 不染世俗智
一一分別想 戒訓度無極 所以顯現法
愍念一切人 不見度無度 寂意度無極
遊至無量界 承事諸賢聖 受教不忽忘
總持度無極 復能現變化 感動諸佛刹
亦不自貢高 滅意度無極 追念過去世
普修菩薩道 不著內諸漏 觀行度無極
修治諸佛土 清淨無瑕垢 度脫無量人
法界度無極 眾生根無量 身體極清淨
內外不染有 了法度無極 知生不足貪

權現無有方 不生眾想念 無等度無極

身法若干種 亦不生塵垢 莊嚴身體相

功德度無極 從無央數劫 積累修法本

積累不爲己 神通度無極 六情不著有

分別無量慧 得過虛空際 一心度無極

生在人中難 受身無有量 眼不著外色

無念度無極 執意無貪著 生生亦不息

自滅內眾行 空觀度無極 無畏無所著

不見內外法 道意無若干 神智度無極

佛身本自淨 不爲塵垢染 智達過百劫

無心度無極 前心非今心 生生而不絕

一意無所起 大智度無極 億百千眾生

度亦不見度 心念無非邪 娛樂度無極

行盡受苦證 達知三世本 不有小乘意

本末度無極 於苦不念苦 了知四非常

盡生更無身 聖諦度無極 本從無量佛

受決當作佛 亦不自歡慶 等施度無極

心本不思議 德超無有量 分別有無觀

靜寂度無極 五道眾苦源 不生清白法

八等過道行 現身度無極 人體本無法

不見法界相 上智過百行 無畏度無極

一心一念頃 受證無有難 永離諸漏法

大聖度無極 本末永自離 亦不見吾我

神力如虛空 知足度無極 自攝持威儀

不著諸相好 自守無所犯 親近度無極

吾從無數世 供養諸世尊 不毀諸法界

無願度無極 亦不有希望 僥倖於諸法

非有無所生 積行度無極 不念彼此岸

超越生死海 究盡一切根 無盡度無極

十六不思議 亦名十六慧 從苦至無法

無著度無極 生死無有底 或出或隱沒
盡能觀了知 性空度無極 身法三十二
汙染不淨行 一一能分別 無著度無極
眼識有內外 不受外身入 無畏無所動
慈心度無極 如我坐佛樹 莊嚴金剛座
降魔無所畏 大慈度無極 愍念眾生類
度人不見度 曠濟無有疆 自離度無極
過去不復生 不染當來塵 慧心無內外
無疑度無極 內外陰持入 不生諸塵垢
守一不放逸 神足度無極 眼不著外色

舌亦不知味 除去貪著想 無形度無極

分別菩薩心 淨觀無所著 道從平等慧

威儀度無極 自識宿命智 知本所從來

不復興想念 現生度無極 智者在世化

盡苦無有餘 拔斷生死本 苦行度無極

愍過慈母育 慧普無高下 內不自見身

無貪度無極 得遊無量境 無有覺知者

亦不自稱歎 法身度無極 復從諸佛受

空慧無量法 自然盡苦際 不起度無極

道從平等慧 不染三有想 從是獲神足

無我度無極 凡夫縛著四 不離三界患
盡生更不造 通慧度無極 從無央數劫
定意不錯亂 意亦無移易 本際度無極
神智無邊涯 永除貪著有 逮得不起忍
寂滅度無極 道慧觀七品 法界無參差
一相不可見 無形度無極 泥洹無生滅
行跡無所有 能離彼此中 隨行度無極
無明眾行本 流轉十二海 不爲識所染
無著度無極 如爾四聖諦 出生諸道果
滅意由四禪 定意度無極 如來八解脫

無苦亦無樂 能滅現在結 無患度無極

不倚著三界 造立於塵勞 修習神通慧

快樂度無極 無住無往還 亦不壞法性

永滅塵勞疇 無變度無極 如色本無色

色性常自然 了知三世苦 滅意度無極

不受外塵垢 定意無他想 生盡更不造

無愛度無極 現變無央數 終不自爲已

道慧無三礙 本際度無極 入定除三想

不見我人壽 執信無馳騁 眾智度無極

空無相願法 三昧聖道觀 寂然滅一意

懷來度無極 道生無量法 從是得到彼
玄達三世苦 愛樂度無極 知生爲大災
穿漏諸法界 捨一不染著 眾妙度無極
慈悲四等心 普潤於一切 化導無尊卑
大智度無極 四大因緣形 體性不可轉
欲達解脫門 三向度無極 若劫欲盡燒
不懷恐懼心 自然通道力 無想度無極
亦不自生念 分別若干想 佛慧無有窮
大海度無極 巧訓過眾行 本業無有量
無一不見一 離羣度無極 弘誓具足願

觀身無形相 破壞四魔患 莊嚴度無極

無念諸法本 泥洹寂然淨 諸佛所遊處

深藏度無極 無相不可見 從一乃成佛

去離心本法 一義度無極 究盡諸道果

不有三窠窟 慧照無邊涯 立本度無極

生死諸艱難 無爲愴然安 不生五塵垢

總持度無極 徧遊無量世 教化眾生類

經歷生死苦 斷苦度無極 現處母胞胎

實不染著有 心淨如虛空 本慧度無極

不見有受報 果證諸明慧 分別四道本

修持度無極	本從無量世	法界不思議
平等無二心	廣慧度無極	佛法甚深妙
非二乘所及	超越無量行	無疑度無極
先淨其眼根	淨修心本行	慕及菩薩道
淨意度無極	執意如金剛	清淨無瑕穢
永離有無界	道果度無極	古昔諸世尊
坐此元吉樹	降伏四魔怨	忍力度無極
神識在虛空	初無恚怒心	亦不生塵垢
超越度無極	神力超無量	一切諸世界
亦不著可欲	無垢度無極	夫欲究盡空

內淨外亦然 分別非常想 因緣度無極

光明照諸界 蠲除諸暗昧 不起若干想

斷垢度無極 慧觀有三法 永除欲怒癡

不爲色所染 智行度無極 設從億千劫

立志弘誓心 不見眾生類 淨教度無極

八等大道行 內外無我想 佛界法界淨

無量度無極 人本修其行 拔斷十二緣

除貪不著有 一意度無極 欲修人道行

先護身口意 十善眾行本 應法度無極

我本不造癡 根本爲所在 十慧無量智

本無度無極 法界不思議 成就無畏法
盡生死根本 重擔度無極 如來慈惠等
養育無高下 除去染汙心 無望度無極
發趣大乘意 接度諸有礙 不見生死本
遠離度無極 弘誓執勤苦 遊戲諸定意
常懷反復心 忘報度無極 眾生平等慧
盡知諸根本 不懷塵欲心 權慧度無極
大道甚爲妙 不爲塵欲動 三空捨本意
究竟度無極 於此賢劫中 諸佛興出世
拔苦無三礙 周旋度無極 身放平等光

接度無數眾 知生不染生 善友度無極

欲成無上道 親近善知識 能盡苦本際

無盡度無極 四道無往來 住壽無數劫

究盡道根本 無變度無極 欲究盡生死

勿懷退轉心 勇健不可壞 立志度無極

行施無所愛 亦不興三想 本末悉自空

解慧度無極 道力如虛空 不計五陰身

色本非有色 清淨度無極 無生眾慧本

常想非有真 不見有教化 智力度無極

過去無數劫 有佛如我號 修平等法本

無形度無極 大辯如來出 消滅愛欲塵
教化眾生類 信根度無極 有佛名無礙
苦行無量劫 攝意不放逸 守戒度無極
次名弘誓佛 教化無高下 意等如虛空
忍辱度無極 有佛名大願 究盡生死根
變化無數身 慇懃度無極 道本自清淨
不見虛空慧 無形不可見 慈悲度無極
更樂八十六 菩薩所修行 無有三毒本
不起度無極 賢聖十六心 悉知無所有
不壞諸法界 無身度無極 一心一念中

不離禪定觀 復從一意起 無想度無極

虛空無邊涯 寂意無染汙 捨一不著一

定意度無極 吾本應此行 寂然無想念

息意處現在 無礙度無極 禪定自滅意

淨觀滅三想 道慧自然淨 除染度無極

佛境不思議 眾生界亦然 法性自然寂

無形度無極 能度生死難 不念三界苦

忍意不起想 憺怕度無極 入三世定意

盡知眾生根 自觀內外身 無願度無極

八部鬼神界 隨彼而教化 爲現神足力

滅跡度無極 善權教眾生 不離本末空
分別四無畏 無我度無極 思惟內外身
分別空無慧 不觀有吾我 法意度無極
生遇賢聖樂 八解無所著 不興眾想念
如幻度無極 正法無男女 意由思想生
染法不可見 惡露度無極 分身無量形
還復合爲一 無能覺知者 身密度無極
如來眾相具 色身遊世間 神足而教化
無倚度無極 凡夫未入學 不觀內外身
聖慧甚深妙 相好度無極 本從神足起

意法無高下

菩薩無形觀

安樂度無極

禪定無念待

息心無所著

遊戲八解池

至誠度無極

人知五苦法

仰修無爲道

六通無漏法

賢聖度無極

神通遊世間

常習賢聖律

不觀內外法

無名度無極

習行無憍慢

不懷顛倒心

不起諸結縛

無穢度無極

若復死屍觀

不念淨不淨

內法無所著

無慢度無極

威儀如法律

舉動不虛妄

眾智自衛護

無對度無極

無身爲道要

不爲塵所染

坐臥心常定

自守度無極 聖人愍念俗 爲雨甘露法
演暢無量慧 受化度無極 博施多恩惠
覺觀除心本 蠲除苦惱患 捨戰度無極
心念無量法 示現無量變 尋憶通慧本
奮迅度無極 內法無所念 恆爲外塵染
以彼無生智 從願度無極 眾定自瓔珞
眼識不起想 彼亦不自有 無移度無極
修習眾智慧 解脫度知見 欲飲不死漿
甘露度無極 淨觀無貪著 慧度空無異
分別四道果 流轉度無極 猶如有士夫

堪忍受塵勞 心慧無塵染 隨願度無極

相相各有報 非有行有法 超越四禪行

生盡度無極 前世由本行 無恚怒於人

自然離八難 超越度無極 常人之所念

合會有別離 非聖弘誓心 分別度無極

以無照本有 徹覩無有外 形累自然滅

無見度無極 往詣虛空界 速疾無所礙

不念中間法 應律度無極 了本無一法

志趣各有別 隨世染其色 解縛度無極

等分三毒本 行盡乃應行 知本非我有

身本度無極 心遊得自在 觀欲如熾然
消滅五道趣 清涼度無極 無願在三有
貪著五欲形 求離八無閒 言說度無極
起滅無有定 總持不忽忘 一切智慧足
博聞度無極 受慧有四品 他覺自不知
緣是逮七空 捷疾度無極 佛道難究盡
非心所能測 悉知無道觀 七覺度無極
分別三十七 如來聖道徑 一意不起想
名身度無極 包識遠近法 不念無礙道
十號一一異 無數度無極 講授深要法

心不懷怯弱 不願求無想 智力度無極

入正八等慧 不壞空性行 內自思惟法

逮果度無極 名色若干變 受人塵勞病

不能達本無 善察度無極 十法空無慧

意念縛著想 不念去外入 限齊度無極

愍念世苦人 憂畏無端數 建立權方便

現化度無極 心堅如金剛 非有為能壞

灌以甘露法 深要度無極 本因虛空慧

解脫無所礙 智明去塵垢 見聞度無極

知奉賢聖律 戒聞慧定心 道意志力彊

無闕度無極 知身本無形 煎燉生死法
愴然歸虛寂 解縛度無極 智者隨俗變
終不著更樂 除結斷苦本 尊上度無極
人中世雄師 行過無量世 至誠不懷欺
言應度無極 心念不思議 究盡深法藏
分別如來界 道覺度無極 如來十句義
各各無形相 寂然無音聲 授決度無極
觀身空無形 清淨無所染 增上本無法
行盡度無極 如來授記蒞 如如不變易
不見生滅本 本淨度無極 正覺所教授

不捨一切眾	盡令得覆護	無比度無極
爲人作橋梁	究盡一切法	漸漸入深藏
離苦度無極	教化眾生類	不離法境界
進趣於道場	自守度無極	眾生所歸趣
盡向於道門	眾智自在慧	無患度無極
與世作炬明	爲眾生作眼	令知所歸趣
大道度無極	十力所現世	拔斷離苦人
智慧壞諸有	神慧度無極	樂在閑靜處
修習本所行	能變現眾生	徑路度無極
於無量劫中	守苦不捨苦	具足十法寶

無離度無極 觀定如空等 普能有所照

自觀復觀彼 等性度無極 觀諸佛刹土

眾智自瓔珞 徧遊十方界 寂然度無極

復有無量法 如來所宣暢 消滅非法本

牢固度無極 眾生應受化 聞法便得悟

斯等宿識利 捷疾度無極 一切諸法本

非有亦不無 道從無想生 八法度無極

菩薩瓔珞經卷第十

音釋

澀色立切 蔓無販切 蕤夷然貌 攘手攘如陽切
不滑也 切蔓蕤相連屬貌 攘手猶將

臂也
降魔
 降胡江切
 服波切
熬煎
 牛刀切

菩薩瓔珞經卷第十一

姚秦沙門竺佛念譯

隨行品第十八之餘

智慧照無量	如師子無畏	觀見無常法
無生度無極	說法不有說	度人無有度
善權過百劫	無染度無極	不沒亦不盡
照曜一切人	宣暢如來慧	無欲度無極
說法無法想	不見吾我人	大慈度有無
輪轉度無極	眾鳥樂於池	青蓮芙蓉間
禪寂永除想	無事度無極	說法有三事

除其本末空 度此無量界 無倚度無極

念察人根源 觀彼心識意 不離菩薩誓

畢竟度無極 隨時行方便 不以苦經心

永捨增減意 如法度無極 幻術著眼識

不見有出生 耳識聞彼聲 解空度無極

若彼大幻師 現化諸飲食 鼻識而分別

香熏度無極 如化之所造 其義不可思

欲得究盡者 味識度無極 本我造更樂

身想諸法本 攝意自然伏 權現度無極

以清淨音響 周徧十方界 戒德香亦爾

無犯度無極 幻術不真實 狂惑愚癡等

導引真實法 真際度無極 推尋眾生根

非聖無能測 權化大聖人 立教度無極

清淨如蓮華 終不受塵垢 越次眾行表

檢意度無極 行過超三界 無形不可覩

普照三千界 法愍度無極 一意一念頃

具足眾相好 不染於塵勞 空界度無極

若能宣暢法 普潤諸萌類 四諦如爾相

苦盡度無極 佛土普清淨 無有三乘心

自然通道教 定意度無極 人本從空生

法界無增減 不違諸法本 方便度無極

幻化不真實 行超三界表 超過無量劫

通達度無極 無想眾生等 倚識不解慧

賢聖得往來 微識度無極 自然如爾性

法慧多所益 四大本自無 終始度無極

不見吾我人 壽命眾行本 一相無有相

無形度無極 無數諸佛土 莊嚴佛道場

演出佛光明 法寶度無極 攝意無有亂

永除三毒心 平等無若干 誠信度無極

倚識由五道 不能解縛著 拔濟苦根源

遠離度無極	雖復處胞胎	不爲欲所染
永離姪怒癡	解脫度無極	佛法甚深妙
神力過三界	現形在五濁	忍辱度無極
若復遭苦樂	不生增減心	執意如虛空
無疆度無極	道不從空生	亦不離人心
分身滿虛空	滅盡度無極	不見吾我人
不壞本無相	一行成正覺	觀世度無極
不生亦不滅	無有生死本	從此至彼岸
超越度無極	眾苦本無形	大智由境界
心識不可毀	幻行度無極	幻有二根本

行幻深智幻 能解此幻法 無疑度無極

智幻超三界 行幻亦復然 八正道清淨

道品度無極 世幻非真實 賢聖不染著

愚者抱常想 通慧度無極 六塵外六入

十二牽連法 名色由更樂 緣想度無極

行從愚惑生 流馳無數念 若當念有形

具足度無極 虛空無邊際 亦不見行迹

得尋生死岸 自然度無極 人壽有長短

今世亦後世 惟道憺然安 憺然度無極

法界各有性 不見受入處 無倚不可染

無壞度無極 佛土無央數 法智不思議
慧海不可量 受入度無極 人智無增減
賢聖行平等 分別空無慧 陰蓋度無極
本從無數世 苦行無有量 不念劫數期
閑靜度無極 念在兜術天 論講無形法
導引無量人 無二度無極 著樂不以歡
處苦亦不憂 見諦成就道 真實度無極
降神閻浮內 轉法於鹿野 盡捨世穢濁
望斷度無極 菩薩行成就 不著六塵勞
學知甚深法 牢固度無極 智術權方便

深入無有礙	分別無量身	在所度無極
勇超無量劫	窮盡生死本	莊嚴佛土淨
微妙度無極	人能信本源	不住於生死
心正無亂想	一相度無極	行施不見施
亦無去來想	觀物如虛空	無厭度無極
觀世非有世	亦無三途苦	自濟復濟彼
大慈度無極	設見眾生類	染著在三有
勸導以正教	大悲度無極	周旋無量界
執信如安明	和顏常一心	歡喜度無極
菩薩初發意	不爲一人故	曠濟無邊涯

放捨度無極 當我初生時 佛土黃金色

莊嚴於道場 神感度無極 不自滅名想

亦不著壽命 空無願無相 根門度無極

本從平等慧 今自致正覺 不捨金剛意

三觀度無極 慇懃於道德 日夜常經行

法說亦義說 進趣度無極 知足道第一

捨意無所貪 三十七道品 無爲度無極

菩薩刹土淨 種姓不襍錯 恆生正真家

豪族度無極 降神處母胎 示現嬰兒相

執心淨無垢 變化度無極 既得出母胎

舉足行七步 足足度七姪 示現度無極

常在金机上 現以香水浴 無量諸佛集

勸進度無極 三十二相具 八十好莊嚴

天地六反動 容顏度無極 諸法無形相

現以色相法 獨步無有侶 最尊度無極

一一思法界 不失本要誓 諸法悉如響

默然度無極 賢聖八等行 止觀無想行

不捨空無慧 一入度無極 常以妙道法

講授諸法門 勸導一切人 法響度無極

十善諸行本 無著不可染 修一得成一

不退度無極 世人懷慳貪 永處於幽冥
導引無量法 學習度無極 如來無所著
受法不捨離 永離眾生居 獨拔度無極
雖處父王宮 寂靜思惟道 不貪五欲樂
無穢度無極 觀身乾樹皮 亦如久朽灰
自察無識想 出息度無極 一數不離一
止觀本行願 繫意在目前 道智度無極
人處生死久 不計本來空 能捨不與俱
總持度無極 所以獲四辯 法義捷疾智
宣暢無量義 應適度無極 無數大聖集

聞法欲無厭	平等通大智	等慧度無極
設復於無量	成敗諸劫數	未盡如來藏
遠離度無極	一生百千生	欲究如來德
未有斯等類	廣及度無極	虛空有邊際
須彌可稱量	豈有大導師	無限度無極
從無央數劫	積累諸德本	行盡更不造
流轉度無極	世雄慈蓋普	潤及眾生類
聞法不疑滯	信解度無極	勇猛超眾上
無有下劣心	降伏魔官屬	忍意度無極
吾昔發誓願	不自惜身命	固自獨特出

金剛度無極 若中間有疑 不成最正覺
累劫德無量 人尊度無極 爾乃道立妙
法藏不可思 超過三有表 純淑度無極
一相不可見 真如性亦爾 捨本就其末
無礙度無極 不教自然悟 無師一切智
獨善無所憂 無尤度無極 壞六十二見
愛欲諸羅網 閉塞生死門 快樂度無極
息心自滅意 不懷玷汙心 執心如大海
無違度無極 觀身如怨讎 諸孔流不淨
分別內外法 解本度無極 一心一念頃

流馳不可制 至坐樹王下 宏誓度無極

法行如蓮華 常以三道教 雖處不染著

一意度無極 等意如大道 永除小節心

三十三法盡 無垢度無極 人當求出要

分別內外法 思惟不捨離 精進度無極

觀身當觀法 五陰聚散行 如人觀掌珠

真諦度無極 破碎四魔垢 摧壞憍慢山

慧火焚三毒 捨離度無極 卿等設有疑

各自宣說本 當以智慧光 照曜度無極

足下眾相明 印文炳然現 諸有覩此相

恩澤度無極 鹿膊如金剛 內外朗然現

峙立不傾側 端嚴度無極 皮毛極軟細

紅華不著水 一一眾好具 行足度無極

當我舉足時 入城行分越 福祐無貧富

不擇度無極 分越訖周徧 還詣靜房室

道法自娛樂 思惟度無極 日夜恆經行

觀誰應先度 不違本宏誓 清淨度無極

是以恆自修 不與世事諍 自離復離彼

離趣度無極 四大各有性 高下亦不同

由識神分別 法義度無極 菩薩自觀空

無微不至察 防護諸惡業 慧見度無極

諦觀諸刹土 不興苦樂想 解諸法甚深

善法度無極 可進知其進 亦不懷狐疑

出要無二道 虛寂度無極 悉觀諸行本

受報亦清淨 不求功德業 忘施度無極

過去不復生 未來不可見 現在自然法

願求度無極 泥洹無體性 亦無受入處

觀諸受法報 如本度無極 靜意三昧定

永與亂意別 無常苦無我 體行度無極

如實觀察法 知一不可動 不壞法本心

自在度無極	悉知法無我	生生不見生
轉諸法輪行	曠濟度無極	能滅諸法性
亦不求解脫	誠信遊五道	盡生度無極
如來至密行	心意識亦然	逮得無生心
了達度無極	計吾本所行	住壽恆沙劫
功勞自然著	行迹度無極	生死本所從
如幻無真實	寂滅不可汗	篋藏度無極
賢聖十二品	悉歸於無爲	無生永不生
行勝度無極	念昔在香林	端坐思惟道
形體不傾側	初禪度無極	又本在師子

曠普講堂所 無想諸天衛 二禪度無極

復於此賢劫 護法大城中 自隱求道教

三禪度無極 如今於此座 廣演無量法

內外無所礙 四禪度無極 行道無玷汙

不與若干念 故今自致尊 離世度無極

如日初放光 令人目所見 吾今演道教

現明度無極 無數阿僧祇 如來不思議

各各布道教 無生度無極 正使億百千

七寶滿世界 不如一意念 一意度無極

不起亦不滅 知本所從來 解了三世觀

梵行度無極 若能崇慧本 次第不越序
修道無二心 立寂度無極 大慈不思議
曠濟眾生類 師子一雷吼 普聞度無極
諸有眾生類 信樂空無法 順理無所犯
造行度無極 內修六重法 樂靜不處鬧
自識宿命行 知本度無極 今世受胎分
欲滅勤修行 一失命根識 受決度無極
諸法不憍亂 修行清白法 念生離生本
無本度無極 人遊五道淵 如河奔大海
速駛不復還 歸趣度無極 常念世間苦

念離不與俱 獨逝不懷憂 無雙度無極

如種諸穀子 稻麻諸華果 本子非生苗

變易度無極 人生不學道 臨死有變悔

欲離勿懈怠 學進度無極 若欲拔根本

勿復種其栽 此盡無過是 香熏度無極

觀諸世間法 悉空無所有 當觀是非法

不動度無極 勸助諸福業 一一無所礙

登於十住行 一生度無極 悉觀諸法門

總持無忘失 諸法界相應 斷結度無極

若欲遊虛空 神足無所礙 無人無我想

習行度無極 一一思惟法 輕舉無所礙
以身量度空 神足度無極 如實觀人本
道行無所違 不興二見心 正定度無極
如鏡觀面像 信已無瑕穢 塵勞自然滅
百福度無極 宿願不可盡 積行今乃獲
誠信如日初 擇法度無極 勤念入深要
搜求無量法 謙恭下下意 牢固度無極
菩薩有八法 修行至道場 解慧不著空
無相度無極 若欲倚空慧 知空非真實
慧本知三礙 空相度無極 有法名戰格

奮迅無畏定	亦不懷怯弱	眾智度無極
因緣各相生	生死是道本	二事不相離
拔苦度無極	一相非本相	亦無眾生相
識神深著有	假號度無極	真道無形質
微妙不思議	道實非有道	震動度無極
觀諸佛土淨	清淨無瑕穢	常以平等道
神通度無極	菩薩常觀察	不著形相法
知生過五道	無名度無極	或有修一法
超越眾行表	最勝自然達	越次度無極
空觀一切人	息心無所念	應一無所汙

齊限度無極	大聖德無量	不爲塵欲染
究盡塵勞源	無底度無極	本無有五道
由塵垢而生	幻化非常想	聖慧度無極
諸法相受入	菩薩所修行	不見眾苦本
無我度無極	亦不在劫數	生死無形兆
當來不常停	速疾度無極	分別四非常
苦空無我身	以慧自莊嚴	修治度無極
如人欲行空	修禪乃果獲	定意不錯亂
志密度無極	口出無量音	不毀於法性
如月眾星滿	果實度無極	神足不可量

慧海如恆沙 善權攝自在 受入度無極

若欲化眾生 入定觀察心 先以權慧導

漸現度無極 佛經不可數 唯佛能記之

諸法相應相 歡樂度無極 度脫一切眾

不限劫遠近 真道無男女 順一度無極

欲修菩薩道 先淨身口意 無從十惡行

本淨度無極 一意念道教 永離欲界行

中間不起想 滅欲度無極 諸法無名號

著色求功報 色亦非本色 離色度無極

菩薩受記前 如來所印可 行盡更不造

不著諸音響	無聲度無極	如人眼視色
絕迹度無極	經歷一切劫	拔擢離劫數
人本從積行	觀世如幻化	不以眾多想
權詐非真實	無著歸滅盡	懷道度無極
一亦本無住	無名度無極	假號出本無
一向度無極	一亦本非一	無一亦復爾
無有本非有	非有亦復然	解有非有者
無生亦復然	知生非常生	無生度無極
起亦不見起	斷結度無極	滅生非有生
補處度無極	有數本無數	無數亦復然

色本非眼候 猶識內分別 無識度無極

聲香味細滑 意法亦復然 本無有此識

自然度無極 無色觀諸法 無痛更樂生

威儀眾行具 造行度無極 本無有此生

貪識樂此生 隨形受生分 斷貪度無極

神識本無形 性本自然息 後受六入苦

斷入度無極 念離五道淵 思惟虛空觀

豎立法大幢 顯曜度無極 無想亦不生

不從師稟受 能從中自悟 越次度無極

諸法如虛空 非思欲之數 悉解眾音響

聞說度無極	其聲淨妙好	所說無滯礙
不起六更樂	妙法度無極	諸法無有量
如來盡超過	道智通三達	正觀度無極
現爲師稟受	不懷高下意	意超三界表
獨步度無極	無行不造行	行本無因緣
緣盡則無行	神德度無極	三痛由苦樂
報應隨其法	無苦無樂痛	痛止度無極
成就七觀行	三處自然滅	陰入不復生
愛止度無極	尋色本從空	以生諸法想
非我本造彼	見止度無極	無行亦無報

端坐無所念	思惟自成道	常住度無極
執意不可動	愴然如虛空	非有非不有
布行度無極	正使後滅度	定意不錯亂
不念有常想	廣行度無極	轉法無法想
況有受法人	解了悉空寂	知時度無極
聲彌滿世界	皆演妙法音	聲本自無生
無聲度無極	慎身守護口	意莫念非邪
與行不相違	無增度無極	思惟諸法界
不壞法轉行	具足九次第	法界度無極
無畏不可盡	無內外遠近	離四諸受入

無量度無極 不壞形色法 亦不與相應
不敗自然相 相應度無極 道行本無一
甚深不可量 隨根源適化 隨智度無極
如有欲解法 現法有境界 便能尋根源
無盡度無極 從億百千劫 教化眾生類
欲令悉成就 方便度無極 隨時現方便
不染著三有 拔斷諸陰蓋 等慧度無極
總持諸法門 不失正行本 不自稱歎已
滿足度無極 生法非有生 盡法非有盡
知生盡本無 音響度無極 譬如人音聲

等正覺所說	悉歸於空無	如實度無極
諸根不錯亂	護念眾相具	清淨歸本無
道慧度無極	人結無量縛	非有所能壞
自然通聖達	化生度無極	如來最正覺
玄鑒過去法	彼彼自然化	深藏度無極
未來有生本	受苦無有量	方便斷未來
本盡度無極	現在無量行	眾生不可量
隨形往因化	淨刹度無極	當說法門品
功德無有盡	不望功福報	道樹度無極
神足行有本	所說法不同	現法有增損

周旋度無極 無量智無礙 所說無虧損
道意甚深固 演暢度無極 佛法無二相
唯在身意淨 法處無倚著 不住度無極
雖得神通道 不習算術法 行說不具足
非來度無極 如實非有一 亦無若干想
行盡得致一 供養度無極 諸佛世尊等
於法得自在 化身得自在 法法度無極
既知前無數 難計無量劫 教盡復流化
舒遲度無極 當來阿僧祇 無量眾生類
知不唐勤勞 普接度無極 觀察種種類

過去無量佛	亦說眞如法	無倚度無極
實亦非本實	實亦自然生	實亦非常住
身轉度無極	文字通道法	行迹無疑難
不疑三世苦	身本度無極	不計本無法
智從無量生	觀世盡爲惑	教授度無極
從初發意來	恆愍眾生類	不處城國邑
離眾度無極	分別身支節	身相諸穢濁
解知本無形	無著度無極	法性非常住
亦非今後世	離法不獲果	未來度無極
亦不與同處	行迹各差別	盡歸於滅度

齊等度無極 實空不可離 況當無實空
念善力勤學 達妙度無極 一切眾相具
本無爲一形 法從空慧得 自生度無極
念本無怒佛 沒命善覺尊 由是今成佛
立志度無極 受形雖被謗 不爲榮辱屈
故號人中尊 攝意度無極 未受本無慧
道意有移轉 現光於世間 發意度無極
滅度有四品 皆由三毒本 名號人中尊
種類度無極 道亦有三相 眞如法性本
現在獲三報 成就度無極 如來眞實法

非有能護持	分別身空本	懷來度無極
得通不可測	心形俱然住	道練心塵垢
往來度無極	本無有心意	自生自然滅
我本亦自無	空寂度無極	佛不由三世
當來現在道	轉易不常停	速疾度無極
法相常自住	神識自流轉	非刹非有刹
慧靜度無極	身法有六行	非想意所造
若行三十七	願宣度無極	非彼吾所造
爲說非常空	出現諸佛法	世界度無極
神智廣長舌	所說如言教	斯由功德成

心通度無極 惠施知恩義 慎莫有僥倖

唯道自將護 現法度無極 道行深義法

神通解脫禪 以權隨時化 眾德度無極

法身思欲身 此非最真正 獲彼泥洹性

滅色度無極 隨宜適化前 勿爲塵勞屈

殊勝奇特變 降伏度無極 初無經苦心

造化不可逮 戒身自然具 德意度無極

信意向三寶 下下無自高 達本究盡苦

除疑度無極 分別諸識慧 不著吾我法

自然通聖達 自至度無極 宣暢十二緣

一一而了別 三藥除三愛 攝口度無極

現化諸刹土 演布虛無慧 亦不倚著身

察眾度無極 度人如恆沙 聞法不可量

周遊虛空界 等無度無極 八法無生度

善權照一切 不見諸法相 常法度無極

眾慧無所礙 修習去更樂 神歸於大道

向門度無極 總持有十事 身口意爲本

除十成就十 報應度無極 能與眾生類

示現無上慧 德過眾聖表 斷苦度無極

清淨空無形 不見正覺道 將導入解脫

道趣度無極 設於百劫中 恭奉賢聖人
不如一道本 垂愍度無極 昔吾初受決
先獲無生慧 猶經劫數期 空慧度無極
正覺本發心 成就十號本 既獲如所求
橋梁度無極 聖德過於天 光澤無有邊
玄化度眾生 恩純度無極 雖在俗中教
嚴訓如所誓 廣宣無量寶 隨時度無極
若人不觀世 無常諸變易 壽命積無量
住劫度無極 如我所經歷 現在目所覩
厭患五陰身 淨觀度無極 雖欲求泥洹

除去身想著 念修現在定 無犯度無極

十八本持法 念滅緣入法 不起妄想者

吉藥度無極 受法有三義 自專身口意

斷求不念空 了達度無極 一一分別身

佛法眾亦然 入定觀諸想 無邊度無極

諸佛無盡藏 演出無量定 徧觀一切界

究竟度無極 諸佛常威儀 修戒最第一

出入安詳法 攝心度無極 欲有所感應

要當先入定 了知本末空 平等度無極

佛本所修習 觀身無所貪 自利復利彼

行際度無極	觀察前後法	超越有無境
自在諸想寂	眾教度無極	身法有三事
不犯殺盜婬	專精求法界	本行度無極
口不犯四過	不妄有所說	自護復護彼
等覺度無極	意法有三事	不起眾亂想
得佛所住處	堅固度無極	本從等空來
教化滿世界	斷求不著空	如實度無極
行由三世起	染著愛欲縛	了以眞際法
成願度無極	三達五通智	所往無罣礙
淨刹化眾生	遊識度無極	本無今日有

有亦非本生 緣行致苦樂 緣對度無極

本學不思議 現變無有量 分身還合一

神智度無極 亦不處彼此 亦不住法界

觀身如無身 行業度無極 著生無有量

緣致生老病 內外悉空寂 無人度無極

本由平等慧 不見有往來 解三無三法

等定度無極 三行有三事 覺觀無有覺

進趣泥洹路 徧現度無極 覺觀諸法種

生三十七品 進趣泥洹路 安隱度無極

無學覺觀法 亦不見生滅 坐臥由自在

不起度無極	觀人無所觀	不見諸法主
現行無起滅	無量度無極	人生遇眾苦
經歷無數身	欲滅此眾難	修學度無極
受此四大身	欲滅無有方	智達悉觀察
斷欲度無極	諸法純熟性	淨諸功德業
積此得致佛	三垢度無極	充足眾生願
令各得成就	悉歸於滅盡	禁戒度無極
佛所教化處	要以空性本	說無不見無
歡喜度無極	若有眾生類	欲修吾德行
合聚無量法	眾慧度無極	修五分法身

戒定慧解度 量盡無有量 法本度無極

最初無有生 無佛亦無眾 因緣自造行

自起度無極 當受無量苦 生老眾痛惱

無形受胞胎 勇進度無極 諸佛恆入定

雨淚眾生故 三等六度法 望斷度無極

修習諸善本 覺意入諸定 雖生能離生

識相度無極 功勳過億劫 不著諸更樂

念善修道本 離塵度無極 入定得歡喜

遊心無量空 一一別眾相 成道度無極

欲具深法藏 先修空無相 教誡神足德

嚴淨度無極	如來一切智	知人本末空
爲說四諦法	果實度無極	大聖人中尊
廣訓無有涯	智業成五法	篋藏度無極
五業成五行	五願斷五道	五性五分身
五業度無極	若能修德業	求本本無業
然熾眾道果	廣曜度無極	十慧十樂道
十法悉具足	十住十所從	十妙度無極
三千二百福	一一眾相具	容顏好無比
自淨度無極	慈悲勸一切	務使成道果
累劫無量德	畢竟度無極	興建眾德本

不見吾我人 故號人中尊 無窮度無極

善權所適化 巧便不可量 隨時隱現法

盡生度無極 福報於三界 不別諸眷屬

現佛威儀德 成就度無極 吾今說瓔珞

諸佛之寶印 莊嚴佛土淨 華鬘度無極

有受持此法 獲福二十億 計身心識具

成辦度無極 耳目自聰明 自識本所更

辯智通達利 宿命度無極 恆見十方佛

稟受此總持 聞法輒解悟 法要度無極

所言人信用 終不被誹謗 身體皆得具

戒香度無極

菩薩瓔珞經卷第十一

音釋

瓔珞

瓔於盈切
珞盧各切

胞

胞班交切
胎土來切

愴

徒覽切
恬靜也

膊

市竟切

也

腸池爾切
屹立也

拔擢

拔蒲入切
擢直角切

僥倖

僥古堯切
倖胡耿切

菩薩瓔珞經卷第十二

姚秦沙門竺佛念譯

光明品第十九

爾時世尊。告善男子善女人。若有菩薩摩訶薩受持
諷誦尊復尊大梵天王所問句義不思議法。便當得
身相不二法門。眼入清淨得法界自在。菩薩摩訶薩
定意正受。卽於己身諸毛孔間。一一毛孔現法界自
在。接度眾生不可窮盡。不壞法界清淨之行。若菩薩
摩訶薩入此定意者。便能具足一切諸法。亦能現化
諸法如幻。能知世界諸法所出。從一佛刹至一佛刹。

乃至無數億百千世。一一分別眾生根源。復能思惟威儀禮節。可坐知坐。可臥知臥。復於彼劫無數億百千世界。分別根義。苦義空義。無形像義。爲說空觀。無名字觀。內觀外觀。非眾生觀。淨不淨觀。平等無二習。大修行。進趣無爲不退轉行。爾時世尊欲與諸來會者解釋狐疑。卽於座上。便放身諸支節。毛孔光明。悉照十方無量世界。其中眾生。蝟飛蠕動有形之類。盡見此光。自識宿命根本之法。復於光明聞此言教。苦義空義。無形像義。卽於彼劫見百劫事。知千劫事。知億劫事。知億百千劫事。知無限劫事。知阿僧祇劫事。

知無量劫事。知無邊劫事。知無數劫事。知無際劫事。知無稱劫事。知不思議劫事。知不可平量劫事。知無窮盡劫事。復知無限無量不可稱計諸佛刹土眾生起盡劫事。復見菩薩摩訶薩所行法則威儀禮節。專意修習不違本行。爾時菩薩見此光明心意開解。復自入己身諸毛孔定意。復見十方無量眾生億百千劫所修行本。爾時菩薩摩訶薩復從彼三昧起。見諸佛光明如前不異。爾時有菩薩名曰照明。卽從座起。偏露右臂。長跪叉手。白佛言。世尊。向見如來至真等。正覺身諸支節毛孔光明。盡照十方無量世界。皆使

眾生自識宿命無量世事。亦使諸菩薩摩訶薩神力自在。復能得入身諸支節毛孔定意。亦知十方眾生宿命。甚奇甚特不可思議。唯願世尊。敢有所問。若見聽者。乃得陳說。爾時世尊已知彼意。便告照明菩薩曰。汝所問者皆是如來境界。諦聽諦聽善思念之。汝所問者豈不爾乎。荅曰。如是世尊。如來諸法之藏。願具演說。永無狐疑。佛言。族姓子。汝向所問如來至真等正覺明行成爲善逝世間解。無上士道法。御天人師。號佛。眾祐世尊。今日放身諸支節光明。徧照十方無量世界。盡令眾生之類自識宿命本所從來。一光

明德所度無量。凡夫學地上至無學。皆蒙此光而得濟度。如來何不恆放此光濟度無量眾生之類。云何照明菩薩。汝所問者爲爾不乎。荅曰。如是如是。世尊。甚奇甚特。向欲所問其義如是。云何族姓子。如來當以此義見報。光明示現。眾定法門。不可以言教。有所教化。汝復當報我。云何世尊。今此日月照四天下。無不蒙光。時日月光。有時有益。有時有損。不乎。我時荅曰。無也。族姓子。佛言。汝所問者爲爾不乎。荅曰。如是。世尊。時汝復當作是問。日月光明。普有所照常。無虧損。如來今日放大光明。有時有損。有時無損耶。我復

當以此義報汝。云何族姓子。日月所照能以晝爲夜。以夜爲晝。不乎。汝當報我。不也。世尊。日月光明不能以晝爲夜。以夜爲晝。我言。族姓子。如是如是。如來光明能以晝爲夜。以夜爲晝。是謂各各差別。族姓子。汝復當以此義問我。云何世尊。若塵霧五翳蔽日月光。無有所照。今如來光明亦有塵翳耶。我言。不也。族姓子。何以故。如來光明內外通徹。非有塵霧之所遏絕。超過三界爲無上尊。云何照明。汝復當作是問。如來光明無所障礙。眾生三毒爲是塵翳。不乎。若是塵翳者。與日月五翳復有何異。時我荅言。善哉善哉。族姓

子快說斯言。吾今與汝一一分別。如來光明不可思議。超過三界爲無有等。法光明者有十藏行。云何爲十。一者勇猛道場不毀諸法。二者諸法無盡得四無畏。三者辯才通利離世八法。四者六通徹達無所望礙。五者演暢妙法不懷怯弱。六者不行放逸永離五蓋。七者慈悲喜護普愍一切。八者遊諸佛國化導一切。九者根門具足不樂下劣。十者修無上道不捨法意。是謂族姓子如來至真等正覺修此十法乃應如來十光明慧。猶如族姓子摩尼珠光神德無量。其光明者照一天下。照二天下。照三天下。照四天下。其光

明照千世界二千世界三千世界。照小千世界中千世界。復照三千大千世界。復有德摩尼神珠。照一佛世界二佛世界三佛世界。乃至無數三千大千世界。其光明德不可稱量。無情之光其德如是。況如來至眞等正覺。放大光明普照無量諸佛國土。其中眾生有形之類。見光明者。除三垢淨。皆發無上正眞道意。復次照明菩薩摩訶薩。若有善男子善女人。篤信承受信如來慧。獲大光明。有十事行。云何爲十。未曾有法如來悉知。是謂一事。未曾所轉善權方便。能現佛法。眾所覺知。是謂二事。於諸外法未得自在。各各狐

疑起是非心。不見言見。不縛言縛。不解言解。不持言持。不成言成。於諸法中。悉得自在。如實如爾。實無虛妄。使諸佛世尊。於一切法。悉得自在。於諸法界。無所罣礙。是謂三事。復次。族姓子。譬如有人。一念之頃。淨諸心垢。豁然大悟。不復經歷劫數之期。從一佛國。至一佛國。教化眾生。而無有礙。盡超三有。不以爲難。是謂四事。復次。照明菩薩摩訶薩。或遭劫燒。其間曠絕。前佛過去。後佛未出。法性恆住。而不變易。有宏誓如來。至眞等正覺。便能澄神寂定。虛空不於無餘泥洹。而取滅度。所以然者。由其本要宏誓重故。是謂五事。

復次照明菩薩摩訶薩。如來至真等正覺。觀察人心。應受化者。不受化者。如來悉知。如實不虛。如來悉知。從此欲界。至有想無想天心。識所念若善若醜若苦若樂。便能於中教化令度。是謂六事。復次照明菩薩摩訶薩。如來化身不可測度。遊於無量諸佛刹土。行禪解脫九次第法。是謂七事。復次照明菩薩摩訶薩。若有善男子善女人。修五德行。懷忍辱心。不譏彼受。亦復無此生若干意。我勝彼不如。復無此心。彼勝我不如。或復生心。彼與我等。我與彼等。是謂八事。復次照明菩薩摩訶薩。若善男子善女人。無量諸法不可

思議。入諸五趣。心中所念。彈指之頃。悉皆知之。有愚癡心。無愚癡心。有愛欲心。無愛欲心。有瞋恚心。無瞋恚心。一一分別。悉皆知之。是謂九事。復次。照明菩薩摩訶薩。若善男子。善女人。遊諸十方。諸佛世界。勸進人民。施爲佛事。便說五趣。受形之惱。雖復生天。非是常道。人身百變。生死無量。抵突畜生。終無解脫。貪饕餓鬼。受形醜陋。地獄受報。罪畢乃出。唯有泥洹快樂無比。指示徑路。進趣無爲。是謂照明菩薩摩訶薩十事行。非是二乘所能及也。

無想品第二十

爾時座上有法造菩薩。聞如來至真等正覺說十光明慧。欣然踊躍。卽從座起。偏露右臂。右膝著地。前白佛言。敢有所問。尊見聽者。乃當陳啓。佛告法造菩薩曰。族姓子。今大眾雲集。悉無所畏。有所疑難。便可問之。時法造菩薩白佛言。世尊。云何有想。云何無想。云何有行。云何無行。云何有痛。云何無痛。佛告法造菩薩。善哉善哉。族姓子。汝所問者。皆持佛威神。諦聽諦聽。善思念之。吾當與汝一一分別。法造菩薩言。願樂欲聞。佛言。族姓子。我今問汝。汝當一一報我。云何族姓子。最正覺者。爲有想耶。爲無想耶。法造菩薩言。最

正覺者是有想耶。非無想耶。佛言。云何族姓子。清淨法身爲有想耶。爲無想耶。法造菩薩白佛言。世尊。清淨法身是有想。非無想。佛言。云何族姓子。戒身定身。慧身解脫身。度知見身。爲有想耶。爲無想耶。法造菩薩白佛言。世尊。戒身定身。慧身解脫身。度知見身。皆是有想。非無想耶。佛復問。云何族姓子。四意止。四意斷。四神足。五根。五力。七覺意。八賢聖道。空無相願。從須陀洹乃至佛。爲有想耶。爲無想耶。法造菩薩白佛言。世尊。從一切諸法至佛。皆是有想。非是無想。佛復問。云何族姓子。從一切諸法乃至等正覺。皆是有想。

非是無想。何者是無想耶。法造菩薩白佛言。本無慧無餘泥洹慧。是謂無想。佛復問法造菩薩曰。云何族姓子。汝今已得本無慧無餘泥洹慧乎。對曰。非也。世尊。佛言。族姓子。云何知本無慧無餘泥洹慧。是無想非有想耶。爾時法造菩薩卽以偈報曰。

昔從天中天 如來等正覺 聞說本無慧

無餘泥洹道 無生非有生 寂然無想著

愴然不變易 安靜無起滅 今故報如來

本無無有想 無著不可汙 何況有眾念

佛復以偈報法造菩薩曰。

如來等正覺 三達無所礙 分別諸法想

猶未盡根源 泥洹寂然定 法性不可壞

想在轉不轉 何爲無想乎 過去恆沙佛

法說義亦然 設本無無想 云何化眾生

爾時法造菩薩白佛言。世尊。云何是有想。云何是無想。佛言。族姓子。求佛是想。得佛是無想。求清淨法身是想。得清淨法身是無想。求五分法身是想。得五分法身是無想。四意止初乃至空無相願。從須陀洹乃至佛。求者是想。得者無想。爾時法造菩薩白佛言。世尊。從清淨法身一切諸法乃至等正覺。爲有形乎。爲

無形耶。若使有形我則無疑。若使無形求則有想得則無想。無形之法不可護持。云何不可護持之法有求有得。佛言。止止。族姓子。吾今問汝。此虛空界有形乎。無形耶。法造菩薩白佛言。世尊。此虛空界空如空。非有形非無形。佛言。族姓子。云何空如空。非有形非無形。法造菩薩白佛言。世尊。內外法有形無形。空如空。無餘泥洹道。是謂非有形非無形。佛復問法造菩薩。云何無餘泥洹。非有形非無形。法造白佛言。虛空界者。眼識所攝。以此觀之。非有形非無形。佛復問法造。眼識空耶。非空耶。對曰。非也。世尊。佛復問。若眼識

非空。云何以識知空。法造菩薩曰。以識非空故知空。如空非有形非無形。佛復問。云何族姓子。如汝所言。以識知無識。頗有無識知有識乎。法造白佛言。本無如來是。佛復問。云何爲本無如來。荅不住不變易不壞法界故。號爲本無如來。佛復問。族姓子。不壞不住。族姓子。以果耶。對曰。非也。世尊。佛言。云何知不住爲本無如來。法造白佛言。過去無形現在不住當來未至。佛言。汝今已得此法性乎。對曰。非也。世尊。佛言。未知三世住不住法。云何知有形無形耶。法造復白佛言。世尊。今聞如來至真等正覺。爲在有餘泥洹。爲在

無餘泥洹。佛言。我今亦在有餘泥洹。亦在無餘泥洹。法造菩薩白佛言。世尊。云何亦在有餘泥洹。亦在無餘泥洹。佛言。如我三十二相成此色身。則有餘泥洹。觀過去諸佛如恆沙數。無形不可見。則是無餘泥洹。法造復問。云何世尊。泥洹法界有可記。不可記耶。佛言。族姓子。泥洹法界不可記也。法造白佛言。泥洹無記。云何說過去恆沙不可數。名曰無餘泥洹。佛言。止。族姓子。如汝所言。此法權詐。無名號姓。所謂泥洹。非有非無。非有形非無形。但爲眾生著空。染空著法。界染法界。不知有形至無形。不知無形至有形。故使

如來說此義耳。法造菩薩白佛言。世尊。若使空如空。亦是有形。亦是無形。如來今日爲體有形爲體無形。假使體無形者。今日如來未入無餘泥洹界。云何知無餘泥洹界爲無形乎。若使如來知無餘泥洹界爲無形者。過去諸佛亦當如是。何以故。世尊。言法性常住而不變易。過去諸佛如恆沙數。不起不滅。故號爲本無如來。佛告法造菩薩。善哉善哉。族姓子。如汝所言。過去諸佛現在當來各無有想。過去非當來當來非過去。過去非現在。現在非過去。我所說者其義如是。法造菩薩復白佛言。過去想無想。現在想無想。當

來想無想。爲有異不異乎。佛告法造菩薩。過去非今。今非現在。各無有異。法造菩薩白佛言。云何爲有行。云何爲無行。佛告法造。清淨法身是謂有行。離清淨法身是謂無行。戒身定身慧身解脫身度知見身是謂有行。離則無行。三十七品從須陀洹乃至於佛是謂有行。離則無行。法造白佛言。如來至眞等正覺。今說有行無行。云何爲有行。云何爲無行。佛言。族姓子。地大水大火大風大色痛想行識是謂爲行。空性法性無形像性是謂無行。佛告族姓子。如來至眞等正覺。亦在有行亦在無行。云何在有行。云何在無行。有

佛境界是則有行。無佛境界是則無行。故謂有行無行。法造菩薩復白佛言。云何有佛境界。則有行。無佛境界。則無行。佛告法造菩薩曰。行有三事。一者恆在空澤。二者在虛空界。三者在人眾中大寂泥洹。爾時法造菩薩復白佛言。云何爲有痛。云何爲無痛。佛言。初欲行檀。是謂爲痛。施而無悔。是謂無痛。習戒不犯。是謂爲痛。戒心牢固。是謂無痛。執心如地。不捨忍辱。是謂爲痛。忍能和眾。不離彼此。是謂無痛。奉法慇懃。初無變悔。是謂爲痛。進法如舊。不捨道本。是謂無痛。雖得久定。心在無想。是謂有痛。不壞道本。一意不亂。

是謂無痛。化導眾生攝以一道是謂爲痛。不見吾我去想著心是謂無痛。

無識品第二十一

爾時有菩薩名曰淨觀。卽從座起偏露右臂。右膝著地長跪叉手。前白佛言。若有善男子善女人。受持諷誦此經典者。我代其歡喜。何以故。皆過去諸如來無所著等正覺之所修行。當來諸如來亦當習此法而得成就。如我今日如來至真等正覺。願宣此法。善權方便化道眾生。爾時淨觀菩薩復白佛言。若有菩薩摩訶薩。宣傳此法布現世人功德有二十行。云何爲

二十。總持瓔珞。不壞法界。種姓瓔珞。居家成就。善權
瓔珞。不減耗諸法。化生瓔珞。不受胞胎。淨教瓔珞。無
欺諍法。法身瓔珞。解性清淨。受入瓔珞。空行成就。眾
生瓔珞。化一切故。滅度瓔珞。無塵垢故。生盡瓔珞。本
無心識。無量瓔珞。垢自淨故。劫數瓔珞。無遠近故。知
生瓔珞。惟本無故。道德瓔珞。行自滅故。大乘瓔珞。諸
根具足故。解脫瓔珞。不見眾生故。法王瓔珞。說法無
窮故。無厭瓔珞。受法不疲故。文字瓔珞。強記不忘故。
法界瓔珞。行具足故。法本瓔珞。本無泥洹故。法性瓔
珞。無生滅故。宏誓瓔珞。道性廣博故。眞如瓔珞。善本

具足故。清淨瓔珞。離生本無故。無礙瓔珞。通達往來故。法起瓔珞。不著三處故。若有比丘比丘尼優婆塞。優婆夷。受持諷誦法瓔珞者。便當具足二十功德。總持法門。爾時淨觀復白佛言。若有善男子善女人。徧滿三千大千世界。一一眾生起七寶塔。不如善男子善女人。諷誦此法。法瓔珞者。其功德福不可稱量。何以故。諸佛世尊皆由而得成就。若有善男子善女人。起七寶塔徧三千大千世界。不如善男子善女人。受持諷誦法瓔珞業。其功德福不可稱量。爾時世尊告淨觀菩薩。善哉善哉。族姓子。乃能於如來前作師子。

吼。云何族姓子。若有善男子善女人。受持諷誦此法
瓔珞。復有恆沙眾生成就五戒。其福寧多不乎。淨觀
菩薩白佛言。甚多甚多世尊。佛言。故不如善男子善
女人得法瓔珞無盡之藏。其功德福不可稱量。百倍
千倍萬億巨億萬倍。不可以譬喻爲比。何以故。一恆
沙眾生成就五戒。皆由法瓔珞而得具足諸道果報。
佛復告淨觀菩薩。云何族姓子。若有一恆沙眾生。盡
得五通皆悉成就。加修五戒十善。其功德福寧爲多
不。淨觀菩薩白佛言。甚多甚多世尊。佛言。故不如善
男子善女人受持諷誦法瓔珞業。其功德福不可稱

量。何以故。一恆沙眾生悉得五通。各各成就。皆由法
瓔珞而得具足。諸道果報。佛復告淨觀菩薩。云何族
姓子。若有一恆沙眾生。行四等心慈悲喜護。行第一
禪。第二。第三。第四禪。念持喜安自守。復行四空定。一
一具足。其功德福寧爲多。不淨觀菩薩白佛言。甚多
甚多。世尊。佛言。故不如善男子。善女人。受持諷誦法
瓔珞業。其功德福不可稱量。何以故。一恆沙眾生。行
四等心慈悲喜護。行第一禪。第二。第三。第四禪。念持
喜安自守。行四空定。皆由法瓔珞而得具足。諸道果
報。佛復告淨觀菩薩。云何族姓子。若有一恆沙眾生。

盡得須陀洹果。斷諸妄想。悉皆成就了。了通達。其功德福寧爲多不。淨觀菩薩白佛言。甚多甚多世尊。佛言。故不如善男子。善女人受持諷誦法瓔珞業。其功德福不可稱量。何以故。一恆沙眾生悉得須陀洹道。一一成就。皆由法瓔珞。而得具足諸道果報。佛復告淨觀菩薩。云何族姓子。若有一恆沙眾生。盡得斯陀含果。無復狐疑。悉皆成就。其功德福寧爲多不。靜觀菩薩復白佛言。甚多甚多世尊。佛言。故不如善男子。善女人受持諷誦法瓔珞業。其功德業不可稱量。何以故。一恆沙眾生悉得斯陀舍。一一成就。而無狐疑。

皆由法瓔珞而得具足諸道果報。佛復告淨觀菩薩。云何族姓子。若有一恆沙眾生盡得阿那含果。無復狐疑。悉皆成就。其功德福寧爲多不。淨觀菩薩復白。佛言。甚多。甚多。世尊。佛言。故不如善男子善女人受持諷誦法瓔珞業。其功德福不可稱量。何以故。一恆沙眾生悉得阿那含。一一成就而無狐疑。皆由法瓔珞而得具足諸道果報。佛復告淨觀菩薩。云何族姓子。若有一恆沙眾生盡得阿羅漢果。無復狐疑。悉皆成就。其功德福寧爲多不。淨觀菩薩復白。佛言。甚多。甚多。世尊。佛言。故不如善男子善女人受持諷誦法

瓔珞業。其功德業不可稱量。何以故。一恆沙眾生悉得阿羅漢。一一成就而無狐疑。皆由法瓔珞而得具足諸道果報。佛復告淨觀菩薩。云何族姓子。若有一恆沙眾生悉得辟支佛。一一成就而無狐疑。其功德福寧爲多不。淨觀菩薩復白佛言。甚多甚多。世尊。佛言。故不如善男子善女人受持諷誦法瓔珞業。其功德福不可稱量。何以故。一恆沙眾生悉得辟支佛。一一成就而無狐疑。皆由法瓔珞而得具足諸道果報。佛復告淨觀菩薩。云何族姓子。若有一恆沙眾生。成一地行發意趣道。修十八法三十七品空無相願。其

功德福寧爲多不。淨觀菩薩白佛言。甚多甚多世尊。佛言。故不如善男子善女人受持諷誦法瓔珞業。其功德福不可稱量。何以故。一恆沙眾生悉得成一地行發意趣道。修十八法三十七品空無相願。一一成就而無狐疑。皆由法瓔珞而得具足諸道果報。佛復告淨觀菩薩云。何族姓子。若有一恆沙眾生超一地住第二地。修八行法并修十八法三十七品空無相願。其功德寧爲多不。淨觀菩薩白佛言。甚多甚多世尊。佛言。故不如善男子善女人法瓔珞業。其功德福不可稱量。何以故。一恆沙眾生超一地行住二地。修

行八法并十八法三十七品空無相願。一一成就而無狐疑。皆由法瓔珞而得具足諸道果報。佛復告淨觀菩薩曰。云何族姓子。若有一恆沙眾生超一地二地。在三地中。修五淨法行五觀法。修行八法并十八法三十七品空無相願。其功德福寧爲多不。淨觀菩薩白佛言。甚多甚多。世尊。佛言。故不如善男子善女人法瓔珞業。其功德福不可稱量。何以故。一恆沙眾生超一地二地。在三地中。修五淨法行五觀法。并修八法及十八法三十七品空無相願。一一成就而無狐疑。皆由法瓔珞而得具足諸道果報。佛復告淨觀

菩薩曰云何族姓子。若有一恆沙眾生從一地二地三地住四地中。修四法及七觀行并五淨法。行五觀法。修行八法并十八法三十七品空無相願。其功德福寧爲多不。淨觀菩薩白佛言。甚多甚多世尊。佛言。故不如善男子善女人法瓔珞業。其功德福不可稱量。何以故。一恆沙眾生在第四地。修行四法及七觀行。修五淨法。行五觀法。修行八法及十八法三十七品空無相願。一一成就而無狐疑。皆由法瓔珞而得具足諸道果報。佛復告淨觀菩薩曰。云何族姓子。若有一恆沙眾生。在五住地修十二法心意不惑。堪任

教化及修四法行七觀行。修五淨法行五觀法。修行八法及十八法三十七品空無相願。其功德福寧爲多不。淨觀菩薩白佛言。甚多甚多。世尊。佛言。故不如善男子善女人法瓔珞業。其功德福不可稱量。何以故。一恆沙眾生在五地中。修十二行心意不惑。堪任教化及修四行修五淨法。行五觀行行七觀行。行八法及十八法三十七品空無相願。一一成就而無狐疑。皆由法瓔珞而得具足諸道果報。佛復告淨觀菩薩曰。云何族姓子。一恆沙眾生在六地。行六度無極布施持戒精進忍辱一心智慧。修十二法心意不

惑。堪任教化。及修四法。行七觀行。修五淨法。行五觀法。及修八法。及十八法。三十七品。空無相願。其功德福。寧爲多不。淨觀菩薩。白佛言。甚多。甚多。世尊。佛言。故不如善男子。善女人。法瓔珞業。其功德福。不可稱量。何以故。一恆沙眾生。在六地中。行六度。無極布施。持戒忍辱。精進一心智慧。修十二法。堪任教化。及修四法。行七觀行。修五淨法。行五觀行。及修八法。及十八法。三十七品。空無相願。法瓔珞業。其功德福。不可稱量。一一成就。而無狐疑。皆由法瓔珞而得。具足諸道果報。佛復告淨觀菩薩曰。云何族姓子。一恆沙眾

生在七地中。逮不退轉行十三法。畢志堅固。當成無上等正覺。得四無畏。獲四辯才。行六度。無極布施。持戒忍辱。精進一心智慧。修十二法。心意不惑。堪任教化。及修四法。行七觀行。修五淨法。行五觀行。及修八法。及十八法。三十七品。空無相願。其功德福。寧爲多不。淨觀菩薩。白佛言。甚多甚多。世尊。佛言。故不如善男子。善女人。法瓔珞業。其功德福。不可稱量。何以故。一恆沙眾生。在七地中。逮不退轉行十三法。畢志堅固。當成無上等正覺。得四無畏。獲四辯才。行六度。無極布施。持戒忍辱。精進一心智慧。修十二法。心意不

惑。堪任教化及修四法行七觀行。修五淨法行五觀行。及修八法及十八法三十七品空無相願。法瓔珞業其功德福不可稱量。一一成就而無狐疑。皆由法瓔珞而得具足諸道果報。佛復告淨觀菩薩曰。云何族姓子。一恆沙眾生在八地中立童眞行。成就十二妙法及五慧業行十三法。畢志堅固當成無上等等正覺。得四無畏獲四辯才。行六度無極布施持戒忍辱精進一心智慧。修十二法心意不惑。堪任教化及修四法行七觀行。修五淨法行五觀行。及修八法及十八法三十七品空無相願。其功德福寧爲多不。淨觀

菩薩白佛言。甚多甚多世尊。佛言。故不如善男子善女人法瓔珞業。其功德福不可稱量。何以故。一恆沙眾生。在八地中立童眞行。成就十二妙法。心意不惑。堪任教化。及修四法。行七觀行。修五淨法。行五觀行。及修八法。及十八法。三十七品。空無相願。法瓔珞業。其功德福不可稱量。一一成就。而無狐疑。皆由法瓔珞而得。具足諸道果報。佛復告淨觀菩薩曰。云何族姓子。一恆沙眾生。在九地中。必當堅住。得佛無量神德之業。盡捨諸法。不復修習。進當成佛。無復退轉。其功德福。寧爲多不。淨觀菩薩白佛言。甚多甚多世尊。

佛言。故不如善男子善女人法瓔珞業。其功德福不可稱量。何以故。一恆沙眾生。在九地中立童眞行。成就十二妙法。心意不惑。堪任教化。如此之比。滿十方恆沙。及前一地二地。乃至九地。故不如法瓔珞業。其功德福不可稱量。一一成就。而無狐疑。皆由法瓔珞而得具足。諸道果報。爾時世尊。告淨觀菩薩。如我今日。如來至眞等正覺。三界獨尊。盡統三千大千世界。故號天中之天。斯由法瓔珞業而得成就。其功德福不可稱量。具足深要。諸道果報。

爾時有菩薩名曰辯通。卽從座起。長跪叉手。前白佛。

言。若有善男子善女人心意好樂。欲得修習法瓔珞者。云何用心。當行何法而得成就法瓔珞慧。佛言。善哉善哉。族姓子。若有善男子善女人。欲得修習法瓔珞者。當去妄想不生識著。諸念具足。得入眾定。遊至十方無量世界。從一佛國至一佛國。承事供養諸佛世尊。何以故。皆由無識著想。而得具足諸道果報。

菩薩瓔珞經卷第十二

菩薩瓔珞經卷第十三

姚秦沙門竺佛念譯

受迦葉勸行品第二十二

爾時佛告比丘比丘尼優婆塞優婆夷及諸大眾普來會者及菩薩摩訶薩誰能堪任於如來前說有行無行不可思議眾智之門。爾時一切大眾聞如來說有行無行不可思議眾智之門默然不對。爾時世尊放舌相光明普照無數無量國土使無量眾生皆見光明。其見光者皆發無上正真道意。時東方去此十億江河沙數。過是數已有佛土名蓮華淨。佛名淨教。

如來至眞等正覺。見釋迦文放大光明普照三千大千佛土。卽遣菩薩萬二千人來至忍土。至世尊所頭面禮足。在一面坐。南方去此十億江河沙數諸佛國土。佛名一道復見光明尋遣菩薩八千大士來至忍界。至如來所遶佛三匝。在一面坐。西方去此七江河沙等諸佛世界。有佛土名曰無礙。如來至眞等正覺見此光明普有所照。卽遣二千二百大士。盡得神通。行過魔界來至忍土。至如來所頭面禮足。在一面坐。北方去此十三億江河沙數。有佛土名曰妙億。佛名正意。如來至眞等正覺。復見光明普照三千大千世

界。尋遣五萬菩薩。悉皆神足。六通清徹。來至忍界。至世尊所。頭面禮足。在一面坐。東北角方去。此八江河沙數。有佛土名曰除垢。佛名等行如來。至眞等正覺。見此光明。復遣菩薩七千大士。來至忍土。至如來所。頭面禮足。在一面坐。東南角去。此三億佛土。有佛國名曰積寶。佛名善積如來。至眞等正覺。復見光明。尋遣七百正士。皆得神通。獲無礙慧。來至忍界。至世尊所。頭面禮足。在一面坐。西南角去。此十江河沙數。諸佛國土。有佛土名曰一相。佛名等慧如來。至眞等正覺。見此光明。尋遣千五百大士。來至忍界。至世尊所。

頭面禮足在一面坐。西北角去此十四億江河沙數。諸佛國土。有國土名曰清淨。佛名眾德如來。至眞等正覺。見此光已尋遣五千菩薩來至忍界。至世尊所。頭面禮足在一面坐。上方去此過眾香界。復過二江河沙世界。有佛土名曰普慈。佛名宏等如來。至眞等正覺。見此光明尋遣五千菩薩來至忍界。至世尊所。頭面禮足在一面坐。下方去此三十二億江河沙數。有佛土名曰堅固。佛名不捨宏誓如來。至眞等正覺。見釋迦文佛放大光明。復遣十千大士從下方來。至世尊所。頭面禮足在一面坐。是時世尊見眾坐已定。

便告諸來會者。吾今當說有行無行。諦聽諦聽。善思念之。若有善男子善女人。從須陀洹乃至阿羅漢。未得如來道慧藏者。斯等之類不在聖例。爾時座上有九萬二千無著阿羅漢。從異方世界來詣忍土。欲從如來聽法。瓔珞有行無行。今聞世尊吐如此教。若善男子善女人。從須陀洹乃至阿羅漢。未踐如來道慧藏者。斯等之類不在聖例。是時九萬二千得道阿羅漢。諸漏已盡。縛結已解。更不受生。如實知之。爾時摩訶迦葉。阿若拘鄰。舍利弗。摩訶目犍連。賓頭盧。摩訶迦旃延。離越。須菩提。滿願子。九萬二千人等。卽從座

起頭面禮如來足。遶佛三匝各自長跪。前白佛言。世尊。我等雖得四果六通清徹。猶尙不如凡夫行人。所以然者。今聞如來說道慧深藏。非我等所入境界。唯願世尊得聞斯法。使久寐眾生永無猶豫。爾時世尊默然不對。時大迦葉重白佛言。我等羅漢雖獲稱爲佛子。皆是如來之咎。非我等過。何以故。若使如來誓無三乘者。我等豈非成等正覺乎。何爲如來不見聽在聖例乎。時大迦葉及九萬二千真人。盡脫袈裟哀號悲泣。五體投地。當爾之時。三千大千刹土六變震動。諸天龍鬼神阿須倫迦畱羅眞陀羅摩休勒乾沓

憇人及非人怪未曾有。爾時世尊欲解諸人心中狐疑。便舒右手持迦葉起。各使復坐。爾時世尊卽說斯偈。

本無如來業	道慧藏第一	諸度無量智
漸入如來境	大道無三乘	況有四道果
觀淨如虛空	耆年迦葉是	今我觀斯心
非有亦非無	多現無量變	不捨佛宏誓
從久遠已來	修神足瓔珞	六度曠大法
何有聲聞名	佛界無疆畔	所化亦不同
故使眾生惑	謂爲道若干	

爾時座上有無央數眾生。聞如來說此偈已。悉皆發意。信樂欲聞道慧深藏甚深之法。皆發無上正真道意。復有無央數眾生。正心解脫得盡信之行。

有行無行品第二十三

爾時無頂相菩薩。卽從座起。偏露右臂。長跪叉手。前白佛言。我能堪任於如來前說有行無行。佛言。善哉。善哉。族姓子。若能說者。今正是時。無頂相菩薩白佛言。世尊。若有菩薩摩訶薩。解了本無。是謂有行。本無自然空寂無形。是謂無行。廣進菩薩曰。現彼佛土神足教化。是謂有行。不見國土化眾生者。是謂無行。知

生菩薩曰。泥洹寂靜無起滅者是謂有行。不見泥洹及泥洹相是謂無行。法寶菩薩曰。說道非道是謂有行。亦非有道亦非無道是謂無行。淨妙菩薩曰。清淨法觀是謂有行。亦不見清淨法觀是謂無行。趣道菩薩曰。見佛神力是謂有行。亦不見佛亦無神力是謂無行。普施菩薩曰。現有入定是謂有行。亦不見修行亦不見入定是謂無行。月光照菩薩曰。見佛身相徧滿三千大千世界是謂有行。亦不見佛及相好者是謂無行。哀世菩薩曰。有吾我壽命是謂有行。亦不見壽命亦不見吾我是謂無行。無畏菩薩曰。說法無法

想是謂有行。亦不見法。非無有法。是謂無行。如是菩薩摩訶薩。於有行無行。便得具足。菩薩瓔珞。無量菩薩。曰。以過佛量而不可限。是謂有行。亦不見量。亦不見非量。是謂無行。心念菩薩。曰。以六神通遊諸佛國。不自稱譽。歎神通道。是謂有行。不見國土有所接度。是謂無行。賢護菩薩。曰。能化一切。盡爲佛形。是謂有行。亦不見化。復不見佛。是謂無行。無邊際菩薩。曰。佛界無量。總持不忘。是謂有行。本無總持。亦無三寶。是謂無行。常悲菩薩。曰。諸有眾生。發大乘心。是謂有行。亦無大乘。復無有道。是謂無行。不思議菩薩。曰。佛不

思議正法亦然。法不思議受報亦然。是謂有行亦不見。思議亦不見。不思議是謂無行。周旋菩薩曰。空慧是一非不有慧。是謂有行。慧亦虛寂亦不有慧亦不無慧。是謂無行。法造菩薩曰。如來爲一眞際亦爾。是謂有行亦不見。如來亦不見眞際無一無不。是謂無行。善權菩薩曰。慧觀分別一切諸法。是謂有行亦無慧觀復無諸法。是謂無行。無與等菩薩曰。一相無相。是謂有行亦不見相亦不見無相。是謂無行。如是菩薩摩訶薩。於有行無行。便能具足菩薩瓔珞功勳。菩薩曰。亦不見生亦不見不生。是謂有行。生亦無生。

復無無生是謂無行。覺悟菩薩曰。有常無常是謂有行。亦不見常亦不見非常是謂無行。成就菩薩曰。不造身行亦無所著是謂有行亦不見造亦不見不造是謂無行。願樂菩薩曰。不造口行亦無所著是謂有行。亦不見造亦不見不造是謂無行。無處所菩薩曰。行亦不見造亦不見不造是謂無行。無處所菩薩曰。不造意行亦無所著是謂有行。亦不見造亦不見不造是謂無行。無礙智菩薩曰。覺無所覺是謂有行。亦不見覺亦復不起有眾生想是謂無行。香積菩薩曰。解道本無法性不異是謂有行。亦不見道復無法性是謂無行。轉法輪菩薩曰。在樹王下頌宣演暢四道。

果證是謂有行。說法無法想亦不見。四道是謂無行。自觀菩薩曰。說色痛想行識空。是謂有行。亦不見。五陰成敗是謂無行。眾智菩薩曰。其有觀四意止。知內外空。是謂有行。分別意止。本無所從來去。亦無所至。是謂無行。多聞菩薩曰。熾然諸法。乃至三十七品。是謂有行。亦不見。熾然及一切諸法。是謂無行。法身菩薩曰。見一切諸法。有動轉者。不動轉者。是謂有行。亦不見。動轉。非不動轉。是謂無行。無怒菩薩曰。一切法自然。法觀亦爾。法觀自然。一切法亦爾。是謂有行。本無諸法。亦無法觀。是謂無行。上首菩薩曰。分別佛慧。

知之虛寂是謂有行。觀佛深慧本性自爾亦無名號。是謂無行。道議菩薩曰。了五分法身而無遠離。是謂有行。一一觀察性自無形亦無起滅。是謂無行。本祚菩薩曰。一切諸法亦無所倚。不倚內空亦不倚外空。是謂有行。了內外空及一切諸法亦不見生亦不見滅。悉無所著。是謂無行。權現菩薩曰。周旋往來禮事諸佛亦不見佛土淨及以不淨。眾生好惡。是謂有行。不見己身及諸佛國好惡清濁。是謂無行。無想著菩薩曰。諸法不亂。澹然不移。不計苦樂。是常非常。若好若醜。是謂有行。無量智慧悉歸於空。不見亂定苦樂。

好醜。是謂無行。大慈菩薩曰。不見諸法有趣無趣。是謂有行。永無有趣亦不見趣。是謂無行。忍行菩薩曰。解空無相願及虛空識界眞如一性。是謂有行。空無相願亦是空空亦是空無相願復無報應。是謂無行。寶掌菩薩曰。入一定意悉知諸佛威儀所行法則之宜。是謂有行。雖入禪定永無法想。是謂無行。喜慶菩薩曰。三毒根本自然起滅。生不知所以。生滅不知所以滅。是謂有行。觀三毒根本自無形兆。永無起滅。是謂無行。觀進菩薩曰。奉律無所犯亦不見有犯。是謂有行。本無有律亦無有犯。本性自爾。是謂無行。常喜

菩薩曰。分別解脫十二法門。是謂有行。亦不見解脫。及諸法寶。有起有滅。是謂無行。宣暢菩薩曰。法生苦。生本無處所。是謂有行。知苦本際而不可覩。是謂無行。修道菩薩曰。大道一相。泥洹無形。不見志求。無上之道。是謂有行。所演道教而無精微。法界自然。無能迴轉。是謂無行。講法菩薩曰。所建立道。不可思議。雖處穢濁。如無所處。是謂有行。了知五淨及五濁。性虛而非真。亦無所有。是謂無行。爾時十方無央數。江河沙數諸菩薩等。各各自說有行無行。已各還復坐。時大迦葉便從座起。整衣服長跪叉手前白佛言。世尊。

我亦堪任說有行無行。若見聽者敢宣所懷。佛告迦葉。今大眾集。渴仰來久。若堪說者。今正是時。爾時大迦葉白佛言。世尊。若有善男子善女人。奉持正律十二頭陀難得之法。無所漏失。如毫釐許。亦不起想。生是非心。斯乃名曰第一有行。時大迦葉復白佛言。若善男子善女人。一意所念。專精不忘。能演道教。各充志趣。乃至成佛。不改大誓。斯亦名曰第一有行。時大迦葉復白佛言。若復善男子善女人。進學修習。禪觀法門。於諸通慧。無所染著。志求道者。各令歡喜。復能誘導。將示道徑。隨前人心。果其所願。求大乘者。畢志。

成就。不使墮落中間罣礙。若復欲得辟支佛者。亦復將護。令得無爲。斯亦名曰第一有行。時大迦葉復白佛言。若有善男子善女人。欲得修習無行法者。一切眾生罪根深固。難可拔濟。然此罪人。與我無緣。無由得度。然我世尊。微設權巧。漸伺方便。知彼去就。爲造因緣。得蒙覆蓋。是謂無行。時大迦葉復白佛言。世尊。若有善男子善女人。本無道心。在凡夫地。卽能指授。使發道意。至竟成就。終不中墮在二地中。是謂無行。復次世尊。若有善男子善女人。從無數劫。積功累德。發大宏誓。若我成道在某國生。遭遇某聖弟子。翼從

亦各如是。然彼善男子善女人。違本所願。中遭賢聖。有佛出世。卽從彼佛而取滅度。是謂無行。爾時世尊。告迦葉言。止止耆年。汝今滓濁褊狹之心。所能測度。何以故。立根得力菩薩摩訶薩。猶尙未悉有行無行。況汝小節。欲得悉乎。此則不然。還復汝坐如常威儀。時大迦葉容顏變常。極大慚愧。禮佛足下。還復本座。爾時長老阿若拘鄰。復從座起。前白佛言。世尊。我今堪任於如來前。願宣道教。有行無行。佛言。善哉善哉。族姓子。今正是時。忞汝所陳。時阿若拘鄰白佛言。世尊。若有善男子善女人。修八正道於八法中不起狐

疑是謂有行。若復善男子善女人。得無量法慧。分別
八法。悉無所有。本無一法。況有八正。無名號之法。亦
無窠窟。斯乃名曰第一最勝無行之法。復次世尊。若
善男子善女人。於四禪行。一一思惟。意不散。繫意
在明。不失法儀。必有所果。無有狐疑。是謂世尊第一
有行。若復善男子善女人。從初至竟。端坐思惟。諸無
形法。不見出生。本無端緒。名號虛詐。非真非有。斯乃
名曰無行之法。時長老阿若拘鄰。復白佛言。若善男
子善女人。分別空慧。心不染空。於空求空。生顛倒想。
是謂有行。若於空慧。不生染汙。不興妄見。起若干意。

本自無本。況當有今。是謂無行。復次世尊。若復善男子。善女人。內思明慧。空寂定意。持心牢固。無增無減。是謂有行。分別內外六情無主。本無六情況。今有識。識非三世不著。三有。是謂無行。是時長老阿若拘鄰。說菩薩摩訶薩。有行無行。已卽禮佛足。佛言。善哉善哉。族姓子。宣暢如來甚深之法。甚奇甚特。實未曾有。還復汝坐。如常威儀。是時尊者舍利弗。卽從座起。齊整法服。長跪叉手。白佛言。世尊。抱疑日久。欲有所問。唯願世尊。一一發遣。佛告舍利弗言。善哉善哉。族姓子。欲有所問。今正是時。如來一一當誨汝問。時舍利

弗。白佛言。世尊。云何爲有行。云何爲無行。如世尊言。現造則有行。本無則無行。今問如來。爲有行。至無行。乃名無行耶。爲有行。常有無行。常無。乃名無行乎。若言有行。則尊者大迦葉所宣有行。亦無錯謬。假使無行。則無言教。云何以無言教之法。令有言教耶。唯願世尊一一分別。佛告舍利弗言。云何舍利弗。有行體性爲空。不乎。舍利弗白佛言。世尊。有行體性空如空。佛復問舍利弗。云何族姓子。無行空性如何。舍利弗白佛言。世尊。無行空性卽有行空性是也。佛告舍利弗。若無行空性。卽有行空性者。今大迦葉。何以故。但

說有行不說有行空。亦不說無行。亦不說無行空性。耶。舍利弗白佛言。世尊。云何有行空性。云何無行空性。佛告舍利弗言。諦聽諦聽。善思念之。吾當與汝敷演其義。對曰。如是世尊。佛告舍利弗。云何族姓子。成五陰身。四大成就。捨本所生。如此眾生。若外見色。於眼識中。自起塵勞。分別此識。不從外來。亦不從內出。由識分別。乃生此患。云何族姓子。五陰法界。爲爾不乎。舍利弗言。如是如是。世尊。皆由眼識起此塵勞耳。佛復告舍利弗。云何族姓子。若有目之士。思惟眼識。分別塵勞。本從何來。爲從何滅。欲求塵勞。窠窟爲可。

得不乎。舍利弗白佛言。不也世尊。眼識無形而不可見。佛言如是如是。舍利弗。是乃名曰有行空性。復次舍利弗。若善男子善女人。於空離空不染空識。息心永滅不興想著。默然無言。斯乃名曰無行空性也。佛復告舍利弗。若善男子善女人。耳聞外聲。鼻嗅外香。舌知外味。身知外更。內樂。意法體知外行。思惟此識亦不從外來。亦不從內生。由識分別。乃起此患。云何族姓子。五陰法界爲爾不乎。舍利弗白佛言。如是世尊。斯由識法生諸塵勞。佛告舍利弗。云何族姓子。若有目之士。思惟法識分別塵勞。爲從何來。復從何滅。

欲求塵勞窠窟爲可得乎。舍利弗白佛言。不也。世尊。法識無形而不可見。佛言。如是。舍利弗。是乃名曰有行空性。佛復告舍利弗。若善男子善女人。於空離空不染空識。滅意永寂不興想著。靜然無語亦無道教。斯乃名曰無行空性也。佛復告舍利弗。夫諸法性住不變易。法起則起。法滅則滅。起亦不知所以起。滅亦不知所以滅。有目之士而觀察之。亦不見起亦不見滅。故號爲本無如來。至真等正覺。明行成爲善逝。世間解。無上士。道法御天人師。號佛世尊。超過三界爲天人尊。若有善男子善女人。受持諷誦此深法要。

有行無行法本者。便得具足眾想之慧。佛說此有行無行法時。有百億那術眾生皆捨本行執牢固誓。進趣佛乘不退轉地。復有諸天世人無央數眾。皆得道忍離凡夫地。是時尊者大目犍連。復從座起頭面禮足。前白佛言。我亦堪任暢達演說有行無行不思議法。佛言善哉善哉。族姓子。若樂說者。今正是時。目連白佛言。世尊。今聞如來包識眾法。以爲有行無行。如我觀省。如來正法。非我聲聞有行無行也。所以然者。弟子緣覺諸根淳淑。不復闕望平等正覺。我於如來則無行也。若使如來欲捨慧海。去諸眾智。求爲弟子。

緣覺道者。如來於我則無行也。又世尊言。一切諸法皆虛。皆寂。無生滅著斷。審如是者。何復限制。弟子緣覺不在聖例。益使我等九萬二千人。悉皆六通倍生狐疑。又聞佛言。我法曠大。亦無邊涯。不計吾我有著眾生。若當爾者。如來今日於清淨法界。則有關也。爾時世尊告目連曰。善哉善哉。族姓子。乃能於如來前宣暢此問。我今問汝。汝當一一報我。目連對曰。如是世尊。云何目連。行有報乎。目連白佛言。世尊。行有報也。又問目連。何者是行報耶。目連白佛言。隨其緣對。善有善報。惡有惡報。佛復問。云何目連。善有善報。惡

有惡報。目連白佛言。三塗八難。拷掠。撈笞。是謂惡報。泥洹永寂。無復生滅。是謂善報。佛復問目連。云何族姓子。今日本無如來。爲獲報不乎。目連對曰。不也。世尊。佛問目連。云何族姓子。如今如來至真等正覺。身黃金色。眾相具足。爲是何報。目連白佛言。如來相好。形質之報。非泥洹報也。佛問目連。汝體泥洹耶。云何知善有善報。是泥洹報乎。目連白佛言。一切諸法。皆悉假號。非有真實。所謂泥洹。泥洹者。亦假號耳。故說泥洹善有善也。爾時世尊告目連曰。如來於汝。則無行也。亦是假號。非有真實。汝欲求無上等正覺者。於

如來所則無行也。亦是假號。於假號法中欲分別有行無行者。此則不然。爾時世尊說此假號法。有九億眾生發宏誓意。願樂欲逮有行無行菩薩瓔珞。復有無量眾生得總持法門。復有三億眾生諸漏盡意。解得阿羅漢。爾時尊者賓頭盧。復從座起。前白佛言。我亦堪任說菩薩瓔珞有行無行。令善男子善女人。得修行之。世尊告曰。善哉善哉。族姓子。若能說者。今正是時。爾時賓頭盧白佛言。世尊。若善男子善女人。於初禪地。分別五陰惡露不淨。於中思惟無可貪著。是謂有行。若入定意觀無所有。虛而非真。觀他人身亦

復如是。斯謂無行。復次世尊。若善男子善女人。現身
臭處不淨流出。是謂有行。深觀本末知之爲空。是謂
無行。復次世尊。善男子善女人。於二禪地具足四行。
是謂有行。知二禪地盡歸於空。是謂無行。復次世尊。
若善男子善女人。自能開悟教眾生類。去離淨心起
不淨想。是謂有行。解了淨想本無所有。是謂無行。復
次世尊。若善男子善女人。思惟三禪淨除塵勞。不自
稱歎有所成辦。是謂有行。不見塵勞成不成者。是謂
無行。復次世尊。若善男子善女人。在四禪地思惟五
陰繫意不忘。是謂有行。分別四禪永無苦樂諸縛縛

著是謂無行。如是善男子善女人。菩薩摩訶薩。寂觀
瓔珞有行無行。爾時世尊告賓頭盧。說此法已。還復
本座。是時尊者大迦旃延。卽從座起。禮世尊足。前白
佛言。我今堪於如來前說有行無行。使眾生類得修
行之。若善男子善女人。於十六聖行不起狐疑者。是
謂有行。思惟縛著本性自淨。亦無十六聖行之名。是
謂無行。迦旃延復白佛言。若善男子善女人。拔斷三
毒。婬怒癡法。察彼眾生心中所念。有無明心。無無明
心。有愛欲心。無愛欲心。有恚害心。無恚害心。悉能分
別而無錯謬。是謂有行。若善男子善女人。觀知三毒

本無所有。不見生者。不見滅者。虛寂無形。是謂無行。迦旃延子復白佛言。若善男子善女人。於結使聚皆令畢竟。亦不更造。興起塵勞。是謂有行。不於結使。見有畢竟。不畢竟者。亦不興造。生塵勞患。是謂無行。如是善男子善女人。菩薩瓔珞有行無行。迦旃延子於佛前說此有行無行已。起禮佛足。還復本座。爾時尊者離越卽從座起。前禮佛足。白佛言。世尊。我亦堪任說菩薩瓔珞有行無行。佛告離越。堪任說者。便可說之。離越白佛言。世尊。若有善男子善女人。於無生法。越度生死。不見有度者。是謂有行。淪泥洹空。寂然無

形不有眾生想。是謂無行。復次世尊。若善男子善女人。得賢聖律受諸果證。修十二法。是謂有行。若觀一切法本。因緣聚散。知盡不生。更不受證。是謂無行。復次善男子善女人。諸佛世尊常所說法。苦集盡道賢聖寶藏。進取泥洹。無起滅法。是謂有行。不見賢聖道品之法。及泥洹道。是謂無行。如是善男子善女人。菩薩瓔珞有行無行。是時尊者須菩提。復從座起。前禮佛足。白佛言。若有善男子善女人。從本無行。至一切智。觀了無形。而不可見。是謂有行。不見本無出生諸法。菩薩瓔珞亦復如是。不見菩薩瓔珞。亦不見非菩薩。

薩瓔珞。是謂無行。爾時世尊問須菩提。云何族姓子。汝以何等義而作斯言。此是菩薩瓔珞。此非菩薩瓔珞。須菩提白佛言。世尊。若善男子善女人。於究竟法不生斷滅興計常想。是謂菩薩有行瓔珞。若善男子善女人。於本無法中諸法悉空。內空外空不起滅空。無所生空道空泥洹空。一切諸法皆空如空。是謂菩薩無行瓔珞。須菩提復白佛言。世尊。若善男子善女人。得空定淨意者。於賢聖法律具足一切諸法窠窟。從須陀洹斯陀含阿那含阿羅漢辟支佛。上至如來至真等正覺。莊嚴具足泥洹之路。是謂菩薩摩訶薩。

有行瓔珞。若復善男子善女人。修行五十五法。虛空
正要。一一分別。心不流馳。皆歸於空。於空無法。中無
生滅著斷。是謂菩薩摩訶薩。無行瓔珞也。尊者須菩
提。說此空性。有行無行。菩薩瓔珞時。有十三億發意
菩薩。本從等意。如來所初發道心。自從是來。中間懈
怠。今聞長老須菩提。說諸法虛寂。無生滅著斷。各還
本意。悉發無上正真道意。進求本誓。願欲成就菩薩
瓔珞。有行無行。爾時尊者。邠耨文陀尼子。卽從座起
前。至佛所。頭面禮足。長跪叉手。白佛言。世尊。若有善
男子善女人。思惟分別。空行法性。不於諸法。生吾我

心者。是謂有行。攝意常定。心如虛空。不著三界。是謂無行。若復善男子善女人。講論諸法。無生之心。金剛三昧。超越八地。捨本習緒。是謂有行。若復善男子善女人。得滅意度。一意莊嚴。瓔珞其身。進趣無上。正真道意。不以成佛。以爲快樂。雖在眾生。不爲勤勞。金剛之心。不可沮壞。是謂菩薩瓔珞有行無行。如此等九萬二千漏盡阿羅漢。各各宣暢菩薩瓔珞有行無行也。

菩薩瓔珞經卷第十三

菩薩瓔珞經卷第十四

姚秦沙門竺佛念譯

有受品第二十四

是時勇進菩薩白佛言。世尊。今聞如來說甚深法。諸賢聖律所入之門。其有聞知了此法者。亦不見著。亦不見脫。於空無法而無所損。不見諸法有所從來。有所從去。若善男子善女人。深觀此法無所從來。無所從去。爾乃明達。名爲解脫。一切諸法各各別異。其所言見。悉各離散。無有合偶。復於諸法不生想念。而有所成。亦復不念有解脫者。所觀諸法亦不有內。亦不

有外。亦無有遠。亦無有近。得慧菩薩深了本無。其知是者。去貢高心。不生慢憶。是爲善男子。善女人。於諸善法。而得解脫。便得住於無生滅地。其所住者。不見有住。復於諸法。住無所住。亦於諸法。見無所見。是謂善男子。善女人。正其性行。不念非邪。其作正見者。便於內性。觀了色相。亦無有色。亦不見色。而有色也。何以故。知一切法。觀空無形。知其本空。如色無有色。於一切法。亦不有受。亦不無受。是謂善男子。善女人。於一切法。而得解脫。是時勇進菩薩。說此有受品時。有十三億眾生。聞此法。已皆得不起。柔順法忍。異口同

音各稱斯言。今日勇進菩薩大士離於諸著。亦使我等成辦此法。我等仁者當以此法教授餘人。如我無異。悉得解脫。畢無所著。爾時世尊告勇進菩薩曰。夫泥洹心亦不在內。亦不在外。亦復不在兩中間。止有受菩薩無生滅處。諸菩薩心道等無二。亦無若干。道心適等無若干者。於一切人必有平等無二之心。是謂菩薩。故名曰等。而無差別。是時座中有五百天子。聞如來平等之法。有受無受。諸塵垢盡。得法眼淨。復有比丘比丘尼優婆塞優婆夷五百餘眾。皆得須陀洹道。復有無央數天龍鬼神乾沓怛阿須倫迦雷羅。

眞陀羅摩休勒人及非人。志趣大乘者。皆發無上平等道意。

無著品第二十五

是時世尊。告四部眾比丘比丘尼優婆塞優婆夷及諸菩薩摩訶薩天龍鬼神八部之眾。若有菩薩摩訶薩。欲逮一切智。欲上菩薩位。欲得金剛三昧。欲得降伏魔官屬者。欲逮一切諸法門總持者。欲離此彼處者。欲莊嚴佛樹者。是善男子善女人。當習如來無著之行。復次善男子善女人。欲得淨佛國土教化眾生。從一佛國至一佛國。承事禮敬諸佛世尊者。當學如

來無著之行。若有善男子善女人。欲得如來奇特之法。甚尊重者。若有眾生不於三界受色陰形。欲離五患。不處五道。如斯等善男子善女人。常當修習如來無著之行。佛復告善男子善女人。吾般泥洹後。正法漸衰。多有眾生倚託法服。貪小利養。詐發道心。虧損正法。無清淨意。如斯等人不信三寶聖賢之行。雖在我眾。離我甚遠。若復善男子善女人。修習如來無著之行。雖在凡夫未上菩薩位。執心牢固。不捨道意。如斯等人。正使處在億百千萬由延之外。猶去我近。何以故。此善男子善女人。修習如來無著行故。爾時有

菩薩名曰明觀。卽從座起頂禮佛足。前白佛言。世尊。云何名爲如來至眞無著之行。唯願世尊。一一分別令諸會者各得開解。佛告明觀菩薩曰。我今問汝。汝當報我。云何族姓子。汝何以故號明觀乎。用色耶。用痛想行識乎。因身耶。因名乎。用何等故號明觀耶。是時明觀菩薩白佛言。世尊。觀色非色。亦非有色。色性自空。亦不有色。我色彼色。本無所有。色空本空。色性自空。諸法自然。復無自然。諸法熾然。本無自然。觀色無生。亦不見生。生自無生。況當有色。但爲眾生癡心所潤。不能自悟。遂致苦惱。墜墮生死流轉。五道身死。

名滅便更受身。如來大聖無所染著。知所從來離諸縛著。眾行根元悉歸於空。痛想行識亦復如是。觀識非識亦非有識。識性自空亦不有識。我識彼識本無所有。識空本空。識性自空。諸法自然復無自然。諸法熾然本無自然。觀識無生亦不見生。生自無生。況當有識。但爲眾生癡心所潤。不能自悟。遂致苦惱。墜墮生死流轉五道。身死名滅復更受形。如來大聖無所染著。知所從來離諸縛著。眾行根元悉歸於空。無著眾行亦復如是。自致無上正真道意。何況善男子善女人。聞則信解於佛法眾。斯乃名曰無著之行。是時

明觀菩薩復白佛言。若使善男子善女人聞如來無著之行。便於是中發菩薩心。雖有是念。亦不供養諸佛世尊。斯於如來無著之行。而有耗減。若復善男子善女人。意欲懈怠。不復堪樂修無著行。能自剋責。念無著行。一念之頃。而不忘失。便得發無上至眞道意。何況篤信而奉行乎。若善男子善女人。得如來金剛三昧。發宏誓心。不可沮壞。斯皆由如來無著聖行而得成就。若復善男子善女人。得三昧王三昧。名曰奮迅勇。若菩薩摩訶薩。得此三昧者。便能降伏諸魔官屬。此善男子善女人。皆由無著聖行而有成辦。若復

善男子善女人。得信空法。無量聖行。修四意止。念念成就。分別內外空寂無形。斯皆出於如來無著聖賢之行。若善男子善女人。得四神足。心識自由。坐臥經行而無罣礙。遊至十方無量世界。禮事供養諸佛世尊。斯亦復是如來無著聖賢之行。若善男子善女人。及菩薩摩訶薩。獲四意斷。至十八法三十七品。莊嚴佛土成眾相好。八種音聲。過乎梵天。其有眾生聞佛音響。得解脫者。斯亦復是如來無著聖賢之行。若得善男子善女人。一一思惟空無相願。不復染著。興是非想。緣此三觀。當成無上正真道意。斯亦復是如來

無著聖賢之行。若有善男子善女人。從無數諸佛世尊。受菩薩戒。當成無上正真道意。畢志牢固。終不中退。亦不爲眾魔所能沮壞。斯亦復是如來無著聖賢之行。爾時明觀菩薩說是如來無著聖賢行時。有八十四億眾生之類。願樂欲求如來無著聖賢之行。復有無數之眾。求於親近明觀菩薩。以爲師宗。復有無量眾生各生斯念。今日明觀菩薩摩訶薩。久如當成無上正真道意。爾時世尊知眾會心各生此念。便告明觀菩薩曰。汝今以能宣暢如來無著之行。如來聖慧不可窮盡。卻後無數阿僧祇劫。上方去此五十江

河沙數諸佛刹土。佛名無垢如來至眞等正。覺純有一乘教化眾生。不聞緣覺弟子之名。汝當作佛號曰明觀如來至眞等正覺。明行成爲善逝世間解。無上士道法。御天人師。號佛世尊。汝當作佛。其號如是。爾時眾會一切眾生。見如來授明觀菩薩決。或有眾生有覺知者。不覺知者。爾時世尊觀察人心。各懷狐疑。佛知其意。便告明觀菩薩曰。如來至眞等正覺在大眾中受菩薩決。有覺知者。不覺知者。有八因緣。云何爲八。善男子。善女人得如來決。當成無上平等正覺。一切眾人無能知者。是謂如來授眾生決。已身自覺。

餘人不知。復次明觀。若有善男子善女人。在大眾中。爲如來所見授決。餘人盡見。已不覺知。是謂如來授。眾生決。餘人盡見。已不覺知。復次明觀菩薩摩訶薩。若有善男子善女人。爲諸佛世尊所見授決。汝當成佛。其號如是。已知授決。餘人亦見。是謂如來授眾生決。已自覺知。餘人亦見。復次明觀菩薩摩訶薩。若有善男子善女人。在大眾中。爲如來所見授決。自不覺知。餘人亦不知。是謂如來授眾生決。自不覺知。餘人亦不知。佛復告明觀菩薩。若有善男子善女人。在大眾中。受如來決。然此受決之人。乃在末行。不近如來。

近如來者自謂授我決。是謂如來授眾生決。遠者覺知近者不覺。復次明觀菩薩摩訶薩。若有善男子善女人。在大眾中爲如來所見授決。近如來者便自覺知。今日如來而授我決。遠如來者復自稱說。如來今日授我等決。爲此眾生未應受決。是謂如來授眾生決。近者覺知遠者不覺。佛復告明觀菩薩摩訶薩。若有善男子善女人。爲諸佛世尊所見授決。當成佛時其號如是。近者不覺遠亦不知。是謂如來授眾生決。遠近眾生皆不覺知。佛復告明觀菩薩若有善男子善女人。在大眾中爲如來所見授決。近者亦覺遠者

亦知餘人不見。是謂如來八因緣法。授眾生決近者亦覺遠者亦知。餘人不見。爾時世尊告四部眾比丘比丘尼優婆塞優婆夷菩薩摩訶薩天龍鬼神乾沓怱阿須倫迦留羅真陀羅魔休勒人及非人。汝等頗見明觀菩薩受記前乎。對曰非也。世尊佛復告族姓子。若有菩薩摩訶薩受如來決。初發道心受前不同。今此明觀菩薩受如來決。已自覺知餘人不覺。如此等人未獲如來四無所畏。發心自誓未廣及眾生亦復未得善權方便。是故受決已自覺知餘者不覺。佛復告族姓子。若有善男子善女人受如來決。眾人盡

見自不覺知。如此等人發意宏普。廣及眾生。得四無畏。發心曠大。有善權方便。教化眾生。是故受決餘者。盡覺已不自知。佛復告族姓子。若有善男子善女人。受如來決。已身自知餘者亦見。如此等人在七住地。分明空觀。不計眾生有染著想。初發道心不生此念。我後成佛。度爾所眾生。不度爾所眾生。心如虛空。不可沮壞。以獲如來四無所畏。得空觀三昧善權方便。是故受決已身自知餘者亦見。佛復告族姓子。若有善男子善女人。受如來決。已身不覺餘者不知。如斯等人未在三住不退轉地。雖有善權方便信樂三尊。

供養承事諸佛世尊。然未得如來無著之行。未能淨
佛國土教化眾生。是故受決。自不覺知餘者不見。佛
復告族姓子。若善男子善女人。受如來決。遠者得決。
近者不得。如此等人。彌勒身是。何以故。此善男子善
女人。諸根具足。不捨如來無著之行。是故受決。遠者
自覺。近者不知。佛復告族姓子。若善男子善女人。受
如來決。近者覺知。遠者不見。亦非眾會所能測度。如
此等人在菩薩位。未能演說賢聖之行。今師子膺菩
薩是也。眾相具足。不捨法本。於無想法中。不壞法性。
是故受決。近者覺知。遠者不見。亦非眾會所能測度。

佛復告族姓子。若善男子善女人如來授決。近者亦知遠者亦見。如此等人眾行具足。行不思議無量佛事。超生死海。漸至無爲岸。何以故。此善男子善女人諸根具足。不捨如來無著之行。徧遊十方無量世界。作不思議顯佛神德。今柔順菩薩是也。是故近者亦知遠者亦見。佛復告族姓子。若善男子善女人受如來決。近者不知遠者不見。如此等人眾行未具。未得善權方便。雖復去離五欲之中。未能備悉如來法藏。今等行菩薩是也。佛復告族姓子。若有菩薩摩訶薩。奉持修習八因緣法。我今視之。如已無異。亦爲十方。

諸佛世尊所見擁護。爾時釋提桓因。卽從座起。前至佛所。頭面禮足。在一面立。須臾之頃。前至佛所。長跪叉手。白佛言。世尊。我名拘翼。號天帝釋。唯願世尊。聽所啓白。佛言。善哉善哉。拘翼。有所疑難。今正是時。釋提桓因。白佛言。世尊。若有善男子善女人。興顯如來無著之行。具足授決。八因緣法。我等諸天。當獲此善男子善女人。至竟成就。終不中退。墮於羅漢辟支佛道。爾時釋提桓因。卽於佛前。而歎頌曰。

本無無所著 永離諸惡趣 云何如來今
授決有高下 昔從無數劫 功勳不可量

積功累眾德 一切眾相具 如來諸法本
無生滅著斷 尊今已受決 論說高下相
得定不起忍 生滅無所有 諸法如幻化
名號不真實 知本所從來 願樂無生法
演說三達智 從限至無限 今爲天帝身
縛解諸結盡 願尊見記前 久如建正覺
爾時世尊以偈報釋提桓因曰。

汝今天帝釋 功德眾行至 乃從無數世
積德光明尊 今爲天帝身 經大小劫數
三十六成敗 不捨本要誓 千佛兄弟過

無復賢劫名 中間永曠絕 二十四中劫

後乃有佛出 十力無所畏 清淨德普尊

刹土名普忍 彼佛極長壽 在世壽七劫

教化已周訖 永寂取滅度 遺法在世化

亦復經七劫 漸漸法沒盡 不聞三尊名

中間復迥絕 當復經五劫 汝於彼刹土

當紹如來位 我今授汝決 本無如來印

號名無著尊 三界最第一 獨步無等侶

說法無窮盡 當化阿僧祇 無量眾生類

爾時釋提桓因聞如來已見授決。頭面禮足遶佛三

而還復故座。是時弊魔波旬。心自念言。今日如來至眞等正覺。教化眾生。轉無上法輪。以善權方便。將導一切諸不及者。眾菩薩等神通大智。皆得授決不退轉地。此賢聖等我。則不疑。今釋提桓因。在我部界。爲我所使。先爲如來所見授決。如我今日。心離魔行。不在榮冀愛欲之中。何故如來不授我決。爾時世尊。知魔波旬心中所念。便告目犍連。汝能堪任於如來前。說諸菩薩摩訶薩受記。前乎。是時目連承佛威神。卽從座起。前白佛言。我能堪任說菩薩摩訶薩受決之法。佛告目連。堪任說者。今正是時。目連白佛言。若有

菩薩摩訶薩於諸空法生染著心。便自貢高輕慢前學。如此等善男子善女人在凡夫地。不應稱爲菩薩。不應受決得如來號。目連復白佛言。若有善男子善女人。見人受決便生增上心。我今豪貴斯人卑賤。如此等善男子善女人在凡夫地。不應稱爲菩薩。不應受決得如來號。目連復白佛言。若善男子善女人。得佛明慧分別三觀空無相願。便爲如來所見授決。然有眾生見此人受決便生憎嫉心。如來何爲先受此決。如此等善男子善女人在凡夫地。不當稱爲菩薩。不應受決得如來號。是時目連復白佛言。若有善男

子善女人。得佛神足。四無所畏。遊諸空界。轉於法輪。善權方便。無所罣礙。於演法教。皆有所益。便爲如來所見授決。然有眾生。得世俗智辯才第一。知古明今。三世通達。內自思惟。而生此念。我所包攬。無事不貫。如來何爲不授我決。今乃反更授此人決。如此等善男子善女人。在凡夫地。不應稱爲菩薩。不應受決。得如來號。目連復白佛言。若有善男子善女人。得無生法。忍四等具足。遊至十方無量世界。本從此佛而發道心。更從異佛受其記莖。然有眾生。內自生念。此非我眾。非我徒類。如來何爲先授此決。不授我莖。如此

等善男子善女人。在凡夫地不應稱爲菩薩。不應受
決得如來號。目連復白佛言。若有善男子善女人。轉
無上法輪。六通變化無所觸礙。權詐巧便攝取眾生。
此菩薩摩訶薩。便爲如來所見授決。復有眾生在三
毒等分愛心未盡。未能適化承事諸佛。內自狐疑而
生此念。今觀此人如有所辨。爲是如來威力所感。爲
此善男子審有此化。於彼此中生猶豫想。如此等善
男子善女人。在凡夫地不應稱爲菩薩。不應受決得
如來號。是時目連復白佛言。世尊。若有善男子善女
人。生在龍中發菩薩心。眾行具足無所缺漏。便爲如

來所見授決。或有眾生內自思惟。我得人身諸根具足。明達正法。六情完具。如來何爲不授我決。今乃反更授此龍決。如此等善男子善女人。在凡夫地不應稱爲菩薩。不應受決得如來號。是時目連復白佛言。若有善男子善女人。已得天身發菩薩心。斷諸縛著。無所戀慕。捨已榮位。遠離五樂。閉塞六情。修清淨法。離世八法。不墮十惡。爲如來所見授決。然有眾生內自生念。今觀此天眾行未足。未捨此形。復於人身。何爲如來而授此決。不授我前。如此等善男子善女人。在凡夫地不應稱爲菩薩。不應受決得如來號。是時

目連復白佛言。或有眾生受地獄形。以佛神力往授其決。如我昔日爲佛所遣。授提婆達兜決。然有眾生內自生念。受地獄形。苦痛無量。鑊湯燒煮。死而更生。刀山劒樹。爐炭鐵輪。火車熾風。銅柱碓臼。於中受苦。痛毒無量。當爾之時。何有道心。如來今日反更授決。得如來號。然我等已復人身。不授我決。如此等善男子。善女人。在凡夫地。不應稱爲菩薩。不應受決。得如來號。是時復白佛言。若有善男子。善女人。生餓鬼中。受餓鬼形。善見菩薩父像。舍利弗祖。善施長者母。受形苦惱。腹如太山。咽如細鍼。咽長千丈。而有千鬲。一

鬲千節。雖得漿水化爲膿血。眼如深谷如千丈崖。然
受苦痛不可稱量。爲飢火所燒求死不得。然佛世尊
以大慈悲。卽遣舍利弗各授其決。令發道心。然有眾
生內自生念。餓鬼苦惱無量。飢寒苦毒不可稱計。然
今如來反授彼決不授我決。如此等善男子善女人。
在凡夫地不應稱爲菩薩。不應受決得如來號。爾時
世尊告目連曰。善哉善哉。族姓子。堪任宣暢菩薩受
決無礙之行。眞佛之子非思欲生。爾時弊魔波旬內
自生念。咄我所行將不謬乎。今聞尊者大目犍連所
說。不爲諸人正爲我耳。是時波旬卽從座起。除去貢

高捨憍慢心。前至佛所。頭面禮足。前白佛言。世尊。我今愚惑。久處邪見。未識眞道。今釋提桓。因爲我所統。如來今日先授其決。我卽興意。生是非心。唯願世尊。受我悔過。消滅欲本。不著榮冀。佛告弊魔波旬。汝今座上。見彌勒菩薩。不乎。波旬白佛。唯然。世尊。佛告波旬。此彌勒菩薩。當授汝決。得菩薩號。

淨智除垢品第二十六

東方去此三十七江河沙數。有佛土名曰華嚴。佛名一意。如來至眞等正覺。明行成爲善逝。世間解。無上士道法。御天人師。號佛世尊。彼佛如來。遣一菩薩。名

曰淨一切地。具眾行本定意不亂。三昧正受無所罣礙。佛所住處皆悉履行。不染法界去。吾我想。卽從座起。偏露右臂。右膝著地。長跪叉手。前白佛言。欲有所問。若見聽者。敢有所陳。佛言。善哉善哉。族姓子。欲問如來所懷疑者。今正是時。淨一切地菩薩白佛言。世尊。云何善男子善女人。供養諸佛無諸佛想。於諸法本亦復如是。雖度眾生無眾生念。行菩薩道不失本意。具足諸願德行充滿。受決心淨不離明慧。爾時世尊告淨一切地菩薩曰。若有善男子善女人。分別思惟大乘行本不可思議深奧之藏。先當習學定意正

受。無亂想行。然後乃具六度無極。自觀身空觀他人
心亦復如是。若善男子善女人。入等定三昧心不動
轉。悉能分別一切眾行。云何善男子善女人。入定三
昧。於一切法思惟分別無有錯謬。於是族姓子。若有
菩薩摩訶薩。立根得力。逮不退轉。便能入定自觀身
本。本所從來一一分別。悉知起滅。來不知所從來。去
不知所從去。此善男子善女人。從定意起復入外身
定意。一一分別眾生之類。復見無量諸佛刹土。有受
形者不受形者。或時善男子善女人。復更入定觀內
外身。彼身我身發趣有異。身行共同。如我所觀。趣大

乘者不捨眾生。求緣覺者亦不求清淨於佛土。弟子
學者承聲受教。離於三有。是謂內外觀定。身行共同
發趣有異。佛復告淨一切地曰。若有善男子善女人
入此等定。正受三昧。悉使無量世界盡從教化。從化
得度。隨意所樂。恣其心意。遊於百千三昧。於中攝意
而不錯亂。是謂善男子善女人趣大乘者。不捨眾生。
佛復告淨一切地菩薩。若有善男子善女人入一身
定。便能觀察眾生心本。有婬怒癡無婬怒癡。隨其本
行而度脫之。此善男子善女人從一身定起。復入眾
多身定。觀眾生類。有婬怒癡無婬怒癡。隨其本行而

度脫之。爾時世尊復告淨一切地菩薩。若有善男子善女人。入無形觀三昧。徧觀眾生心識。所念眾生若干所念不同。復有三昧名觀眾生心。菩薩摩訶薩得此定意者。便能觀察人道眾生心識。所念徧知十方無量世界。有姪怒癡無姪怒癡。隨其本行而度脫之。佛復告族姓言。復有定意知閱叉心。菩薩摩訶薩得佛復告族姓言。復有定意知閱叉心。菩薩摩訶薩得此三昧者。徧觀閱叉心識。所念有姪怒癡無姪怒癡。隨其本行而度脫之。佛復告淨一切地菩薩曰。復有定意知諸龍心。菩薩得此定意者。便能觀察龍道眾生心識。所念徧知十方無量世界。有姪怒癡無姪怒

癡。隨其本行而度脫之。佛復告淨一切地曰。復有定
意。知阿須倫心。菩薩摩訶薩得此定意者。便能觀察
阿須倫道眾生心識所念。徧觀十方無量世界有姪
怒癡。無姪怒癡。隨其本行而度脫之。佛復告族姓子。
復有定意。知諸天心。菩薩得此定意者。便能觀察天
道眾生心識所念。徧知十方無量世界有姪怒癡。無
姪怒癡。隨其本行而度脫之。佛復告族姓子。復有定
意。知梵天心。菩薩摩訶薩得此定意。便能觀察淨志
天心識所念。徧知十方無量世界有姪怒癡。無姪怒
癡。隨其本行而度脫之。佛復告族姓子。復有定意。知

欲界眾生心。菩薩摩訶薩得此定意。便能觀察欲界
眾生心識所念。徧知十方無量世界有婬怒癡無婬
怒癡。隨其本行而度脫之。佛復告族姓子。復有定意
知地獄眾生心。菩薩摩訶薩得此定意者。便能觀察
地獄眾生心識所念。徧觀十方無量世界有婬怒癡
無婬怒癡。隨其本行而度脫之。佛復告族姓子。復有
定意知弗于逮眾生心。菩薩摩訶薩得此定意者。便
能觀察弗于逮眾生心識所念。徧知十方無量世界
有婬怒癡無婬怒癡。隨其本行而度脫之。佛復告淨
一切地菩薩曰。復有定意知閻浮地眾生心。菩薩摩

訶薩得此定意者。便能觀察閻浮地眾生心識所念。徧知十方無量世界有婬怒癡無婬怒癡。隨其本行而度脫之。佛復告淨一切地菩薩曰。復有定意知瞿耶尼眾生心菩薩得此定意者。便能觀察瞿耶尼眾生心意。徧知十方無量世界有婬怒癡無婬怒癡。隨其本行而度脫之。佛告淨一切地菩薩曰。復有定意知鬱單越眾生心中所念。菩薩得此定意。便能觀察鬱單越眾生心。徧知十方無量世界有婬怒癡無婬怒癡。隨其本行而度脫之。佛復告淨一切地菩薩曰。復有定意知一四天下眾生心中所念。菩薩得此定

意者便能觀察一四天下眾生心中所念。徧知十方無量世界有婬怒癡無婬怒癡。隨其本行而度脫之。佛復告淨一切地菩薩曰。復有定意知二四天下眾生心中所念。菩薩得此定意者。便能觀察二四天下眾生心中所念。徧知十方無量世界有婬怒癡無婬怒癡。隨其本行而度脫之。佛復告淨一切地菩薩曰。復有定意知三四天下眾生心中所念。菩薩得此定意者。便能觀察三四天下眾生心中所念。徧知十方無量世界有婬怒癡無婬怒癡。隨其本行而度脫之。佛復告淨一切地菩薩曰。復有定意知四四天下眾

生心中所念。菩薩得此定意者。便能觀察四四天下
眾生心中所念。徧知十方無量世界有婬怒癡無婬
怒癡。隨其本行而度脫之。佛復告淨一切地菩薩曰。
復有定意知五四天下眾生心中所念。菩薩得此定
意者。便能觀察五四天下眾生心中所念。徧知十方
無量世界有婬怒癡無婬怒癡。隨其本行而度脫之。
佛復告淨一切地菩薩曰。復有定意知六四天下眾
生心中所念。菩薩得此定意者。便能觀察六四天下
眾生心中所念。徧知十方無量世界有婬怒癡無婬
怒癡。隨其本行而度脫之。佛復告淨一切地菩薩曰。

復有定意。知七四天下眾生心中所念。菩薩得此定意者。便能觀察七四天下眾生心中所念。徧知十方無量世界。有婬怒癡無婬怒癡。隨其本行而度脫之。佛復告淨一切地菩薩曰。復有定意。知八四天下眾生心中所念。菩薩得此定意者。便能觀察八四天下眾生心中所念。徧知十方無量世界。有婬怒癡無婬怒癡。隨其本行而度脫之。佛復告淨一切地菩薩曰。復有定意。知九四天下眾生心中所念。菩薩得此定意者。便能觀察九四天下眾生心中所念。徧觀十方無量世界。有婬怒癡無婬怒癡。隨其本行而度脫之。

佛復告淨一切地菩薩曰。復有定意知十四天下眾生心中所念。菩薩得此定意者。便能觀察十四天下眾生心中所念。徧知十方無量世界有婬怒癡無婬怒癡。隨其本行而度脫之。佛復告淨一切地菩薩曰。復有定意知百四天下眾生心中所念。菩薩得此定意。便能觀察百四天下眾生心中所念。徧觀十方無量世界有婬怒癡無婬怒癡。隨其本行而度脫之。佛復告淨一切地菩薩曰。復有定意知千四天下眾生心中所念。菩薩得此定意者。便能觀察千四天下眾生心中所念。徧觀十方無量世界有婬怒癡無婬怒

癡隨其本行而度脫之。佛復告淨一切地菩薩曰。復有定意知萬四天下眾生心中所念。菩薩得此定意者。便能觀察萬四天下眾生心中所念。徧觀十方無量世界有婬怒癡無婬怒癡。隨其本行而度脫之。佛復告淨一切地菩薩曰。復有定意知億萬四天下眾生心中所念。菩薩得此定意者。便能觀察億萬四天下眾生心中所念。徧知十方無量世界有婬怒癡無婬怒癡。隨其本行而度脫之。佛復告淨一切地菩薩曰。復有定意知一佛國眾生心中所念。菩薩得此定意者。便能觀察一佛境界眾生心中所念。徧知十

方無量世界有婬怒癡無婬怒癡。隨其本行而度脫之。佛復告淨一切地菩薩曰。復有定意知十佛刹土眾生心中所念。菩薩得此定意者。便能觀察十佛刹土眾生心中所念。徧觀十方無量世界有婬怒癡無婬怒癡。隨其本行而度脫之。佛復告淨一切地菩薩曰。復有定意知百佛刹土眾生心中所念。菩薩得此定意者。便能觀察百佛刹土眾生心中所念。徧觀十方無量世界有婬怒癡無婬怒癡。隨其本行而度脫之。佛復告淨一切地菩薩曰。復有定意知萬佛刹土眾生心中所念。菩薩得此定意者。便能觀察萬佛刹

土眾生心中所念。徧觀十方無量世界有婬怒癡無
婬怒癡。隨其本行而度脫之。佛復告淨一切地菩薩
曰。復有定意知億佛刹土眾生心中所念菩薩。得此
定意者。便能觀察億佛刹土眾生心中所念。徧觀十
方無量世界有婬怒癡無婬怒癡。隨其本行而度脫
之。如是菩薩摩訶薩。於此定意。盡得具足。諸三昧王。
佛復告淨一切地菩薩曰。若有善男子善女人。奉持
修習此法門者。便獲如來眾相具足。爾時世尊。告淨
一切地菩薩曰。若有善男子善女人。得此三昧定意
者。有善權方便。教化眾生。復有十事。得功德業。何爲

十。一者口氣清淨人多信用。二者不失本意不譏彼受。三者善明算數知六十四變。四者分別空無形相法。五者知當來法解脫無緣。六者於現在法念成證法。七者憶過去行知已無相。八者於無相法本無自然。九者起滅自然不著三世。十者菩薩定意不失次第。是謂菩薩摩訶薩入定三昧。便能觀察億佛刹土。眾生心中所念有婬怒癡無婬怒癡。隨其本行而度脫之。

菩薩瓔珞經卷第十四

菩薩瓔珞經卷第十五

姚秦沙門竺佛念譯

無斷品第二十七

佛復告等行菩薩。若有善男子善女人。從初發意發菩薩心。修行五法。不懷怯弱。云何五法。一者勸進。前人不捨道心。二者分別法界。不毀法性。三者一意清淨。無他異想。四者行權方便。度未度者。五者得三十二業。定意不亂。是謂等行菩薩。摩訶薩從初發意。守菩薩心。修此五法。不捨道意。佛復告等行菩薩曰。若有善男子善女人。初發道心。復有五事。云何爲五。一

者分別三世不離空無。二者淨已國土育養眾生。三者分別眼識不受外人。四者神足神通念則在前。五者現在眾智而自瓔珞。是謂等行菩薩摩訶薩。從初發意修此五法。而得成就無有疑難。進前成佛不懷怯弱。佛復告等行菩薩。若善男子善女人發菩薩心。當行五法而自瓔珞。云何爲五。於是族姓子。若菩薩初發道心入等定意。能令十方天下盡爲七寶。二者使已國土眾生斷婬怒癡。三者已成佛時修三空慧。四者莊嚴一相不離慧根。五者行六神通不自稱記。是謂善男子善女人從初發意行菩薩道。行此五法。

而自瓔珞。佛復告等行菩薩。若有善男子善女人從
初發意行菩薩道。復有五法。云何爲五。一者思惟如
來無形相法。二者諸佛要誓不違本性。三者自識本
命知所從來。四者不計我人壽命離五苦難。五者法
本自爾不見起滅。是謂善男子善女人修此五法而
自瓔珞。佛復告等行菩薩。若有善男子善女人從初
發意行菩薩道。當行五法不可思議。云何爲五。一者
諸佛神德不可思議。二者諸佛篋藏不可思議。三者
行業受報不可思議。四者諸佛刹土不可思議。五者
演布道教不可思議。是謂善男子善女人初發道心。

修此五行不可思議。乃至成佛而自瓔珞。爾時世尊在於大眾而說此偈。

諸佛不思議	宣暢道亦然	思惟眾生本
本末不可覩	執四聖諦炬	照彼無名根
常想無有常	念除結縛病	劫數無有窮
無盡非有盡	但爲眾生惑	欲知本無心
夫欲學在先	聞受深奧法	亦非二乘行
所能思測度	佛本自計誓	蠲除五道淵
行盡有等心	故號人中尊	佛慧無邊涯
神智無有量	不以身苦本	永除三世難

諸佛瓔珞法 自覺無師受 心定如虛空
常想樂想緣 吾從無數劫 入定不離空
一意成一道 故號人中尊 復於無數劫
承事諸世尊 盡生逮無著 自致最正覺
諸佛在世化 正法修道樂 能淨諸佛國
不染三有樂

爾時世尊說此偈已。復告等行菩薩。若有善男子善
女人奉持修習。五不思議深奧法者。十方諸佛悉來
擁護。不爲眾魔所能得便。佛復告等行菩薩。若善男
子善女人。從初發意行菩薩心。當行五法。不可思議。

云何爲五。一者以已定意徧施眾生盡在佛處而不退轉。二者不徇三道而受果證。三者無量法海皆現在前。四者眾相法門具足智辯。五者分身教化得六度慧。是謂族姓子從初發意行菩薩心。行此五法不可思議。便能具足如來眾行。佛復告等行菩薩。若有善男子善女人。思惟分別五苦法本。云何爲五。一者分別色源不生識著。二者思百八痛無有苦樂。三者永斷眾想不興亂意。四者解十二因緣本無此行。五者識神無形不可究盡。是謂等行菩薩。若善男子善女人。分別思惟五苦法本者。親近佛藏不離賢聖眾。

道之源。佛復告等行菩薩。若善男子善女人從初發
意修菩薩心。復有五法不可窮盡。云何爲五。一者無
數功勳不可窮盡。二者八十四智不可窮盡。三者如
來法慧不可窮盡。四者諸法要定不可窮盡。五者八
種音響不可窮盡。是謂等行菩薩。若善男子善女人
從初發意修菩薩心。修此五法不可窮盡。便能具足
如來之法。爾時世尊復告等行菩薩。若有善男子善
女人從初發意修菩薩心。修行六度不思議法。云何
爲六。於是善男子善女人。不惜身命隨前所索。不逆
人意。於中具足施度無極。雖具施度攝持戒人不毀

戒性。見暴逆者。勸令忍辱。若人懈怠。勸令精進。或有
眾生著六十二見。心意錯亂。不識虛無。泥洹大道。攝
彼眾生。一意禪定。除去亂想。不生二見。或有眾生永
在闇冥。懷愚惑心。以權方便。攝彼眾生。令見慧明。佛
復告等行菩薩。若有善男子善女人。從初發意修菩
薩心。於一度中。便當具足六度無極。云何於一度中
便能具足六度無極。或有眾生一心持戒。不毀戒性
於持戒中。具足布施。不譏彼受。常行忍辱。若有眾生
見毀辱者。不興亂想。無瞋怒心。日夜精勤。無懈怠心。
雖持禁戒。定意不亂。於戒性中。不毀於禪。演布智慧。

除愚闇心。是謂菩薩在戒度無極。便能具足六度無極。佛復告等行菩薩。若有善男子善女人。從初發意修菩薩心。得忍度無極。降伏心意。不念貢高。於忍度無極。復當具足六度之法。不捨忍心而行布施。雖有所施不起想著。於中具足戒性之法。若人擊打不起亂想。自攝心意。具足修習忍度無極。具足定意不毀禪法。於忍度中具足禪行。若復善男子善女人。已得忍度。分別五陰成敗所起。思惟三毒。知從癡愛。以道慧觀察。永無所生。是謂善男子善女人。於忍度中具足六度之法。佛復告等行菩薩。若有善男子善女人。

從初發意修菩薩心。於禪定中復當具足六度無極。攝取眾生除去亂想。云何菩薩於禪定中具足六度。於是善男子善女人。觀空身相不見起滅。定心不亂而行布施。不見眾生及以財寶。亦不生心。今我所施。後獲大報。莊嚴佛土本無清淨。便能具足智度無極。佛復告等行菩薩。若有善男子善女人。從初發意修菩薩心。於智度無極具足六度。云何善男子善女人。於智度無極具足六度。於是善男子善女人。已能修習智度無極。分別無想無他異行。一一分別名身句身。攝意持戒不毀戒性。若人毀辱不懷憂感。是謂於

智具足戒性。若復善男子善女人。於智度無極修行。忍辱。心如虛空。不受穢惡。是謂於智度無極得忍辱心。佛復告等行菩薩。若善男子善女人。得智度無極。攝意精進。去懈怠心。分別眼界不可思議。見懈怠者。勸令精進。是謂於智度無極具足精進。佛復告等行菩薩。若有善男子善女人。得智度無極。分別禪定心。不分散。一意一念。經百千劫。攝意自伏。於三十六度。皆悉分別。是謂等行菩薩摩訶薩。眾行根源。爾時世尊。與等行菩薩說是語時。有無量眾生本發心。趣於緣覺。今皆迴意。發於無上正真之道。復有無數諸天。

世人得盡信之行不離大乘。

賢聖集品第二十八

爾時審諦菩薩卽從座起。白佛言。世尊。我亦堪任宣暢六度清淨之行。佛告審諦菩薩。若堪任者於如來前便可說之。爾時審諦菩薩白佛言。世尊。若有菩薩摩訶薩修習六度清淨之法。兼修八關諸佛禁法。此善男子善女人。於六度法具足清淨之行。淨意菩薩白佛言。若有善男子善女人。欲禮十方諸佛世尊。承受正教修習奉行。如此等善男子善女人。於六度法清淨具足。那羅延菩薩前白佛言。若有善男子善女

人斷諸結使不生染汙於六度法清淨具足淨法界
菩薩白佛言若有善男子善女人解自然法性不毀
道門於六度法清淨具足善解幻菩薩白佛言若有
善男子善女人分別八法除去榮辱於六度法清淨
具足過量菩薩白佛言若有善男子善女人在大眾
中轉無上法輪攝身口意無他異念於六度法清淨
具足法藏菩薩白佛言解四空定無我人想思惟法
界不毀智本是謂六度清淨具足心淨菩薩白佛言
若有善男子善女人攝眼根本不興識想耳鼻身口
意亦復如是於六度清淨具足師子大將白佛言眾

生沈翳永處闇冥。布現慧光使知道趣。於六度法清淨具足。時有菩薩名曰慧眼。問文殊師利云何菩薩摩訶薩攝身口意不毀戒性。於六度清淨具足。是時文殊師利報慧眼菩薩諸菩薩摩訶薩解空無我施無想報。於六度法清淨具足。慧眼菩薩又問云何族姓子。如來色身眾德具足。三十二相八十種好。身黃金色猶如金積。爲是有想報耶。無想報乎。文殊師利報慧眼菩薩曰。如來色身是有想報。如來法身是無想報。慧眼菩薩又問。施去貪求。內心清淨。除去想著。乃獲大果。六度之法。非無想報。云何乃成法身之報。

時文殊師利報慧眼菩薩曰。云何族姓子。如來色身爲有耶。爲無乎。慧眼菩薩報曰。如族姓子所說。如來色身是有報。非無報。如我觀察如來身者。亦非有報。亦非無報。時文殊師利復問。云何如來色身亦非有報。亦非無報。慧眼荅文殊師利曰。如來身者。眾功德具妙。色莊嚴。視無厭足。其見形者。皆發無上正真道意。是謂色身之報。云何如來色身無報。於是族姓子。如來在世教化終訖。潛神無爲。終無變易。一相無形。不可沮壞。是謂如來色身無報。爾時文殊師利復問。慧眼菩薩曰。云何族姓子。如來形相不可思議。以有

形而無報。以無形而無報。慧眼報曰。如來身者。或有形而無報。或無形而無報。云何有形而無報。如來至眞等正覺。在世教化無量眾生。皆得果證。獲無爲道。是謂如來色身有形而無報。云何無形而無報。於是如來色身。在世教化。現神足變。終訖說法。於無餘泥洹界。而取般泥洹。是謂如來色身無形而無報。爾時文殊師利。知諸眾生心中所念。各有狐疑。未能暢達。有報無報。復問慧眼菩薩曰。云何族姓子。如來色身如幻如化。云何於幻化法中。而有無報。一切眾生得法性。如道果清淨。若眼界所攝。云何於眾生道性而

得無報。又問慧眼。如來色身不可思議。終訖說法寂然滅度。無生老病死。已捨色身不復受形。一相無相亦不可見。權設假號亦無真實。如來者亦無如來亦無佛。云何以無爲道。是如來色身無報。文殊師利又問。云何族姓子。如來色身無爲報。泥洹無爲報。是一異乎。假使是一者亦無如來。云何有無報。設有二無者。則如來色身非泥洹報。爾時慧眼菩薩。報文殊師利曰。本無如來至真等正覺四大色身。於現法中亦是有報。亦是無報。滅盡涅槃。是曰無報。爾時慧眼菩薩。復報文殊師利。眾生所行六度無極。若人布施亦

無施想。亦復不見有受施者。是謂爲施具足。施度無極。若復有人戒身具足。不毀於戒。亦不見有持戒者。是謂於戒具足。戒度無極。慧眼菩薩。復語文殊師利。若有善男子善女人。恆修忍辱。有輕慢者。不生憍慢。亦不自念。見有忍辱。是謂具足。忍度無極。若有善男子善女人。勤加精進。修十六聖行。不見有人。勤精進者。是謂具足。進度無極。慧眼菩薩。復語文殊師利。若有善男子善女人。攝意入定。分別三觀。亦不見人。立定意者。心遊十方。無量世界。承事供養。觀一切法。如幻如化。是謂具足。禪度無極。慧眼菩薩。復語文殊師

利。若善男子善女人。宣暢如來無量法界。眼識清淨。不可思議。一一分別悉無所有。若耳聞聲。知所從來。鼻嗅彼香。知所從來。一一分別而無所有。若舌嘗味。知所從來。如來心識分別諸法。神足無量。是謂具足。智度無極。慧眼菩薩。復語文殊師利。復有定意名無盡法門。菩薩摩訶薩。得此無盡法門者。超越三乘。成菩薩號。復有觀察法門。菩薩摩訶薩。得此法門者。觀察法界不住二地。復有色像法門。菩薩得此法門者。成如來法無盡之藏。復有不退轉法門。菩薩得此法門者。持清淨法不見色像。復有廣濟法門。菩薩得此

法門者。化彼眾生不自爲已。復有佛音響法門。菩薩
得此法門者。雨法甘露潤澤一切。復有諸佛境界法
門。菩薩得此法門者。現說微妙眞如性法。復有現教
法門。菩薩得此法門者。莊嚴刹土翼從成就。復有無
等法門。菩薩得此法門者。分別如來深奧之義。復有
法要法門。菩薩得此法門者。宣暢如來不思議法。復
有善根法門。菩薩得此法門者。分別諸根永離五道。
復有幻化法門。菩薩得此法門者。分別無盡曠大之
法。復有攝行法門。菩薩得此法門者。分別句義無形
像法。復有稱可法門。菩薩得此法門者。便能充飽虛

想法者。復有一意法門。菩薩得此法門者。善根淳熟。得四無畏。復有法海法門。菩薩得此法門者。善業具足。不捨道性。復有光燄法門。菩薩得此法門者。普現光燄。演法無盡。復有神足法門。菩薩得此法門者。廣遊諸界。不染三道。復有日月光明法門。菩薩得此法門者。徧照苦惱。拔濟得度。復有無生法門。菩薩得此法門者。方便導化。應自然律。復有無極之慧法門。菩薩得此法門者。超三界患。不見有度。復有智生法門。菩薩得此法門者。盡知諸法。所歸趣處。復有無著法門。菩薩得此法門者。以智慧光。蠲除闇冥。復有根源。

法門。菩薩得此法門者。分別四法。不思議行。復有因緣法門。菩薩得此法門者。分別十二癡行之本。復有道慧法門。菩薩得此法門者。不闕法性如來三等。復有忍智法門。菩薩得此法門者。坐樹王下降伏魔官。復有宏誓法門。菩薩得此法門者。不捨眾生而取滅度。復有苦行法門。菩薩得此法門者。現食麻米諸行具足。復有獨步法門。菩薩得此法門者。自現奇特無與等者。復有心淨法門。菩薩得此法門者。蠲除心垢。無所染著。復有究竟法門。菩薩得此法門者。皆使眾生入出要道。復有無欲法門。菩薩得此法門者。除去

貪著無染著心。復有法處法門。菩薩得此法門者。愍
哀一切不捨本願。復有道業法門。菩薩得此法門者。
分別諸根立上人法。復有心不轉法門。菩薩得此法
門者。發道心者立不退轉。復有法藏法門。菩薩得此
法門者。道慧清淨受慧果證。復有化導法門。菩薩得
此法門者。發無生心不見動還。復有法瓔珞法門。菩
薩得此法門者。莊嚴國土清淨眾生。復有深奧法門。
菩薩得此法門者。深入法藏具七覺意。復有無畏法
門。菩薩得此法門者。安處諸法說賢聖行。復有除垢
法門。菩薩得此法門者。安處諸法無所染著。復有淨

行法門。菩薩得此法門者。分別三向空無相願。復有法身法門。菩薩得此法門者。分別一切無著空行。復有法力法門。菩薩得此法門者。無量空界獲大智慧。復有無礙法門。菩薩得此法門者。敷演道教無所罣礙。復有大慈法門。菩薩得此法門者。潤及一及不捨妄想。復有大悲法門。菩薩得此門者。拔濟苦難不生塵勞。復有喜心法門。菩薩得此法門者。蠲除一切懷忿怒心。復有護心法門。菩薩得此法門者。分別四諦不二之法。復有廣施法門。菩薩得此法門者。除去三想不計吾我。復有神通法門。菩薩得此法門者。徧遊

十方無量世界。復有無盡法門。菩薩得此法門者。分別義趣。修三句法。復有演暢法門。菩薩得此法門者。功德具足。懷來道故。復有清淨法門。菩薩得此法門者。淨除口過。不興十惡。復有十力法門。菩薩得此法門者。執金剛心。不可沮壞。復有無量善根法門。菩薩得此法門者。便能具足。如來神力。復有如來行滅法門。菩薩得此法門者。不起吾我。我人壽命。復有息意法門。菩薩得此法門者。永斷生老病死之苦。復有增益法門。菩薩得此法門者。諸善功德。日日增長。復有歡喜法門。菩薩得此法門者。充飽一切渴仰道者。復

有無怒法門。菩薩得此法門者。除心緣著無顛倒想。復有惓望法門。菩薩得此法門者。成就眾生三法本行。復有無念法門。菩薩得此法門者。盡使眾生無三毒念。復有法義法門。菩薩得此法門者。出生諸法不失次序。復有速疾法門。菩薩得此法門者。分別根源成道而行。復有思惟法門。菩薩得此法門者。分別內外觀諸不淨。復有香薰法門。菩薩得此法門者。當以戒德香普周一切。復有善權法門。菩薩得此法門者。隨形適化不見度者。復有曉了法門。菩薩得此法門者。分別音響而取度之。復有無我法門。菩薩得此法

門者。解知諸法空無所有。復有善住法門。菩薩得此法門者。宏誓堅固。心不動轉。復有無數身法門。菩薩得此法門者。一一分別不限眾生。復有善入法門。菩薩得此法門者。盡化眾生。進入法律。復有法自在法門。菩薩得此法門者。堪受正法。不恥下問。復有淨妙法門。菩薩得此法門者。遊諸佛國。不懷怯弱。復有無侶法門。菩薩得此法門者。心自樂寂。不憍一切。復有無量功德法門。菩薩得此法門者。眷屬成就。得果實報。復有放光明法門。菩薩得此法門者。徧照一切。諸在闇冥。復有無欺法門。菩薩得此法門者。具足口行。

不犯四過。復有勸德法門。菩薩得此法門者。愍諸不
及與不死法。復有依憑法門。菩薩得此法門者。盡令
眾生而有歸趣。復有拔濟法門。菩薩得此法門者。增
益功德。心淨如空。復有無際法門。菩薩得此法門者。
不見有度。得成就者。復有等行法門。菩薩得此法門
者。分別眾智。無有邊際。復有平等法門。菩薩得此法
門者。不說諸道。有種種乘。復有一意法門。菩薩得此
法門者。不見發意。有趣道者。復有虛空盡法門。菩薩
得此法門者。入諸等定。意不分散。復有然燈法門。菩
薩得此法門者。廣演一切無窮盡法。復有分別法界

法門。菩薩得此法門者。一一分別法界所興。復有越境界法門。菩薩得此法門者。救護一切得至彼岸。復有究竟法門。菩薩得此法門者。不見出生諸法窠窟。復有淨觀法門。菩薩得此法門者。不譏眾生見清淨法。復有滿足法門。菩薩得此法門者。不以劫數以爲現遠。復有出要法門。菩薩得此法門者。行一切智不起法想。復有出生法門。菩薩得此法門者。出一切法深奧之藏。復有利根法門。菩薩得此法門者。聞一趣道立不退轉。復有次第法門。菩薩得此法門者。修習諸法不失本要。復有法相法門。菩薩得此法門者。一

一分別諸法相貌。復有無形相法門。菩薩得此法門者。一切諸法而現在前。復有劫數法門。菩薩得此法門者。執勤苦行不離生死。復有道行法門。菩薩得此法門者。思惟五行觀不淨想。復有深入法門。菩薩得此法門者。深入法寶無盡之藏。復有化導法門。菩薩得此法門者。育養一切眾生之類。復有來往法門。菩薩得此法門者。周旋教化心無懈怠。復有成就法門。菩薩得此法門者。道果成熟不捨五趣。復有徹照法門。菩薩得此法門者。一意入定無若干想。復有無量法門。菩薩得此法門者。所行眾法不可思議。復有如

來神足法門。菩薩得此法門者。修習現在無量空行。復有應響法門。菩薩得此法門者。具足眾願永除意想。復有變化法門。菩薩得此法門者。分身散形所願自由。復有無闕滅法門。菩薩得此法門者。淨除眾生意思。復有通達來往法門。菩薩得此法門者。一毛孔淨眾生界。復有無形法門。菩薩得此法門者。教化無形法界清淨。復有無礙法門。菩薩得此法門者。無量眾生離四非常。復有苦音法門。菩薩得此法門者。令習苦眾生永離縛著。復有集音法門。菩薩得此法門者。令縛著眾生永離集縛。復有盡音法門。菩薩

薩得此法門者。今有盡眾生至無盡泥洹。復有道音法門。菩薩得此法門者。不興六十二塵勞之心。復有威儀法門。菩薩得此法門者。進止行來不失儀則。復有真性法門。菩薩得此法門者。分別眷屬不處卑賤。復有真視法門。菩薩得此法門者。分別五陰一向趣道。復有天行法門。菩薩得此法門者。住入天人修清淨本。復有人行法門。菩薩得此法門者。入人道眾生。誘進令度。復有畜生行法門。菩薩得此法門者。隨形入化悉歸道門。復有餓鬼法門。菩薩得此法門者。勸令除貪無所悵望。復有地獄法門。菩薩得此法門者。

現身入化使發善心。爾時慧眼菩薩卽於佛前而說
頌曰。

無著不可汙	不染三界有	德香淨一切
法門無窮盡	八百六度行	世雄所宣暢
分別眾生心	意趣各不同	無量眾德本
權現入世俗	旣布善道教	超至無爲岸
今日大慈哀	演法無窮極	過去恆沙佛
演法亦如今	福業修五德	降伏倒見者
色身無身報	諸佛深奧藏	無報非有報
泥洹性自空	眾生自興念	存心報無報

行除分別想 思惟如來業 非生非無生

故應菩薩門 說法非有法 亦無眾生想

樂想去苦想 生滅永已寂 福響自然應

如空無所著 一意成正覺 色報爲所在

統王天世間 眞諦不可盡 入定現非常

終歸滅盡本 道心不在內 亦復不在外

苦想若干念 求道盡根源 思惟百千定

生生未始斷 係意乃折心 亂想何由生

菩薩所行業 法門各不同 欲求無量法

當於眾生求 法法自然生 法慧無窠窟

尋生本無生 何有法源本 積智過百劫
修慧不懈怠 進成八等行 故號人中尊
有報非有報 亦無色身相 瓔珞眾智業
現身教化俗 表裏如紫金 音響極柔輒
所說不唐捐 聞者皆得度 我如螢火光
自照無益彼 佛日照大千 不知闇冥處
豈敢以朝露 增益江海潤 承佛大聖威
故說菩薩門 菩薩放慧光 永除眾生冥
拔愚惑根本 賢聖道在前

菩薩瓔珞經卷第十五

菩薩瓔珞經卷第十六

姚秦沙門竺佛念譯

三道三乘品第二十九

爾時世尊告舍利弗。汝等觀此慧眼菩薩。得四辯才。眾智自在。修心意定。在大眾中演暢菩薩諸法深奧。此菩薩者。久如當成等正覺乎。時舍利弗白佛言。世尊。我等聲聞所見微尠。豈能測度大聖法典。惟願世尊。演布道化。使眾會者悉聞其要。爾時世尊告舍利弗。諦聽。諦聽。善思念之。吾當與汝宣暢正要。舍利弗言。如是世尊。佛告舍利弗。西北去此十四江河沙數。

彼有佛國。名眾智自在。佛名慧造如來。至真等正覺。明行成爲善逝。世間解無上士。道法御天人師。號佛世尊。彼佛如來初發道心。廣大無崖。超過眾聖。諸受別者。彼佛如來發此宏誓之心。若我成佛。與生死別。不處憤鬧。五濁鼎沸。使我國土清淨無瑕。我旣成佛。翼從成就。男女各別。無貪欲心。復發此願。使我國土一切眾生。光光相照。無有日月星宿光明。水精瑠璃。碑磔瑪瑙。眞珠琥珀。金銀七寶。莊嚴已國。使我國土同一水乳。亦令我刹有一浴池。如四天下。鳧雁鴛鴦。盡七寶身。悲鳴相和。共相娛樂。浴池東口所流水處。

縱廣千由旬。浴池南口縱廣千由旬。浴池西口縱廣千由旬。浴池北口縱廣千由旬。當浴池中央有自然七寶高座。高下縱廣各千由旬。諸十方無量無限無邊際恆沙國土大乘菩薩。坐樹王下永除心結。降伏魔宮成無上道。卽於其日來至此刹。詣我浴池昇七寶座。演說大乘不退轉行。大乘翼從發宏誓者皆詣我國。使我國土無上大乘菩薩無上大乘辟支佛。無上大乘聲聞者。佛復告舍利弗。今此慧眼菩薩大乘牢固心難沮壞。當生彼國成等正覺。教化眾生無有窮極。彼國人民壽命各等。無有中天之者。欲知其壽

亦如無量佛國。但男女眾生不如阿彌陀佛國得道者也。是時舍利弗聞佛所說怪未曾有。一切眾會皆懷狐疑。卽從座起偏露右臂右膝著地長跪叉手。前白佛言世尊。今聞如來演說大乘不退轉行。大乘翼從成已國土。願樂欲聞。云何爲大乘菩薩。云何爲大乘辟支佛。云何爲大乘聲聞。佛告舍利弗。菩薩三乘各有三品。辟支三乘亦有三品。聲聞三乘亦有三品。於是舍利弗欲知菩薩三乘者。今與汝說。有菩薩大乘。有菩薩辟支佛乘。有菩薩聲聞乘。是謂菩薩三乘。又舍利弗。辟支佛三乘者。有辟支佛菩薩大乘。有辟

支佛菩薩緣覺乘。有辟支佛菩薩聲聞乘。是謂辟支
三乘。又舍利弗。聲聞三乘者。有聲聞大乘。有聲聞辟
支佛乘。有聲聞無著乘。是謂聲聞三乘。時舍利弗。復
白佛言。世尊。云何爲菩薩大乘。佛告舍利弗。慧眼菩
薩所生國土。慧造如來境界是也。若有菩薩摩訶薩。
發宏誓心。不樂小道。如上所願。盡得生彼慧造國土。
時舍利弗。復白佛言。世尊。云何爲菩薩辟支佛乘。佛
告舍利弗。西北去此過十四江河沙已。復過十四江
河沙數。有佛土名爲淨泰。佛名無動如來。至眞等正
覺。十號具足。國土清淨無姪怒癡。上下恭順貴修清

虛。彼土眾生盡修一行。普出家學無上正眞修平等覺。彼佛境界有一浴池。縱廣一佛世界。浴池東口百千萬由旬。浴池南口百千萬由旬。浴池西口百千萬由旬。浴池北口百千萬由旬。諸有菩薩修大乘辟支佛者。盡生彼國。異類奇鳥數十百種。遊戲池中。種種香熏徧布世界。生七寶樹。華果香潔。彼池水中優鉢蓮華。鉢頭牟華。拘味投華。分陀利華。皆生於池水中。當池中央有七寶高座。縱廣高下過眾生界。盡諸賢聖所居之處。如是舍利弗。彼佛國界無有菩薩大乘。唯有菩薩辟支佛乘。所以者何。皆由宿願而得生彼。

分別三十七道品法。共相娛樂。演布道教。是謂族姓。子菩薩。辟支佛。乘所居之處。非菩薩聲聞乘所能逮及。爾時世尊。與舍利弗。便說此偈。

如來不思議 諸法各殊特 菩薩大乘慧

刹土亦各異 賢聖辟支乘 普集同一味

相勸現教化 演布無比法 演暢清淨音

平等無二心 由宿本願報 故生彼刹土

處七寶高座 雷吼震三界 所度無有量

自然應法律 不計生死本 不懷憂喜想

不著有無行 不計本末空 今汝舍利弗

欲知辟支乘 國土佛姓號 所說義如是

爾時舍利弗復白佛言。世尊。如來至眞等正覺。以廣長舌神口所說。菩薩大乘菩薩緣覺乘。今已具知。願樂欲聞菩薩聲聞乘所行法則。其事云何。爾時世尊告舍利弗。西北去此度二十四江河沙已。復過二十四江河沙數。彼有佛土名毛孔光。佛名法觀如來。至眞等正覺。十號具足。彼國清淨。一切眾生具四空定。神足變化超過賢聖。彼有浴池如上無異。皆有宿願而得生彼。鬚除鬚髮著袈裟法服。具足六度空無相無願。所度眾生不可稱量。彼土菩薩聲聞乘者。勝我

國土一生補處。所以然者。今此菩薩逮阿惟顏百劫
教化盡趣道門。各各成就立不退轉。故不如彼國菩
薩聲聞。一日所化濟度眾生。百倍千倍。巨億萬倍。不
可以譬喻爲比。爾時世尊與舍利弗復說頌曰

清淨如金精 亦如星中月 禁戒威儀具

乃生彼佛國 法觀大賢聖 宿積無量行

分別虛無慧 心正無餘想 說法度眾生

一會恆沙數 盡令具足成 菩薩聲聞乘

吾昔發意錯 苦行不可量 不與彼因緣

王此五濁世 今雖成佛道 神足自在遊

欲願至彼土。無由在其例。諸佛境界異。

所願各不同。欲與彼緣者。發願豈在晚。

爾時世尊。與舍利弗說此偈已。時座上百億那術諸
天人。皆發宏誓。曠大之心。願樂欲生法觀如來菩
薩聲聞佛土。彼佛刹土。無有菩薩大乘。無有菩薩辟
支佛乘。唯有菩薩聲聞乘。盡生彼國。共相娛樂。皆由
宿願。而得生彼。爾時舍利弗復白佛言。世尊。今聞如
來說菩薩摩訶薩菩薩大乘菩薩辟支佛乘菩薩聲
聞乘。一切眾生皆悉奉行信樂承受。今請如來說辟
支佛菩薩大乘辟支佛辟支佛乘辟支佛聲聞乘。願

樂欲聞心解狐疑。爾時世尊告舍利弗。諦聽諦聽善
思念之。吾當與汝一一分別。舍利弗荅曰。如是世尊。
佛告舍利弗。去此西北四十四江河沙。佛土名曰雷
吼。佛名如意如來至真等正覺。十號具足。彼國殊特
七寶成就。眾生賢柔辯才通達。智慧如海言不妄發
說清白事以爲禁戒。法法成就不相拒逆。彼有浴池
如上所說。彼浴池中有七寶金剛師子之座。高廣上
徹眾生之表。一切辟支佛菩薩大乘悉生彼國。其相
敬順不懷貢高。本所造緣不違誓願。住壽恆沙神足
自在。爾時世尊與舍利弗而說頌曰

虛空無邊際 清白行各異 心如本無際

緣覺所由刹 緣覺菩薩乘 由昔發意得

光相自嚴飾 不計優劣行 永離諸苦惱

不闕諸法相 乃從無數世 行至得成佛

正法如虛空 四大無所因 聚散須臾間

無生不起滅 人身多憂慮 緣對所縛著

彼土寂然定 脫此眾患惱 若使羣萌類

精進植功德 欲獲不死法 當願生彼國

正使彼佛念 欲來至我土 無緣無起想

終不來此國 所以諸佛國 各各殊特別

由宿所發願 所度各不同 法辯神妙義
義辯決眾疑 應辯如聲報 此四悉具足
若欲立成就 願樂彼佛者 宏誓曠大者
立志不虛詐

爾時世尊與舍利弗說此偈時。爾時座上七萬比丘。
本求小乘。斷漏取證。盡皆迴意。願生彼國爲辟支佛。
菩薩大乘。復有無數諸天人民。逮須陀洹果。爾時舍
利弗白佛言。世尊。聞如來說菩薩摩訶薩。三道三乘。
又復演說辟支佛道。菩薩大乘。一切眾會莫不歡然。
眾德具足。善心生焉。今欲願聞辟支佛辟支佛乘。其

義云何。亦使眾生心得開悟。爾時世尊。告舍利弗言。去此西北八十四江河沙數。復過此數。有佛土名曰清瑠璃。佛名身相如來至真等正覺。十號具足。彼國寬博無眾穢惡。刹土平整坦然無礙。彼有浴池清涼微妙。於池中央有七寶高座。高廣嚴飾。至眾生際。諸有得辟支佛辟支佛乘者。盡現彼國周流教化。講論妙法殊勝之行。諸有發願欲生彼者。皆遂本心中間無礙。爾時世尊與舍利弗而說頌曰。

一向心意識 執意不可動 本願所牽連
乃生彼佛土 積德如恆沙 要拔生死元

本無性常定 泥洹清淨樂 辟支緣覺乘
執心無邊崖 瑠璃剎土妙 身相如摩尼
面如紅蓮花 香熏一切剎 不受餘道果
解脫至要妙 佛界曠無疆 所度不可計
辟支要集處 說法義無窮 解空無有空
志趣不退轉 行過神仙表 故號辟支乘
夫欲崇深妙 如來無著行 咸各齊發願
成佛無有難 眾生上中下 用心各不同
惟當攝一意 道果自然至

爾時世尊與舍利弗說此頌時有七十千比丘皆發

宏誓願生彼國。復有菩薩行人無央數眾。願樂欲見身相如來至真等正覺。及彼刹土諸辟支佛。爾時世尊。知彼眾生心中所念。便放頂相光明。照彼佛國。如掌觀珠。晃然大明。盡見彼國清淨無瑕。大聖賢士。爾時世尊。還攝光明。從頂而入。諸菩薩眾欣然大悟。卽從座起。禮世尊足。前白佛言。今蒙大聖布演道化。旣蒙光明得見彼土。使我等身捨此形命。願樂欲生瑠璃佛刹。爾時世尊告眾菩薩。諸族姓子。發意曠大宏誓。深固汝等各各盡生彼國。同時成佛。功德成就。時諸菩薩見授決已。起禮佛足。還復本座。爾時舍利弗。

白佛言。世尊。今聞如來說菩薩大乘菩薩。辟支佛乘。菩薩聲聞乘。辟支佛菩薩乘。辟支佛乘。一切眾生諸來會者。信心成就。各獲道證。未聞如來說辟支佛菩薩聲聞乘。唯願開解。隨時發遣。令眾會者咸得聞知。爾時世尊告舍利弗。西北去此一億七百萬江河沙數。彼有佛土。名曰興顯。佛名廣曜。如來至真等正覺。十號具足。今現在說法度人。無量世界淨妙眾德具足。志趣皆同。不相違背。四等平均。哀愍一切。周旋教化。不離本行。興顯正法。神足變化。彼有浴池中七寶莊嚴。光光相照。視無厭足。於浴池中。生眾華。

果香熏苾芬不可稱計。當池中央七寶高座。縱廣高
升上至梵天。一切大聖盡集彼土。宣暢如來六度無
極。智慧聞施不離本願。十六殊勝如來深藏。一一達
了。而現在前。彼土眾生無婬怒癡邪見之人。彼浴池
者。一名盡垢。二名受證。若有菩薩摩訶薩。本誓牢固
心願清淨。得生彼刹。諸根清淨。六情完具。悉詣浴池
自恣所欲。卽於池上。諸塵垢盡。成辟支佛菩薩聲聞
乘。得等正覺道。眾相莊身。觀無厭足。斯由宿願成道
果證。爾時世尊。與舍利弗而說頌曰。

心爲眾行本 導引度識崖 宏誓自將御

無畏成正覺 忘空不計形 蠲除心想法
三有去形累 自然覺道成 佛本修空慧
不於彼此求 悉滅前後心 從是成道果
今生非後生 假號成其名 人以幻法惑
沒溺於深淵 興顯刹土妙 諸聖盡雲集
廣曜如來尊 在彼而教化 佛心無不定
志堅不可動 行盡獲果實 乃得生彼刹
池如八解味 飲者除眾患 結縛自然解
便獲無上道 辟支聲聞乘 功德不可盡
執意不分散 尋應如來行 光明接化人

演說功德業 心淨如明珠 不爲塵欲染

彼刹寶奇特 眾行不思議 有欲願樂者

吾前未有疑 我當扶接汝 威神擁護身

勿生懈怠意 於後悔無益 昔從無數劫

不遇賢聖人 一失人道本 欲求甚爲難

爾時世尊與舍利弗說此偈時。座上有七千居士。捨
憍慢心。除去貢高。不著榮飾。內自剋責。我等愚惑。染
俗來久。今聞如來深要正法。各從座起。前禮佛足。卽
於佛前發宏誓心。我等願樂欲生彼國。唯願世尊神
力將接。無令同誓中有罣礙。爾時世尊告居士等。汝

發道心實爲難有。我當證汝成等正覺。時諸居士聞佛授決卽從座起。遶佛三匝。頭面禮足。還復本座。爾時舍利弗復白佛言。世尊。今聞如來至眞等正覺已說菩薩摩訶薩三道三乘之行。復說辟支佛菩薩三道三乘之行。諸來會者聞此正法。皆發無上平等正覺。應一相行不失本際。施爲佛事不思議法。未聞如來說聲聞菩薩三道三乘之行。唯願世尊今宜知時。當與眾會敷演正要。令諸狐疑永無猶豫。爾時世尊告舍利弗。諦聽諦聽善思念之。吾當與汝一一分別。舍利弗白佛言。如是世尊。爾時佛告舍利弗。去此西

北過百千億江河沙數。有佛土名師子口。佛名法成。就如來至真等正覺。十號具足。現在說法。大聖所行。無不周徧。諸菩薩法皆悉具足。土界清淨。威儀禮備。壽命極長。無三惡道。戒功德香。而自娛樂。五分法身。以爲禁戒。彼有浴池清淨殊特。香氣苾芬。無不周普。彼土虛寂。無有石沙穢惡。泰然亦無山河石壁。彼有浴池深且清涼。一切眾聖盡集。彼浴共相娛樂。池中有龍。神德無量。三十二頭。隨時降雨。普潤世界。當池中央。有七寶高座。縱廣一億由旬。諸有得聲聞菩薩。大乘者。詣彼七寶無畏之座。演說菩薩三十二殊特。

之業。六度四等無生滅法。斯由宿願乃得生彼。爾時
世尊與舍利弗。而說頌曰。

聲聞菩薩乘	功勳不思議	光明普所照
不復興名想	刹土極清淨	道慧自娛樂
永離諸欲愛	正法恆顯曜	日夜奉修道
行淨無所染	不見法相本	見有窠窟處
佛藏甚深妙	果實不唐捐	宿願所追逮
乃得生彼刹	彼國盡賢聖	演吐甘露法
蠲除眾穢惡	無生老病死	頌宣諸法典
度人無有量	盡趣無爲海	寂然取滅度

爾時世尊與舍利弗說此偈時座上有七億那術眾生聞如來與舍利弗說聲聞菩薩大乘之行。此等諸人本求聲聞斷結受證。今聞大聖說聲聞大乘菩薩之行。各從座起至世尊所。頭面禮足白佛。我等願樂欲生師子口刹土。法成就如來所。修清淨行。志求無上正真之道。佛言。善哉善哉。族姓子。汝等心意曠大無崖。乃能發此聲聞菩薩摩訶衍心。必果所願。亦無有虛。時彼諸人聞佛授決。欣然歡喜。遶佛三匝。頭面禮足。還復本座。爾時舍利弗復白佛言。今聞如來至真等正覺。已說菩薩摩訶薩三道三乘。已說辟支佛。

菩薩三道三乘。復說聲聞菩薩乘。未聞如來說聲聞
菩薩。辟支佛乘。唯願世尊。以時敷演。使眾會者。永無
狐疑。爾時世尊。告舍利弗。汝欲聞聲聞辟支佛菩薩
乘者。諦聽諦聽。吾當演說。舍利弗白佛言。如是世尊。
佛告舍利弗。西北去此度二百億江河沙數。彼有佛
土。名曰盡度。佛名清淨觀如來。至真等正覺。十號具
足。佛土清淨。總持不忘。菩薩所行法。不思議。化度眾
生。一向修道。諸法熾盛。得佛聖行。神足變化。無所觸
礙。彼有浴池。清淨無穢。眾果茂盛。香氣芬馥。於池水
中生種種華。優鉢蓮華。拘牟頭華。波頭牟華。分陀利

華復有異類奇鳥數十百種。在彼池中共相娛樂。諸
有得道聲聞辟支佛菩薩乘者。盡生彼刹。於池中央
有七寶座。縱廣高下如一億刹土。上過眾生際。諸有
發意求聲聞辟支佛菩薩乘。盡生彼刹。爾時世尊與
舍利弗而說頌曰

盡度清淨刹

諸聖盡雲集

其說諸道教

變化無窮極

清淨觀如來

本願之所致

念念無餘想

唯修無上道

捨本除闍冥

現佛光明慧

內外悉清淨

無復三毒患

一切眾生類

聞法輒開悟

菩薩三道乘

無緣得生彼 辟支三道乘 亦復不得生

聲聞辟支乘 乃得生彼刹 汝等舍利弗

觀彼清淨界 所度不可量 非我所能及

爾時世尊與舍利弗說此偈已。復有無數百千眾生。內心自念。我等愚惑沈翳生死。不聞如來無畏大法。如今聞說彼刹清淨善根具足。我等願樂欲生彼土。爾時世尊知彼眾生心中所念。便告諸天人曰。汝等後生生彼國土清淨之處。同日同名盡成無上。等正覺道。時諸眾生聞佛授決。歡喜踊躍。不能自勝。卽從座起。頭面禮足。遶佛三匝。還復本座。爾時舍利弗白。

佛言。世尊。已聞如來至真等正覺。說菩薩摩訶薩三
道三乘。復說辟支佛菩薩三道三乘。復聞聲聞菩薩
乘。復聞聲聞辟支佛乘。一切眾會莫不欣然。今請如
來說聲聞聲聞菩薩乘。令眾會者悉得開解。爾時世
尊告舍利弗。汝欲聞聲聞聲聞菩薩乘者。諦聽諦聽
善思念之。吾當與汝一一分別。舍利弗白佛言。如是
世尊。佛告舍利弗。去此西北八十四江河沙數。有刹
土名曰無盡。佛名徹聽如來至真等正覺。十號具足。
彼國清淨。眾生成和。三世智慧以爲道教。行菩薩法
不失總持。一切眾生成同。一意奉修正法。共相娛樂。

無量三昧而現在前行諸佛觀不失本要。彼有浴池微妙無比。賢聖大慈所遊戲處。常轉法輪不退轉行。使諸菩薩悉得成就。諸有發意中間不退。盡得生彼無盡刹土。爾時世尊與舍利弗而說頌曰

無盡清淨刹 徹聽如來國 本願所追逮

眾相悉成就 一切諸賢聖 盡集彼刹土

眾德自瓔珞 演說無比教 開化一切人

皆同其至味 入定等三昧 眾行悉具足

本從無數劫 行權不捨願 十力無所畏

故生彼佛刹 世尊普慈蓋 愍哀一切人

念想不離願 自然成正覺 猶如日光明

悉照千萬品 菩薩所行慈 一切普蒙恩

爾時世尊與舍利弗說此偈時。有十三億眾生。皆發無上心。願生彼國。爲聲聞聲聞乘。上修無上梵行。爾時世尊知眾會心中所念。便笑。口出五色光。遶佛三匝。還從面門入。時舍利弗卽從座起。整頓衣服。長跪叉手。前白佛言。唯然世尊。佛不妄笑。願聞其意。佛告舍利弗。汝見此十三億那術人。不後將來世。過此賢劫。盡同一願。當生彼土。成等正覺。修清淨行。

供養舍利品第三十

爾時尊者長老須菩提。在大眾中竊生此心。今聞如來至真等正覺說極妙之法。無限曠大不可思議。非是辟支所及。諸法自然無有生滅。云何於無生滅法中。有三道三乘。是時長老須菩提卽從座起。齊整衣服。偏露右肩。右膝著地。長跪叉手。卽以此偈而歎頌曰。

本無如來法	如空無有形	云何於三道
各有三乘行	一相本無相	亦不見生滅
學道無窮極	息行爲第一	如海無增減
吞流無有厭	虛空正法性	曠大亦復然

佛爲眾聖王	三界無等侶	演布無窮慧
度於未度者	功成不念報	不求尊豪貴
勉濟一切人	獲於無上道	如日照天下
處闇悉蒙明	聖人降神生	莫不得蒙濟
四大本無主	忽然在五道	受入三毒根
遂生有無想	形累在縛著	識想乃滋甚
如沒在深淵	欲濟甚爲難	菩薩大乘學
刹土各不同	設欲取滅度	舍利爲所在
唯願人中尊	敷演令開悟	普爲大世界
分別善惡趣		

爾時長老須菩提。以此偈問佛已。卽從座起。遶佛三
帀。還復本位。爾時世尊復以此偈報須菩提。

佛子須菩提

空慧爲第一

暢達三世法

所說甚玄微

所念不爲己

愍接一切人

常想滅生死

永在無爲處

佛道不思議

攝意乃應律

入定神足力

應感不可量

菩薩大乘迹

現變如恆沙

教化已周訖

寂然滅心意

見成未必成

猶有存亡心

成亦本無成

乃應解脫慧

爾時世尊告須菩提。過無數恆沙諸佛所說道教。濟

度眾生各各不同。或有如來至真等正覺。教化眾生
淨佛國土。從一佛國至一佛國。供養承事諸佛。世尊
接度眾生。於無餘泥洹界而般泥洹。然後如來乃取
滅度。或有如來至真等正覺。淨已國土。現不思議神
足變化。入佛定意。敷演道教三十七品。或經一劫至
百千劫。教化終訖。皆使眾生永離眾苦。於無餘泥洹
界使般泥洹。然後如來現般泥洹。畱身在後。普使一
切興致供養。顯極妓樂而娛樂之。神變光明六度無
極。復令無數眾生悉得無上大道。或有如來在世教
化修勤苦行。荷負眾生爲人重任。遊至諸佛一切刹

土。承受正法。修無上大道。復於彼刹。現神足道。於無
央數諸佛世界。教化周訖。現取滅度。復現畱全身。舍
利。徧滿三千大千世界。育養眾生。淨佛國土。教化旣
周。復使無數眾生。於無餘泥洹界。而般泥洹。然後如
來。乃取滅度。佛復告長老。須菩提。如來法身。眾德具
足。色身教化。不可稱量。復畱全身。舍利。接度眾生。所
度眾生。不可窮盡。若有善男子。善女人。信心牢固。恭
奉三寶。及供養三世諸佛。世尊。其功德福。不可稱量。
爾時長老。須菩提。白佛言。若有善男子。善女人。信佛
信法。信比丘僧。除去猶豫。不懷邪見。供養法身。及現

在色身。及供養全身舍利。此三功德何者爲多。爾時世尊告長老須菩提。云何族姓子。若有人得信解脫。起七寶塔徧一天下。隨時供養種種香華。其功德福寧爲多不。長老須菩提白佛言。世尊甚多甚多。佛言。故不如信解脫。善男子善女人。供養舍利繒綵華蓋種種香熏。其功德福不可稱量。不可以譬喻爲比。勝彼供養一天下塔者上。何以故。起七寶塔隨時禮敬。皆因舍利乃得供養。佛復告長老須菩提。復置此塔。若有善男子善女人。供養全身舍利滿一天下。隨時供養繒綵華蓋種種香熏。并供養一天下七寶塔。其

功德福寧爲多。不長老須菩提白佛言。世尊。甚多甚多。佛言。故不如得信解脫。善男子。善女人。供養一色身如來。至真等正覺。其功德福不可稱量。不可以譬喻爲比。何以故。此善男子。善女人。供養一天下七寶塔。及一天下全身舍利。繒綵華蓋種種香熏。皆由如來色身而得供養。佛復告須菩提。云何族姓子。若有善男子。善女人。得信解脫。於二天下起七寶塔。并供養二天下全身舍利。并二色身如來至真等正覺。繒綵華蓋種種香熏。云何須菩提。其福寧爲多。不須菩提白佛言。甚多甚多。世尊。佛言。故不如善男子。善女

人供養法身。承事諷誦翫習不懈。其福甚多甚多。不可以譬喻爲比。何以故。此善男子善女人。供養二天下七寶塔。及二天下全身舍利。復供養二色身如來。至眞等正覺。繒綵華蓋種種香熏。皆由法身而得供養。佛復告長老須菩提。云何族姓子。若有善男子善女人。於三天下起七寶塔。并三天下全身舍利。及三色身如來。至眞等正覺。繒綵華蓋種種香熏。如是供養。其福寧爲多不。須菩提白佛言。甚多甚多。世尊。佛言。故不如善男子善女人受持諷誦法身。其福甚多甚多。何以故。三天下七寶塔。及三天下全身舍利。及

三色身如來至真等正覺。皆由法身而得供養。佛復告長老須菩提。云何族姓子。若有善男子善女人。於四天下起七寶塔。及四天下全身舍利。及四色身如來。至真等正覺。繒綵華蓋種種香熏。如是供養其福。寧爲多不。須菩提白佛言。甚多甚多。佛言。故不如善男子善女人受持諷誦法身正教。其福甚多。不可以譬喻爲比。何以故。供養四天下七寶塔。及四天下全身舍利。及供養四色身如來至真等正覺。皆由法身而得供養。佛復告長老須菩提。若有善男子善女人。於小千天下起七寶塔。及小千天下滿中全身舍利。

及供養百色身如來。至眞等正覺。繒綵華蓋種種香
熏。如是供養。云何族姓子。其福寧爲多不。須菩提白
佛言。甚多甚多。世尊。佛言。故不如善男子善女人受
持諷誦法身正教。其福甚多甚多。不可以譬喻爲比。
何以故。供養小千天下七寶塔。及供養小千天下全
身舍利。及供養百色身如來。至眞等正覺。皆由法身
而得供養。佛復告長老須菩提。若有善男子善女人。
於中千天下起七寶塔。及中千天下滿中全身舍利。
及供養千色身如來。至眞等正覺。繒綵華蓋種種香
熏。作如是供養。云何族姓子。其福寧爲多不。須菩提

白佛言。甚多甚多世尊。佛言。故不如善男子善女人受持諷誦法身正教。其福甚多甚多。不可以譬喻爲比。何以故。中千天下起七寶塔。及供養中千天下全身舍利。及供養千色身如來。至眞等正覺。皆由法身而得供養。佛復告長老須菩提。云何族姓子。若有善男子善女人於大千天下起七寶塔。及大千天下全身舍利。及供養萬色身如來。至眞等正覺。繒綵華蓋種種香熏。如是供養其功德福寧爲多不。須菩提白佛言。甚多甚多世尊。佛言。故不如善男子善女人受持諷誦如來法身正教。其功德甚多甚多。不可以譬

喻爲比。何以故。大千天下起七寶塔。及大千天下全身舍利。及供養萬色身如來至眞等正覺。皆由法身而得供養。佛復告長老須菩提。若有善男子善女人。於三千大千天下起七寶塔。及大千天下滿中全身舍利。復供養一億色身如來至眞等正覺。繒綵華蓋種種香熏。如是供養其福功德。寧爲多不。須菩提白佛言。甚多甚多。世尊。佛言。故不如是善男子善女人受持諷誦法身正教。其福功德甚多甚多。不可以譬喻爲比。何以故。三千大千天下起七寶塔。及三千大千天下滿中全身舍利。復供養一億色身如來至眞

等正覺。皆由法身而得供養。佛復告長老須菩提。云何族姓子。且置三千大千世界。若有善男子善女人。從一佛世界至百千佛土。起七寶塔滿中全身舍利。復供養億百千色身如來。至真等正覺。其福功德寧爲多不。須菩提白佛言。甚多甚多。佛言。故不如是善男子善女人受持諷誦法身正教。其福功德甚多甚多。不可以譬喻爲比。何以故。一佛境界至億百千世界。起七寶塔滿中全身舍利。復供養億百千色身如來。至真等正覺。皆由法身而得供養。爾時世尊與須菩提。而說頌曰。

菩薩行善權	隨形而適化	不於空染識
功熏自嚴身	夫欲盡空際	達了本無觀
心往形不滯	正觀自覺悟	眾生法界異
所趣解脫同	超越生死岸	無復有無識
人本染四流	四駛水所漂	四大各還本
及成四果證	若復入正定	分別有無慧
顯曜無盡法	辯才智無礙	安般自攝意
不起眾亂想	眾結顛倒心	鏟以智慧劔
識想本無形	細入無有間	所行不思議
受決乃得悟	諸佛國清淨	現變無有雙

皆由正法身 獲此巍巍尊 本無無三道
亦無成正覺 皆由眾生念 使有優劣心
忍爲諸法藏 行淨無點汙 盡生更不造
斯由法身果 觀諸佛所行 聞法無厭足
化導一切人 盡同正法味 乃於無數劫
究盡生死海 清淨觀三世 了達法身本
爾時世尊說此偈時。有無數百千眾生皆發無上正
眞道意。復有五百比丘二百五十優婆塞。遠塵離垢
得法眼淨。時長老須菩提白佛言。世尊。如來至眞等
正覺。三達無礙神通清淨。演說法身甚深微妙。欲有

所問。唯願大聖。願愍開悟。爾時世尊告須菩提。有所疑難。今正是時。如來當爲一一分別。時須菩提白佛言。世尊。如來色身。全身舍利。此二法性。有何差別。佛告須菩提。善哉。斯問。如來色身。眾德積聚。演布道教。訓以三業。云何爲三。一者身行清淨。防塞不善。二者口言真誠。不說非邪。三者意專向道。無他異念。是謂三業具足。清淨得昇道場。全身舍利。雖復真體。離此三業。永無言教。正可有威神光明。供奉得福。故有優劣。時長老須菩提復白佛言。如世尊所說。以有三業。各有進退。故有差別。所謂供養色身。及供養全身舍

利。法性同一法無若干。今問如來色身及全身舍利。不問如來三業教誡。云何世尊以三業報荅夫三業者。識界所攝。識非色身。色身非識。爾時世尊告須菩提。云何族姓子。全身舍利光明威德。與如來色身有異無乎。須菩提白佛言。世尊。全身舍利亦有威神功德。隨人所念各充其願。如來色身眾相具足。亦有威神功德。接化眾生。無有窮極。所度各異。故有差別。佛復告須菩提。云何族姓子。如來現變光相具足。徧滿十方無量世界。執權方便。隨形適化。全身舍利復有此功勳不乎。須菩提白佛言。世尊。如本生契經所說。

頂王如來至眞等正覺。十二那術劫在世教化。說法
周訖卽捨其壽。於無餘泥洹界而般泥洹。畱身舍利
徧滿世界。復經十二那術劫。世人供養如佛存在。說
法教化所度亦等。是故世尊如來色身全身舍利各
無差別。爾時世尊告須菩提。頂王如來全身舍利在
世教化。爲是本識。非本識耶。須菩提言。非也。世尊。皆
是頂王威神所接。爾時世尊告須菩提。如是如是。如
汝所言。此頂王者威神。全身舍利有是言教。是故色
身全身舍利法性不同。爾時世尊與須菩提。便說此
偈。

過去頂王佛 在世教化久 十二那術劫
說法無增減 周訖取滅度 畱身演布教
所度無有量 修一進成佛 舍利識非識
頂王威神故 捨本不著本 憺然入無爲
卿今雖獲空 漏盡無有礙 分別如來界
非汝狹劣局

爾時座上有八萬四千諸天人民聞佛所說皆發無
上正眞道意我等後作佛時皆如頂王如來教化不
異時須菩提遶佛三匝頭面禮足還復本位。

譬喻品第三十一

爾時世尊說法瓔珞。講法身福功德無量。座中有五千菩薩。卽從座起。頭面禮足。遶佛三匝。便退而去。爾時尊者大目犍連。內自思惟。此五千正士。聞佛所說三身法寶。不肯受持。各退而去。此必有緣。事不空。爾時目連卽從座起。徧露右臂。長跪叉手。白佛言。唯然世尊。此五千正士。修菩薩道。已入如來深法之藏。行過聲聞辟支佛上。今聞世尊說法瓔珞三身深義。不肯受持。各退而去。佛告目連。止止。族姓子。若有善男子善女人。聞此義者。頭破爲七分。沸血從面孔出。何以故。此惡人等。本從無數阿僧祇劫。恆喜誹謗毀辱。

正法。爾時復重白佛。唯然世尊。願說誹謗受罪云何。佛告目連。此五千正士。從過去恆沙佛已來。亦修布施持戒。忍辱精進。一心智慧。善權方便。還起想著。有悔過心。於如來所。便有退轉。方當經歷勤苦之難。千佛過去。猶不得度。此五千正士。最上首者。名曰勇智。雖修菩薩摩訶薩行。欲求成佛。終不可得。譬如士夫。欲於空中造作七寶宮殿。五色玄黃。雕文刻鏤。如此善男子。善女人。乃能作不。目連白佛言。不也世尊。何以故。虛空無像。不可造作。爾時世尊告目連曰。此勇智菩薩。光明佛時。作師子王。吾爲梵志。修清淨行時。

師子王晨朝峙立六處不動。奮迅身體。便大雷吼。走獸伏住。飛者墮落。然後乃趣曠野山澤。案行局界。求覓羣獸。逢一象王。殺而食之。髀骨哽咽。死而復蘇。時有木雀在師子前。求覓輒蟲。取而食之。師子張口告木雀曰。與吾挽此骨。卻後若得食。當相報恩。木雀聞之。入口盡力拔骨。乃得去之。時師子王後日求食。大殺羣獸。木雀在側。少多求恩。師子不報。佛告目連。時師子王。以此偈報木雀曰。

吾爲師子王 以殺爲家業
噉肉飲其血 以此爲常膳
汝旣不自量 脫吾牙齒難

還得出吾口 此恩何可忘

爾時木雀復以此偈報師子曰。

我雖是小鳥 誠應不惜死 但王不念恩

自負言誓重 若能小寬宏 少多見惠者

歿命終不恨 不敢有譏論

爾時師子王竟不報恩捨之而去。木雀自念。吾恩極重。反見輕賤。今當追後。要伺師子。便不報怨者。終不行世。在在處處。終不相離。時師子王復殺羣獸恣意食之。飽便睡眠。無所畏懼。時彼木雀飛趣師子當立額上。盡其力勢。啄一眼壞。師子驚起。左右顧視不見。

餘獸唯見木雀獨在樹上。時師子王語木雀曰。汝今何爲乃壞吾目。時彼木雀以偈報師子王曰。

重恩不知報 反更生害心 今畱汝一目

此恩何可忘 汝雖獸中王 所行無反復

從是各自休 莫復作緣對

佛告目連。時師子王豈異人乎。莫造斯觀。所以然者。今此勇智菩薩是。時木雀者。今汝摩訶目犍連是。此正士等。自從是來。恆行誹謗。不信如來三身之要。方當經歷地獄之難。佛復告目連。若有菩薩摩訶薩。修淨瓔珞得三身定者。神足遊戲無所罣礙。爲人重任。

荷負眾苦。譬如空界無所不覆。淨妙瓔珞。三身法者。亦復如是。滿足一切眾生所願。譬如大海深廣清淨。不受穢惡。諸不淨者。菩薩摩訶薩亦復如是。得淨妙瓔珞三身法者。不受塵垢縛著顛倒。譬如摩尼寶珠。光明徹照。非日月星辰光明所能遏絕。菩薩摩訶薩亦復如是。獲淨妙瓔珞三身法者。不爲五通神仙禁呪神藥所能制持。譬如四道受證。自信通以慧度五道。不爲眾邪所見。畱住。譬如滅盡定人。燒盡本行。菩薩摩訶薩。盡生死根。信心牢固。不興誹謗。譬如士夫。得如意珠。隨意所念。皆現在前。菩薩摩訶薩亦復如

是得如意正定。觀眾生類純淑根者。漸漸訓導。各至無爲。猶如不退轉法。不復墮落染著生死。菩薩摩訶薩亦復如是。雖處生死。不懷畏懼。言我當復退轉在生死中。譬如非男非女之人。持示殊妙五樂之中。亦不生心染著情欲。菩薩摩訶薩亦復如是。周旋教化。徧入五道。知而不著。不起想念。拔濟眾生。不可稱量。爾時世尊與目連而說頌曰。

菩薩本意淨 猶如金剛山 執意不可毀

受證如彈指 雖在世教化 不著緣本想

徧學一切法 豎立大法幢 猶如二士夫

執意各有術 相將至戲堂 各欲現其技
須彌四寶山 縱廣甚峻高 三百三十萬
六萬由旬數 一人在山頂 手執甘露瓶
一人在山下 執瓶受甘露 寫者亦不泄
受者不捐棄 彼人各凡夫 未獲通慧道
云何目犍連 此爲極難不 雖難未足奇
三法身甚難 從億千萬劫 欲聞淨瓔珞
分別三身慧 斯法最爲難 卿今莫愁憂
已超眾苦患 得聞三法要 自濟復濟彼
若有族姓子 篤信修習法 現世盡諸漏

神通遊自在 所生國土淨 七寶宮殿成
諸根悉完具 心淨如虛空

爾時世尊與目連說此品時。有億那術天人皆發無
上正真道意。願所生國土盡同一相。無有誹謗三法
身者。爾時目連起禮佛足。遶佛三匝還復本座。
菩薩瓔珞經卷第十六

菩薩瓔珞經卷第十七

姚秦沙門竺佛念譯

三世法相品第三十二

爾時世尊告輒首菩薩。吾昔成佛積功累行。自致如來至眞等正覺。棄國捐妻。不貪榮位。宣布一切諸佛法藏。隨前適化而度脫之。猶如醫王療救眾病。隨病輕重。然後投藥。若有眾生。今身現在種過去病。菩薩亦知而救護之。或復眾生。身已過去種未來病。菩薩亦知而救護之。是時尊者劫賓菟白佛言。世尊。云何善男子。善女人。身處現在種過去病。云何身過去種

未來病云何身在未來種現在病爾時世尊告劫賓
菟曰善哉善哉族姓子於如來前而問斯義多有所
益何以故過去當來今現在佛所宣法藏施爲佛事
不思議法莊嚴佛樹進行成佛爾時世尊與劫賓菟
而說頌曰

清淨聲柔輒	徧聞十方界	具足諸善根
拔苦離眾惡	分別三世行	無入無所生
如來悉觀察	獨善無等侶	初發宏誓心
不爲少許人	意廣如虛空	濟度恆沙數
今在樹王下	眾相自嚴飾	降伏諸外道

奉修正法教	首戴七覺華	身被慚愧服
和顏忍辱心	獨步無有難	無畏如師子
勇銳無有難	色像如月初	諦視無厭足
一切十方世	悉來供奉尊	隨本心所願
盡歸解脫門	本我所發願	不限劫數期
哀愍諸眾生	爲演甘露法	欲求人身難
聞受正法難	生處中國難	遭遇真人難
豪貴執信難	慳嫉惠施難	縛著受證難
分別三世難		

爾時世尊復告劫賓菟若有善男子善女人分別三

世姪怒癡病。遠離縛著無復生滅。神足自由變化無方。如此善男子善女人。入三世定意三昧。盡知過去未來現在諸佛所行。眾善根本悉現在前。諸佛世尊八等正道進趣泥洹。所以諸佛出現於世。觀察眾生。究盡根源。令知道門。如來三達觀三世法。無量無限。不可思議。或有眾生應聞過去法。如來便說過去滅。盡眾行不起。或有眾生應聞現在法。如來便說現在正教。遠離縛著。或有眾生應聞未來法。如來便說未來未生不起滅法。是時尊者劫賓菟白佛言。世尊。云何眾生應聞過去法。如來與說過去滅。盡眾行不起。

也。云何眾生應聞現在法。如來與說現在正教。遠離縛著也。云何眾生應聞未來法。如來與說未來未生不起滅法。爾時世尊告長老劫賓菟。諦聽諦聽善思念之。劫賓菟白佛言。唯然世尊。願樂欲聞。佛告長老劫賓菟。若有菩薩摩訶薩。觀了三世無量無限不可思議。非是辟支羅漢所及。何以故。如來所行非彼境界。若有菩薩摩訶薩。身處現在眾行具足。應從過去如來受決。便聞現在如來說過去法。過去滅盡眾行不起。心卽開悟。卽得授蒞。如來正眞等正覺十號具足。是謂菩薩摩訶薩。身處現在應聞過去法。過去滅

盡眾行不起。佛復告長老劫賓菟。復有菩薩摩訶薩。身處現在應聞現在法。從現在佛而受記。前如來至真等正覺十號具足。是謂菩薩摩訶薩。身處現在受前去離縛著無生滅想。復有菩薩摩訶薩。身處現在應聞未來法。如來與說未來未生不起滅法。是時菩薩心卽達悟。卽得授決。如來至真等正覺十號具足。是謂菩薩摩訶薩。身處現在說未來法。未來未生不起滅法。是時長老劫賓菟白佛言。世尊。但菩薩摩訶薩。分別三世眾行所趣耶。爲聲聞辟支。亦有此行乎。佛告劫賓菟。從信地見地。乃至三耶三佛地。皆

有三世無量無限不可思議。眾行所趣便受名號。是時長老劫賓菟白佛言。世尊。云何從信地見地乃至三耶三佛地。皆有三世無限無量不可思議。眾行所趣得受名號耶。佛告長老劫賓菟。汝欲廣知如來至真等正覺分別三世眾行所趣。今當一一敷演其義。從信地見地薄地無婬怒癡地。從須陀洹乃至三耶三佛。皆悉分別三世所趣。云何菩薩摩訶薩。從信地見地薄地無婬怒癡地。分別三世眾行所趣。於是族姓子。若善男子善女人。以信解脫得根力覺意八直行盡。有時成就。有時不成就。如此等人或在聖地。或

在凡夫地。從不退轉。乃至一生補處。是謂菩薩摩訶薩。永離凡夫。受如來決。是謂族姓子菩薩摩訶薩。從信地。薄地。無婬。怒。癡地。各各有別。是時長老劫賓菟。白佛言。世尊。云何菩薩摩訶薩。從信地。乃至無婬。怒。癡地。或在聖地。或在凡夫地。佛告長老。劫賓菟。若有善男子。善女人。從初發意。求無上道。身處現在。聞過去法。便不信樂。而捨之去。何以故。本無信樂。故有狐疑。中道退還。不至究竟。爾時弊魔。波旬。則得其便。化作佛形。往至菩薩所。勸進菩薩言。善男子。知不乎。我前所說。非如今說。是汝應聞。未來法。應得受決。今乃

聞吾說過去法。唐勞其功。不成果報。汝何不速捨本
意。更發宏誓。然後乃成無上等正覺。菩薩聞之心懷
猶豫。卽便退轉。在凡夫地。是謂菩薩摩訶薩於三世
法不獲無上正真等正覺。佛復告長老劫賓菟云。何
菩薩摩訶薩。分別三世眾行所趣。牢住聖地而不退
轉。於是族姓子。若有菩薩摩訶薩。從信地乃至無婬
怒癡地。身處現在。聞過去法。眾行所趣。不疑不難。無
所畏懼。心卽開解。霍然大悟。便聞如來授其名號。當
爲無上正真等正覺。爾時弊魔波旬。化作佛形。來至
菩薩所。語菩薩言。善男子。知不乎。我前所說是今所

說非。若能變悔從吾教者。便成無上正真等正覺。菩薩聞之心。遂歡喜。將非波旬化作佛像來沮我意乎。心如金剛不可壞敗。如此善男子善女人。離凡夫地。恆在聖地。是謂菩薩摩訶薩。聞過去法。心不退轉。佛復告長老劫賓菟。如汝所問。從須陀洹乃至三耶三佛。分別三世眾行所趣。或在凡夫地。或在聖地。於是族姓子。若有善男子善女人。以現在身聞過去法。應從過去而得信解。反從波旬說邪徑道。善男子爲知不乎。過去已滅。眾行無本。十方世界空寂無形。何不求方便發宏誓心。如是行者得佛不久。菩薩聞之便

懷猶豫。我今所行將非如是乎。卽捨本願退菩薩行。方欲修習隨魔言教。是謂菩薩摩訶薩。於過去法便有退轉。佛復告長老劫賓菟。如汝所問菩薩摩訶薩。已得聖地離凡夫地者。善思念之。於是族姓子。猶如有人身處現在聞過去法。心不恐懼無所疑難。波旬復來壞敗菩薩言。我所說者權詐合數非眞實法。汝今捨前本心。更發無上至眞等正覺。成如來道。正爾不久。菩薩聞之心自念言。吾已受決在無上道。今此非佛是弊魔波旬耳。便捨之去。不與從事。是謂菩薩摩訶薩。離凡夫地。牢住聖地。爾時世尊與劫賓菟。而

說頌曰

如來等正覺	分別三世空	永離諸縛著
乃應賢聖地	如來授其決	稱國土名號
不爲魔所壞	無能移動心	從億百千劫
定意不錯亂	自然得覺悟	乃應如來慧
八等正眞道	運濟諸苦厄	不戀諸財寶
恆與身命諍		

爾時世尊與劫賓菟說此偈已。時座上有七億眾生。聞說三世平等正法言教。皆發無上正眞道意。爾時座上復有無量眾生。心猶未悟。各有狐疑。內自思惟。

今日如來所說言教演三世法受決成佛各有前後。十方諸佛亦當說此三世法不乎。爾時世尊知彼眾會心中所念。佛便放眉間相光明普照十方無量恆沙刹土。一一光明有百千億恆沙刹土。一一刹土有百千億蓮華。一一蓮華有百千億摩尼珠。一一摩尼珠現百千億七寶講堂。一一講堂現百千億七寶高座。一一高座現百千億如來至眞等正覺。一一如來盡說菩薩三世眾行所趣六度無極。爾時眾會盡見十方無量世界奇特異變歎未曾有。各各白佛言。世尊。甚奇甚特。未曾所見未曾所聞。今日如來至眞等

正覺放此光明。普見諸佛所行法則。或見眾生在如
來前而受決者。或見眾生成聽受法者。或見眾生成得三
十二相八十種好莊嚴身者。如是眾會所見不同。一
切十方諸佛世界。興致供養。香華繒綵徧滿三千大
千世界。爾時世尊觀察眾生心中所念。復以神足感
動十方無量世界。請諸如來至眞等正覺。演說三世
平等正法。東方去此八江河沙。有佛土名曰思惟。佛
名無念如來。至眞等正覺。十號具足。一跏趺坐徧滿
三千大千世界。卽於大眾而說頌曰

過去眾行趣 不見生滅本 解脫應受決

乃應賢聖地 法性離諸有 不造三世塵
勇猛超眾行 如華自然敷 如來現教戒
普潤有行類 清淨如明珠 心堅如安明
諸佛功德具 永離諸更樂 防制塵欲愛
自然無所染 佛法實奇特 二乘所不及
權智現眾變 具五分法身 我亦無師受
不從有爲學 沐浴甘露淵 解脫莊嚴身
南方去此八江河沙有佛土名曰莊嚴佛名嚴淨如
來至眞等正覺十號具足一跏趺坐徧滿三千大千
世界在大眾中而說頌曰

今日十方佛	普現神足變	各說三世法
究盡如來業	一相本無形	深入無邊涯
以法講授人	如空無所念	法鼓震大千
十善功德具	拯濟下劣人	永離生死海
諸佛所以現	變化不可量	因緣成道果
乃應賢聖地	十方刹土集	各說三世法
自然逮正法	定意現在前	一一諸毛孔
放百千光明	演說諸道教	消滅三毒本
西方去此八江河沙	有佛土名淨復淨	佛名越淨如
來至真等正覺	十號具足	一跏趺坐徧滿三千大千

世界在大眾中。而說頌曰。

眾生性若干 不觀解脫慧 三世法常住

起滅如法性 賢聖入定觀 分別十二緣

七處觀三法 悉歸真如性 不願樂生天

亦不僥倖法 是爲明三世 常念擇善友

種法明爲慧 最爲第一義 分別有無想

故號人中尊 諸法各有性 所行悉歸空

如人測度空 先當分別身 瞻覩如來顏

諸法自然足 口演八種音 度人無有量

北方去此八江河沙。有佛土名曰化成。佛名無染如

來至眞等正覺。十號具足。一跏趺坐徧滿三千大千世界。在大眾中。而說頌曰。

四大本無性	自生自然滅	我不造彼緣
物物無所有	無著宣解脫	牽引示甘露
恣人本所願	各令獲果證	吾昔行施度
統領十方界	七覺自然寶	充滿一切人
畱教化眾生	不念四無想	永離八不閑
恆與賢聖俱	本從三達智	聞此三世慧
今離三垢塵	受決三世尊	行施未曾悔
專意離顛倒	諸在邪徑者	示之以正道

東北去此八江河沙。有佛土名曰忍慧。佛名香盡。如來至真等正覺。十號具足。一跏趺坐徧滿三千大千世界。在大眾中。而說頌曰

法性自然生 無形不可覩 習聖禁戒律

無數非有數 住本亦無住 尋究本無形

甚深難測度 乃應在聖地 分別現在法

不染空無相 過去生已盡 得離三世患

身爲眾患器 漏出諸不淨 能捨入正慧

漸至無爲道 意正不染邪 不捨大道心

心淨如鍊金 趣道亦不難 人生在五道

分別內身觀 三世爲何從 令人懷愚惑
東南去此八江河沙。有佛土名賢聖普集。佛名觀世
苦如來至眞等正覺。十號具足。一跏趺坐徧滿三千
大千世界。在大眾中。而說頌曰。

諸佛觀一切	三世空無相	慧斷愛欲本
乃應賢聖地	造立勤苦行	供養恆沙佛
眾智一切具	故號人中雄	信爲甘露法
不生二見心	在眾如師子	所說震十方
生死諸穢濁	根本不可尋	了達三世患
親近如來律	夫欲求佛道	慧實爲第一

焚燒狐疑叢 自然無所念 佛遊無量境
慧光之所照 淨除一切法 分別三世行
西南去此八江河沙有佛土名無量藏佛名忍慧如
來至真等正覺十號具足一跏趺坐徧滿三千大千
世界在大眾中而說頌曰

念持諸法本 緣想不可壞 行至自然固
乃應在聖地 諸佛行方便 功勳化眾生
菩薩修宏誓 四等無增減 增上無爲道
清淨無所染 徧布智慧空 消滅三世患
賢聖在世化 令修止觀法 一一分別慧

乃應賢聖道 三世本性空 念想不思議
生滅更互興 入定乃得除 不著三界有
爾乃獲無盡 爲人演威儀 永獲安隱處
西北去此八江河沙。有佛土名曰賢善。佛名賢柔如
來至眞等正覺。十號具足。一跏趺坐徧滿三千大千
世界。在大眾中。而說頌曰

如來現權慧 統攝十方界 分別三世空
乃應賢聖行 法界不可量 如空無窮盡
得佛定法忍 不興二見心 吾昔得受決
分別內外空 今自致正覺 得離三世苦

如來廣長舌 百福自嚴飾 蠲除思想心
至誠無二業 佛爲眾行本 演暢十二門
自意成道跡 不復由五道 猶如仰射空
勢盡還復墮 宣暢三世法 無量不可窮
上方去此八江河沙。有佛土名曰吉祥。佛名行盡如
來至真等正覺。一跏趺坐徧滿三千大千世界。在大
眾中。而說頌曰

過去諸賢聖 頌宣正真典 不染名色法
乃應賢聖律 菩薩本發意 上修如來教
染法無增減 不見解脫人 徹聽無量世

分別眾生根 專一思惟一 成就有無法
無相非有相 不念三世識 觀了無所有
得號人中尊 一切諸法本 因緣合會成
思惟無形法 空寂本無形 十住道地法
心念不退轉 一行成正覺 無復生老死
下方去此八江河沙有佛土名曰極深佛名寶聚如
來至真等正覺明行成爲善逝世間解無上士道法
御天人師號佛世尊一跏趺坐徧滿三千大千世界
在大眾中而說頌曰

忍智修道果 永離三惡界 自淨復淨彼

乃應賢聖法 爲說無上道 周旋無有方

執權盡諸行 度人無懈怠 遭遇賢聖樂

聞法信受樂 度人斷垢樂 泥洹永寂樂

我行過三界 遠離惡部業 得親善知識

聞法日增益 超越三界表 神足遊虛空

無像如有像 愚者所修習 六度大乘法

忘已萬物盡 得昇十住地 故愍復來化

爾時長老劫賓菟聞十方佛三世之法眾行所趣心
開意解霍然大悟卽從座起頭面禮足還復本位有
無央數諸天人民龍天鬼神健沓愁阿須倫伽畱羅

眞陀羅摩休勒人及非人。皆發無上正眞道意。復有
無數諸天人。聞佛演說三世法本。皆歎佛德深義
無量。諸佛法身不可沮壞。亦非羅漢辟支佛所及。是
時諸人悉皆願樂。分別身中內外三世。進趣道場。逮
不退轉。

清淨品第三十三

爾時長老邠耨文陀尼子白佛言。世尊。今聞如來至
眞等正覺說三世法。諸天人。人民八部鬼神。皆興供養。
宿衛菩薩摩訶薩。進成佛者。當來過去現在諸佛。演
說三世分別智慧。然熾一切諸法所生。復以神足道

力所化。感動三千大千世界。修行執心不捨本願。清淨國土淨除眾生跡。是時長老邠耨文陀尼子復白佛言。世尊。若有菩薩摩訶薩。修習本無一相之法。內自思惟分別身想。內外清淨不生染著。云何菩薩摩訶薩。內自思惟分別身想。內外清淨。於是族姓子。若有善男子善女人。行六度無極。諸佛所行。一切諸法。悉皆清淨。云何諸法。一切清淨。於是善男子善女人。分別三世悉無所有。不見成就三乘道者。從須陀洹乃至如來至真等正覺。皆修三世清淨之行。內自觀身分別識想。有時清淨。有時不清淨。云何菩薩摩訶

薩。有時清淨。有時不清淨。於是族姓子。若善男子。善女人。分別三向空。無相願。不見吾我。我人壽命。一切諸法。從須陀洹。乃至菩薩摩訶薩。所說清淨。復次。邠耨文陀尼子。無學。無著。無所生滅。分別空觀。三無學法。有時清淨。有時不清淨。云何三無學法。有時清淨。有時不清淨。於是族姓子。於未來中。分別一切諸法。所修正法。一一思惟。有覺。有觀。正受。三昧。有時清淨。有時不清淨。邠耨文陀尼子。白佛言。世尊。云何無學。無著。無所生滅。分別空觀。三無爲法。有時清淨。有時不清淨。佛告邠耨文陀尼子。若有無學。學人。分別未

來一切諸法。永除斷滅。不興塵勞。復以此法廣及眾
生。是謂有時清淨。復次善男子。善女人。所修行人。習
意欲斷。未來塵勞。永不使起。是謂有時不清淨。如是
邠耨文陀尼子。於三無學成就一法。復次邠耨文陀
尼子。無學學人。分別現在一切諸法。有覺有觀。正受
三昧。永使斷滅。不生塵勞。是謂有時清淨。初習行人
於現在法。分別思惟。有覺有觀。正受三昧。永使斷滅。
是謂有時不清淨。如是邠耨文陀尼子。於三無爲法
有時不清淨。佛復告邠耨文陀尼子。或時無學學人。
於是過去法。分別一切諸法所生。一一思惟無覺無

觀。永使斷滅不生塵勞。如是成就三無爲法。是謂有時清淨。若修行人。分別思惟現在諸法無覺無觀。亦使斷滅不生塵勞。是謂善男子。有時不清淨。三世分別三有爲法。亦復如是。佛復告邠耨文陀尼子。無學人。復當分別三向法性。皆悉清淨而無所有。云何無學。學人於三世中。分別三向而無所有。於是無學人。於未來法。分別一切諸法所生。有時清淨。有時不清淨。是謂族姓子。於三有爲法。成就一法。佛復告邠耨文陀尼子。所修學人。復於未來。分別一切法。諸法所生。皆空。皆寂。而無所有。永使斷滅。不興塵勞。是謂

族姓子有時清淨。有時不清淨。佛復告邠耨文陀尼子。無學學人。於現在法復當分別無願正行。有時清淨。有時不清淨。亦使斷滅不生塵勞。是謂於有爲法。有時清淨。有時不清淨。佛復告邠耨文陀尼子。所修行人。於現在法思惟分別無相正受。有時清淨。有時不清淨。亦使斷滅不生塵勞。是謂於三無爲法。有時清淨。有時不清淨。爾時邠耨文陀尼子復白佛言。世尊。唯此三空三向。有時清淨。有時不清淨耶。頗有諸法。有時清淨。有時不清淨乎。佛告邠耨文陀尼子。如是如是。族姓子。如汝所問。一切諸法。有時清淨。有時

不清淨。從須陀洹上至如來至眞等正覺。有時清淨。有時不清淨。從四意止四意斷四神足五根五力七覺意八賢聖行。有時清淨。有時不清淨。爾時邠耨文陀尼子白佛言。世尊。云何有時清淨。有時不清淨。佛告邠耨文陀尼子。汝欲聞從第一義。有時清淨。有時不清淨耶。爲欲聞三世諸法。有時清淨。有時不清淨乎。邠耨文陀尼子白佛言。世尊。願樂欲聞從第一義。有時清淨。有時不清淨。佛告邠耨文陀尼子。一切諸法。無數。非有數。亦不住。亦不住。是謂於三世法。而得清淨。若有善男子。善女人。亦不見住。亦不見不住。

於住想著生染汙心者。是謂不淨。菩薩宏誓徧度一切眾生之類。雖度眾生不懷妄想。是謂清淨。若復生意興想著者。是謂不淨。現智慧光除去闇冥。是謂爲淨。於中便生想著。是謂不淨。導引眾生永處無爲。是謂爲淨。見有所度生染汙意。是謂不淨。一意一向趣無爲道。亦使眾生同己所得。是謂爲淨。而自稱說我有所度。是謂不淨。道在人心隨類教化。精進勇猛不懷懈怠。是謂爲淨。所修勤力心不退轉。然不想著欲成無上正眞之道。是謂不淨。分別諸行空無所有性本自然。是謂清淨。復自分別不斷望求。是謂不淨。無

數身行皆知爲空。不生想念有所成辦。是謂清淨。自
歎功勞染著身法。是謂不淨。口所演教無有邊涯。亦
不自念有無之道。是謂清淨。能捨一切進修威儀。欲
得成無上正眞之道。是謂不淨。分布文字總持諸法
強記不忘。是謂清淨。不見文字出生諸法。不信空慧
成道教者。是謂不淨。一切諸想皆歸於空。是謂清淨。
本無名號爲作名號。復欲於中成無上道。是謂不淨。
痛想行識無著無縛。推求境界亦無所有。是謂清淨。
識神無爲非眼界所覩。方欲慇懃知其窠窟。是謂不
淨。一切諸法不見受入。方欲求覓諸道出生。於中不

惑成道教者。是謂清淨。雖生諸法。意有進退。懷三道心。是謂不淨。精勤法界。習智受證。是謂清淨。知諸佛法。一而不一。復無起滅。虛寂無形。是謂清淨。十力所住。不遠十地。進修明慧。化諸境界。是謂清淨。觀察諸法。永離三毒。是謂清淨。大乘正法。超越生死。是謂清淨。諸法無著。自生識想。是謂不淨。諸法無教。爲生六度。是謂清淨。知轉輪法。爲立處所。是謂不淨。修習諸法。盡同一相。是謂清淨。諸法無生。爲說出生。起二見心。是謂不淨。如來達聖。轉大法輪。空性無形。永處泥洹。是謂清淨。不見諸法。不見泥洹。有此二心。欲成無

上正眞之道。是謂不淨。三世諸法有上中下。以次受證。無所戀著。是謂清淨。於中起想見受證者。是謂不淨。本無增減。悉歸於空。是謂清淨。設見增減分別諸法。是謂不淨。諸法無生受無生證。是謂清淨。設見諸法有所出生。爲起識想記其名號。是謂不淨。不見諸法麤澀柔軟。是謂清淨。若復分別見有麤澀柔軟者。是謂不淨。諸法無上不見動轉。是謂爲淨。設復分別見動轉者。是謂不淨。諸法永寂不可護持。是謂爲淨。設復分別受持諸法。斯是善法。斯非善法。是謂不淨。一切諸法無有內外。解知身法悉歸於空。是謂爲淨。

若復分別內外諸法。此是內法。此是外法。有此二心者。是謂不淨。一切諸法。聾不聞聲。是謂清淨。若復分別諸法。有聾有聲。起二見者。是謂不淨。諸法成就一切道品。是謂爲淨。見有出要見道果者。是謂不淨。百千萬行。無有窮盡。悉歸虛空。而無想念。是謂清淨。見有漏盡。斷結除縛。是謂不淨。一切諸法。皆空無形。生者自生。滅者自滅。亦不見生。亦不見滅。是謂清淨。若復分別。見有起滅。是謂不淨。一切諸法。亦無師授。自然覺悟。成八等行。是謂清淨。若復見有從師諮受。分別高下。是謂不淨。忍心不起。得柔忍心。斷諸結。使永

息不起。是謂爲淨。若能思惟不計本行。有起有滅。便有二心。分別諸法。是謂不淨。夫欲求道親善知識。是謂爲淨。設復思惟。意懷懈怠。中有退心。是謂不淨。本末轉法音響教授。是謂爲淨。設有見轉大法輪音響受教。是謂不淨。未有諸法十二緣起。尋能分別捨而不從。是謂清淨。見有然熾滅結使者。是謂不淨。一切諸法甚奇甚特。去不可窮。來亦不盡。接度眾生。得至彼岸。是謂爲淨。若復見度彼岸者。是謂不淨。諸法未來。思惟永滅。是謂清淨。見有未來有起滅者。是謂不淨。現在分別八十四行。莊嚴如來威顏容色。是謂爲

淨。見有現在起愛樂心染著容色者。是謂不淨。諸法無生不見造作。自然興律應度無極。是謂爲淨。若見造作一切諸法。應禁戒律興此心者。是謂不淨。一切諸法無有形像。悉歸無爲應無上道。是謂爲淨。設復見彼形色之變。自生念想。是謂不淨。一切諸法獨而無侶。諸法無說不見言教。是謂爲淨。見有說法有言教者。是謂不淨。諸法不起不染三世。是謂爲淨。見三世法有起滅者。是謂不淨。諸法無倚不著三界。是謂爲淨。見有依倚著三界者。是謂不淨。諸法無身唯法爲體。是謂爲淨。見有法身度知見者。是謂不淨。當來

過去現在諸佛。去亦無數來亦無盡。所說道教各無
參差。是謂爲淨。若復宣說三世諸佛言教增減者。是
謂不淨。諸法無形亦無色像。是謂爲淨。復以諸法造
色像者。是謂不淨。諸法不可覩見寂然虛空。是謂爲
淨。若復宣說諸法可見者。是謂不淨。諸法無量不相
違背。是謂爲淨。見有諸法有量有數者。是謂不淨。諸
法無境亦無刹土。教化眾生淨佛國土。是謂爲淨。若
見眾生淨佛國土化眾生者。是謂不淨。諸法平等泥
洹一性。是謂爲淨。見有受果成就道者。是謂不淨。諸
法出要不念法報。是謂爲淨。見有出要受法報者。是

謂不淨。諸法盡生永離形色。是謂爲淨。見有離生受形色者。是謂不淨。諸法常定初不變易。是謂爲淨。見有動轉變易不住者。是謂不淨。諸法不可覺知。亦無有人能尋迹者。是謂爲淨。見有形迹可尋追求者。是謂不淨。佛復告邠耨文陀尼子。若有菩薩摩訶薩。執持修行淨不淨者。現世便得無盡慧三昧正受定意。便能超越諸佛境界。從一佛國至一佛國。教化眾生淨佛國土。一一分別諸法所趣。以四等心普潤一切。以漸教授各令得度。隨本所願各使充足。復以神通宿命智觀。審知根本淨其行迹。或時菩薩入正受三

高有下。何以故。菩薩得此定意。正受三昧者。神足自由。隨意所念。不於諸法有增減心。若善男子。善女人。得此定意者。堪任周旋教化眾生淨佛國土。從一佛國至一佛國。禮事恭敬諸佛世尊。復以善權方便。與作善知識。微說道教。至無爲道。亦使眾生立信堅固。相視如父如母如兄如弟。各無異心。展轉共相教授。隨意所念。盡成道果。是謂菩薩摩訶薩入此定意。便能具足一切諸法。爾時世尊與邠耨文陀尼子。而說頌曰。

一切諸法本 所歸門不同 各各境界異

所行法亦然 我說清淨道 眾行不可盡

今麤與卿說 淨與不淨行 諸佛不可量

言教亦無盡 今麤說正要 分別諸道果

諸佛義廣大 空慧非有異 彼此具成就

悉歸解脫門 眾智根門淨 諸佛所嘉歎

斷念除眾想 具足眾智說 諸佛所演教

令知恩愛患 忘有不處有 故得人中尊

佛本積宿行 自致無上尊 具足菩薩法

演布大乘業 眾智現在前 盡知眾生源

分別無生滅 究竟無上道

是時世尊復告邠耨文陀尼子。若有菩薩摩訶薩。便得具足諸度無極。分別法界微妙之行。智慧增益。演布道訓。皆使周徧。得四無畏。眾智自在。復得出要。度不度者。心念諸法。皆現在前。禪智滿足。念識爲食。法界爲身。總持爲行。恆常周旋。諸佛國土。令諸眾生皆悉具足。成就佛道。分別諸定。行善權方便。諸佛所行。悉過其量。從眾生心所念善惡。皆能分別隨類而化。從無央數億千萬劫。一心入定。不毀正法。無他異想。爾時世尊復與邠耨文陀尼子。而說頌曰。

吾昔求佛道 未受菩薩別 經歷億百千

禪定不移動 究竟一切法 不生染著想
從是得作佛 得爲人中尊

一切諸法不可思議。眾生境界亦復如是。若復善男子善女人。入無形三昧。徧觀三千大千世界。應度眾生亦當覺知。無限無量不應度者亦當覺知。三世起滅亦當覺知。如是邠耨文陀尼子。菩薩摩訶薩。得此定意者。清淨不清淨行。

釋提桓因問品第三十四

爾時釋提桓因白佛言。世尊。如來至眞等正覺。說一切諸法皆使清淨。及諸無量恆沙佛土諸佛世界。清

淨如空皆無所有。今復聞說盡當覺知一切諸法。云何於諸法之中無形不可見。而欲覺知一切諸法乎。爾時世尊告釋提桓因。善哉善哉。拘翼。乃能於如來前而問斯義。今當與汝一一引譬。智者以譬喻自解。猶如幻師化作萬物。國土城郭宮殿屋室飲食牀臥貧賤富貴名號。姓字父母兄弟僕從。給使復幻作人左右衛從。如此幻師所見化法。或經劫數供給所須。衣被飲食醫藥牀臥具。受者實受。施者實施。如卿觀之。爲實有不乎。是時釋提桓因白佛言。無也。世尊。何以故。一切諸法皆空。皆寂。幻化非真。愚者染著。便致

顛倒。無來無去。無著無縛。無盡無不盡。幻化無形。亦不可倚。佛告釋提桓因。如是如是。拘翼。菩薩摩訶薩。亦復如是。得如幻三昧。自然定意。分別一切諸法所起。無緣無著。不見成敗。化導一切眾生之類。不見有度。不見無度。度無所度。化無所化。皆空皆寂。復無生滅。何以故。如幻定意。正受三昧。甚深微妙。無有邊崖。如幻境界。不可思議。唯有菩薩摩訶薩。徧能觀察。乃得達了。亦不見生。亦不見滅。亦復不見。當有生者。亦復不見。有已生者。何以故。菩薩所入。不可思議。非是羅漢辟支所知。菩薩所度。猶如虛空。虛空所度。無形。

無像。如幻三昧亦復如是。亦無東西南北四維上下。拘翼當知。今當與汝引喻。猶如凡夫本無形色。未能分別禪定根本。生亦不知生。不生亦不知不生。亦復不知當生已生。未能究竟心所念法。亦不見住亦不見不住。亦不見盡亦不見不盡。何以故。心本無形。不可倚著。亦非三乘所能思議。拘翼當知。菩薩摩訶薩亦復如是。入此如幻三昧。一切諸法皆現在前。無有邊際。亦無境界。有亦不見。有無亦不見。無。何以故。菩薩境界不可思議。所行法則徧滿三千大千世界。拘翼當知。今當與汝引喻。猶如娑竭龍王意欲念雨。若

在六天便雨甘露。若在四天王上能雨七寶。難陀優鉢難陀龍王及摩那斯龍王。雨六天上便雨衣被服飾香瓔華鬘。若雨第四天上自然飲食各令充足。云何拘翼。此龍所作爲實有不乎。爾時釋提桓因白佛言。無也。世尊。何以故。但彼諸天功德。乃使諸龍王等獻奉供養。佛復問釋提桓因。云何拘翼。七寶宮殿衣被服飾。皆龍所降。本無所有。今復自說諸天福德。故使諸龍降雨諸寶。諸龍及寶物爲有爲無。釋提桓因白佛言。世尊。義說法說亦不有龍亦無寶物。何以故。一切萬物皆空皆寂。我身及天亦無所有。龍所降雨。

亦無有雨。亦不見盡。亦不見不盡。愚惑之人。自生識想。佛告釋提桓因。如是拘翼。菩薩摩訶薩。入如幻三昧。盡觀一切諸法。諸法所生。亦不見生。亦不見不生。見諸法門有盡無盡。見幻化法門有盡無盡。復見無量無限教化法門。復見無量無限諸佛世尊遊步法門。復見無量無限諸根羅網。見入法門。復見無量無限諸佛世界成敗劫燒。心意廣大超越諸佛所行法門。如是拘翼。當知諸法無生無滅。但以眾生自生識著。未入定意觀察人心。不解空慧而獲無生。爾時世尊與天帝釋。而說頌曰。

出要入道門	分別三世行	展轉由五道
破有不處有	菩薩如實觀	分別慧明道
本我所造行	如今乃剋獲	世界皆如空
彼我無二想	恭敬於諸佛	今獲無頂相
顏貌如優曇	廣長覆面門	不生亦不滅
得爲天人尊	拘翼當念本	眾行不缺漏
勇猛不懈怠	究竟本末空	於坐不起想
不見有時立	不倚眾行本	故號爲沙門
實無有泥洹	亦無五道趣	菩薩所遊處
權化見有生	從無央數劫	無欲無所貪

初無有悔心 況當有倚著 自從是已來
修善不離本 一行成佛道 得轉無上法
倚託生死中 教化無數人 令知無生法
自然應道教

爾時世尊與釋提桓因說此偈時。無數百千諸天人。卽於座上得無生忍。復有無數諸天龍神。皆發無上正眞道意。佛復告釋提桓因。若有善男子善女人。及四部眾比丘比丘尼優婆塞優婆夷。受持諷誦此如幻定意無盡法者。便能具足無量法藏。云何爲無量法藏。欲具足如來辯才具足者。當學此如幻定意。

無盡法藏。復次拘翼。若善男子善女人。欲得究竟覺
知佛慧者。當學此如幻定意無盡三昧。復次拘翼。若
善男子善女人。欲得遊至諸佛世界親近佛者。當學
此如幻定意無盡三昧。佛復告釋提桓因。若有善男
子善女人。欲得轉無上法輪如佛所轉在大眾中而
無畏者。當學此如幻定意無盡法藏。復次拘翼。若善
男子善女人。欲得諸佛百千總持自娛樂者。當學此
如幻定意無盡法藏。佛復告釋提桓因。若善男子善
女人。欲得一切眾生願者。淨佛國土神足變化者。當
學此如幻定意無盡法藏。復次拘翼。若善男子善女

人欲使諸佛世界無量眾生無量性行盡同一趣者。當學此如幻定意無盡法藏。復次。拘翼。若善男子。善女人。欲使無量世界諸佛刹土合爲一者。色如黃金。當學此如幻定意無盡法藏。何以故。一切諸佛皆從此生。過去諸佛皆從此如幻定意得成無上正眞之道。現在十方諸佛世尊。亦皆從此如幻定意無盡法藏。得成無上正眞之道。當來無數恆沙諸佛。亦當習此如幻定意無盡法門。佛復告釋提桓因。我今與汝引譬。智者以喻自解。猶如猛火光炎赫熾。復更益薪。大風所吹。遂復熾盛。燒焚山野。無有休息。要盡草木。

火勢乃滅。菩薩摩訶薩亦復如是。發心起學濟度眾生。分別思惟法界所趣。乃至無數恆沙剎土。復觀虛空眾生根源。復自思惟恆沙剎土無數世界眾生心意所念根源。一一分別復自計校。吾以何智具足彼願。一一分別已法所趣。當轉何法云何教化。爾時菩薩復自思惟。我本發願具足諸善徧化眾生充足我願。復自具足威儀禮節。轉入三世根本之行。自念轉法入不思議。如是校計應度不度。一切世界或有或無。復更周旋諸佛世界。無限無量不可思議。與共周旋立功德業。不斷正法要誓所趣。行大慈悲執宏誓。

心。究盡生死心無缺減。何以故。一切眾智皆悉具足。故復觀眾生心意所念。應由何路而得將導。恆念眾生如母愛子。是故菩薩摩訶薩。執此勤苦無量之心。復入無量無限三昧。觀察世界不捨本誓。如是廣大無限之用。爾時世尊與釋提桓因。復說頌曰。

菩薩初發心 宏誓甚廣大 要盡虛空際
所願乃具足 當度眾生時 不見有所度
解知三世本 因緣不久停 心正不動傾
正念應道教 恆求善方便 以次至解脫
心不懷怯弱 晝夜思惟法 一行得成佛

亦不從師受 身本心爲行 道力知清淨

出家在空野 入定身不動 然熾一切法

普照十方界 自修宿命智 乃知眾生根

爾時世尊與釋提桓因說此法時。一切眾會莫不欣然。皆發無上正真道意。

本末行品第三十五

爾時有天子名眾首瓔珞。卽從座起。偏露右臂。齊整衣服。諸根寂靜。從先佛已來常修梵行。三處已盡。果願已辦。右膝著地。長跪叉手。前白佛言。唯然世尊。所居方界。去此極遠。願欲所問。若見聽者。敢有所啓。佛

告眾首瓔珞菩薩。善哉善哉。族姓子。爲眾導首。發開童蒙。豎大法幢。演慧光明。有所疑問。今正是時。如來當爲一一分別。隨問還報。使得開解。爾時眾首瓔珞菩薩卽白佛言。世尊。頗有一生補處菩薩。更不進修無上正眞之道。得成佛不乎。頗有一住立根德力菩薩。大士乃至八地菩薩。大士更不進修無上正眞之道。頗有諸天眾行具足。立不退轉。諸根具足。不復人身。得成佛不乎。唯然。世尊。當以方便而發遣之。爾時世尊告眾首瓔珞菩薩曰。善哉善哉。族姓子。乃能於如來前作師子吼。諦聽諦聽。善思念之。從初發意。乃

至成佛。菩薩所行諸法不同。或有菩薩摩訶薩。彈指之頃。求菩薩心。卽成無上正眞之道。不經日夜。或有菩薩。從初發意。不捨宏誓。乃至六住。進求佛道。便有退轉。而不成就。或有菩薩。從初發意。乃至七住。進趣成佛。不經八地。爾時眾首瓔珞菩薩問。云何菩薩摩訶薩。彈指之頃。發菩薩心。卽成佛道。不經日夜。云何菩薩。從初發意。乃至六地。有退轉者。而不成就。云何菩薩。乃至七住。進趣成佛。不經八地。爾時世尊告眾首瓔珞菩薩曰。若有菩薩摩訶薩。彈指之頃。求菩薩道。不經日夜。而成佛者。此善男子。善女人。諸根具足。

未曾經歷生死之難。或從何會一旦修天來生此間。或從無怒佛土來生此間。或從無量佛土一聞如來說本末空無生滅道。便成無上正眞之道。或有菩薩摩訶薩。眾行具足。得如來明慧法觀。復修如來念佛念法念比丘僧念天念安般念死亡念修四意止四意斷四神足五根五力七覺意八賢聖道。親善知識。於婬怒癡不大。慇懃增益善本。亦使眾生具足善根。雖在六地心生猶豫。咄我將非七住菩薩乎。或復自念我審然不疑。復爲僞化菩薩。壞敗此菩薩言。汝今已得本末空慧。此菩薩聞已歡喜踊躍。我今聞神德。

菩薩所見證明。今當得無上正眞之道。期則不久。便於六住退轉。乃墮聲聞辟支佛道。佛復告眾首瓔珞菩薩曰。若善男子。若善女人。已在六地具足菩薩行。復自思惟。我今審然在八住地。當成無上正眞之道。亦復不久。親近善知識。方便爲說八住行法。善男子。知不乎。汝今已在八住地中。莫自貢高。輕餘菩薩。如是善男子。當成無上正眞之道。亦復不久。菩薩聞之。歡喜踊躍。不能自勝。便隨善男子。教在閑靜處。一心自念。如是。彼菩薩卽在八住行中。立不退轉。施爲佛事。經歷劫數。成佛不久。佛復告眾首瓔珞菩薩曰。若

有善男子善女人行菩薩道。復爲異菩薩所見勸勉。汝今成佛教化眾生。亦復不久。菩薩自念。我無此行。云何當成無上正眞之道。將非此人使我不成究竟。執心牢固。便得進前。在七住地。得不退轉。是謂菩薩摩訶薩。在六住中。有退不退。爾時眾首瓔珞菩薩問云。何八住菩薩卽得成佛。不經胞胎。有是無耶。佛言。有之。八住菩薩觀一切法如空。如幻。虛寂無形。所行法則亦復如空。欲度眾生。亦無眾生想。往詣十方諸佛世界。聽受無量法教。一切諸佛本無身相。亦當分別內外無形。徧問諸佛。一切諸法。無有厭倦。復當教

授一切眾生捨是就是深入禪定。可坐知坐。可臥知臥。若化眾生不失時節。爲說深法。令眾生類盡得度脫。如是菩薩摩訶薩。具知此行時。便得佛三昧。教化眾生淨佛國土。已淨國土。便入菩薩正要。已入正要。便能出生一切總持法門。已具法門。則能示現辯才無礙。當來過去現在諸佛所演法教皆悉具足。變化無方。諸法成就各無錯亂。能淨一切眾生心垢。便得解脫無礙法慧。十方諸佛皆來擁護。此善男子善女人。成就諸法十力具足。悉無所畏。菩薩如是分別眾生心識所念。一一選擇終不捨之。立一切人使獲本

末空慧無量無限十方世界安處道教種種方面皆有離別。十方世界皆有合會。復於十方無量世界。如來至眞等正覺眾智瓔珞而現在前。復於無量刹土。一一諸佛名號姓字。皆悉分別如一方面。無量諸佛世界分別無量諸佛姓字。十方境界諸佛姓字亦復如是。菩薩摩訶薩。復使十方無量世界或舒或縮。如十方世界已舒已縮。復使無量無限恆沙刹土以智慧力或舒或縮。一一名號復於無量無限見如來面。復以慧力或舒或縮。如是無量無限恆沙諸佛刹土。分別諸佛名號。皆悉分別如是十方諸佛法界。分別

名號然諸佛世尊皆來擁護此菩薩使得成就菩薩
摩訶薩得此大乘意入本末空定不失菩薩威儀法
則徧能觀察眾生根本復能知諸佛心識所念彼菩
薩不當名爲菩薩當名如來何以故解一切法超越
眾行於一切法不懷狐疑行等如來得一切如來正
法或知一生知百千生知阿僧祇無量佛法受持諷
誦成就佛道亦不忘失入一切智不見吾我覺知諸
佛法總持強記亦不忘失彼菩薩觀一切法爲現光
明以智慧光照愚癡冥智不退轉彼菩薩摩訶薩以
善權方便教化眾生無有罣礙彼菩薩已得無量法

耳根清淨聞無盡法。自然應化信而不從。彼菩薩摩訶薩無量無限使眾生身變化非一。或見無央數色還合爲一。復從無色至無數色。使眾生類莫不信解出廣長舌普覆三千大千世界復還爲一。如是教化無央數眾。佛告眾首瓔珞菩薩。若有菩薩摩訶薩十方世界虛空邊際盡能了知此眾行者。便名爲菩薩補如來處。爾時世尊復與眾首菩薩而說頌曰。

十方聞法界 示現眾生路 修行諸佛事

人中菩薩尊 在眾成就道 徧知菩薩行

超越一切行 十力無有礙 諸佛常擁護

面見而在前 稱揚其功德 歎法無有上
菩薩瓔珞經卷第十七

菩薩瓔珞經卷第十八

姚秦沙門竺佛念譯

聞法品第三十六

爾時有菩薩名文殊師利。卽從座起。攝持威儀。前至佛所。長跪叉手。白佛言。云何世尊。名曰聞法。得成無上正眞之道。聞如空等。空無所聞。亦無善惡諸法相。貌。法無形相。云何世尊。言受持諷誦本末空慧。爾時世尊默然不對。時文殊師利復更白佛。夫聞法者。爲有言教。乃得聞法。爲無言教。乃得聞法。爾時世尊默然不對。文殊師利三白佛言。法有生滅。法無生滅。一

切諸佛所轉法輪。爲有轉耶。爲無轉耶。爾時世尊告文殊師利。云何族姓子。一切諸佛皆轉法輪。亦有有轉。亦無無轉。汝今所問。爲問有轉。爲問無轉。時文殊師利白佛言。世尊。今所問者。亦問有轉。亦問無轉。佛言。族姓子。諸佛正法。亦不有轉。亦不無轉。文殊師利復問。云何亦不有轉。亦不無轉。佛言。諸法如空。故無有轉。故無無轉。文殊師利又問。今日如來。爲有轉耶。爲無轉耶。及此諸菩薩眾。爲聞法耶。不聞法耶。佛言。族姓子。諸法清淨。眾會菩薩。亦復清淨。以是之故。亦不有轉。亦不無轉。文殊師利又問。云何有轉。無轉。佛

告文殊師利。眾生無轉。本末空慧。乃謂爲轉。一切眾
會。我身及汝。皆謂無轉。本末空慧。乃謂爲轉。文殊師
利。又問。云何有轉。云何無轉。佛言。有斷無轉。無斷有
轉。生滅無轉。無生滅者。乃謂有轉。文殊師利。又問。云
何有轉。無轉。佛言。有邊際縛著。乃謂無轉。無邊際縛
著。是謂有轉。文殊師利。又問。云何有轉。無轉。佛言。一
切世間見。然熾法。是謂無轉。一切世間不見。然熾法
是謂有轉。文殊師利。又問。云何有轉。無轉。佛言。淨無
量福。福祐眾生。是謂無轉。不見淨無量福。福祐眾生
是謂有轉。文殊師利。又問。云何有轉。無轉。佛言。淨無

量眾生根本成一切智是謂無轉。不見淨一切無量
眾生是謂有轉。文殊師利又問云何有轉無轉。佛言
亦不有轉亦不無轉。故謂有轉無轉。爾時世尊與文
殊師利說有轉無轉時。有八千比丘三千比丘尼。逮
得本末空慧心不退轉。復有無數眾生聞此未曾有
法皆發無上正真道意。於將來世悉皆成佛同一名
號。精進勇猛與我無異。

淨居天品第三十七

爾時世尊與文殊師利說此閻法轉不轉品時。時有
淨居天子乃從過去無量諸佛植諸功德承事供養

諸佛世尊從一佛國至一佛國。通盡法藏。辯才無礙。行大慈悲。得空法性。權現生天。欲度天故。卽從座起。整頓衣服。及諸將從。儼然起立。時彼天子。前至佛所。頭面禮佛。足白佛言。世尊。我等諸天。宿種功福。今得生天。五樂自娛。左右侍從。自然響應。遊戲浴池。快樂難量。爲修何福。得生天上。我所居宮。四十九由延。七寶殿堂。與世奇妙。後有浴池。有七寶樹。七重圍繞。爲修何福。乃獲此德。爾時世尊。告淨居天子曰。善哉善哉。天子。乃能於如來前。而問此義。今當與汝。一一分別。善思念之。過去恆沙諸佛。世尊亦說此義。現在未

來一切諸佛亦當說此微妙之法。云何天子。我今問汝。汝當一一報我。汝所居天前過去者可記不乎。荅曰。不也。世尊。過去諸天其號名字不可稱記。云何天子。汝今此身爲有常爲無常。天子報曰。如我今身是有常法。非無常法。佛復告天子。設汝今身是有常法。過去諸天今爲所在。荅曰。摩滅。佛言。云何天子。過去諸天悉皆摩滅。汝今此身焉得長存。天子報言。過去諸佛皆取滅度。今日世尊何由而生。佛告天子。過去諸佛及我今身。爲同不乎。天子荅曰。不也。何以故。過去諸佛於過去中是過去見。云何過去諸佛皆悉滅。

度。天子又問。爲有三世。爲無三世。佛報天子。有三世名。然三世行異。天子又問。如來今說有過去佛。我則不疑。復說十方現在諸佛。我亦不疑。云何世尊。說有未來佛。世尊報曰。汝今問我所問。爲問過去三世。爲問現在三世。爲問未來三世。天子白佛。我亦問過去三世。現在三世。未來三世。今日但問三世諸佛。云何未來說言佛乎。佛告天子。未來佛者有二因緣。云何爲二。或有過去諸佛如來至真等正覺。行大慈悲。眾相具足。行善權方便。入五道中。教化眾生。不壞法界。復現在俗。或爲梵天。或現釋身。隱佛形像。是謂菩薩。

摩訶薩未來成佛。或有菩薩受如來慧。修行佛事。遊至三千大千佛土。供養承事諸佛世尊。既未成佛。眾相未具。或作天身。或作鬼神。不毀法界。是謂天子。未來成佛。有此因緣。復次天子。過去諸佛世尊。復有二因緣。云何爲二。得師子奮迅三昧。在閑靜處。心無所著。內自思惟十法無量功德。云何爲十。於是菩薩修諸佛世尊念所念法。是謂無盡之行。復次天子。菩薩摩訶薩。分別如來一切諸法。是謂無盡之行。復次天子。菩薩教化眾生。盡趣無上正眞之道。是謂無盡之行。復次天子。菩薩分別無量諸佛世界。淨佛國土。教

化眾生不毀智慧。如所念法而成就之。是謂無盡之行。復次天子。菩薩如佛世尊所行禁戒。修解脫法。因此禁戒教化無量眾生。盡發無上正真之道。是謂無盡之行。復次天子。菩薩觀過去當來今現在諸佛。出要在樹王下降伏魔眾。執心如地不可移動。是時弊魔波旬。作若干變化來恐於佛。或人頭獸身。或獸頭人身。或四眼八眼。至百千眼。或作猿猴虎狼豹來恐於佛。執心如地不爲傾動。是謂無盡之行。復次天子。菩薩於億百千劫。強記總持而現在前。或於一生至百千生。或念一劫至百千劫。其中所行或善或惡。一

一分別悉不忘失。是謂無盡之行。復次天子。菩薩復能分別三世諸行。諸善功德盡現在前。如彈指頃。能使三千大千世界。蜎飛蠕動之類。盡成無上正眞之道。或成羅漢辟支之道。是謂無盡之行。復次天子。菩薩摩訶薩。復憶過去無數諸佛所度眾生身口意行。不壞諸法。演布智慧。廣及一切。是謂無盡之行。如是天子。菩薩摩訶薩。得此師子奮迅定意者。則能具足三世諸法。復次天子。或時菩薩分別十無相法。云何分別十無相法。於是善男子。善女人。內自觀身。分別諸行。諸根純熟。或有善行。或不善行。或時清淨。或時

不清淨。復次天子。若善男子善女人。外觀他人身。一
一分別諸根純熟。諸根不純熟。或時清淨。或時不清
淨。是謂天子一無相行。復次天子。若彼行人內自思
惟攝意不亂。如我所行不違聖典。時諸如來至眞等
正覺。出入經行與身口意相應。懷來法寶轉大法輪。
以無生心教化三世未度眾生。於中便獲自然法輪。
無限無量悉入法律。是謂二無相法。復次天子。若善
男子善女人。發宏誓心徧滿三千大千世界。智慧思
惟亦無窮盡。音響流利無所障礙。分別一切眾生音
響。或以一音報百千萬音。皆演道教。普潤一切眾生。

之類。是謂三無相之法。復次天子。若善男子善女人。轉無上法輪。廣化眾生。皆取滅度。不染三世。諸天人。民。魔。若魔天。所未曾轉。而佛獨轉。是謂四無相法。復次天子。若善男子善女人。於一生中出家學道。鬚除鬚髮。受持禁戒。身既清淨。亦使眾人樂其所樂。是謂五無相法。復次天子。若善男子善女人。性行合空。從空往來。無量無限。終不自爲教化眾生。超卓過空。無所觸礙。是謂六無相法。復次天子。若善男子善女人。於一切眾生獨步無礙。於諸法智演通慧義。坐放光明。普到十方。無量世界。或取滅度。現無常義。或存或

亡。或示相好。或隱相好。於中教化無量眾生。淨佛國土。是謂七無相法。復次天子。若善男子善女人。復有通慧名曰降魔。得此定意者。降伏四魔。愛欲死天魔。使菩薩依倚此法而得成就。欲爲法王。最在前者。先當習此降魔定意。是謂八無相之法。復次天子。若善男子善女人。徧學諸法。深入至要。具足善本。亦使無量眾生得入此要。見菩薩力增長止觀。已盡無盡。無生滅法。雖見相貌。本無相貌。坐臥思惟。惟菩薩眾行。是謂九無相之法。復次天子。若善男子善女人。具足十善之本。云何爲十。身三口四意三。眾法自在不染著。

有樂無量無爲復能樂無量百千定意。一一定意化無量眾生。是謂十無相之法。如是天子。夫習法者當習無法。無行爲。行無觀爲觀。是謂爲上。眾行中妙。一切諸佛之所歎譽。爲行佛事。爲無等侶。爾時天子復白佛言。云何世尊。三世諸佛則無三世。如世尊所說。過去諸佛還至現在。現在諸佛復至未來。法界不定。云何世尊言有三世乎。此義不然。何以故。過去已滅。權還現在。現在未動。復說未來。眾法相違。云何言過去諸佛數如恆沙。當來諸佛數如恆沙。現在諸佛數如恆沙。爾時世尊告曰。善哉善哉。族姓子。今汝所問。

皆承佛威神。令汝得問此義。諦聽諦聽。善思念之。吾當與汝一一分別。天子受教。如是世尊。佛告天子。過去云何爲過去乎。天子白佛。新新生滅。故曰過去。昨色非今色。故曰過去。昨身非今身故曰過去。昨力非今力。故曰過去。爾時世尊復問天子。云何族姓子。身想知爲異乎。天子白佛言。不也。世尊。佛又問。名色更樂爲異乎。天子白佛言。不也。世尊。佛又問。出要至道爲有異乎。對曰。無也。世尊。佛告天子。止止。族姓子。佛藏曠大非汝境界。過去過去。智有限。現在現在。智有限。未來未來。智有限。何以故。一切諸法。法法相生。法

法相滅。本無法者。無過去當來今現在。亦無今世後世善行惡行。亦無賢聖有果證者。是謂族姓子云何言有三世法乎。爾時天子復白佛言。三世名號云何而生何由而滅。佛告天子。生本無生。滅本無滅。一切諸法亦復如是。生本無生。滅本無滅。何以故。性自然空故。爾時天子復白佛言。世尊。今日如來爲在生耶。爲在不生耶。佛告天子。如來身者。於過去未來現在亦不在生。亦不在無生。是故無過去未來現在。天子白佛言。世尊。但如來至眞等正覺。過去未來現在無生。一切諸法盡無生耶。佛告天子。一切諸法皆悉無

生亦不見生亦不見無生。天子白佛。我人壽命眾生根本至六度無極。爲有生耶爲無生乎。佛告天子。起不見起亦不見不起。諸法不可得而自成就。故曰無生。三世諸佛無欲無汙亦無有生亦不無生。故無所起。三昧正受亦復如是。說無所說。故無言教。天子白佛言。四依四道爲有生耶爲無生乎。佛告天子。四依四道本無所生。況今有生當來亦不生。爾時天子白佛言。世尊。淨地性地薄地本無地無姪怒癡地。爲有生耶爲無生乎。佛告天子。有受有取乃至一切諸法。色痛想行識癡愛更樂乃至生老病死。從須陀洹乃至

至無上道亦不有生亦不無生。爾時天子白佛言。世尊云何有生云何無生。佛告天子。得如意度無極者。是故不見有生不見無生。天子白佛云何如意度無極亦不有生亦不無生。佛告天子。從此岸至彼岸。不見眾生有生者有滅者。亦不見窠窟處所。是故亦不見生亦不見無生。天子白佛。一切諸法及如來身。爲在有生爲在無生。佛告天子。亦在有生亦在無生。亦不見有生亦不見無生。是故三耶三佛亦不在有生亦不在無生。佛告天子。若善男子善女人。得此通慧。定意觀了諸法。不在有生不在無生。如來經法亦復

如是不在有生不在無生。何以故。諸法無著無縛亦無解脫。是故降伏四魔。佛復告天子。若有善男子善女人成就智者。則能具足一切諸法。復當修於十法。云何爲十。一者親近善知識。求爲朋友。二者行大慈悲。廣及一切。三者滿足前人隨意所念。四者淨一切界。斷諸結使。五者修清淨道。爲人重任。六者荷負眾苦。不譏彼受。七者教化愚人。訓誨正要。八者教誨愚惑。令信正道。九者與法相應。不譏彼受。十者一心奉法。不與邪部共相參豫。是謂族姓子。若善男子善女人。修持正法。得此定意。便能具足一切諸法。爾時世

尊復告天子。若有善男子善女人恭敬於師。復當修習十無礙法。云何爲十無礙法。一者遊至十方禮事諸佛。是謂族姓子一無礙。二者於諸智慧無縛無脫。念斷滅法。三者於諸苦樂心寂然滅。四者在空閑處。思惟禪定。意不錯亂。五者菩薩法本。七出要道。無有增減。六者一切色相本無所有。不見來處。七者計本無形。不有生滅。解知無常。八者一心入定。道本自然。不著諸法。九者一意一行。與法相應。不相違背。十者亦不在內。亦不在外。自然起滅。如是族姓子。若善男子善女人。分別思惟十無礙者。便能具足一切諸法。

佛告天子。若有善男子善女人。一心念頃。盡能具足一切諸法。當修十法。第一義辯。云何爲十。一者生智。盡智無生滅智。二者四等平均。無吾我想。三者喜安。自守不失四信。四者所言如意不違本願。五者道心牢固。法法成就。所行正見不違本相。六者修六重法。觀本無相。七者怨讎一等。無有是非。八者一向信心。了本所生。九者講授諸法。不有法想。十者金剛定意。不毀如性。是謂族姓子。若善男子善女人。具此十法者。便能具足一切諸法。佛復告天子。善男子善女人。修法十施。亦無施想。便能具足一切諸法。云何爲十。

一者坐樹王下心不移動。二者恆樂閑居不處憤亂。三者修三向定趣泥洹門。四者禪寂定意自滅亂想。五者檢意修道永無貪著。六者法施財施不生想念。七者相好自嚴照曜世界。八者勤行方便令無覺者。九者顯曜正法示慧光明。十者代人受苦不求相報。是謂天子。若善男子善女人行此十施不起施想則能具足一切諸法。何以故。此善男子善女人。心如金剛不可沮壞。菩薩所行諸法如是。亦非羅漢辟支所知。佛復告天子。若善男子善女人。修十一清淨法者。復能具足一切諸法。云何爲十一清淨法。一者道當

清淨穢濁非道。二者道當一意多想非道。三者道當知足多欲非道。四者道當尊敬僣慢非道。五者道當檢意放逸非道。六者道當顯曜自隱非道。七者道當連屬無行非道。八者道當精勤懈怠非道。九者道當覺悟愚惑非道。十者道當教化矜吝非道。十一者道近善友習惡非道。是謂天子善男子善女人修此十一法者則能具足一切諸法。猶如日光永除闇冥。照耀世人各得眼目。菩薩亦復如是。習此十一法便能具足一切諸法。天子當知。猶如真金內外明淨。所欲作器皆悉成就。菩薩摩訶薩亦復如是。內無塵垢外

有所照。亦如虛空普覆一切。菩薩亦復如是。修此十
一法。亦無想念。我有所辦。教化眾生。斷諸結著。復次
天子。猶如須彌山王。四寶所成。須彌山王亦無此念。
我四寶所成。跣立四海中央。菩薩得四辯才。亦復如
是。不念此辯所說如應。何以故。本無想念故。猶如大
地。普載萬物。樹木華果。及諸藥草。盡皆生長。地亦無
此念。我能成辦長養諸物。菩薩摩訶薩亦復如是。我
化眾生。行大慈悲。從一佛國。至一佛國。擁護一切諸
不度者。天子當知。猶如四大海水。出種種寶。諸有眾
生。往採寶者。隨意而歸。海水亦不念。我生諸寶。給與

眾生。菩薩摩訶薩亦復如是。救濟苦人。給施七寶。所謂七寶者。七覺意是。菩薩亦不作是念。我施七覺意寶。善根具足。莊嚴佛樹。眾好自嚴飾。何以故。本無想念。天子當知。猶如法界出生諸法。大慈大悲。六度無極。法界亦不作是念。我出生諸法。教化眾生。亦不極。菩薩摩訶薩亦復如是。出生諸法。教化眾生。亦不念言。我有所度。天子當知。猶如入定。比丘斷除眾想。心不移動。入定比丘亦不作是念。我今神力入定。自在。菩薩摩訶薩亦復如是。隨所念法。悉皆成就。所言真誠不違本要。天子當知。猶如金剛不可沮壞。何以

故本性自爾。菩薩摩訶薩亦復如是。與法性相應不
失本際。猶如明珠廣有所照。明月珠者亦不作念。我
有所照而令眾生見其光明。菩薩摩訶薩亦復如是。
猶如得仙道人意有所願皆能成辦。彼五通人亦不
作是念。我今所念皆悉成辦。菩薩亦復如是。猶如工
巧之人善解六藝。或以刀劍或以矛稍壞敗大眾。彼
工巧人亦不作是念。我今所作人中最上。降伏大眾
無有與我等者。菩薩摩訶薩亦復如是。入無量三昧
正受定意。感動三千大千世界。亦不自稱譽。我有此
神力感動諸世界莫不周徧。猶如轉輪聖王本修十

善五戒。具足統領王四天下。千子勇猛七寶具足。諸粟散小王盡來朝賀。爾時轉輪聖王亦不作是念。我今眾德具足相好嚴身統領四域。何以故。福自性爾不相違背故。菩薩摩訶薩亦復如是。修菩薩道敬承佛教。恆行教化天人蒙恩。所度眾生不可稱量。何以故。菩薩亦無是念。我當濟度無量眾生。於無餘泥洹界而般泥洹。空性自爾無有眾生能使不爾。猶如農夫隨時種作不失時節。前子非後子。後子非前子。各各長大共相受入。然彼穀子不作是念。我有所生彼有所損。何以故。本性自爾無有人使令不爾。菩薩摩

訶薩亦復如是。徧學諸法行菩薩道。復以十善功德之本淨眾生根。皆趣無爲之道。爾時菩薩不作是念。我今有所濟度。從此至彼。何以故。本性自爾。無有人使令不爾。猶如甘雨隨時下降。百穀草木隨時滋長。然彼雲雨亦不作是念。我有潤澤有所長養。何以故。本無心故。菩薩摩訶薩亦復如是。法雲一降。普潤三千大千世界。令眾生類盡得潤澤。不捨本願行菩薩道。菩薩亦不作是念。我今能降法雨。普潤三千大千世界。使眾生類盡得開解。何以故。本無心意宏誓之心性自然故。如是菩薩摩訶薩入此三昧定意。能使

眾生至竟清淨。非餘清淨。能使眾生至竟安隱。非餘安隱。能使眾生得到彼岸。非餘得到。能使眾生獲度。無極。非餘能度。能使眾生至竟歡喜。非餘歡喜。能使眾生斷結。使非餘能斷。能使眾生安處。良祐福田。非餘能安。能使眾生受不信施。福度一切。非餘能受。福度一切。能使眾生入於賢聖法律。非餘能入。賢聖法律。能使眾生立不退轉。非餘能立。不退轉地。能使眾生得一切智。盡徧三千大千刹土。非餘能徧。三千大千。能使眾生爲人作將導。非餘能作將導。何以故。菩薩摩訶薩。習此定意。無量法行。普周一切。使得蒙濟。

爲開法性宏誓法門。不可思議無限曠大。不爲一人
淨菩薩道。普及一切難度眾生。於中建立應度無極。
或時菩薩救濟一人故。沒命代受苦惱。或有菩薩爲
一人故。從劫至劫。初不捨離。要使得度。後乃自滅度。
或有菩薩欲淨已界。斷諸縛著。淨除眾生根本。安處
清淨正法出要。復有菩薩執勤苦行。不著天福。恆在
五道周旋教化。或有菩薩得四無畏。教化眾生不懷
怯弱。或有菩薩得四辯才。人來詰問。理通無礙。或有
菩薩堪任說法。不著榮冀。僥倖求利。或有菩薩得總
持門。分別法觀。修不淨行。或有菩薩得佛定意。立一

切智不捨妄想。或有菩薩得佛出要。令一切人出家學道。或有菩薩得神通。行權巧方便。隨形而入。或有菩薩得無形觀三昧。入虛空界。行不思議。或有菩薩得滅盡定。現取滅度。不處泥洹。或有菩薩得七觀道。外現威儀。內實充足。或有菩薩得天眼通。徧察十方。無量諸佛。諮受未聞。而自娛樂。或有菩薩得天耳通。徧聞眾聲。分別善惡。輒往能度。不令墮墜。或有菩薩得心意通。以神足力往而度之。或有菩薩得宿命通。自知宿命。亦知他人所從來處。隨類降伏。不墮邊際。或有菩薩得漏盡通。能斷一切眾生結縛。或有菩薩

坐樹王下。得佛神德威儀法則。威儀成就。種姓成就。父母成就。居家成就。或有眾生得佛光明。住佛所住。心進如月初。或有眾生住佛慧地。能以智劍割斷塵垢。如是菩薩摩訶薩七十五法。如來深藏。不思議行。得成作佛。終不退轉。亦非羅漢辟支所及。如是天子。菩薩摩訶薩得此眾行定意者。能使三千大千世界。盡黃金色。照煥一切眾生之類。悉同無上正眞之道。如是天子。當以此法教化眾生。乃應菩薩律。復有菩薩修十二法。所行無礙。進止行來。修菩薩道。云何爲十二。一者降伏魔兵。現十力行。二者與其功德。無生

滅想。三者能以神力充一切願。四者依無著力見佛變化。五者如已所種善本功德能施一切無有悋悔。六者修第一法過於佛量。七者知生爲苦不染三有。八者無盡道本而自娛樂。九者知聲聞行亦不染著。十者知緣覺法捨離不從。十一者無礙道法行九次第。十二者當化父母眷屬成就。是謂天子十二無礙清淨道本。菩薩當念修習成其道果。天子當知菩薩摩訶薩當習一心定意。想知滅有十事。知過去未來現在。如佛所行而無有異。云何想知滅有十事。一者觀色形像本無所有。亦不染著起形想法。菩薩摩訶

薩如佛所行而無有異。爾時菩薩修相好度無極。一
一相者。如佛所行而無有異。菩薩神智變化無方。應
化眾生隨緣往度。如佛所行而無有異。爾時菩薩化
無量身色像第一。以八種音聲勸導眾生。如佛所行
而無有異。又彼菩薩淨佛國土。觀察眾生心意所念。
威儀禮節不失禁戒。如佛所行而無有異。爾時菩薩
復入定意正受三昧。能使眾生分別音響強記不忘。
如佛所行而無有異。又彼菩薩行十明慧。無限無量
不可窮盡。亦使眾生習此法本。應適隨時轉無上法
輪。如佛所行而無有異。又彼菩薩得四無畏。在大眾

中作師子吼。不斷賢聖如來正法。復以此法教化眾生。皆悉成就得無上道。逮一切智無所罣礙。如佛所行而無有異。又彼菩薩口所演教。徧布一切入三世行。盡諸有漏成無漏行。神通智達能化一切如佛所行而無有異。又彼菩薩得佛無畏十力具足。見佛國土眾生清淨。如佛所行而無有異。如是天子。菩薩摩訶薩行此十事者。進成作佛而無有難。何以故。一切諸法本無所有。亦不來時亦不去時。諸法無相相亦無所有。諸法無聲聲本無形。本性自空。何以故。聲從空出。還歸於空。眾生染汙從起識想。天子當知。吾昔

求道從無數劫分別本末。未能究竟一法定意。云何爲一法。所謂無念也。菩薩得無念定意者。觀一切法皆悉無形。如是天子。吾今成佛。由此一行。得成無上正眞之道。爾時淨居天子前白佛言。世尊。如今所聞菩薩所行。諸法無量難可究竟。眾生若干諸根不同。云何欲得成無上正眞之道。又聞佛言。如佛所行而無有異。今問如來。云何如佛所行而無有異。唯願世尊。一一分別。爾時天子復白佛言。菩薩所行其法各異。志意所趣行迹不同。云何世尊。如佛所行菩薩不異者。何以故。不名爲佛。何以故。十力不具。降伏魔宮。

何以故。不名爲一切智。何以故。不名爲覺了一切諸法。何以故。不名爲徧觀行菩薩道。何以故。不坐佛道場。願宣緣起。何以故。不名爲最正覺。何以故。不知三世正法諸佛所行。何以故。不住壽一劫。宣布智慧。何以故。不依倚諸法。修正受定意。何以故。不分別法界。進無量慧。教誨菩薩。以爲眷屬。爾時。世尊告淨居天子。曰。善哉。善哉。族姓子。如汝所問。已過諸量。今當與汝說。諦聽。諦聽。善思念之。天子。今問。菩薩所行。與佛無異者。一切善男子。善女人。覺了諸法。無形不可見。菩薩宏誓。廣及一切。當來過去。今現在有形之類。展

轉相成。未獲智慧清淨空觀。設當得智慧者。故名爲如來至眞等正覺。倚菩薩慧化度眾生。自得復授彼。是謂菩薩道能斷三毒不興十惡。盡如來境界。是謂名爲十力。已越凡夫立菩薩行迹。心不移動於無上正眞之道。是謂名爲菩薩。若復善男子善女人。分別法界共相受入。是謂名爲一切智。猶如諸法本無相貌。以眾生故各有名號。可就知就可捨知捨。不離善本修菩薩道。是謂名爲菩薩。猶如菩薩分別無一無二。自然出生諸度無極。復自覺了亦使眾人同其法相。是謂名爲佛。猶如彼菩薩不見二三諸法所生。善

察不忘思惟達了。法從何起法從何滅。轉法輪者爲
是何人聞法是誰。能解知一切諸法者。是謂名爲菩
薩。猶如菩薩以其慧眼徧觀三千大千世界。有愛欲
心無愛欲心。有愚癡心無愚癡心。有瞋恚心無瞋恚
心。復能思惟徧斷根本者。是故名慧眼。復次慧眼菩
薩。周旋往返遊諸佛境界。盡知眾生心心所念應度
不度。便能入化隨類度之。是謂名爲菩薩。猶如菩薩
以諸光明普有所照徧諸境界。亦以無量智慧憶諸
佛世尊深奧之法。是謂名爲菩薩。猶如菩薩以智慧
光乃能照曜虛空境界。如來神智而現在前。閉塞罪

門開泥洹路。復不染著。十八本持無著無縛。是謂名爲菩薩。猶如菩薩以佛威儀而自修習。分別如來獨步無侶。名色六入更樂受有生死。過去三世眾生。本末一一悉知。爲無等侶。猶如菩薩紹繼如來。不斷佛種。施行佛事。生者不知生滅。者不知滅。本無虛寂。具四等心。亦復分別本無。今有本有。今無。解了悉空。不生若干念。是故名爲佛。猶如菩薩得神通慧。觀眾生劫有。近有遠。劫遠不以爲感。劫近不以爲喜。成劫敗劫亦復如是。攝意持心而不亂者。是故名爲菩薩。佛復告淨居天子。若善男子善女人。行菩薩道。復當思

惟一切諸法從初發意乃至成佛。不計吾我。我人壽命。自然其行斷諸塵垢。此乃名曰修菩薩道。復有菩薩發求道者。爲一切眾生荷負苦行。亦復不見有得道者。亦復能度阿僧祇無量眾生。有受證者不受證者。於中受決無所染著。此乃名曰修菩薩道。復次天子。若善男子善女人。分別三空無量深法如實知之。云何爲三空。一者有覺有觀。二者無覺有觀。三者無覺無觀。是謂三空菩薩所行。復次天子。復有三空。云何爲三。一者盡空。二者無盡空。三者非盡非無盡空。是謂三空菩薩所行。佛復告天子。復有三空。一者生

空。二者無生空。三者非生非無生空。是謂三空。菩薩所行。佛復告天子。復有三空。云何爲三。一者住空。二者無住空。三者非住非無住空。爾時淨居天子白佛言。世尊。過去當來今現在諸法。一切眾生盡有生滅著斷。有此三空不乎。佛告天子。我今與汝說善思念之。云何爲住空。所謂住空。無爲寂靜是也。天子當知。云何爲無住空。汝身及我是也。云何爲非住非無住空。一切有形三世諸法是也。佛復告天子。若善男子。善女人。解此三空者。便能盡解一切諸法。五盛陰身亦復如是。是謂菩薩道。佛復告天子。諸法無合無散。

亦不見淨亦不見不淨亦不自念言若我成佛當於
某處生國土郡縣父母宗親姓氏名氏亦復不念生
一劫中壽命長短復不自念言身黃金色坐華樹下
當成無上正真之道是謂菩薩道已能具足得不退
轉行無生心本無一相況有二相爾時菩薩分別諸
法悉歸空寂恆自將護不爲弊魔得便趣無所趣轉
無所轉如是已入法界無量空慧能自嚴飾眾相之
法佛復告天子曰猶如眼色內外無主三事共合乃
成眼識痛想行識亦復如是內外成就乃成諸識佛
告天子我今與汝引喻智者以喻自解猶如伊羅鉢

龍王。金福山側於中止住。七寶殿堂。七寶垣牆。七寶樹木。梯陛街巷。皆七寶成。彫文刻鏤。眾寶所成。時彼伊羅鉢龍王。身體絕白如雪珂積。金蓋逐後。身香瓔珞。悉七寶成。復以七寶以作食器。純紫磨金。造作華鬘。復以七寶作鐘鼓樂器。七處齊平。口齒齊正。容貌端嚴。視無厭足。清淨香潔。左右迴轉。無所觸礙。有此眾德。不可稱量。然釋提桓因。領三十三天。天王中尊。心有所念。如彈指頃。欲使金福山側伊羅鉢龍王。如屈伸臂頃。往至三十三天者。左右侍從。給使天王。尋到無礙。爾時天王。釋提桓因。欲使諸天。證其功德。卽

被以七寶莊嚴龍身。時天帝釋乘此神龍東西遊觀。當於爾時。伊羅鉢龍王復以神力化作種種供養承事恭順。彼天帝釋龍自化形三十二首。一一首上有七牙。一一牙上有七浴池。一一池中有七百蓮華。一一華上有七百玉女。一一玉女復將七百使人。作倡妓樂共相娛樂。若復天王釋提桓因意欲懈怠。卽詣七寶殿。後至一浴池。名曰香潔。躬入浴池。乘伊羅鉢龍王恣意遊戲。爾時天王釋提桓因以入一好浴池。乘此龍已。眾寶雜厠莊嚴其身。作倡妓樂五欲自遊。共相娛樂。樂不可言。爾時伊羅鉢龍王捨本形狀。

不作龍身。以已神力變作三十三天像。復入一浴池。及彼諸天將諸玉女共相娛樂。亦如天帝釋無異。左右觀見此變化。大身龍身各無有異。身與天身同色。與天色同。共在一浴池。無有變異。釋身龍身一而無二。何以故。皆由宿積功德所致。設此二人本求無上正真道者。今日成佛亦復不久。行從心得心淨道成。如彼天宮本不知所從來去亦無所至。一切眾行皆空皆寂。天子當知。汝今此身及彼天宮日月天子。悉歸摩滅。不可久保。是故天子當解法性成敗所趣起滅常分。唯有泥洹最安最妙。非刀劍呪術能毀壞敗。

爾時世尊復告天子。菩薩摩訶薩亦復如是。獲無礙
定意。宏誓牢固。以菩薩三昧七寶而自瓔珞。以七覺
意華莊嚴其身。善住無礙。定意不亂。身放光明。無不
有照。擊法鳴鼓。聲徹十方。豎法高幢。顯攝威儀。身鉤
鎖骨力過天人。增益一切諸度。無極於自然。法律皆
悉成就。肌肉軟細。不受塵垢。演慧法輪。法王中勝。入
深法藏。以諸菩薩用爲眷屬。八解浴池。用洗心垢。不
斷眾人宏誓之本。坐道樹下。捨一切業。不恪國榮。用
此惠施而成佛道。出此聲響。今正是時。吾不成佛者
不起於座。要覺所覺。乃起於座。唯地樹神乃知我心。

爾時世尊說是語時。十方無量恆沙刹土。有八十億
姪及神通菩薩。僉然俱至。天地大動。十方諸佛各各
於其方稱揚其德。告四部眾。今日菩薩釋迦文者。於
娑訶刹土。當成無上正真之道。汝等堪任能至彼者。
攝持威儀。而往親覲。是時十方諸神通菩薩。承佛聖
旨。僉然興敬。禮佛三匝。各持香華。詣忍世界。興致供
養。圍繞道樹。稱善無量。忍心如地。衣毛不豎。繫意在
前。不左右顧視。慈心遂盛。愍傷苦厄。我今所以欲成
佛者。矜愍一切。說是語時。大地六反震動。爾時世尊
直前瞻視。七日不動。諸天龍神八部之眾。皆來圍遶。

擁護菩薩。至成作佛。令得究竟。我亦不捨菩薩所行。復次天子。菩薩神足行六聖法。進前成佛。乃應道教。吾前成佛。由此六行。行大慈悲。云何爲六。一者慈仁。哀愍未度。二者惠施周滿一切。三者廣演聖慧。不有進退。四者行三空慧。淨攝國土。五者攝取國土。無進退心。六者受佛印信。封印眾生。是謂六事。得成如來。至真等正覺。佛復告天子。菩薩摩訶薩。復有六事。念化眾生。不懷懈慢。充足一切眾生之願。云何爲六。一者精進。斷諸漏結。二者苦行。不捨道心。三者自憶攝身口意。四者追師求受正法。五者修德爲眾生故。六

者入定觀察根源。是謂菩薩摩訶薩具此六事。便應通慧。佛復告天子。諸佛世尊修此六法。得成無上正眞之道。廣化眾生。轉深法輪。入總持門。云何爲總持。所謂總持者。樂法清淨。總持菩薩入此總持者。能使眾生娛樂法樂之樂。佛復告天子。復有無邊際總持。菩薩得此總持者。使無邊際眾生立入解脫。佛復告天子。復有無斷轉法總持。菩薩得此總持者。使諸眾生聞法不斷。復有覺道了眾生本總持。菩薩得此總持者。令阿僧祇眾生知本所從來。復有行迹無礙總持。菩薩得此總持者。如自然法無起無滅。復有誦法

不忘總持。菩薩得此總持者。獲諸法門不起法想。如是天子。菩薩總持百千億數。非心所念。菩薩由此總持。便得遊戲百千三昧。佛復告天子。有四賢聖如來辯才。菩薩得此賢聖辯才者。向泥洹門而無有礙。云何賢聖四辯才。於是天子。或有菩薩初心入定。後心向道。行如來智。不壞前心入定之意。是謂菩薩賢聖辯才。復次天子。菩薩入定前念後念寂然不動。能具相好布現世人。純以菩薩左右侍衛。是謂菩薩賢聖辯才。復次天子。或有菩薩現如入定。心遊無量諸佛世界。採取深妙賢聖法律。一切眾生無覺知者。是謂

菩薩賢聖辯才。復次天子。復有菩薩入滅盡三昧。無形正定。復從定起。作無數變。一切眾生無覺知者。或現一劫。至百千劫。或現一月。或現一日。乃至七日。或現成佛。取般泥洹。是謂天子菩薩辯才功德無量。爾時世尊告天子曰。若有菩薩獨步三界。供養諸佛。世尊者。先當習此賢聖辯才。若欲超過聲聞辟支佛者。欲供養諸佛世尊者。欲盡三世無量佛法者。欲得解脫。如佛解脫者。欲使眾生一時成佛者。如是天子。此菩薩摩訶薩。當習此賢聖辯才。受持諷誦。爲人解說。雖不能多。初夜可。雖不能初夜一時。間可。雖不能一。

時彈指頃可。何以故。三世諸佛一切諸道皆從此生。爲世光明諸困苦者自然安隱。若有善男子善女人。身生瘡癩膿血流溢。彼人聞此賢聖辯才卽得除差。若善男子若善女人。脊曲負天目盲耳聾瘖瘵不言。遭值善知識與說四賢聖辯才。卽蒙解脫無有眾苦。如是天子。若我曩昔不得四賢聖辯才。終不能成賢聖四辯才。何以故。其功德福難可限量。若從一劫至百千劫。復從無數恆沙劫中。歎譽此法無以爲喻。佛復告天子。吾今略說其要。若有善男子善女人。至如來所。頭面禮足。以此爲首。乃至十方無量刹土。禮事

供養信心不斷。種種華香懸繒旛蓋。問佛深義增益功德。知一切法如幻如化。兼化一切說菩薩道。一一分別平等大道。菩薩眾行種種不同。眾生性行亦復如是。種種菩薩境界。種種菩薩智慧。種種菩薩威儀。種種菩薩妙行。種種菩薩神足。種種菩薩出要。種種菩薩入不染著境界。種種菩薩無惑心自娛樂。種種菩薩法要。分別無量法故。種種菩薩通慧。觀眾生純熟根故。種種菩薩道慧。不捨本末定故。種種菩薩深觀。入定意故。種種菩薩宏誓。不違本願故。種種菩薩勇猛。成辦諸法故。種種菩薩精進。不懷懈怠故。種種

菩薩勤苦。不念劫遠近故。種種菩薩大悲愍念一切故。種種菩薩喜心未曾起。怒故。種種菩薩護心。放捨一切故。種種菩薩不淨觀。自觀內諸法故。種種菩薩數出入息。內自攝意故。種種菩薩十二緣起。自滅諸法故。種種菩薩觀五盛陰。念斷諸想故。如是天子。菩薩摩訶薩觀察諸法不可思議。淨一切迹。應一切智。成一道本。歸一泥洹。乃應賢聖辯才。分別如來所說經戒。云何爲經。所謂經者。契經歌授。決本末久遠事相應。生經方等。未曾有法。因緣經譬喻深藏斷結。是謂天子菩薩摩訶薩學此。

法者便能具足。佛復告天子。若有菩薩欲得具足如來身相者。三十二大人之相八十種好八種羯毗音聲圓光七尺。欲得如是相者。當學賢聖辯才。欲得如來法身具足五分法身者。當學賢聖辯才。欲攝取一切菩薩具足六度無極。成一切智具足佛法。當學賢聖辯才。佛復告天子。若有眾生欲不斷諸法不倚四大不違如來深奧妙法。欲得如是。當學賢聖辯才。欲入智慧深淵乘三達智遊戲於百千三昧。當學賢聖辯才。欲滅本姓名號成如來名號。欲離縛著不樂居業。欲得如是者。當學賢聖辯才。如是天子。菩薩摩訶

薩徧學諸法已成大乘迹。具足本願佛國成就眾生
清淨。於佛法藏無所罣礙。解了諸法如幻如響。如芭
蕉樹如鏡中像如夢中所見。亦如幻化悉無所有。如
是天子。菩薩解了諸法。便能禮事諸佛世尊。從一佛
國至一佛國。聽受正法入深妙藏。佛復告天子。若有
善男子善女人。欲得轉輪聖王七寶導從領四天下。
欲作梵天王及釋提桓因。欲得如是者。當學聖賢戒
律。爾時世尊說此語時。九十八億得阿羅漢。皆懷變
悔。前白佛言。我等過重捨本所習。今墮邊際。惟願世
尊垂愍教誨。欲得修習賢聖辯才。如是再三。佛默然。

可之。復有無數眾生聞此法已。諸塵垢盡得法眼淨。佛告淨居天子。此賢劫中七百佛過汝當作佛。名曰智積如來。至真等正覺。明行成爲善逝世間。解無上士道法。御天人師。號佛世尊。

菩薩瓔珞經卷第十八

菩薩瓔珞經卷第十九

姚秦沙門竺佛念譯

十方法界品第三十八

爾時世尊將欲滅度。卻後九十日當取般泥洹。告四部眾。吾昔成佛於摩竭國。既成佛後在法樂講堂。十方恆河沙一切菩薩。皆來雲集來至我所。各各勸進。令我說法。爾時有菩薩名優鉢蓮華藏。而白佛言。世人多愚不識眞法。唯願世尊敷演正義。令一切眾得蒙解脫。復有菩薩名波頭摩藏。來至我所。前白佛言。沈墮生死流轉五道。唯願世尊開甘露門。久飢虛者

得蒙濟度。復有菩薩名曰喜藏。前白佛言。世多有苦惱。縛著十二緣。不覩大聖顏。唯願當濟度。復有菩薩名旃檀藏。前白佛言。五濁鼎沸。世不識真正法。慧日既已降。唯願除闇冥。復有菩薩名金剛藏。前白佛言。眾生然熾。劇恆貪著五欲。不識如來性。唯願頒宣法。復有菩薩名曰力藏。前白佛言。一切世無常生滅。各有限。尊今既降形。何不時說法。復有菩薩名無垢藏。前白佛言。尊今如蓮華。不著諸塵垢。內外悉平等。布現如來法。復有菩薩名清淨藏。前白佛言。天師久不現。世人恆在冥。尊今既降形。唯願時說法。復有菩薩

名如來藏。前白佛言。過去諸恆沙如來等正覺。出現
皆說法。尊今何故默。復有菩薩名曰輒首。前白佛言。
生世值佛難。聞尊經法難。得受人身難。度脫眾生難。
復有菩薩名曰慈氏。前白佛言。一切眾苦患。皆由恩
愛生。世多非法人。唯願尊開悟。復有菩薩名曰師子。
前白佛言。夫人欲聞法。斷除三礙形。尊今無上師。願
度一切人。復有菩薩名曰無量界。前白佛言。佛力無
所畏。法界不思議。過去當來佛。說法於此處。復有菩
薩名虛空藏。前白佛言。本無等正覺。無染無所汙。平
等度脫人。何故寂然住。復有菩薩名曰慧造。前白佛

言。生死甚爲苦。如人沒在淵。尊今大船師。唯願時度濟。復有菩薩名曰光造。前白佛言。眾行今已盡。已離三界苦。慈悲四等心。本誓今所在。復有菩薩名曰法造。前白佛言。眾生界難量。一切恩愛會。三寶久斷絕。願尊時說法。復有菩薩名曰無著。前白佛言。智慧光明降。照除三毒冥。世人五苦患。唯尊演正法。復有菩薩名曰無畏。前白佛言。執意如金剛。宏誓甚牢固。心淨如虛空。願救諸厄人。復有菩薩名曰護覺。前白佛言。智人已降形。當度無數人。願救濟一切。使得至彼岸。復有菩薩名曰無生。前白佛言。正法不思議。曉達

者甚少。無數劫積行。願莫唐其功。復有菩薩名曰神足。前白佛言。慧眼今已降。當度不肖人。本無平等慧。令離諸苦患。復有菩薩名曰雷聲。前白佛言。眾行本無慧。智達一切人。明斷諸塵垢。尊今正是時。復有菩薩名曰雷音。前白佛言。佛尊過一切。智行無數劫。自生自然滅。無量無過尊。復有菩薩名曰常悲。前白佛言。尊本積苦行。經歷生死難。佛日今已出。莫知愚癡冥。復有菩薩名曰幻化。前白佛言。思惟一切法。幻化亦非真。道當以平等。願尊時敷演。復有菩薩名曰無厭。前白佛言。三世眾生苦。未聞八正道。最勝今已降。

渴仰天師久。復有菩薩名曰勇猛。前白佛言。是以無
數世。積行不可量。威神覆一切。願除一切惱。復有菩
薩名曰覺知。前白佛言。佛慧無有量。演法無有窮。住
本亦不住。願轉正法輪。復有菩薩名曰善行。前白佛
言。無生本無生。今日尊已生。現形於五濁。願度一切
人。復有菩薩名曰正見。前白佛言。三界第一尊。天人
所供養。轉法震大千。如今寂然默。復有菩薩名曰法
淨。前白佛言。設從無數劫。欲歎尊功德。究竟百福業。
未盡如毫釐。復有菩薩名曰無相。前白佛言。本無本
無相。尊今出眾相。行盡得作佛。何爲入禪定。復有菩

薩名不思議。前白佛言。一切眾生類。不見生滅苦。了本知眾相。唯願尊時起。復有菩薩名曰導首。前白佛言。一切諸法空。因緣共會合。久不轉法輪。何爲入正定。復有菩薩名曰輪轉。前白佛言。平等無憎愛。愍念一切故。尊今已願屈。何爲復睡眠。復有菩薩名無量辯才。前白佛言。大聖人中尊。經歷劫數勤。今已成正覺。願愍一切人。復有菩薩名曰生盡。前白佛言。一切眾行本。盡歸於無常。常身非常身。尊今計常身。復有菩薩名曰本末空。前白佛言。虛空無邊際。眾生難覺悟。本無如來現。時演勿有疑。復有菩薩名曰多悲。前

白佛言。夫欲自利者。先度一切人。尊從眾生出。今違本誓願。復有菩薩名曰顯德。前白佛言。神足無量法。六度無增減。眾相自嚴身。願尊時屈神。復有菩薩名曰一意。前白佛言。十方諸菩薩。盡來詣忍土。欲得聞正法。唯尊時覺悟。復有菩薩名曰不虛妄。前白佛言。世尊大慈愍。思惟入正定。無量已過量。時至可說法。復有菩薩名曰喜樂。前白佛言。知生無量行。行過三界表。尊今三世尊。願度三界人。復有菩薩名曰本無前。前白佛言。尊今極神妙。道力不思議。成佛爲眾生。何不轉法輪。復有菩薩名摩訶衍。前白佛言。三乘同一

趣。未聞正法言。尊今當分別。令知泥洹要。復有菩薩名曰劫數。前白佛言。人生當歸滅。捨一復就一。唯願尊降伏。不生不復滅。復有菩薩名曰受證。前白佛言。生老病死痛。五陰爲禍緣。十二牽連縛。唯尊願拔濟。復有菩薩名曰不眴。前白佛言。我等所居刹。去此甚久遠。唯願今世尊。說法使我聞。復有菩薩名曰捷疾智。前白佛言。尊具七覺意。具足四等心。當悟諸不悟。願尊度脫之。復有菩薩名曰常舉手。前白佛言。大人眾相滿。顯揚一切法。已得離諸著。亦使眾生離。復有菩薩名曰法意。前白佛言。過去諸如來。說法無有量。

尊今既成佛。願時轉法輪。復有菩薩名曰月盛滿。前白佛言。世間皆非常。一切皆歸空。解知無所生。尊今人中上。復有菩薩名曰無量稱。前白佛言。身淨不造惡。口淨言誠信。超越一切上。過於諸天人。復有菩薩名曰無與等。前白佛言。如來從如生。降神度生死。但當時說法。何爲懷猶豫。復有菩薩名曰遠離。前白佛言。從無央數劫。時時乃有佛。如日現華敷。何爲不現光。復有菩薩名曰威神。前白佛言。十方無有比。獲空無相願。法身如安明。唯願開甘露。復有菩薩名曰道力。前白佛言。空觀無想念。行亦寂然滅。從是自致佛。

天人所恭敬。復有菩薩名無所倚。前白佛言。眾生若
千種。不識解脫門。願尊前將導。乃到無畏處。復有菩
薩名閑靜觀。前白佛言。人心如流水。念念皆生惡。尊
當斷其根。永滅無萌兆。復有菩薩名無盡意。前白佛
言。越度生死海。淨修梵志行。眾生甚飢虛。說法令充
足。復有菩薩名不違信。前白佛言。三界都熾然。眾生
無恃怙。尊當慈愍念。爲說眞法要。復有菩薩名善權
現。前白佛言。通盡一切藏。安處無爲境。究盡本無行。
今尊何思慮。復有菩薩名曰達本源。前白佛言。四大
聚一處。皆由宿識行。癡愛共相生。願尊示現法。復有

菩薩名曰山岳。前白佛言。所以諸佛興濟度三千世。使無名眾生永斷三惡道。復有菩薩名曰逮覺。前白佛言。未獲今已獲。不種生死本。世尊心常定。願從禪寂起。復有菩薩名曰賢護。前白佛言。一切諸法本。生滅無所起。智達三界苦。盡斷諸有漏。復有菩薩名無與等。前白佛言。諸佛法不異。唯化人爲本。本從等意來。大慈今所在。復有菩薩名曰大天。前白佛言。眾生宿有限。得觀如來形。未聞眞諦法。唯願時演說。復有菩薩名曰行道。前白佛言。今觀身色相。一切眾行具。至誠逮正覺。何不行佛事。復有菩薩名曰離垢。前白

佛言。本尊所發願。乃爲阿僧祇。令彼顛倒等。乃覩於
正路。復有菩薩名曰無盡。前白佛言。觀顏如華開。容
貌無等雙。功德過八難。何故而寂然。復有菩薩名無
希望。前白佛言。十力哀出世。教化天世人。從此至彼
岸。賢聖所行業。復有菩薩名曰佛慧。前白佛言。從此
虛空際。徧滿十方世。皆來欲聽法。洗除心垢患。復有
菩薩名曰人本。前白佛言。三界悉苦患。亦無逃避處。
唯須神力接。爾乃永得安。復有菩薩名曰天王。前白
佛言。身垢三百五。恆染汙人心。當以智慧光。蠲除令
無餘。復有菩薩名曰無怒。前白佛言。我從平等慧。故

來省覲尊。欲聽無量法。修習本無行。復有菩薩名曰
無欲。前白佛言。我憶過去世。有佛名能仁。勸進令說
法。如尊無有異。復有菩薩名曰入定。前白佛言。曾聞
成佛道。三覆轉法輪。如今何爲默。不聞一轉聲。復有
菩薩名曰海相。前白佛言。今我得通智。皆聞於正法。
愍彼眾生等。故勸請如來。復有菩薩名曰師子吼。前
白佛言。一相本無相。諸法悉空寂。眾生所不達。尊今
當分別。復有菩薩名曰大豪。前白佛言。天尊甚巍巍。
眾相無有比。欲聞瓔珞法。開悟一切人。復有菩薩名
曰樂居。前白佛言。如華優曇鉢。億千劫乃出。佛亦過

於是。今現何自隱。復有菩薩名曰趣道。前白佛言。法
法自相生。不染三界有。願雨七覺華。普潤一切人。復
有菩薩名曰講法。前白佛言。眾生無緣想。當以法因
緣。空淨心無垢。尊當具分別。復有菩薩名曰眼通。前
白佛言。尊本行此願。當度不度者。今日期已至。願說
空無慧。復有菩薩名曰無頂相。前白佛言。世間甚可
愍。顛倒眾生多。迷惑於正道。願示慧明處。復有菩薩
名曰得總持。前白佛言。憶念過去世。與尊共宏誓。當
度恆沙人。令至無爲岸。復有菩薩名曰無與等。前白
佛言。尊今廣長舌。如華覆面形。皆由說正法。故獲此

福報。復有菩薩名曰大施。前白佛言。尊本惠施人。不
望受其報。今得人中尊。巍巍乃如是。復有菩薩名曰
究竟淨。前白佛言。六度大智慧。當徧於世間。令愚惑
之徒。悉趣本無行。復有菩薩名曰無著觀。前白佛言。
四辯無所著。應對一切人。一一決斷疑。皆由宿報緣。
復有菩薩名曰好喜。前白佛言。昔緣善知識。成就道
法門。今既得成佛。非法云何果。復有菩薩名曰甚深
智。前白佛言。興造一切行。眾德自瓔珞。唯佛能演暢。
從有至邊際。復有菩薩名華鬘子。前白佛言。功勳累
劫積。解無眞際法。得爲三界尊。斯由聞法報。復有菩

薩名曰色相。前白佛言。如來丈六身。金剛至難壞。願以無形法。普及諸萌兆。復有菩薩名觀外身。前白佛言。如日光所照。普除一切冥。今未覩佛光。願示威儀相。復有菩薩名具足相。前白佛言。常想無常法。係意入禪定。離垢過三界。度脫一切人。復有菩薩名純熟根。前白佛言。諸佛所行法。唯度人爲事。已果本所願。快哉時說法。復有菩薩名曰眾生根。前白佛言。法界不思議。眾生根亦然。願以神足力。示現於一切。復有菩薩名曰通慧。前白佛言。光相如雪山。世人所宗仰。今雖覩一寶。唯願說二寶。復有菩薩。

此元闕菩薩名前白佛

言。佛道甚深妙。講授一切法。當王於三界。皆由諸法本。復有菩薩名曰極微。前白佛言。十方諸世尊。遣我等來此。唯欲聞正法。不樂賢聖默。復有菩薩名曰色身。前白佛言。無量諸佛等。戒律清淨具。自得復授彼。充飽一切願。復有菩薩名淨音聲。前白佛言。十慧十無生。十法想知滅。十地功德具。十力願說法。復有菩薩名曰常定。前白佛言。我今最下劣。眾智未廣普。唯願尊今日。示我神足道。復有菩薩名曰無底。前白佛言。本我自發誓。要當聞言教。尊今不說法。我終不捨去。復有菩薩名曰燄光。前白佛言。佛道甚爲難。法起

無有盡。能淨一切垢。乃應入道真。復有菩薩名曰法眼前。白佛言。無量總持門。聲震於天地。說法度眾生。令得成佛道。復有菩薩名曰慈仁。前白佛言。諸法甚深奧。如空無端緒。達本無諸道。故號人中尊。復有菩薩名曰一乘。前白佛言。生死塵勞垢。八難爲垣墻。此苦莫能濟。唯佛能度脫。復有菩薩名曰盛明。前白佛言。苦哉老病死。三界爲大患。慧日旣降出。默然不說法。復有菩薩名曰長壽。前白佛言。世人壽命短。更樂所縛著。六識所嗜師。唯願尊消滅。復有菩薩名曰算數。前白佛言。一切眾生類。三毒所覆蔽。願尊當降神。

療以法醫藥。復有菩薩名合縷掌。前白佛言。聲震於十方道降甘露雨。無盡深法藏。非佛誰能宣。爾時世尊告諸大眾。斯等菩薩百千億數。各各勸進興敬道法。各各說請慇懃於佛。吾當爾時放舌相光明。普照三千大千世界。還攝光已告眾菩薩。吾今所以得廣長舌分別諸法。悉無所有。復以八聲震動十方無量佛國。悉令聞知。爾時世尊與諸大眾而說頌曰

一切諸法本 因緣合會生 十方諸刹土

空寂皆無形 道意自然著 功德眾相滿

分別內外法 無形無所有 我聞既成佛

度脫一切人 有大法瓔珞 莊嚴佛土淨
卿等欲得聞 究盡本末空 一一當分別
令至無爲岸 吾昔四宏誓 當度不度者
豈須諸人請 令各有怨心 吾本初發意
亦不限齊人 但緣未及道 故復默然耳
爾時眾會一切菩薩聞佛說偈各各踊躍不能自勝
皆稱善哉歎未曾有如來將欲敷演法教度脫眾生
爲成法界三世勞苦悉蒙解脫爾時座上未得神通
凡夫學人二萬餘眾皆發無上正真道意各各發願
善心生焉欲得聞此大法瓔珞

十智品第三十九

爾時彌勒菩薩白佛言。世尊。云何菩薩摩訶薩。先習何法。修何功德。得成無上正真等正覺。應大法瓔珞乎。佛告彌勒。善哉。族姓子。諦聽。諦聽。善思念之。若有菩薩摩訶薩。欲成無上正真等正覺。與大法瓔珞相應者。欲斷生死根源者。欲興顯如來正法者。欲得無量定意如世尊者。欲得如爾法性遊戲者。如是菩薩摩訶薩。當學無量智門。云何爲無量智門。彌勒善聽。如來至真等正覺。有十明智。一意一念一時之頃。悉知無量眾生境界。分別思惟不失法界。便成無上至

眞等正覺。云何爲十明智。所謂十明智者。菩薩摩訶
薩一時之頃。能使三千大千世界一切眾生盡生兜
術天。共修善行各無異心。令餘眾生無覺知者。復次
彌勒菩薩摩訶薩一時之頃。能使三千大千世界一
切眾生。成菩薩道法。法成就。與諸賢聖共相娛樂。有
異眾生無覺知者。復次彌勒菩薩摩訶薩一時之頃。
能使三千大千世界其中眾生未立根德力者。同時
出家修無上梵行。鬚除鬚髮著三法衣。手持應器行
十二法。時到分越。福度一切。或時坐禪分別身觀。然
有眾生無覺知者。復次彌勒菩薩摩訶薩一時之頃。

能使三千大千世界一切眾生。成菩薩道。詣樹王下。吉祥獻草。結跏趺坐。內自思惟。今日當成無上至眞。必然不疑。先當感動一切世界。神通得道賢聖之人。來擁護我。令餘眾生無覺知者。復次彌勒菩薩摩訶薩。一時之頃。能使三千大千世界一切眾生。成菩薩道。皆轉法輪。四諦如爾。法苦集盡道。亦令眾生修而得度。隨其所念。成三乘果。令餘眾生無覺知者。復次彌勒菩薩摩訶薩。一時之頃。能使三千大千世界一切眾生。諸根純熟。具五分法身。眾相具足。宏誓成就。施行佛事。降伏魔兵。然餘眾生無覺知者。復次彌勒。

菩薩摩訶薩一時之頃。能使三千大千世界一切眾生。生成菩薩道。盡成如來等正覺。入佛意三昧。各各分身教化眾生。入賢聖法律。令餘眾生無覺知者。復次彌勒菩薩摩訶薩一時之頃。能使三千大千世界一切眾生。成菩薩道。入如意定意。盡令山河石壁瓦石草木。變爲七寶。給施貧苦。普令充足。然後乃說六度無極。令餘眾生無覺知者。復次彌勒菩薩摩訶薩一時之頃。能使三千大千世界一切眾生。成菩薩道。入金剛定意。能化一切盡黃金色。如佛色相。而無有異。皆令成就。成無上道。令諸眾生無覺知者。復次彌勒。

菩薩摩訶薩一時之頃。能使三千大千世界一切眾生。成菩薩道。過去當來今現在。得佛根力覺意。分別空無相願。覺了諸法悉無所有。使一切眾生無覺知者。復次彌勒。如是菩薩摩訶薩行。十明智至成無上正真之道。必然不疑。爾時彌勒白佛言。世尊。今聞如來至真等正覺所說正法。坦然大悟。願令眾生逮此智慧。

應時品第四十

爾時法妙菩薩白佛言。云何菩薩摩訶薩。進修無上正真之道。成最正覺。執持威儀。應時之行。乃能具足。

大法瓔珞。佛告法妙。若有菩薩摩訶薩。欲得具足成無上至真等正覺。具足如來大法瓔珞。當修十慧大法瓔珞。便能具足大法瓔珞。於是族姓子。若有善男子善女人。欲聞如來大法瓔珞應時之行者。諦聽諦聽。善思念之。云何爲十。所謂十者。若菩薩摩訶薩。自知時到。當成無上至真等正覺。便不失期。詣樹王下。執宏誓心。心如虛空。斷除眾想。是謂菩薩摩訶薩應時之行。復次法妙。若復菩薩審自知已。今我時到。化彼眾生。姓氏字氏。不越局界。要當度脫一切眾生。然後乃定。是謂菩薩摩訶薩應時之行。復次法妙。若復

菩薩深自知己。我今當成無上等正覺。復當授菩薩
決。國土翼從方面所在。是謂菩薩摩訶薩應時之行。
復次法妙。若復菩薩審自知己。我今已獲眾智自在。
當使眾生如我無異。尋時入彼而教化之。普令眾生
獲此自在無礙之法。是謂菩薩摩訶薩應時之行。復
次法妙。若復菩薩入解脫門。施行佛事。變化一切形
礙之法。皆令歸於無盡之藏。亦使眾生同己所得。是
謂菩薩摩訶薩應時之行。復次法妙。菩薩審自知己。
我今已獲無形四空定法及四等心慈悲喜護。復以
此定教化眾生。普令一切同己所得。是謂菩薩摩訶

薩應時之行。復次法妙。若復菩薩審自知已。執持威儀不失禮節。可行知行可坐知坐。晝夜孜孜不違道教。到時入城不左右顧視。福度眾生其慧無量。亦使眾生同已所得。是謂菩薩摩訶薩應時之行。復次法妙。若菩薩審自知已。觀眾生根本應度不度。受彼信施量腹而食。還至閑靜坐臥思惟。今所受施以支四大得行道德成最正覺。復以此法化導一切。普令眾生同已所得。是謂菩薩摩訶薩應時之行。復次法妙。若復菩薩審自知已。如我今日應賢聖律。導化一切。無有增減。漸漸前進入五道中。察彼心意而度脫之。

若入人道爲說禁戒。令彼眾生知犯罪之苦。示以正道而度脫之。若入天道處彼天宮。爲說無常摩滅之法。勸勉使修十善之行。捨天重位。修無上道。若入畜生苦痛之中。爲說抵突欺詐之法。使生善心。改更之義。若入餓鬼醜陋之中。爲說慳貪縛著之心。使發善心。改往修來。若入地獄受罪人中。爲說五逆難救之法。復令地獄眾生。心開意解。善心得生。畢其罪苦。得復人中。是謂菩薩摩訶薩應時之行。復次法妙。若復菩薩審自知已。眾行已具。眾智自在。得不思議。當以神足感動一切。自試神足而無罣礙。從一佛國至一

佛國承事諸佛禮敬世尊。務修梵行。稟受不及。亦使
眾生同已所得。是謂法妙菩薩摩訶薩。修此十慧。應
時之行者。得成無上正真之道。成最正覺。便能具足
大法瓔珞。

十不思議品第四十一

爾時道勝子菩薩白佛言。世尊。云何菩薩摩訶薩入
五道中周旋往來。教化眾生淨佛國土。成無上至真
最正覺乎。行不思議大法瓔珞耶。佛告道勝子菩薩
曰。諦聽。諦聽。善思念之。若有菩薩摩訶薩。欲成無上
至真等正覺。行不思議大法瓔珞者。當修十法。云何

爲十。若有菩薩摩訶薩。入五道生死隨類而化。一踰
跌坐徧滿十方諸佛世界。復以音響震動三千大千
世界。於中教化一切眾生。悉發無上正真道意。乃使
眾生無覺知者。是謂菩薩摩訶薩所行正法。應不思
議。復次道勝子。若復菩薩摩訶薩。入五道中教化眾
生。以一句義充足一切諸佛世界。有形之類。悉得聞
知。然彼眾生亦不自覺。所從聞法。皆發無上正真道
意。是謂菩薩摩訶薩修於正法。不思議行。復次道勝
子。若復菩薩摩訶薩。入五道中教化眾生。以一光明
徧照三千大千刹土。其見光者。皆發無上正真道意。

然不見形。皆令一切入解脫門。是謂菩薩摩訶薩。修於正法。不思議行。復次道勝子。若復菩薩摩訶薩。入五道中教化眾生。一意一念一時之頃。以一法身徧滿三千大千世界。皆使眾生普令聞知。盡令眾生具足法界。然彼眾生不知所從聞。皆發無上正眞道意。是謂菩薩摩訶薩。修於正法。應不思議。復次道勝子。若復菩薩摩訶薩。入五道中教化眾生。以神足力盡化三千大千世界一切眾生。盡作佛形。然彼各各相教。爲說十二勤苦之行。共相濟度。不可稱量。然彼眾生不自覺知。爲誰所度。是謂菩薩摩訶薩。修於正法。

應不思議。復次道勝子。若復菩薩摩訶薩。入五道中。教化眾生。以一智慧分別一切無形之法。無所罣礙。普使有形之類。解此正要而得度脫。若彼眾生不自覺知。如我今日爲誰所度。是謂菩薩摩訶薩。修於正法。應不思議。復次道勝子。若復菩薩摩訶薩。入五道中。教化眾生。一念之中。盡能普見一切諸法。分別法界。行不思議。皆使眾生聞此道教。同時成道。無所障礙。然彼眾生不自覺知。爲所從聞。是謂菩薩摩訶薩。修於正法。應不思議。復次道勝子。若復菩薩摩訶薩。入五道中。教化眾生。令彼眾生盡得神通。遊戲十方。

無量世界。聞諸十方諸佛說法。解知諸法如幻如化。然彼眾生不自覺知。如我今日爲誰開悟。是謂菩薩摩訶薩。修於正法。應不思議。復次道勝子。若復菩薩摩訶薩。入五道中教化眾生。使三世中一切有形。成等正覺。皆悉成就。是謂菩薩摩訶薩。修於正法。應不思議。復次道勝子。若復菩薩摩訶薩。入五道中教化眾生。入深法藏。分別妙智。超越過去當來現在。獨步三界。亦無等侶。復令眾生與己無異。是謂菩薩摩訶薩。修於正法。應不思議。是謂道勝子。菩薩立根德力。入五道中教化眾生。諸法殊勝。不可稱量。亦非羅漢。

辟支所知

無我品第四十二

爾時有菩薩名曰心智。前白佛言。世尊。若有菩薩摩訶薩。分別身觀解無我想。云何成就菩薩道觀。爾時世尊告心智菩薩曰。若有菩薩欲得成就菩薩道觀者。當行十法。云何爲十。若有菩薩摩訶薩。未住菩薩位安處無爲。究竟道本成就宏誓。自觀無我復化眾生如已無異。是謂菩薩摩訶薩無我之行。復次心智。若復菩薩摩訶薩。能化無身現有形身。復化有身現無形身。以有我爲無形。以無我爲有形。於中化導一

切眾生。是謂菩薩摩訶薩。具足一切心智之法。復次
心智。若菩薩摩訶薩。欲成如來至眞等正覺。成無生
心。解諸法本不可樂法。是謂菩薩摩訶薩。無我之心。
得成如來至眞等正覺。復次心智。若復菩薩摩訶薩。
已得空心。解我無有。亦無生滅。復以此法教化一切。
知無我想。有此智慧。不自稱揚。於諸深法。最爲第一。
是謂菩薩摩訶薩。爲修第一無我之行。復次心智。若
菩薩摩訶薩。若有善男子。善女人。分別一切諸法之
相。亦不見法。眾相之本。及其一切諸法之本。亦復如
是。眾生起無我想。內外諸法及一切智。是謂菩薩摩

訶薩修無我行。復次菩薩摩訶薩。若復善男子善女人。見劫成敗。見劫不成敗。不以成爲喜。不以敗爲憂。於兩中間不起吾我想。菩薩摩訶薩逮無我法。佛復告心智菩薩。若有善男子善女人。捨一切身入滅盡三昧。分別行本知所從來。出要無爲。至於大道。是謂菩薩摩訶薩無我之行。復次心智。若有善男子善女人。得無我心。分別一切十二因緣。生者不知所以生。滅者不知所以滅。於諸法本悉無我想。是謂菩薩摩訶薩於諸法本無我之行。復次心智。若復菩薩摩訶薩。分別一切諸法之本。亦不見近。亦不見遠。本無所

生亦無所起。是謂菩薩無我之行。復次心智。若有菩薩摩訶薩。於不起法。忍解知心識。悉無所有。於中得成無上至真等正覺。亦不見成。亦不見不成。是謂菩薩摩訶薩無我之行。如是心智。若善男子善女人。欲得具足學無我之行者。必至堅固。終成無上正真之道。復次心智。若有善男子善女人。欲具足一切諸法者。當學無我之法。云何爲無我。所謂無我者。究竟至成此亦無我。分別四大思惟本源。此亦無我。一切諸佛出世教化。此亦無我。不見眾生有所度脫。坐樹王下降伏魔兵。悉無所有。是謂菩薩無我之行。不見三

世總持法本。無所著智亦不在內外。分別思惟悉無所有。是謂菩薩無我之行。佛復告心智。若復善男子善女人。入空定意。究竟如來深法之藏。亦不在此。亦不在彼。解知一切悉無所有。若復善男子善女人。以神足力入定意定。顯曜一切無相法觀。云何爲無相。諸佛世尊所教化度脫一切。不以言教。是謂無相。云何爲無相。一切諸佛於眾生本而自遊戲。是謂無相。坐一樹下。得成無上正眞之道。是謂無相之行。如是心智。若有菩薩摩訶薩。習持此法。逮無我法者。便成無上正眞之道。

菩薩瓔珞經卷第十九

菩薩瓔珞經卷第二十

姚秦沙門竺佛念譯

等乘品第四十三

爾時座中有菩薩名曰淨眼。卽從座起偏露右臂長
跪叉手前白佛言。云何世尊。菩薩摩訶薩。發趣大乘
至無礙慧。爲修何法滅大乘跡。爾時世尊告淨眼菩
薩曰。善哉善哉。族姓子。今發汝問者。皆佛威神之所
致也。諦聽諦聽。善思念之。吾當以偈發遣汝疑。是時
世尊便說頌曰

不以壞敗色 得趣平等道
觀色道不異

乃能乘大乘	思惟色與道	如爾性亦然
不見壞敗道	智者所修行	道性本無壞
尋究不可盡	最應第一義	乘此至無礙
愚者心顛倒	求道陰持入	染著於三界
不離受生分	諸法無受取	上下及中間
不見有散落	此名趣大乘	若見法非法
在二意不動	亦不生二見	發起亦復然
二爲有爲法	亦名無爲法	除二不見二
乃應無上道	超越凡夫地	未至賢聖道
得趣未成就	亦是世福田	能離世八法

猶華不著水 超越百劫行 爾乃趣大乘
在在修正業 處處現神足 度人不見度
心口意密行 不退生死道 心亦無怯弱
執意如金剛 最應無礙慧 虛空無善惡
法界恆清淨 法亦本無法 豈有染汙者
不見捨邪法 而修無上道 復無下劣人
是爲大乘相 諸法本無相 如空不可持
求相本自空 智者當覺知 夫欲行無礙
善權爲第一 充彼眾生願 將導至道場
善友爲正法 牢固不忘捨 永離陰持入

不習調疑蓋	若使佛出世	及以取滅度
正法恆存在	終以不變易	諸法有正證
善惡不朽敗	眞際性亦然	常住不移動
所修極甚深	魔鬼無所著	諸法亦復然
永離邪見黨	欲求無上道	不著修行法
非有想無想	是應無礙慧	佛慧無所著
諸法無所生	無見起滅道	乃應大乘行
或以頭目施	信心無所捨	不見有受者
望想無所著	諸法本無生	尋究無窠窟
法相亦復然	端緒不可見	若人欲究空

欲知其邊崖 晝夜思憶念 唐勞其功夫
愚惑執吾我 計常不能離 墜墮三塗難
不獲究竟處 真人賢聖道 三達無罣礙
猶未盡空源 況復斯等類 人皆計是常
無明不自照 滋長生死苦 何由至解脫
財施無所著 欲求無上道 施道二不俱
何況永究竟 禁戒無我行 安處第一法
亦復無此相 念戒慧度行 不修自然得
智除無明根 戒具清淨道 淨如月無垢
身如泡聚沫 亦如電過目 意想如野馬

戒爲清淨道	最勝無等倫	眾聖天中天
息止一切惡	寂定度無極	犯戒及持戒
定亂無若干	分別諸法界	戒爲無漏道
獲忍度無極	堪受諸苦惱	普慈諸眾生
無有高下相	追憶過去法	生滅不久停
稱譏毀譽法	安能得其便	節節解其形
終不生惡念	分別內外事	身心鏗然住
怨讎欲來害	滅此僞脆身	忍之如地載
不計有好惡	忍辱大宏誓	見對無想念
故使諸眾生	見者莫不欣	欲載大乘舟

慎莫懷怯弱 端身正其心 便獲無生忍
本從無數劫 流轉生死中 爲一眾生故
躬被宏誓鎧 諸法無起滅 復無壞敗想
愚人心顛倒 不解過去慧 法界性常住
學者不究竟 當了知本末 生者無所生
眾生不深達 微妙無礙慧 當求巧方便
除去顛倒心 諸佛興出世 不值度所度
亦復不放捨 精進勇力强 分別一切法
如幻野馬光 求實無果報 如空觀無形
眾生不諦念 自興染著想 漸示至道教

令知無爲處 方便念此義 所願者必得

一一思惟觀 無礙智慧成 念持內外行

處處求空性 無倚無所著 生死本末淨

進學樂空閑 獨處無所畏 思惟禪定慧

善趣六神通 在眾猶如野 一心無錯亂

不失威儀法 是謂微妙定 定法有若干

息意無漏行 增上二解脫 是謂微妙定

徧觀一切法 安處心不移 於一復數一

是謂微妙定 道心遂牢固 滅意心永息

接度純熟人 是謂微妙定 恆憶等正覺

如來法身道 厭患諸色想 是謂微妙定

復修六思念 不違次第行 除念無思想

是謂微妙定 四雙八輩人 從生無爲道

無數非有數 是謂微妙定 智者修四禪

不用識空定 了別內外身 是謂微妙定

十方諸佛等 遙見此眾生 不由眼見色

自然成道教 亦復見此人 在在方說法

不生耳聲想 識滅不復著 眾思想無量

一意而悉知 不興二心見 更生若干念

憶念過去劫 恆沙不可數 前心後亦然

勇猛不懈怠	復遊無量刹	示現神足道
心住身自隨	令知變化法	演說甘露道
不失進趣行	從劫至百劫	不盡無礙慧
逮智度無極	分別陰持入	爲人說妙法
不計有吾我	行權方便度	等分姪怒癡
因緣無垢著	令知清淨道	本我自造行
解脫無所畏	緣等合會成	諸法無處所
自觀亦觀佛	觀空法亦然	生死泥洹徑
智者乃覺悟	善解智慧性	令求慧光明
億載塵闇冥	燿然見大明	此智謂大智

佛智不思議 將導眾生類 成此無上智
夫計一切智 無能過是者 修此眾智具
大乘道果成 餘智雖有號 非有眞實道
此智眾智上 救濟一切難 若欲求智慧
如求虛空性 無心疾於彼 況復生亂想
虛空無量界 無形不可見 此智亦復然
無量無邊岸 假使一切人 乘此智慧舟
遊戲生死岸 直至泥洹海 若人百千劫
欲歎此功德 智慧大炬明 無能盡其底
無盡不可盡 亦無八無閑 能誦無礙慧

天人中最尊	初不墮惡趣	六情常完具
生天及人中	豪貴眾中上	一切眾生類
皆當成道智	受持此正法	未曾懷恐懼
擁護正法本	安處無爲道	當轉正法輪
布現於世間	於億百千劫	終不墮生死
必成等正覺	斯由無礙慧	勇猛人中上
降伏魔官屬	精進智慧強	總持不忘失
如有一人念	普飲江河水	周行遊四域
不能盡其源	智者權方便	思慮內自念
唯飲四海水	爾乃普周徧	欲成無上道

無礙智慧光 受持念誦諷 受前亦不久

雖佛未出世 現相三十二 便爲行佛事

廣濟無量人 令我成正覺 三界第一尊

斯由受持此 無礙大慧藏

當其世尊說此法時。甚深難量不可思議。亦非羅漢
辟支所及。爾時座上十千天人。皆發無上正真道意。
復有三萬七千菩薩。得不起法忍。復有無量比丘。有
漏心得解脫。四十六姪眾生。諸塵垢盡得法眼淨。

三界品第四十四

是時有菩薩名淨施王。前白佛言。世尊如我從佛所

聞正要法甚深。若有菩薩摩訶薩。受菩薩記號。則受六十二見邪徑之道。何以故。六十二見者。皆出生菩薩。出生菩薩道果。道果者。則出生六十二見。所以者何。菩薩道果。不從欲界。不從色界。不從無色界得。不從有爲無爲。有漏無漏得。何以故。菩薩名字。不可得亦無處所。六十二見邪徑名號。亦復如是。本意清淨無形。而不可見。云何世尊。猶如有人。欲得尋究虛空。邊際。稱量。齊限。青黃赤白。復與五陰。施設名字。色痛想行識。是生是滅。是有爲。是無爲。是有漏。是無漏。是有常法。是無常法。是苦。是樂。云何世尊。此士夫於常

法中有慧不乎。佛告淨施王菩薩。虛空無形而不可見。云何立字與作名號。欲於空中求空。此事不然。爾時淨施王菩薩白佛言。如是世尊。菩薩道果及無礙慧。三十七品空無相無願六十二見。悉無所有而不可見。亦如虛空無形不可護持。諸法之相非願求可得。何以故。本無所有故。以超三界。越過三世。若不爾者。佛及菩薩道便生二見。以有二見。便有二想。以有二想。便墮邪部。以墮邪部。便入五趣。已入五趣。流轉生死。誹謗賢聖。道言非道。亦不言有賢聖法律。愚惑之人。自相謂言。佛異道異。生死亦異。生死既異。豈有

泥洹亦復無佛修菩薩道。何況當有成無礙慧乎。此事不然。爾時座上有菩薩名曰究竟。問淨施王曰。云何族姓子。菩薩摩訶薩發趣大乘。辯無礙慧。得成無上至真等正覺。淨施王菩薩曰。若有菩薩從初發意。至成無上等正覺者。習菩薩行。非爲不習。亦不捨正法。而習邪業。亦不見行菩薩道。亦不見不行菩薩道。是謂菩薩摩訶薩。以過行地。習無所習。究竟菩薩復問淨施王曰。云何族姓子。菩薩摩訶薩。以過行地。習無所習。而修無上道。得菩薩號。淨施王報究竟菩薩曰。不受取一切諸法之相。眼耳鼻口身心。以過此界。

故超諸地習無所習。究竟菩薩復問。云何族姓子。以過行地習無所習乎。淨施王菩薩報。究竟菩薩曰。不徧過諸地習菩薩道。何以故。一切諸法出生菩薩道教。究竟菩薩曰。云何族姓子。諸法復有境界乎。何以故。說超過諸地習無所習。淨施王菩薩曰。諸法如如道性亦如。亦不見來時。亦不見去時。是故菩薩摩訶薩。出生道教習無所習。究竟菩薩謂淨施王菩薩曰。族姓子。云何發趣道心。淨施王曰。如道如。究竟菩薩曰。云何如道如。淨施王曰。夫道如者。亦不在過去。當來。今現在。是故菩薩摩訶薩。於三世中不見道性清。

淨如亦清淨。爾乃發無上至眞等正覺。如過去如如
未來如如現在如如。自然性空。亦不見來亦不見去。
趣無所趣。爾能發無上至眞等正覺。習無所習。究竟
菩薩復問。云何發無上至眞等正覺。習無所習。淨施
王菩薩曰。失道徑者。乃能發趣於道。加以大哀令無
恐懼。雖處三界五無間處。不懷其勞。等心周徧。能發
道意。習無所習。究竟菩薩復問。云何族姓子。若如無
目焉。得視瞻。吾今倍生狐疑。唯願開解。今當爲我說
之。除去猶豫。令心得悟。如汝所云。失道徑者。能發趣
於無上道。加以大哀。令無恐懼。於平等法。亦無增減。

是病無能療之。唯族姓子。爲我演說。今心重疑而得
微輕。淨施王菩薩曰。善哉善哉。族姓子。今發汝問者。
皆佛威神之所感也。今文殊師利爲眾上首。因可請
求。令知機變。時究竟菩薩謂文殊師利。向我狐疑。淨
施王言。云何族姓子能解。唯願演說。令無餘難。時文
殊師利報究竟菩薩曰。大哀菩薩。三界無礙。若入深
妙。其法審諦。習無所習。亦無所著。亦無所疑。亦無所
難。亦無所畏。若如是者。已爲得哀。得住本際。而得安
身。無所歸者。得受其歸。雖處三界五無間處。不捐其
勞。等心周徧。能發道意。習無所習。究竟菩薩復問。云

何文殊師利。以何爲本。若如所言。習無所習。諸法所生。可有異乎。可以眼耳鼻舌身意異乎。大哀菩薩平等異乎。文殊師利言。且止。且止。族姓子。其言道者。非有道也。若不念有吾我壽命眾生之類。是者以得大哀等心。周徧能發道意。習無所習。究竟菩薩復問。文殊師利。夫道性如不恃三界。不捨三界。云何得發無上至真等正覺道乎。文殊師利曰。心無所恃。亦不有緣。亦不因。四大地水火風。亦不倚。五陰色痛想行識。亦不於六衰興六塵勞。不念有德。不念無德。不著於俗。不生道心。無罪福念。無慧無愚。不見有餘。不見無。

餘亦不見戒身。定身。慧身。解脫身。解脫知見身。不見纏縛。生死染著。泥洹清淨。不見本無生滅。著斷亦不見有常無常。苦空無我。悉觀諸法寂泊虛空。住如是者。住無所住。已得等哀平等。無二習無所習。得發無上至眞等正覺。雖處三界五無間處。不辭其勞。究竟菩薩聞是法已。倍復踊躍。不能自勝。唯願文殊師利。令我逮此無習之習。獲泥洹第一無礙。復緣此法而得安隱。文殊師利荅曰。族姓子。若住學地。習無所習。然有希望於諸法者。便有所緣。欲得安隱。此則不然。所以者何。若無所緣。則無安隱。豈得從緣得獲泥洹。

其法寂靜無所從來。不緣過去念滅不斷。不想現在有計常心。不慮未來有對無對。是故諸法不住有習亦無所習。不見有念亦無所念。亦不有安亦無所安。亦不貢高無所斷滅。一切諸法無聞無聲亦無音響。不見有餘不見無餘。是則名曰得處安隱而獲泥洹。通達諸法無起滅想。文殊師利復告究竟菩薩曰。若族姓子。若念無念不生於念。中間無異後無災異。設當生念有災異者。是則不安。從本至竟不脫有患亦無患。若當分別不見有災不見無災。是乃名曰通達泥洹永處安隱。無復往還有習無習應第一義。爾時

究竟菩薩言。云何文殊師利。若有士夫作是說言。空有住耶。空無住耶。空有習無習耶。有生無生耶。若言是者。其義云何。文殊師利言。云何族姓子。若空有住。若空無住。若空有倚無倚。有習無習。有生無生。有願無願。有相無相。其念是者。云何得至泥洹。應於無習。時究竟菩薩曰。云何族姓子。空者亦不有住。亦不無住。亦不緣二。亦不緣一。復無中間。離此者。當復云何。得至泥洹。第一無習。文殊師利荅言。若空有住。亦無所住。若空無住。本無所住。有倚無倚。有習無習。有生無生。有願無願。有相無相。本無有相。非不有相。相亦

無相。無相亦無相。一切諸法亦復如是。不見有作。不見無作。非不有作。非不無作。不見有相。無相。不見有異。無異。有求無求。不念我有所作。我無所作。不倚身口。意言善惡行。是乃應於第一無習。所以者何。無生死想。不著有爲。不著無爲。不緣三世根本深固。不言泥洹永寂無爲。是謂族姓子菩薩大士。從初發意。乃至成佛於其中間。不生是者。應於無上無習。不習。時究竟菩薩復問。云何文殊師利。何謂覺欲菩薩有求。無求。有生。死無生死。不念三世有盡無盡。有至不至。有常無常。復於諸法覺禪三昧。有增有減。作如是者。

豈有生死不乎。文殊師利言。云何族姓子。生死何所止處。荅言。處無所處。又問。云何與道合耶。荅曰。生死者則與道合。道者則是生死。究竟菩薩言。云何族姓子。日明闇冥共合不乎。文殊師利言。族姓子。明與闇合。但汝不見。謂爲不合。究竟菩薩又問。云何族姓子。冥止在何所。文殊師利言。不可見者是謂闇冥處無所處。所以者何。若日出時。月亦俱照。豈可復言無益於明乎。共相受入。不可離別。族姓子。且聽。如日出時。冥爲所在。歸東歸西。歸南歸北。四維上下。爲在何所。勿生斯觀。所以者何。闇者常在無所歸趣。明亦如是。

與闇共合。當觀此義。生死與道合。道則是生死。文殊師利復語。究竟菩薩言。近取方喻。智者以此自悟。須彌山者。東黃金色。南水精色。西瑠璃色。北白銀色。其有趣者。色豈有異乎。莫造斯觀。所以者何。色者是一亦無若干。但愚者念。謂爲有異。是故正士。道與生死合。生死與道合。其知此者。一切諸法。亦復如是。何以故。皆悉空故。云何生念。於諸法中。言不合者。此事不然。時究竟菩薩復問文殊師利。未解脫者。復與解脫合乎。對曰。如是。又問云。何族姓子。解脫未解脫。合耶。答曰。未脫者已脫。已脫者不念有脫。不念無脫。無脫

者無性。無性者無生。無生者亦不見來時。亦不見去時。是謂爲道。亦爲泥洹。又問云。何無求無脫而爲大道。文殊師利言。於脫不念有脫。是爲不脫。是爲道。不生二見者。乃應泥洹。究竟菩薩。又問。其道者與泥洹異乎。文殊師利言。不也。族姓子。道一無二。道則是泥洹。泥洹則是道。亦無若干。究竟菩薩復問。頗復有法出於泥洹耶。荅曰。無也。又問。誰處泥洹。言泥洹耶。有法從來。此是俗法。此是道法。此生死法。此泥洹法。文殊師利言。無處所者。則是泥洹。亦無往者。亦無來者。無住無滅。亦無著斷。其知道者。亦復如是。道等泥洹。

亦等。求之不可見。亦無處所。是故道等。泥洹亦等。究竟菩薩。又問。頗有巧便。住無所住。而學道耶。文殊師利報曰。住無所住。異於道耶。欲從此法。而學道乎。究竟菩薩。又問。何者是道。何者非道。文殊師利言。住無所住者。此則爲道。何得從住。而學道乎。此則不然。從有爲法。至無爲法。從淨戒身。三昧身。智慧身。從住學乎。此亦不然。是故當知。不從無住。而學道也。夫學道者。不緣三十七品。空無相願。戒定慧解脫智見品。諸禪三昧身相。眾好。權現適化。布施持戒。忍辱精進。一心智慧解脫。而學於道。此法不然。何以故。道者非學。

亦無有學。不見貢高住無所住。作如是者。乃應於道。不緣三界論慧之相。復不見法成無上道。作此觀者。乃有住處。如道性空。泥洹亦空。是故正士。勿生狐疑。於泥洹道。爾時究竟菩薩。復問文殊師利言。若善男子。善女人。欲求無上至真等正覺。當行何法而得至道。文殊師利報言。族姓子。若善男子。善女人。從初發意。乃至成佛道。於其中間。不失道心。雖處五無間處。亦不復畏。五陰六衰。生老病死。世間苦惱。魔若魔天。無能奈何。若善男子。善女人。欲求道者。亦不見法。有常無常。有爲無爲。有漏無漏。有脫無脫。亦不見法。是

我所非我所。我人壽命。善惡所趣。悉空。悉寂。一切法性。生死泥洹。亦復如是。諸世俗法。及與度世。凡夫佛法。學不學法。聲聞緣覺。普皆一等。而無差別。解空無相。棄捐諸種。無生無行。於此法等。修如此業。隨宜分別。作如是學。乃謂爲道。爾時究竟。菩薩讚文。殊師利言。善哉善哉。如所說者。饒益一切。我自思惟。不敢有疑。於諸法相。何以故。如諸法者。無吾無我。亦無壽命。分別法觀。平等無二。如來至真。解脫無礙。唯佛能察。演布說耳。所以者何。如來以盡諸漏。愛欲聲色。穢患未曾復起。貪欲結網。人尊皆脫。諸生死苦。已斷無餘。

善權方便住無所住處。形教化爲人執勞皆爲眾生。而演經典使趣無爲泥洹大道。所盡已盡無所復盡。所度已度無所復度。施爲佛事曠濟無量。復以聖慧漸度彼岸。獨善無伴亦無儔匹。應正覺律習無所習。心無憤亂專精一意。常懷慚愧如恥不及。內外清淨如水澄靜。聖慧道德如海無厭。定意三昧遊無量界。賢聖默然以自娛樂。眞諦受證終無有疑。今文殊師利。賜有此德難量難測。現不思議總持法門。亦使鄙賤逮此深藏。多所饒益感動一切。爾時文殊師利說此法時有七萬二千立行菩薩住不退轉地。皆逮得

深法之藏。復有無量眾生。皆發無上正真道意。梵釋
四天王。天龍鬼神。皆興供養。散華燒香。加敬微意向
文殊師利。

菩薩瓔珞經卷第二十終

菩薩瓔珞經

功德主名錄

委印文號：104353

一一四、〇〇〇元：「林淑瑛、賴朱罔市、賴俊哲、黃素齡、賴澍鈞、吳宜家、吳冠伶、吳澄岩、

往生者 吳碧霞、往生者 吳博容、往生者 林元全、往生者 林卓玉蘭、往生者 賴文慶、往生者 黃文華、

往生者 黃江梅及吳氏、林氏、賴氏、黃氏歷代祖先暨其冤親債主。」

願以此功德普皆迴向，從初禮拜乃至隨順所有功德，皆悉迴向盡法界、虛空界一切眾生。願令眾生，常得安樂，無諸病苦。欲行惡法，皆悉不成。所修善業，皆速成就。

關閉一切諸惡趣門，開示人天涅槃正路。

以上計新台幣：一一四、〇〇〇元，恭印一、〇〇〇本。

回向：天下和順，日月清明，風雨以時，災厲不起，國豐民安，兵戈無用，

崇德興仁，務修禮讓，國無盜賊，無有冤枉，強不凌弱，各得其所。

祝願法界一切有情，所有六道四生，宿世冤親，現世業債，咸憑法力，悉得解脫。

祝願現生者增福延壽，發菩提心，常隨佛學，勤修精進，利濟群生。

祝願已故者往生淨土，同出苦輪，共登覺岸。

附記：本會接受善信委託，代印經書、佛像，其必要之費用，均經本會審慎評估；若有結餘，均續作本會之印（購）經書及運費，為施主廣積陰德，歡迎十方大德善加利用。

普為出資及讀誦受持
輾轉流通者回向偈曰

願以此功德

消除宿現業

增長諸福慧

圓成勝善根

所有刀兵劫

及與饑饉等

悉皆盡滅除

人各習禮讓

讀誦受持人

輾轉流通者

現眷咸安樂

先亡獲超昇

風雨常調順

人民悉康寧

法界諸含識

同證無上道

佛曆二五五九年／西元二〇一五年八月

恭印：一〇〇〇本

流水號：13465
書號：CH374-04

菩薩瓔珞經

發行人：簡豐文

出版者：財團法人佛陀教育基金會

地址：100 台北市杭州南路一段五十五號十一樓

網址：<http://www.budaedu.org>

E-mail：budaedu@budaedu.org

電話：(011) 3395-1198

傳真：(011) 3391-1345

劃撥戶名：財團法人佛陀教育基金會

郵局劃撥帳號：〇七六九九七七九

銀行名稱：台灣銀行城中分行（請於電匯或轉帳後告知本會用途）

銀行帳號：〇四五〇〇四五九七五〇三

本會經書免費結緣之請取方式如下：

(一) 親臨本會二樓講堂。(二) 利用傳真：(02) 23965959

(三) 撥打電話：(02) 23961198 分機：11、12

(四) 網址：<http://www.budaedu.org/books/>。(五) 寫信指定：本會法寶流通股。

為提高服務效率，請您嚴謹考量，慎選所需經書；儘量少用電話，多利用文字方式請取，並請詳寫經書名稱、冊數及收件人姓名、地址、電話、郵遞區號，以減少本會之處理時間；若大量申請，請註明用途，且避免姓名、地址等文字上書寫之錯誤。

◎ 本會經書，歡迎翻印（請勿增刪），贈送流通，功德無量。

◎ 本會交通——

※ 捷運：善導寺站5號出口，至杭州南路右轉，過兩個紅綠燈。

※ 公車站牌：審計部站→212、299、232、205、276、605、257、262

台北商業技術學院→253、297、237 仁愛路二段→253、297 開南商工→208

仁愛路、杭州南路(紹興街)口→630、270、263、245、621、651、37、261

行政院新聞局出版事業登記證局版臺業字第三八八九號



